

DIIDXA' LÁ NIRU DO'

Diidxa' ni riree chu de xti' diidxa' I

Ca guenda ni rudii gu'chi' ro' bia' ri' binni

Ndaaga 1. Lu ca guidxi ro' dxaaga guidubi zaguita (Mexico) guirá' ca binni zaapa guirá' ca guenda rudii gu'chi' ro' bia' di', laaca qui zanda guiaana dxi de gaca ni na diidxa' di' pa cadi laaca laani guini' ni pa za o pa co'.

Guiruti' zaanda gutoo binni ndaani' ca guidxi ro' dxaaga guidubi zaguita (Mexico). Ca binni de xti' guidxi ni ucu yaaga xquidxi la?, casi pe quixhe ñe ca' lu layu xtiinú maca bilaa ca' ne zapa ca' guirá' guenda rudii ca diidxa' ro' bia' di'.

Guiruti zaanda gudxii deche tuuxa ti si binni huala'dxi' la, pa zaa de gadxe guidxi, ne ca pa naca gunaa naca nguiiu, pa nagoola, pa nahuiini', pa napa xiixa, pa risaaca pa co', pa nazaaca, pa huara, runi xiudu', runi xtiidxa' runi ntiica racaladxi' guni' pa ma bichaaga naa o pa co' pa caa guni naa ca' xquenda ca binni ni cayaapa lu gu'chi' ro' bia' di'.

Ndaaga 2. Guidibi naca zaguita (Mexico) tobi lucha si laa, ne qui zaanda guilaa.

Guidubi naca zaguita (Mexico) nabeza xtale binni gadxé, gadxé xquendabiani', ti ndaani'' ca xquidxi ca binni huala'dxi' nga biale ca diidxa' ri', dxi bizulu' ca dxu'' bixhatañe xquidxi ca be. ne laaca laacabe ribii cabe tu gaca xa ique xquidxi be, ne gapa cabe bidxiichi, guenda xti' cabe, ne ti lade lade zanda gapacabe ca guenda ri'.

Xquenda biaani ca binni huala'dxi', ngape riguixhe tu la nga zaanda icaa ca diidxa' ro' bia' ri'.

Naca ca' ca guidxi huiini da'gulisaa ti guidxi ro', xti' ca binni huala'dxi', guirá' ca ni napa ni tobisi guenda lu guenganabaani xti' cabe, lu guenda nabaani xtica' be, xpidxiichi cabe, lu guendaruni dxiña' xtica' be ne xpiaca' ni nabeza lu ti layu ne ruzuuba ca' xtiidxa' xa ique xti' ca', casi pe na lu xquenda ne xpia' ca'.

Ca guidxi huladxi' zanda guni' ca bia' ni naa si ca' diidxa' ro' bia' ni ca lu gu'chi' bia' ri', ne zaanda gunica' ne gutaagulisaa guidxi ro' dxaaga zaguita (Mexico). Guirá' guenda gapa ca guidxi ro' ne guidxi huiini' zacaca' lu ca

diidxa' ro' bia' di' casi ca lu ca diidxa' dxaaga rari', ne zaqueca naquiiñe' guniabilia' ca' ca diidxa' xti' binni huala'dxi'.

A. Gui'chi' ra ca ca diidxa ro' rí riguixhe xapiaani' ne rudii ni naquiiñe' ca guidxi huiini ne guidxi huala'dxi' ti guni ca' ni naca', ne zaqueca, guiapa xpiaca' ti ganda:

I. Quixhe xi zaca zanda guibani ca', ne xquenda lisaa ca', xhiña ca', sica ribi xa ique xti' ca' ne xquenda biaani ca'.

II. Gúnica casi ná ca diidxa' gula'quica' xquidxica' ti ganda quixhedxisica lu guenda ridinde ndaani' xquidxi ca', huaxa naquiiñe' chinandaca' ni ná ca diidxa' ro' bia' ca lu gui'chi' ro' rí, ne guiaapa' chaahu' guirá' ca guenda nexhe' xti' tutiisi binni, ca guenda napa guirá xixé binni ne jma rusi naquiiñe, guiiapa' guidubi naca guenda xti' ca' gunaa. Ca diidxa' ro' bia' rí zaguixhe ca' xi guirá' zanda gaca' ti ca xa ique diidxabia' ne ca binni ruguu binni ndaani' liidxidxiguiiba' ganda guiquiiñe' ca' ca diidxa' rí.

III. Cuica' tu gaca xa ique xti' xquidxi ca', xisi la, naquiiñe' guisaca xtiidxa' ca gunaa biaca' risaca xtiidxa' ca nguiu, zaqueca naquiiñe' guiaapa' ca diidxa' ni ma' gudixhe ca xa ique guidxi ro' dagulisaa zaguaita(Mexicu), ne ca diidxa' ro' bia' ma gudixhe ca diidxa' ro' bia'.

IV. Guiaapa' ca diidxa' huala'dxi' xti' ca' ne guidale ca guenda ni napa xquenda biaani ca'.

V. Guiapa ca' ne guidale guenda nabaani xtica', ndaani' gudxi layú ra nebeeza ca' casi ca lu gui'chi' ro rí.

VI. Ganda chu' ca' tobisi, ne guzuuba ca' ca diidxa' ni ca lu gui'chi' xti' ca xpixuna layú, ne ca diidxa ca' lu gui'chi' bia' rí ne guirá' gui'chi' riree lu xtiidxa' ni, ne zaqueca naquiiñe' guzuuba ca' xtiidxa' ca binni guidxi huala'dxi' ni nabeeza ndaani' gudxi huiini ca, ne gadxe binni ni nabeeza ndaani' gudxi ca, ni maca naca xpixuaana layú ca. Zanda guicaaca' ne iquiiñe ca' guirá' ni rudii guidxi layú, ra nabeeza ca' casi ca lú gui'chi' bia' rí ti gaanda gaaca ni ca lu gui'chi' bia' rí, ne ganda guidagulisaa ca'.

VII. Zanda cui ca', binni huala'dxi' tu la zanda gaca xa ique xquidxi ca'.

Ca diidxa' ro' bia' liibi lisaa xti' ca guidxi ro' dxaaga zaguaita (Mexicu) nga

quixhe'ne gusiene ca diidxa' xtí' ca xa ique xtí' guidxí', ti ganda gapa ca' xtipa' ne cuica' xa ique xtí' ca, casi na xquenda biaani ca'.

VIII. Ganda chu' ca' lu guirá'a xixe dxiiña' ne xtiidxa' guidxi ro' zaguita (Mexico). Para ganda gapaca' ca guenda ri la?, naquiiñe chu' ca' lu guirá' xixe lu ca guenda ridinde xtí' diidxa' ro' bia', pa xtale ca' o pa xtubi tobi si, ne naquiiñe pe chinanda ca' ca xquenda ne xpia, ne xtiidxa' ca binni huala'dxi', ti ganda gaca ni na gu'chí' bia' rí'.

Ca binni hualadaxí' la, zanda gapa ca' tuuxa ni gutiixhi xtiidxa' ca' ne xtoobi ni guzuhua lu xtiidxa' ca', ca binni di la, naquiiñe pe' gana ca' modo nabaani ca binni huala'dxi' ti ganda guni ca' xhiiña ca' jneza.

Ca diidxa' ro' bia' liibilisaa ne ca guidxi ro' xtí' zaguita (Mexico) laasi ca' nga zanda quiixhe ca' xi dxiiña' racaladxi ca' binni huala'dxi' guni, ti ganda gaca ca binni huala'dxi' tuuxa ne gaca ne ca ca' xa ique guidxi huiini huala'dxi'.

B. Xa ique ro' guidxi zaguita (Mexico), ne ca guidxi ro' xtí', ne ca xa ique guidxi huiini, zuyuubi ca' guisaaca xhiiña' binni huala'dxi' bia' ca risaca xhiiña' tutiisi binni ne cadí' cuee chuu cabe laaca', ne zuyuubi ca' ti yoo ra guisaaca ne ganda guiapa' ca guenda xtí' ca' binni huala'dxi' ne zaca guirooba ca xquidxi ca' ne dxiiña gaca ne laaca'.

Ti ganda guirá'a guenda nana' ne guiluxe guirá' ni cayaadxa' gaca' lu ca guidxi huala'dxi', ca xa ique guidxi napa ca' xi guni ca' ca ndí':

I. Zuni ca' dxiiña' ti guiroba' ca guidxi ra nabeza ca binni huala'dxi' ti ganda guidale dxiiña' ndaani' xquidxi ca' ne chu' guenda nazaaca lu guenda nabaani xtí' ca', lu ca dxiiña' rí' zadaagu lisaa guirá' ca xa ique guidxi, ne zaqueca naquiiñe' guidxiña ca binni guidxi. Ca xa ique guidxi nga quiixhe' pa bia nga bidxiichi guni ne ca guidxi huiini xtí' dxiiña'.

II. Gudiica' ne gutale ca' ca yo ora riziidi binni ne guireeca', guyuubica' guiziidí' binni ra guidxaaga diidxa', guenda huala'dxi'ne diidxa' xtia, guiziidí' binni huanisi gu'nda' ne gucaa lu gu'chí', ne guiluxe ca' bia' naquiiñe' guziidi ca' neca qui guireeca ca', guziidica', guiziidi ca' guini ca' dxiiña' ne guire caaca' lu guenda riunda'. Guidxela bidxiichi gata' lu na' ca binni huala'dxi' cayunda gu'chí' bia' tiisi gacaladxi ca' guiziidí' ca'. Gaca ti gu'chí' ra ica ni guiziidí' binni huala'dxi' ni gului ca xquenda ca xquidxi ca' ne ra gaca gu'chí' ri la napa cabe xi guinabadiidxa' cabe ca

binni huala'dxi' xi modo gaca ca' dxiiña' rí, ne guni bia' binni guirá'a ca guenda huala'dxi' nuu ndaani' guidubi guidxi zaguita (Mexico).

III. Guihuini ra chu' ra che' binni guianda ne guidale ra che' ca binni huara, lu gudubi guidxi zaguita ne laca naquiiñe guidopalu guirá' sica rusianda ca binni huala'dxi' saqueca guizaa ni goo guirá' binni huala'dxi' jma ru si naquiiñe guizaa ni goo ca xcuidi.

IV. Guihuini chu' guenda nazaaca lu guidxi huala'dxi' ne zaqueca ra nabeza ca' ne ra quite ca'. Lu ca dxiiña' ne lu bidxidxichi rudii ca xa ique guidxi ti ganda cui ne gaca chahui yoo ra nabeza binni ne zaqueca guidale ca xhiiña' ca xa ique guidxi, ra raca ne ca binni ni dxandi pe caquiiñe ni.

V. Guidxela ganda chu' ca' guna' huala'dxi' lu dxiiña' guindisa guidxi, lu dxiiña' gacaladxi ca guni ca', ne lu guenda rusianda, ne lu guenda racane ti guiree ca ca' ne guisaaca xtiidxa ca' lu guenda nabaani xti' xquidxi ca'.

VI. Guixele' jma neza ro' ni ganda guchiiñalisaa ca binni gadxé gadxé guidxi, ne guidale ca neza ruchiiña ne ruchaga xtiidxa' binni.

VII. Gaca ne ca' chu' dxiiña' ni gutale guenda nazaaca lu xquenda nabaani ca binni huala'dxi' ne guidxela ra ganda gapa ca' bidxichi, ne ca xa ique guidxi ne tutiisi binni gacaladxi gudii dxiiña' lacabe ti gapa cabe ti ndaa bidxiichi, guidxela xi dxiiña' zanda gunicabe, dxiiña' ni cue ndu' cabe ni ganda gutoo cabe ndaani' yoo guiaa.

VIII. Ca xa ique guidxi guyubi ca gaca ne ca', ca binni huala'dxi' ni rie riguni dxiiña' gadxe guidxi, casi ca lu ca layu xti' zaguita (mexicu), zaqueca lu ca guidxi zitu, ne naquiiñe gaca xiixa ti ganda guiaxa ca binni ni cayuni dxiiña' ca' jneza, ne gaca ti dxiiña' jma jneza ra guiapa guenda nazaca xti' ca gunaa, chu' ti dxiiña' ni gacane lu guenda roo xti' ca xcuidihuiini ne ca' ni ma huanisihuiini ne badudxapahuiini' xiiñ' ca binni ni rie riguni dxiiña' guidxi zitu; ne guiapa' dxichi' ca xquenda xhiiñi ca' ne guihuini xquenda ca' ne xpia ca'.

IX. Chu' xtiidxa' ca binni huala'dxi' lu ca dxiiña' ni chiguni xa ique ro' zaguita (mexicu), ne xtiidxa' ca xa ique guidxi huiini, ne xtiidxa ca' xa ique guidxi ro', paque nacabe gunicabe ni la?, neca uca diaga si cabe xtiidxa ca'.

Ti ganda gaca guirá' ca diidxa' ro' bia' ma' ca lu gu'chi' ri la?, yoo ro' ra dxaaga ca binni zuhua lu xtiidxa' guirá' ca guidxi dagulisaa zaguita (mexicu),

ca binni zuhua lu xtiidxa' guidxi ndaani' ca guidxi ro' dxaaga , ne ca xa ique guidxi, bia' ra nexhe ni gúnica', zaguixhe ca' pabia' bidxiichi iquiiñe' ca binni huala'dxi', ti ganda gaca guirá' dxiña' ni ca ra rí'.

Ti cadí gacaná ca guenda nexhé rarí' ni nexhé gaca ne ca binni huala'dxi' ndaani'' xquidxi ca', guirá' guidxi gapa ca' ni napa binni huala'dxi', gapa ca' tobi si guenda ni ca lu ca diidxa' ro' bia' rí'.

Ndaaga 3. Guirá' binni napa xide guiziidí' gunda ne gucaa lu gu'chí'. Xa ique guidxi ro' zaguita (mexicu), ne guirá'a guidxi liibilisaa xti', ne ca guidxi huiini xti', naquiiñepe' gusiidi ca', ca guna ne nguiuu, ne guiluxe ca' bia' naquiiñe' guziidi ca' neca qui guireeca ca'. Ca guenda riziidí' ri la? Napa xide guziidí' guirá'a xixe xcudi ne ni huniisi ca ni.

Ca guenda rusiidí' ni napa guidxi ro', zaguita la?, napa xi guiziidí' binni ca ni jneza ne nayaa guie, ne lu ca guenda rusiidí' ri la, napa xi guisiidí' binni ganaxhii xquidxi ne guidaagulisaa ca binni de xti' guidxi, ne cadí chu' dinde ne ca xti' guidxi tiisi cadí nuu xiixa jneza.

I. Ca guenda riapa' ni riete lu ti ndaa gu'chí' bia' rí' 24 ni naa de que ca binni ni rinanda intiisi yuudu' la?, zaa chinanda ca ne guriti zabee ni laaca', huaxa ne ca guenda riziidí' xti' ca yu'du' ri la?, guirutu zaanda gusiidí' ni ndaani' yoo ra riziidí' ca xcuidi gu'chí'.

II. Ca guenda rini' ni gusiene ca guenda rusiidí' binni ucaa ne gur'da' gu'chí' la?, napa xi chinanda ni lu ca guenda ni nanna jma , ti zaaca jma zaziidí' binni guchaa, ne ziu xpiaani ne guirutu' zaguite laa.

Ne jmaru si:

a) Zanda guini' guirá'a ni raca laadxí', ne guenda rini' ni raca la'dxi ca la?, que zaaca di ni casi na ti xa ique diidxa' bia' ne que zaca di ni casi na ti politicu, huaxa zaca ni ti guidxi naya, ne zacane ni gapa binni bidxiichi, ne zabeeza ca jma nayeeche';

b) Zaca ni ti guidxi ro' naya sin chu' tu siñe laa, ne que chu' tu gutaguná' ca xti', ne zucaa diaga ca guenda naxoo ni napa binni xquidxi, ne iquiiñe cani cue ndu layu xtica' ne cadí chu' dinde ca', ne zaqueca guiapa' xpidxichi ca', ne zaca guiasa ne guirooba' ne guidale ca xquenda ne xpia ca xpini ca';

c) Zaca ne ni lu xquenda nabaani binni, ti zaaca gusirooba ni lu guenda

riziidi xtí' binni, ne ca ni nabeeza ndani guidxi ro' zaguita (mexicu) la?, zanaxhii saaca', ne zaca ca gunaa ne nguiuu zadagulisaa ca la?, ne guisaaca xtiidxa' ca biaca biaca.

III. Ti ganda gaca ni na lu guiropa ndaaga de lu ti ndaa II xtí' gu'chí' bia' rí' la?, xa ique ro' guidxi zaguita(mexicu), nga quixhe modo zanda gaca gu'chí' ni chi gusiene ca' gunaa ne nguiuu ni chi guiziidí' guca ne guiluxe ca' bia' naquiiñe' guiziidi ca' neca qui guireeca ca', ca dxiiña' ri la zaca ni guidubi naca ndaaní' guidxi zaguita (mexicu). Ne huaxa ra gaca ca dxiiña' ri la?, xa ique ro' guidxi zaguita(mexicu) naquiiñepe gu'yabe xtiidxa' ca xa ique guidxi huiini ni liibilisaa zaguita ne xtiidxa' ca binni ni racane chu' jma guenda riziidí' ne guenda rucaa, casi pe na luu gu'chí' bia' rí'.

IV. Guirá' guenda rusiidí' binni ucaa ne gun'da la? Que ziaxa dí' nin ti de gaayu'.

V. Ne jma ru' si ra gaca ca dxiiña' ni gusiidí' binni ucaa ne gun'da bia tiisi neca cadí' guireeca ca', ni caa lu guiropa ndaa xtí' gu'chí' bia' rí' la?, guidxi ro' zaguita (mexicu) zuluini tutiisi binni xinga guenda rundaa ne guenda rucaa, ne zuyuubi ni ca dxiiña' ni jma sicarú' ni guiziidi ca xpini, ne zacane ni lu ca guenda ni jma nanna ti guiziidí' binni jma ne laaca zaca ne guiasa ne guirooba ca guenda ne xpia ca xpinni.

VI. Ca binni ni rusiidí' binni ucaa ne gun'da, ni cadí' runi xiiña' xa ique guidxi la?, zaanda guisiidí' ca' ca xcuidi ca modo riale laadxí' ca'. Huaxa cadí' guiree cue cabe de lu ni na lu gu'chí' bia' rí', guidxi ro' zaguita (mexicu) la?, zanda gudii ti gu'chí' ca binni ni gunduuxe ne pa que gunica' jneza la?, laaca laani gaxha ni gu'chí' que laa. Ca binni ni rusiidí' binni ucaa ne gun'da' ni cadí' runi xiiña' xaique guidxi la? napa xi gunica' ca ndí':

a) Gucheche naca' ca guenda rusiidí' gu'chí' ne chi nanda ca' casi pe na lu guiropa' ndaa ne xtí' ndaa II (ra guiropa nda), xtí' gu'chí' bia' rí', ne ni casi na ni ca lu xtí' ndaa ra III (guion anda), ne.

b) Niru doo naquiiñe gapa cabe ti gu'chí' ni gului na de que zanda gusiidi cabe gu'chí' casi pe na lu gu'chí' bia'.

VII. Ca yoo ro' ne xcaadxi ra riziidí' binni ganna jma, ca ni rudii gu'chí' bia' di la guni dxiiña' xtubi zanda guni ca ni jneza laasi ca', zanda gusiidi ca' ne guyuubi ca' ne gucheeche ca' ca xpia binni huala'dxi' casi naa ca diidxa' ni ca rarí' ne diidxa' ro' bia' ri zana ni guni ca yoo ro' ra riziidí'

binni ganna jma rí' dxiiña' casi raca laadxi ca' ne casi raca ladxi ca cu' bia' ca' xquenda biaani binni, ne chu ca' tobi si ra guni ca xiiña' yoo ro' ni chi gusiidí' ca', laca laca quixhe ca' pa' bia' guiaxa, ne gu'cheche' ca xtiidxa ca' pa dxi nga ma uzulu ca' gusiidica' ne pa bia nga dxi nga zanda guni ca xpi ca' dxiiña', ne zapa ca' xpidxichí' ca'. Xiiña' ca binni ni rusiidí' ne xiiña ca binni ni runi dxiiña' ni runi dxiiña' xti' yoo ro' ra riziidí' binni la?, napa xi chi nandaca' lu ti nda gu'chí' bia' rí' ra ca ndi A ne ti ndaaga 123 xti' gu'chí' bia' rí' ne casi na lu gu'chí' bia' ni rapa xiiña' binni casi ñaca ti dxiiña' nayaa ne jneza, ne guirutí' ucueza laa casi racaladxi' guni ne casi raca ladxi ca' gusiidi ca' ne casi racaladxi ca' ca yoo ro' ra riziidi binni uca' ne gun'nda casi na lu ti ndaa gu'chí' bia' rí'.

VIII. Ca' xa ique ro' ni ruzuhua lu xtiidxa' binni zuyuubica gutagu'lisaca' xtiidxa' ca' ti guihuini pa bia nga gusiidí' ca ca' binni uca' ne gun'nda gu'chí' guidubi naca ndaaní' zaguíta(mexicu), ne zabeca bia' tiisi diidxa' ro' bia' ni iquiiñe ti ganda guireche na ca dxiiña' rí' ndaaní' guidxi ro' zaguíta(mexicu) ne ca guidxi ro' xti' ne ca guidxi huiini xti', ti guihuini pa bia nga quixhe ca binni ni runi xiiña' ca ni ra guchecha' ne ca ni ne ca ni guche ne ni.

Ndaaga 4. Casi na gu'chí' bia' ri la?, biaca risaca nguiiu ne guna'. Ne laca laani nga gusurooba ni, ne gutagulisaa ni xquenda biaani binni ti guibani ca jneza.

Guirá' binni nga quixhe panda' baadu' gapa, ne casi raca ladxi gutale ca xiiñí'.

Guirá' binni napa xi guiapa guenda nazaaca xti'. Ca diidxa' ro nga quixhe casi racaladxi gaca ca dxiiña' ni rapa ca binni huara' ne la nga quixhe pa bia binni zanda guiu ndaaní' ca yoo xti' guidxi ro' ne xti' ca guidxi huiini casi na lu ti ndaa gu'chí' VXI ne lu xti' ndaaga xti' 73 xti' gu'chí' bia' rí'.

Guirá' binni napa xi guibaani ndaaní' ti guidxi nayaa ne sicaru, ra guibani jneza.

Guirá' lisaa napa xi gapa ti lidxi huiini pipi do'. Diidxa' ro' bia' nga quixhe pa bia' ti' nga caquiiñe ti gaca ni na ni.

Guirá' xcuidi napa xi guizaa chahuí' ni goo ca', ne chu' ca' nazaca', ne guziidi ca gun'nda ca' ne uca ca' ne laca guziidí' ca' de guirá' lu'.

Ca lisaa, ne ca ni cusuniisi ne ca ni cayapa ca xcuidi, napa xi guya que chi gana ca guenda ni rapa ca xcuidi. Ca guidxi ro' xti' zaguita nga quixhe ni caquiñe ti guinisicabe jneza. Ne iquiñe ni laacabe.

Zudii guidxi ro' guirá' ni zanda gacane binni, ti ganda gaca ne ca' guiapa' ca guenda xti' ca xcadcuidi.

Guirá' xixe binni napa xi chu' lu ca guenda ne ca xpia ca xpinni ne lu guirá'a xiixe ca dxiiña' ni rudii guidxi ro' ri', casi na ca diidxa' ni cayeté ra ri', zaqueca lu ca dxiiña' ni bisaana nee ca binni guenda laacabe. Guidxi ro' nga gucheeche diidxa' xti' ca guenda ni napa binni huala'dxi ti zaca ganda guirooba ca' lu guibinca xiiña' ca' ne xtiidxa' ca' ne guiriti' guxiidxi laaca'. Diidxa' ro' bia' nga quixhe ca neeza ti ganda chu' ca binni d' lu ca xquenda ne xpia' ca binni huala'dxi'.

Ndaaga 5. Nin ti binni que zanda ucueza cabe la, lu intiisi dxiiña' ni racaladxi guni o dxiiña' ni gului ladxi guni ne cadí guchene diidxaz ro'. Ca dxiiña' di zanda guianadxi ca ni ra guiree xiixa diidxa' ro' bia' nacubi, ra guchee necabe xtobi o pur xtiidxa' xa ique ro' xti' guidxi casi na lu ca xtiidxa', diidxa' ro' bia' ne ra guninacabe xquenda ca binni guidxi. Guiruti' zanda guíaxa ni ribee ndu' xiiña' pa cadí ne xtiidxa' ti xa ique bia'.

Diidxa' ro nga zanda quixhe ndaani' ca guidxi ni liibi lisaa zaguita (mexicu), xi dxiiña' nga caquiñe gu'chi' ti ganda gaca ne tu zanda guni ni, xinga naquiñe' guni cabe ti ganda gapa cabe ni, ne tu nga xa ique zanda gudii ni.

Guiruti' zanda uca' cabe laa guni xiiña xtobi ne que guíaxa jneza, ca xa ique ro' si nga zanda uca' ca' tuuxa guni dxiiña' pa bichee neca diidxa' ro' bia', ca dxiiña' ri la napa xi chinanda ni ni lu ndaa xti' guichi ro' ri' I y II xti' ndaaga 123.

Ca dxiiña' ni guinaaba si ne uca guidxi laacabe nga que ziixa di, casi na diidxa' ro' bia', casica' ca guiiba' ni riquiñe' ca dxu'', ne ca ni ruzuuba' cabe xtiidxa' ne zaqueca xiiña' ca binni ni runine xa ique guidxi dxiiña', ne zaqueca ca binni ni ribiicabe ne ni que ribii cabe para gapa ti guenda ndaani' yoo lahui'. Ca dxiiña' ni runi binni ra rie rinaaba diidxa' ne chitopa' panda miati' nabeeza ndaani' ti yoo, ne ca binni ni chi ti rua mexa ra chi guzee cabe lu gu'chi' laaca que ziixa di ca', huaxa ca binni ni guni ca dxiiña' ri' jneza la?, zanda guíaxa ca' casi na lu gu'chi' bia' ri' ne casi na lu xtiidxa' diidxa' ro' bia'. Ca dxiiña' ni rudii ca binni ni biziidi' napa cabe xi gudii cabe ni ne guíaxa cabe ca si na lu diidxa' ro' bia' ri'.

Guidxi ro' que zudii xtiidxa' di ra gaca ti gu'chi' o xiixa ni guchugu' lu ti guenda xti' binni ra guni ni gacaladxi pur xiixa si.

Laaca que zanda di' guni ni ti gu'chi' ra gacaladxi ni guiladxini tuuxa o uca' cabe binni que guni ti guichi ra gudii xtiidxa' pur chupa chonna gubidxa o guiana ca' tobi si tiru de guni xiiña' o gutoo ni raca laadxi.

Gu'chi' ni raca ra chi gaca ti dxiiña' zanda ucani ni lii gunu dxiiña' bia dxi si biidii lu xtiidxa' lu ne xtiidxa' diidxa' ro' bia', que zanda di tiidi ni jma que ti iza pa cayuni naani tuuxa ni runi dxiiña' ne que zanda di tidi ni jma iza ne guchugu' cabe binni ra cayuni xiiña'.

Pa' ni cayuuni dxiiña' ca' que guni casi naa gu'chi' ni bizeebe lu ca la?, zuca ni laabe guni be dxiiña' ni ma guni be zuni be, ne pa que guni be ni la?, guiruti zanda gusegu' yoo laabe ndani lidxi guiba'.

Ndaaga 6. Ca guenda rini' ni racalaadxi' que zanda di gutayoo cabe laa pur ngasi, huaxa pa guini be o guzeete be xiixa de tutiisi binni, pa guni be xiixa guenda naxoo, o pa guni be xiixa ndaani' neea xti' tutiisi binni; pa guninu xiixa la?, napu xi chinada un casi na lu diidxa' ro' bia'. Pa raca ladxi nu gannanu xiixa la?, xa ique quidxi ro' nga gabi laanu xi cayaca.

Pa raca ladxi nu ganna nu xi cayaca ndaani' xquidxi nu la?, guidxi ro' ne ca guidxi liibi lisaa napa ca' xi gabi ca laanu xinga cayaca ndaani' xquidxi ca' casi na ni seeda lu gu'chi' ri':

I. Guirá'a xixe diidxa' ni ucaa tutiisi' xa ique, guca be xa ique huiini o xa ique ro' la?, napa xide gana guidxi ni ne zanda gapa cabe ni chupa, chonna gubidxa pa zaca raca laadxi guidxi casi naa lu diidxa' ro' bia'. Ca guenda rusiene ca diidxa' ri la?, napa xi de gului cabe ni binni casi pe na ca diidxa' ri'.

II. Ca gu'chi' ra ca laa binni ne ca xcaadxi diidxa' ni gului xquenda nabaani xtobi siapa ca ni casi na lu diidxa' ro' bia' ne laani nga zanda gului ni bia' ra ganda ti'.

III. Tutiisi binni, zanda guinaba diidxa' pur ca xquiich' sin guini' xi chi guni ne ni.

IV. Napa xide chu' ti xiixa ni gusiene binni para guiu guinaba diidxa' xi ziyuubi ne gabi cabe ni la nagueenda. Ca xiixa di la zaca ni xtale ndaa ti ganda gusuiene ca ni binni jneza sin chu' tu cu'rua lu ni guni ne guini'.

V. Guirá' binni napa xide gapa ca' ca xquiichi ca' ne guni ca ni nacubi ne sin usiadxa ca gaxti' de ni raca laadxi ca guni ca', ne ca dxiiña' ni raca ne binni, ne ucaa ni lu guiiba' rica nacubi ni nuu yanna ti ganda iquiiñe binni ca ni.

VI. Diidxa' ro' bia' nga quiixhe pa bia' ti nga bidxichi' zanda icaa binni ne gabi ca' guidxi pa bia nga bidxichi cudii ca' binni.

VII. Ne pa qui gusiene cabe laanu jneza de ca ni caquiiñe nu ganna nu la?, zusaba naa diidxa' ro' bia' ca laaca be.

Ndaaga 7. Guiruti' cuchee pa ucaa xiixa diidxa' ni racaladxi ucaa.

Nin ti diidxa' ro' bia' ne nin ti xa ique ro' que zanda dī guinaaba bidxichi ne guchugú' lu ca guenda ruca' xti' binni, yanna tiisi' cacaaca' ti guenda ruca la?, que zanda dī guini' ca' o ucaaca' lu xquenda nabaani xti' binni. Que zanda dī utagunacabe ra yoo ra rica' lu gu'chi' casi ti donda'.

Ca diidxa' ro' bia' nga quixhe bia' tiisi diidxa' ganda ica' ti gaca ne cueza dxi de guidagu naa ca yoo ra rica' lu gu'chi', ne que zanda dī guidagu yoo guirá' binni ni cayuni dxiiña' ndaani'' ni. Pa guihuini pa napa cabe donda' nga zadaguyoo cabe.

Ndaaga 8. Guiira ca xa ique ro' ne ca binni ni runi dxiiña' guidxi, napa ca' xi diaga ca' xtiidxa' binni canaaba laaca ne pa xi canaaba cabe la?, napa xi uca ni lu gu'chi' ne sin chu' dinde ca; Pa xa gaca cabe politicu la?, que zanda di gapa cabe ca guenda dī.

Guirá' ni racaladxi ti binni guini' o guinaaba' naquiiñe uca' ni lu gu'chi' ne guseenda ni ra nuu xa ique guidxi ne chu' ca' tobi si, ti xa ique ca uca' lu xti' gu'chi' la?, ne gudxigueta ni lu naa ni canaaba' ni que nagueenda.

Ndaaga 9. Que zanda di guindaacabe lu guenda riegú' lisaa xti' binni pa que cayuni gastí; Ca ni zanda si guni ni la?, nga ca binni guidxi xti' guidxi ro', ti ganda chu' ca lu xiiña' ne xtiidxa' ca politicu xti' guidxi ro'. Nin caadxi o xtale binni guinaaze guiiba' zanda guiegu lisaa ne guni ti yaya' ndaani' guidxi.

Guiruti' zanda guchia ne guini' cadī jneza ni cayuni cadxi binni ra canaba ca xiixa o ra guchiña ca' xtiidxa' ca ra nuu ti xa ique pa cadī cayuni jneza, pa cadī cagu' di cabe o culaacabe diidxa' ne guchibi cabe laa guni ni nacabe.

Ndaaga 10. Guirá' binni ni nabeenza ndaaní' guidxi zaguita (mexicu) la?, zanda gapa ti guiiba' ndaaní' liidxi ti ganda gudxilul ni chi chu' ra liidxi, ni que zanda gapa cabe nga ca guiiba ni riza ne ca dxu'. Diidxa' ro' bia' nga zanda quixhe paraa ne xi guí'chi' nga zanda iquiiñe binni ti ganda gapa ca guiiba' ri'.

Ndaaga 11. Tutiica binni zanda guiu ne guiree ndaaní' guidxi xti' zaguita (mexicu) ne chi zaa ne chindeeza ra racalaadxi' ne que gapa xide gului ti guí'chi'. Lu na si ca xa ique ni ruzuhua' lu xtiidxa' binni nga zanda guihuini modo gaca ca dxiiña' ri', ne ca dxiiña' ri la?, raza ni xtale ndaa ti gadxe gadxe binni nga guya' ca' xi guenda naxoo napa binni ne zaqueca gadxe nga tu guya' ca binni ni guiu ne guiree ndaaní' guidxi ro' zaguita (mexicu) ti gana ca tu xti' ladu nga nabeza ndaaní' guidxi ne cayuuni guenda nadxaaba', laaca zaqueca ziu xti' binni guya' lu ca guenda nazaaca xti' ca binni ni nabeenza ndani gudubi naca guidxi ro' zaguita (mexicu).

Ndaaga 12. Ndaaní' guidxi ro' zaguita (mexicu) guirutí' gapa xide gusu xhiibi xañe ti binni neca naca tuuxa, ne laaca que zasaca' di cabe ti icaacabe ti guí'chi' o xiixa ni gudí' xti' guii ro' ni cadí xti' zaguita (mexicu) laacabe.

Ndaaga 13. Guirutí' zanda guxhuuba' donda' lu tuuxa tiisi napa ti guenda. Nin ti binni que zanda di di gaca jma nandxo ne guiixa jma que bia' ni nexhe guiixa cani runi xiiña' guidxi. Pa nuu ti guenda ridinde ne xti' guidxi la?, binni guidxi xti' zaguita (mexicu) zanda gacane ca dxu' lu guenda rindinde xti' ca, huaxa que zanda di guxhuuba' donda' ca dxu', ni cadí naca dxu' casi na lu xtiidxa' ca'. Ne pa ti binni guii' o guni na tu dxu' la que zanda di guxhuuba' donda' lu ca dxu' si un que lu ti xa ique diidxa' bia'.

Ndaaga 14. Que zanda di guni na ti diidxa' ro' bia' cubi xquenda binni.

Guirutí' zanda gusegu' yo oca be laa ne gaxha cabe xti', pa cadí niru do' guchiña' cabe la neza lu ti xa ique diidxa' bia' casi na ca diidxa' ro' bia' pa napa' be donda' o co'.

Que zanda di gudxiiba' cabe donda' ique tuuxa', neca nanna cabe bí'ni' be ni, pa cadí ca ni lu diidxa' ro' bia'.

Ra riluuxe diidxa' xti' ra guyuu dinde binni la?, napa xi gacani casi na lu guí'chi' ni binduuxe ni ca o casi na lu diidxa' ro' bia', ne pa co' la napa xi chinannda ni casi naa lu diidxa' ro' bia' ra riapa' ca guenda xti' binni.

Ndaaga 15. Que zanda di guinaacabe guilaa tuuxa ni ma yegu' yoo ndani ti guidxi, guibigueta' ixquidxi para gudxiiba cabe donda' que ique be ra que, naca be politicu o nacabe tutiisi gubaana', o neca cabe yaaga lu na xtobi. Ne ca gaca ti gu'chi' ni guilaa laacabe tiisi napa be ca guenda riapa' ni caa' lu gu'chi' bia' rí.

Ndaaga 16. Guiruti' zanda gu'chiiña' cabe la, ra liidxi nin ca binni liidxi, nin gaxa cabe xquiichi' o ni napa pa cadí naaze cabe xiixa gu'chi' ni gudii tuuxa xa ique diidxa' ro' bia' bia, ni guini' pa zaa gaca ni zaque.

Guirá'a binni napa ti guenda ti guiapa' ca xquiichi', guiu ne guxa ca ni ma bí'ni' ne zanda guini' cadí cayuu laadxi, casi nabaqu' diidxa' ro' bia', ne laaca la nga guini' ra zanda guxaa guiu binni guxaa ni ma bí'ni' n era co', ca binni si ni rapa' guidxi ro' zagueta (mexicu) nga nanna xiínee gaca ni zaca, ti guiapa' xquenda xtí binni casi na binni gaca ni, ne ra guiapa' binni ne ca binni huara.

Que zanda di guire ti gu'chi' na de que gudaguna ti binni pa cadí ne xtiidxa' ti xa ique, ne zaqueca che tuuxa chindaqui xtondabe casi na lu diidxa' ro' bia', ne laca naquiiñe' guiuhini pa bichee be ti guidaguyoobe ti guiaana xquiichi' be lu ca binni ca.

Tutiisi xa ique guinaaze tuuxa la?, naquiiñe chisaana laabe naguenda ra nu xa ique diidxa' ro' bia' bia'. Que zanda di gudxiiba be donda ique ni gunaaze laabe paca la diidxa' ro' bia' la?, zuciene laabe.

Tutica binni chin da ra cayaaca xiixa la?, zanda guinaaze laabe, ne naquiiñe guzencaa dxu' chisaana ca laabe naguenda ra nuu ti xa ique ni nuu jma gaxha, ne ndi la?, guiuba guiseenda laabe ra nuu ti xa ique rugaani donda' ne ica ca xi bí'ni' be.

Pa bí'ni' be xiixa naxoo pe, casi na diidxa ro' la?, guiuba ga si igaabe ti que guxooñe be, pa ca xa ique ni rudxiiba' donda' ca que chinda naguenda, pa ma huaxhini o pa guca ca xiixa la?, laaca zanda guini' ca', iga ni bí'ni' donda' que, ne guini' ca' xiíñe' nga guni' ca' iga ni bí'ni' donda' que.

Pa iga tuuxa ra cabaana la?, ne chisaana cabe la ara nuu xa ique diidxa' ro' bia' bia' la?, la cue diidxa' laabe ne la guya' pa siegu yoo be pa guilaabe casi na lu diidxa' ro' bia'.

Pa guinaaba ca xa ique rudxiiba' donda' ca chee ca dxu' chindee o chiyuubi

tuuxa gulaana cabe laa, bia' dxi ni canaaba diidxa' ro' bia', ne que chidi dí chupa late gande dxi, ti gaca ca guenda riyuubi ca jneza, ne zaca guiapa' ca xquenda binni que, ne laaca zanda chiyuubi cabe ca binni ni gulaana binni que ti que guxooñe' lu na diidxa' bia'. Ne pa que gaca ni bia' dxi ni biete lu guía ca la?, zanda gaca ni tapa la tengande dxi ti nga, naga na ca xa ique rudxiiba' donda' ca.

Ni zanda guiene nu ti riegulísaa xtale binni ne guni' xtiidxa' ca' chiguni ca ti guenda naxoo narooaba', nga ni ribaana binni.

Que zanda dí uzegunaa ca xa ique rugaani donda' tuuxa binni jma de chupa late gande ne xhono nuu tapa lu (chupa gubidxa), bia' ca nga dxi nexa pa guiaana be ndaani'' liidxi guuiba' o pa ilaabe bia' dxi di zanda gani tapa gubidxa' pa binni ri' nuu lade ca binni ni ribaana binni. Pa que gaca ca ni na lu gu'chi' ri la diidxa' ro' bia' zuciene laacbe.

Guiruti' que zanda chi gudxiena ra liidxi tuuxa pa cadi ne ti gu'chi' ni gudii ti xa ique ni rugaani donda' laacabe, lu gu'chi' ca la zaca tu ra liidxi, paraa ne tu binni nga zanda gudxiene naacabe ra liidxi ne xinga chi yuubi cabe, ne ra guiluuxe ca dxu' ri de guidxiena ca' ra chi gudxienaca la?, zuni cabe ti gu'chi' ni guini' xinga bi'ni' cabe ra gaca gu'chi' ri la?, zaca ni neza luu chupa binni.

Que zanda dí guchugu cabe lu ra cani' tuuxa nagachi'. Zusaba na diidxa' ro' bia' ca binni ni guni xiixa lu guía tuuxa ni cayui diidxa' nagachi'. Paaxa pa tobi de ca binni ni cayui diidxa' nagachi' ca guni ni la?, que zusaba na dí diidxa' ro' bia' laa. Xa ique diidxa' ro' bia' bia' la?, zandaa ique ne ca diidxa' ri' tu gu'ya' pa naca ni ti donda'. Que zanda di chu' xiixa ucheeche' ca diidxa' nagachi' ni na diidxa' ro' bia'.

Lu ca guenda riu diidxa' nagachi' la?, ca dxu' rinaaze guuiba' ni nabeeza ndaani'' guidxi zaguita (mexicu) ne xtiidxa' ca xa ique ragaani donda' la?, laasi ca' nga zanda guini' pa zanda guiete ca diidxa' nagachi' ni Biu' binni. Xa ique ni canaaba guiete' o ica ca diidxa' ni biete nagachi' ca la?, napa xi guni' xiñee nga gaca ni zaca, ne laaca zani pa bia' dxi nga guiete ni o icani.

Ca xa ique dxu' ni rinaaze guuiba' ni nabeeza ndani guidxi zaguita (mexicu) la?, que zanda di chindu' ruaca ne guinaaba diidxa' ca de lu ca dxiiña' ri': casi ca dxiiña' ni rapa ca binni runi xiiña' binni, ca dxiiña' ni runi binni ra cui tu gaca xa ique ti guidxi, ca dxiiña' xti' yoo ra rutiine cabe bidxichi, ca dxiiña' ra ruzaabi cabe xpidxichi binni, ne ca dxiiña' ni ra raca xquichi'

binni, ne laaca que zanda di guiu cabe uca diag cabe xtiidxa' ti binni bigaa ne ni zuhua lu xtiidxa'.

Ca xa ique diidxa' bia' la?, napa xi guni chahuí' ne cuaqui chaahui ca diidxa' ni guni ca dxu' ni nabeeza ndaani' guidxi zaguita (mexicu) ne guni ni nagueenda. Ca diidxa' ni guiu ti xa ique diidxa' bia' ne ti xa ique rugaani donda' la?, napa xi gaca ti gu'chi' de guirá' ni guinaaba lisaa cabe laaca be, ti ganda guiapa ca guenda nazaaca xtí' ca binni ni nuu dinde lu ti guenda naxoo, ti zaca ganna xa ique diidxa' bia' ca xi modo nga runi ca binni rí' ca dxiíña' ra ruyuubi cabe donda'.

Guirá' ca guenda rinaaba diidxa' napa xide chi nandani casi na diidxa' ro' bia'. Ca ni que chinanda ni na diidxa' ro' bia' la que zanda di guiu guinaaba diidxa'.

Xa ique ni rapa binni guni xhiíña' nayaa la?, napa xi chi guya pa jneza ne nayaa nuu ndani ti yoo ra rutoo cabe guenda roo ne pa rie dxu' rigapa ra que, ne naquiiñe guinaaba be ca gu'chi' xtí' binni que ti guya be pa caguiixe guirá' ni canaaba diidxa' ro' bia' la.

Ca gu'chi' yegu chaahui ni nuu ndaani' xtí' guiiichi ni nuu lu na ca ni ruseenda gu'chi' xtí' guidxi que zanda di guxhale cabe ni, paca zusaaba na diidxa' ro' bia' laacabe.

Pa cadi nuu dinde guidxii la?, que zanda di chiguiana ti dxu' ra liidxi tuuxa pa que na, ne ucaa labe gúdiibe laa bidxichi.

Pa nuu dinde guidxi la?, zanda guinaaba ca dxu' guiana ca ra liidxi tuuxa, gudii ni goo ca la ne guina xhaaba ca' ne guintiisi ni gaca laadxi ca' casi na diidxa' ro' bia' ni rapa ra nuu dinde binni.

Ndaaga 17. Guiruti' zanda uquiixe ni bí'ni' cabe laa ne guni yaya ti guizaa laadxi cabe laa.

Guirá'a yoo ra riapa xquenda binni la?, napa ca xide gapaca xquenda guirá' xixe binni ne naquiiñe' gaca ca ni naguenda ne bia' dxi na diidxa' ro' bia' nexhe guni cabe ni, ne cadi gani naacabe tobi ne xtobi co'. Ne cadi guinaaba cabe bidxiichi saca guni cabe saca xiiña' cabe.

Ca binni ni runi dxiíña' ndaani' yoo ra ruzuhua cabe lu xtiidxa' binni nga cue diidxa' ro' bia' ni gusiene diaga binii. Ca diidxa' ro' bia' guiree di la?,

laca ca ni nga guini' cani xi modo quiixe ti binni ni que nuzuuba' diidxa' xtonda, ne xi neeza nga gusaaba na ni tuuxa ni guche', ne xi lu dxiiña' nga gaca ni. Zuni bia' ca xa ique diidxa' bia' ni nabeeza ndaani' guidxi zaguita (mexicu), guirá' ca neeza xti' ca dxiiña' rí'.

Ca diidxa' ro' bia' zuyuubi xi dxiiña' guni' binni ti guchugu' lu ca guenda naxoo. Lu ca dxiiña' ni rugu' binni ndaani' liidxi guiiba' pa guchee la?, zuyuubi ca modo guni ca dxiiña', ne modo quiixe ti binni xtonda' pa ma biichee, ne laaca guini ca pa zaquiiñe ca chee tuuxa dxu' chiguya lu ca dxiiñai ni chiguni ca'.

Ca guendaribee ndu xtuuba' diidxa' ni guca' lu ca dxiiña' ra guyuu dinde binni la?, naquiiñe guiete ca ni neza lu binni paaxa niru doo guseenda ca cabe ca binni ni guyuu dinde ca', ti guiete ca ni.

Ca diidxa' ro' bia' xti' guidxi ro' ne xtiidxa ro' xti' ca guidxi huiini nga quixhe ca neeza, ti gaca ca yoo ra ruxuuba' donda' binni ca guni ca xgiiña' ca xtuubi si ca', ne laca que iquiiñe ca xtiidxa' xtobi ti ganda cue ndu ca xtuuba' diidxa'.

Guidxi ro' zaguita (mexicu), ne ca guidxi huiini xti' zuni ca ti dxiiña' sicarú ni gaca ne ca binni ni guzuhua lu xtiidxa' binni ni nabeeza ndani ca guidxi ca', ti zaca gaca ca dxiiña' rí' jneza ne ca binni ni chi guzuhua lu xtiidxa' binni ca guni ca jneza. Xtiidxa' ca xa ique rudxiiba' donda' ca que zacasaca di ca ni jma que xtiidxa' ca binni ni ruzuhua lu xtiidxa' binni.

Guiruti' que zada guida yoo pa nuzaabi xiixa bidxichi ni guini' tuuxa xa ique diidxa bia', ra guinaaba' xpidxichi xtobi.

Ndaaga 18. Nuu nga donda' si ni ruguu binni ndaani' liidxi guiiba'ro, ne liidxi guiiba' ra riu binni chupa chonna si gubidxa. Ca liidxi guiiba' ca raca ni chupa ndaa ne ca binni ni bi'ni' ni chi chu' jma iza ca la?, gadxe nga ra chu' cabe ne gadxe naga ra chu' binni ni chi chuu chupa chonna si gubidxa bia'.

Ca liidxi guiiba ca la?, zuni ca ni cadxi dxiiña', ni gusiidi ca binni ni guiaba ndaani' ca', guni ca', casi guenda riziidi uca' ne gun'da, casi modo guni ca' ti ganda gapa ca' xquenda nabaani ca' ne casi modo guni ca' dxiiña', ti zaca ma cadí guni ca xiixa guenda nadxaaba ndaani' guidxi ra ma guiree ca' nda ni, ni, ti zaca nga na diidxa' ro' bia' gaca ni.

Ra guiaba ti gunaa ndaaní liidxi guiiba' la?, que ziu di cabe ndani ra nuu ca ngiu ca.

Guidxi ro' zaguita (mexicu), ne ca guidxi huiini xti' zuni ca ti dxiiña' ra gutaagu ca xtiidxa' ca, ti guihuini modo guni cabe xiiña' cabe ra ma napa cabe tuuxa ni que iquiiñe lu naa cabe, ne guihuini modo gunduuxe binni que xi ndaaní liidxi guiiba' ni napa ca be lu naa cabe.

Guidxi ro' zaguita (mexicu), ne ca guidxi huiini xti' zabaqui ca ti dxiiña' ni napa ca lu naa ca, ne gutaagu' naa ca dxiiña' ni gaca ti ganda gusaba naa ca xcuidi ni napa bia' chíi bi chupa iza ne nahuiini de chíi bi xhono iza, ne ma bíni' ca ti guenda guenda naxoo ni ca lu diidxa' ro' bia', ne guihiuini guiapa' ca guenda ni ni napa binni, ni ca lu gu'chi' bia' rí, ne zaqueca ca xcaadxi guenda ni maca bizuhuini ni. Ca xcuidi ni napa chíi bi chupa iza ne ma bíni' ca ti guenda naxoo ni ca lu diidxa' ro' bia' la?, laacabe la que ziu di cabe ndaaní liidxi guiiba', laacabe ziu cabe ndaaní ti yoo ra guiziidi ca be ti ma que guni ru cabe xti' guenda naxoo.

Guirá' xa ique xti' ca guidxi ca la?, zapa ca' xiiña' ca', ne yoo ra gusiene diaga ca' ca xcuidi ni ma bíni' ca ti guenda naxoo. Ne Laaca nga ma nana ca' pa bia' nga zanda gusaaba naaca' ca xcuidi ni ma bíni' ca xiixa.

Guirá' ca dxiiña' ni runi diidxa' ro' bia' la?, napa xi gaca ni jneza casi na rari', ne paaxa gaca ni dxandí. Lu guirá' ca dxiiña' ni rusaba na ca xcuidi ca la?, napa xi chinanda ni casi na lu diidxa'ro', zaqueca lu ca dxiiña' ra ribee ndu' ca xa ique diidxa' bia, diidxa', ti cadí guni ca ni casi na xtobi. Ca guenda rusaaba naa ri la?, napa chi gaca ni na'na' pe', ti ni raca laadxi ca dxiiña' ri la?, guidaagulisaa ca lisaa xti' xcuidi ni bíni' guenda naxoo que, ti zaca guinisi be jneza ne pípi' do' guirooba xquenda biaani be. Ca dxiiña' ni rusaaba na ca xcuidi ni ma bíni' xiixa guenda naxoo ca la?, naca ni ti guenda ruchiibi sí, ti ma cadí guni cabe ni xti' bieque, ne zaca ni naguenda, ca guenda rusaaba na ri la?, zusaaba na ni ca xcuidi huanisi bia' chíi bi tapa iza, ne niru do' nga guya' cabe xi guenda naxoo ni jma na'na' nga bíni' be, ti guya' cabe xi modo gusiene diaga cabe laabe.

Ca binni xiiñi' zaguita(mexicu) ni segu yoo ndaaní liidxi guiiba' xti' guidxi zitu ni cadí xquidxi zaguita (mexicu) la?, zanda guenda cabe ndani guidxi rí' ti ra ri gunduuxe cabe dxi ndaaní liidxi guiiba' casi na lu ndaaga rí, ne zaque ca binni xti' guiixi ni cadí xiiñi' zaguita (mexicu) laa la?, ne bíni' ca' xiixa guenda naxoo ndani guidxi rí' la?, laaca zanda chibi' ca' xquidxi ca ti ra que gunduuxe ca dxi ndaaní liidxi guiiba' ti zaca na ca dxiiña' ni ma

bilui na ca xa ique guidxi gaca. Paaxa na ca binni ni segu' yoo ca' chi bi' ca xquidxi ca la?, zaca ni, ti ma xquidxi ca gunduuxe ca' bia' dxi chu' ca' ndaaní liidxi guiiba'.

Pa na diidxa' ro' bia' la?, ca binni ni zegu yoo ndaaní liidxi guiiba' ca zanda guiegu yoo cabe ndaaní liidxi guiiba' ni nuu jma gaxa ra liidxi cabe, ganda guiu be xti' bieque gaxa de ra nuu binni guidxi. Ca ni naa diidxa' ri' lu ndaaga ri la?, que zaca di ca ni para ca binni zegu yoo ndaaní liidxi guiiba' ni gulaana binni ne gunaaba bidxichi ti gundaa laabe ne xcadxi donda' ni napa ni jma naxoo ne naquiiñe guiapa' jma.

Ca binni ni gulaana binni ne guinaaba bidxichi ti gundaa laabe la?, ziu pe' ti liidxi guiiba ni jma riapa' cabe ndaaní. Ca xa ique ni rapa ca ra liidxi guiiba' ca zanda guchuugu cabe lu xtiidxa' ca binni ni segu yoo ca ti cadí guni ne xtobi, ni zanda guni ne cabe nga tuuxa binni ni chugusuhua' lu xtiidxa' be, ne napa xi guiapa' cabe jma di cadí guiree chu cabe. Ca diidxa' ni biete ca la?, napa xi gaca ni luguia' ca binni ni naquiiñe' guiapa' jma ndaaní ca liidxi guiiba' ca, ne naquiiñe gaca ca ni casi na diidxa' ro' bia'.

Ndaaga 19. Que zanda di gunaaze ca dxu' tuuxa, ne gapa ca laabe lu na ca, jma que chonna gubidxa, ne que guini' ca paraa bicheebe, ne laca que guini' ca paraa, padxi ne pora nga guca ni, ne laca naquiiñe guchiiña ca' xcaadxi gu'chi' gului na de que ne laabe bi'ni' be xiixa ni na diidxa' ro' bia' naca ti donda'.

Pa que guidxiña tobi de ca binni ni nuu dinde ca la?, xa ique rugaani donda' ca zanda guinaaba be xa ique diidxa' bia ca' gusedaca ne dxu' binni ni que nidxiña que, ti zaca ganda guiluxe guenda rindinde xti' ca', ne lu ca guenda ruyuubi xtuuba' diidxa', ne guiapa' ca binni ni guca na, ne ca ni gulu' na, ne ca binni guidxi, zaqueca guiapa' ni bigaa yegu yoo ra cuxhuuba' donda' o ra llegu yoo ndani liidxi guiiba' pur xiixa ni bi'ni' ne xiana. Xa ique diidxa' bia' zani' guiuba ga igaa tuuxa, casi ra ritagulisaa chupa chona binni ni rie rindaana xti' binni, ca ni Guti binni ne xiana, ni guila xoo binni, ca ni ribaana binni ne guinaaba bidxichi, ne xcadxi guenda naxoo ne donda' ni guni cabe ra ma naaze cabe guiiba' ro' ne che cabe luguia guidxi, ne guchuugu ca lu guenda nazaca xti' binni ne ra guinisi binni.

Diidxa' ro' bia' nga guini' para si nga zanda ucueza xa ique diidxa' bia' ca de guilaa tuuxa ni yegú yoo.

Bia' dxi na ni ucanaa ca nga guiegu yoo ni b'ni' guenda naxoo que, ne chinanda ni casi na diidxa' ro' bia'. Ne diidxa' ro' bia' nga gusaaba naa laabe pa guirooba' ru guenda naxoo que. Pa xa ique liidxi guiiba' ra yegu yoo ni bigaa que, que ica ca gu'chi' ni guinii za guiegu yoo be la?, zulidxi be xa ique diidxa' bia' ca xiñee cadí cuseenda ca gu'chi' ni na za guiegu yoo buqué, ne pa que icaa be ca gu'chi' ca' lu chona xigaaba la?, zundaabe ni yegu yoo que.

Guirá' xtuuba donda' napa xi de chinanda ni casi na ca guenda naxoo ni culiu na ca donda' ni guca ca'. Ne pa ra cuyuubi cabe xtuba donda' ca la?, que zanda di cu' cabe ni lu laaca ni ma uca napa xi guyuubi cabe xtuuba donda nacubi ni bidexela cabe que, ti que cadí gudale xtonda be.

Pa nuu tuuxa gulaana binni ne gunaaba bidxichi la, ne de gadxe guidxi la, ne xti' xa ique diidxa' bia' gusenda ca laabe chebe xquidxi be la?, ma zarugu lu ca guenda ruyuubi donda' ni cayaca guidxi ri', ti ma siebe xquidxi be, ti ma raque quixe be xtonda be.

Pa guinaaze ca dxu' tuuxa ne guni nacabe la ra igaa, o pa ma nuu ndaaní liidxi guiiba' ne guni na cabe la la, ne guirá' ca guenda riziñe xti' ca neca cadí naaze ti gu'chi' ni guini' xi chi guni ca la?, zusaba na diidxa' ro' bia' laaca ne xtiidxa' ca xa ique.

Ndaaga 20. Lu ra nuu dinde binni la? napa xi chu' ti guenda rui diidxa' ne naquiñe ica yuu cabe ni neza lu xtale binni. Ti chu' dinde diidxa', ne cuaqui' dxi cabe xpiani cabe ti gaca dxiiña' ca jneza, sin guiana naa ni, ne naquiñe guya' xaique diidxa' bia' ca xtiidxa' guirá' binni chi guini', ne xtiidxa' ca binni nuu dinde ca ti cue xiabe donda que.

A. Cani chi guiete ri la?, naquiñe gaca cani sicari:

I. Ra riree xtuuba' donda' la?, napa xi gaca ni jneza ti guiree xia ca guenda naxoo ni guca, ne guapa binni ni guca na que, ti guidegu yoo ni b'ni' guenda naxoo que, ti quixe be guirá' ni b'ni' be.

II. Guirá' ca guenda ribee xtuuba' donda la?, napa xi gaca ni neza lu xa ique diidxa' bia', sin cu' riuu tuuxa ra cadinde diidxa' cabe, ti gaca dxiiña' ri jneza ne guenda biaani.

III. Ti guire undu' xtuuba diidxa' ca jneza la?, xa ique diidxa' bia' napa xi chi chinanda lu ca diidxa' ni maca biete ra guyu dinde xtiidxa' cabe que. Ti

ganda guiree xia xtiidxa' tuuxa la?, naquiiñe gaca ni casi na diidxa' ro' bia', ca diidxa' ni maca biete;

IV. Lu guenda riu rindinde diidxa' la?, naquiiñe gaca ni neza lu ti xa ique diidxa' bia' ni que ganna de la ni. Ti guihuini ni dxandi' la?, naquiiñe ica yuu cabe ni neza lu xtale binni

V. Ti guihuini ni dxandi la?, binni ni uca na ca naquiiñe chindaqui xtonda ni b'i'ni' ni ca ra nuu ti xaquie rugaani donda', casi na diidxa' ro' bia'. Ca binni ni nuu dinde, biaca biaca zasaca xtiidxa' ca', casi ca ni cudxiiba' donda', zaqueca ni na cadí dxandi' ni.

VI. Nin ti xa ique diidxa' bia que zanda cuaqui chaahui lu ti guenda ridende xti' tuuxa pa que guini xtobi ni nuu dinde ne que, ti naquiiñe gulaabi be guenda ricayuu xtiidxa' ca. Paaxa na diidxa' ro' bia' ri guidxaani la zadxaani;

VII. Pa ma bizulu', lu guenda ruyuubi xtuuba' donda la?, ne pa cadí ni cayaani donda' ique que ucaa ñe yuu la?, diidxa' ro' bia' guini' ma biluuxe ni. Pa ni cayaani donda ique ca cue rua' diidxa' o guíale ni de la guni' de que ne la b'i'ni' guenda naxoo que neza lu ca xa ique que la?, gapa' ga si la, ne jmaru si pa nuu tuuxa guini' dxandi ne laabe b'i'ni' be ni, xa ique diidxa' bia' ca zabiidxi laabe chi uca diaga be, ni gulee ndu xtuuba ca xtiidxa' be.

Pa ni caguiiba' donda' ique ca ma gulee riuu diidxa' la?, diidxa' ro' bia' ca zaguiixhe xi guni be ti quixhe be ni.

VIII. Pa xa ique diidxa' bia' ca ma nanna chahui de que ni caguiiba donda' ique que, b'i'ni' guenda naxoo que la?, zusegu yoo laabe.

IX. Pa caguiiñe cabe tuuxa ti cue rua' diidxa la?, diidxa' ca que zaquiiñe d'i. Ne

X. Ca ni ma biete lu ndaaga ri la, laca zahuini ca ni lu ca guenda rica yuu diidxa'.

B. Guenda riapa' xti' ca binni ni caguiiba' donda' ique:

I. Xa ique diidxa' bia' que zanda gudxiiba' donda' ique tuuxa pa caru guihuini pa la b'i'ni' xiixa guenda naxoo;

II. Zanda guni' o igani. Ra iga tuuxa naquiiñe gabi ca be la xiiñe gunaze cabe la, que chi guni' xiixa ni raca laadxi, ti cadí quiba' donda' ique.

Pa ra guinaaze cabe tuuxa la?, que zanda di uchibicabe la, ne guni na cabe la, pa laacabe guni cabe ni la?, zusaaba na diidxa' ro' bia' laacabe. Pa uxuuba' donda' cabe tuuxa ne que guini ni chi uzuhua lu xtiidxa' be ca la?, que zasaca pe ni xtale;

III. Ra guinaaze cabe tuuxa ne guchiñacabe la neza lu xa ique rugaani donda' o ne za lu xa ique diidxa' bia' napa cabe xi gabi cabe la, xiñee bichiiña cabe la ra que, ne laca zabi cabe la guirá' guenda ni zanda gapa' la ti que chu' tuuxa o xiixa ni guni na la. Pa igaa ca ni ribaana binni ne rinaaba' bidxichi la?, ca xa ique ca zudii diidxa' que chi guini ca be la ne para nabeza binni ni gunaaba' igaa cabe.

Pa ca ni caguiiba' donda' ique o ni ma dxiiba' donda' ique o ca ni ma nuu ndaani' liidxi guiiba' gaca ne ca guidxeela xtuuba' donda', xti' ca binni ni ribaana binni ne rinaaba' bidxiichi la?, diidxa' ro' bia' zacane laacabe;

IV. Ca ni caguiiba' donda' ique zanda guchiiña' ca tuuxa binni ni guini de que quigaapa ca be donda' ne zanda guchiiña cabe xiixa gu'chi' ni gula laacabe. Lu bia' dxi nagueixe diidxa' ro' bia';

V. Ra guxuuba' donda' be la?, zuni be ni neza lu xatale binni ne neza lu ti xa ique diidxa' bia'. Diidxa' ro' bia' si nga zanda ucueza cadí gaca ni neza lu xtale binni, ti ganda guiapa' guidxi ro' ne guiapa' binni guidxi, guiapa' ca binni guca na, ca ni bilu' na, ne ca xcuidi, jma pa chi guiete xiixa gu'chi' bia' ni risaaca, o pur ti zaca canaaba' ca binni ni runi dxiña' ndaani' yoo ra riguiiba' donda' ique binni ca gaca ni.

Lu ca guenda ruyuubi xtuuba' donda' xti' ca binni ni ribaana binni ne rinaaba' bidxichi zazaca ni jma. Jma pa que guidxiña ca binni ni guca na ne ca binni ni biului na. Cadi tisi ma ucua ni zaca la?, zanda guni na ni xquenda ca ni caguiiba' donda' ique, zanda udxilu be ne guchiiña' be xacadxi gu'chi' ni gaca ne laabe;

VI. Pa guinaaba be ca gu'chi' ni cugaani donda' ique be ca la zacaabe ni, ti ganda gaca ne ni laabe gudxiilu be.

Ni caguiiba' donda' ique ne ni chi guzuhua lu xtiidxa be ca, zanda iguii ca gu'ya' ca' xi na ca gu'chi' ni bigaani donda ique ni bigaaque ne pa chi guinaaba diidxa' cabe xiixa o pa chi guxuuba' donda' be. Laca zaqueca, pa deeru' chi guxuuba' donda' be neza lu xa ique diidxa' bia', ti ganda guyuubi cabe xiixa ni gaca ne laabe guilaa be. Dede nagasi ma que zanda di

guiapa' ca guí'chí' ni ruyuubi donda', paaxa na xa diidxa' ro' bia' guchaani, ti ganda guiapa' ca xtuuba' ca donda' ni bidxela ti cadí guni na xquenda ni caguiba donda' ique que;

VII. Napa cabe xi guxuuba donda' cabe laabe ante guizaa tapa beu, pa guenda naxoo ni bí'ni' be ca que zusaaba na laabe chupa iza ndaaní' liidxi guiiba' ne pa ttiidi de chupa iza xtí' donda' ca la zuni cabe ni lu tubiza, paaxa guinaba be guidale dxi ca jma ti ganda guidxela xiixa ni gaca ne laabe;

VIII. Zanda guyuubi be tobi ni guzuhua' lu xtiidxa' be, ni gaca laadxi be cui be casi pe' guinaaze cabe laabe. Ra cuidxi cabe laabe ca' ne pa que gapa ni quiixe be tu guzuhua lu xtiidxa' be la xa ique diidxa' bia' ca zudii laabe tobi. Ne laca chu' ni chi guzuhua' lu xtiidxa be ca lu guirá' ca ni chi gaca ca, ne napa xi guchiiña' cabe la cada cuidxi cabe la, ne

IX. Guiruti' zanda guseguyoo cabe la xadxi pa que gapa' ni quiixe tu guzuhua' lu xtiidxa' o pa ganda quiixe bidxichi ni gudiíñe' o pur xiixa ni bí'ni'.

Lu guenda riseegu' yoo ga xtí' tuuxa ni bí'ni' xiixa guenda naxoo que zanda di tiidi ni jma de chupa iza, bia nabaquí' diidxa' ro' bia' gaca ni La prisión preventiva no podrá exceder del tiempo que como máximo de pena fije la ley al delito que motivare el proceso y en ningún caso será superior a dos años, zadela dxi ca pa guinaaba ne guidxela xiixa ni gaca ne laabe. salvo que su prolongación se deba al ejercicio del derecho de defensa del imputado. Pa guizaa dxi ne que huaree undu xtuuba' diidxa' ca zunda cabe laabe, laga idxela xtuuba' diidxa' ca, ne cadí nga guchenda yuucabe ne quiba xtí' donda' ique be.

Ra guire ndu xtuuba' diidxa' la?, napa xi igaaba' dxi guiegu' yoobe.

C. Ca guenda riapa' xtí' ca binni gucaná:

I. Chu' tuuxa ni ruzuhua lu xtiidxa' binni ti gusiene laabe de ca ni cayaca; gannabe de ca guenda ni rudii guí'chí' bia' laabe ni gapa' laabe ne pa guinaaba be ganna be xinga ca yaya cayaca' la?, laca zabi cabe laabe;

II. Gacane be ca xa ique ni rugaani donda' ca guidxiiña' ca guí'chí' ni gaca ne laabe, ti gaca ca guenda ruyuubi donda' ca jneza ne ganda guiu be lu ca dxiiña' ni cayuuni ca xa ique rugaani donda' ca bia' dxi nabaquí' diidxa' ro' bia' gaca ni.

Pa na ca xa ique rugaani donda' ca cadí caquiñe pe ca, ca gu'chi' ca la?, guni xiñee cucueza ca ni;

III. Casi pe gaca guenda naxoo ca la?, ora queca guya' ti gubeedxe' (doctor) laabe pa cadí guca be ne guya' xtobi laabe pa cadí guca na xquenda biaani be.

IV. Pa uca na be la guiaxa be. Ra ganda la?, ca xa ique rugaani donda' ca guinaaba guiaxa be. En los casos en que sea procedente, sin guinaaba be ni la pe be; ne pa xa ique diidxa' bia' ca ma bidii xtiidxa' iga ni b'ni' na laabe ca la?, ma que ziaxa di be.

Diidxa' ro' bia' nga quixhe bia' dxi guiaxa ca binni ni guca na;

V. Naquiñe guiapa' ca xquiich' be ne tu laabe casi na rari': pa nahuiini cabe, pa gulaana cabe laabe ne gunaaba cabe bidxichi, pa zaca na xa ique diidxa' bia' ca gaca ni, ti ganda guiapa' ca xquenda be;

Naquiñe gapa ca xa ique rugaani donda' ca binni ni guca na ne ca binni ni chi gului na, ne guirá' binni ni chundu rua' lu ca ra ridxeela xtuuba' donda'. Naquiñe gapa ca xa ique diidxa' bia' ca, ca dxiiña' ri ti gaca caní jneza;

VI. Binni ni guca na ca zanda guinaaba' chu' tu gapa la ti ganda guipa' ca xquenda. Ne

VII. Che guini' neza lu ca xa ique ro' ca' caní cadí cayuuni ca xa ique rugaani donda' jneza lu ca guenda ruyuubi xtuuba donda', zaqueca ra gutaguria cabe xi cayaaca, ne pa que naca guya ca lu guenda ruyuubi donda' ca ne pa cadí cayuu ladxi ca' bia' zení.

Ndaaga 2I. Ca xa ique rugaani donda ne ca dxu' si nga zanda guyuubi xtuuba' donda, ne laaca la?, zuca' diaga ca' ne zuni ca' ni na ca binni ni biete niru do' ca.

Ni zanda gudxiiba' donda ique tuuxa ti chu' ndaani' liidxi guiiba' la?, ca xa ique rugaani donda nga guni dxiiña' ti gaca ni. Diidxa' ro' bia' si nga zanda guini' paraa nga zanda guni tutiisi' binni dxiiña' ti quiiba' donda ique tuuxa ti chu' ndaani' liidxi guiiba'.

Ra quiiba' donda ique tuuxa, ne bia' dxi gata ca ni la?, ca binni ni runi xiiña' justicia nga cuaqui ni.

Ca xa ique runi xhiina' justicia la?, zani' ca' xi zanda guni ca binni ni ma bichee lu na diidxa' ro' bia', casi pa bia' nga quiixe cabe ti guilaa cabe, ne pa co' la, guiu cabe ndaaní liidxi guiiba' bia' chonna late gande xhoopa' xigaaba dxi, o laca guya' cabe xi dxiiña' guni ca', casi gaca ne ca guidxi o gusia ca guidxi; paaxa ni caguiiba' donda' ique ca que quiixe ni gulaqu' cabe quiixe que la?, zadxaa ni quiixe que, ne zugu' cabe la, ndaaní liidxi guiiba', bia' chonna te chií nuu xhoopa xigaaba' dxi.

Pa ca binni ni caguiiba' donda ique ca, runi dxiiña' raña la?, que zanda di, ucaacabe laabe quiixe be jma de bia' riixa be ti dxi.

Ca ni runi dxiiña' raña la?, que zanda di uquiixe cabe la, jma de ti dxi dxiiña' xti'.

Ti gudxiiba' ca xa ique rugaani donda ca, donda ique tuuxa la?, naquiiñe guya cabe xi na diidxa' ro' bia' ti guni cabe ni.

Ti ganda uca diaga ca xa ique ruzuhua lu xtiidxa' binni ca, xtiidxa' ca binni ni runi dxiiña' ndaaní yoo ra riguiiba' donda ique binni, xti' guidxi ro' ni cadí xti' (zaguíta) Mexicu la?, niru doo naquiiñe guya cabe xtiidxa' ca xa ique ro' ni ruzuhua lu xtiidxa' binni xiiñí (zaguíta) Mexcu, ti guni cabe ni.

Guirá' ca guenda riapa' binni la?, ca xa ique ro' ne ca xa ique huiini xti' guidxi nga guni ca dxiiña' casi; cadí gaca ti guenda naxoo, guyuubi ca xtuuba' donda', ne saa nandacabe ca dxiiña' ri' ti gaca ni jneza, ne guirá' dxiiña' ni rului na, diidxa' ro' bia' gaca' ne ni na gu'chi' bia' ri'. Guirá' ca dxiiña' ni guni ca binni ni runi xiiña' justicia la?, napa ca' xi guni ca', ca dxiiña' ca jneza, naya do', ne guenda biaani, ne cadí gani na cabe tobi ne xtobi co', ti guíapa ca guenda xti' binni ni ca lu guio'chi' ro' ri'.

Ca binni ni runi dxiiña' xti' justicia la?, zuni ca xiiña ca' jneza ne guenda biaani, ne zaca ne ca' tutiisi binni. Ca binni ni runi xiiña' ca xa ique ruzuhua' lu xtiidxa' binni ne ca xa ique rugaani donda la?, zaca ca' tobi si ti guni ca' dxiiña' ne gapa ca guidxi, ti cadí chu' xiixa guenda naxoo, ne chinanda cabe ca diidxa' ni zeda ri':

a) Ra guya' ca be tu zanda chu' lu ca dxiiña' xti' cabe, ra guiziidi' ca binni ni chigapa binni guidxi ti cadí chu' xiixa guenda naxoo. Ra gaca ca dxiiña' ri la?, napa xi guya' ca xa ique guidxi ro' ne guidxi huiini xti' mexicu, gaca xquidxi ca naya ne cadí chu' xiixa guenda naxoo.

b) Ca gu'ichi' ni ica xi guirá'a guenda guti' ma uca ndani guidxi, xti' ca yoo ra riapa' xquenda binni. Nin ti binni que zanda di chu' ndaani' ca yoo ra riapa' xquenda binni sin ica laa, lu gu'ichi' xticabe.

c) Ca dxiña' ni gaca ti ma cadí chu' ru' jma guenda naxoo.

d) Naquiñe guihuini paraa nga zanda gaca ne binni yoo lacabe ra guyuubi cabe donda, ne paraa nga zanda gacanecabe guidxela xtuuba' ni, ne zaqueca xcaadxi yoo ni rapa cadí chu' guenda naxoo.

e) Ca bidxichi ni rudii xa ique guidxi ro' mexicu la?, zeda ndani lu na ca xa ique xti' cada guidxi ro' ne ca guidxi huiini, ti ganda gaca ca guenda riapa' binni jneza.

Ndaaga 22. Que zanda di gatí tuuxa binni pa nuzaabi xiixa donda' lu na justicia, uga cabe ná o ñé, cue cabe xiixa luguia, ucacabe o uquiidí' cabe xiixa ladi, quiiñe cabe, o cu' cabe gueere' laa, o uca cabe laa quixe biatí' na cabe, uchiibi cabe laa, o guiana ne cabe ca xti' ne xcaadxi ru ni jma risaca ni napa. Guirá'a binni napa xi quixe bia' donda' ni bí'ni'.

Pa nuu tuuxa caguiiba' donda ique la?, que zanda di guiaana ne cabe ca xti', casi ti guenda riaxa ni zabi', nin nini' tuuxa xa ique bia' gaca ni, ti ganda guiaaxa ca ni zabi xti' xiixa donda ni maca uca'. Ne laca que zanda dí' guiaana necabe xti' ca binni ni birooba' xpidxichi zacasí casi na, lu ti ndaa 109 xti' gu'ichi' ro' bia' ri', ti guiana ne guidxi ro ni, ni pa na cabe de que guidxi caquiiñe ni. Ne pa gunitilu xiixa xti' guidxi la? zuni cabe dxiña' ti gaca ni casi na ni ca ni xaguite ri:

I. Zuni ni xiiña' ni casi na ni ne sin chu' xtobi cu rua;

II. Zuni ni dxiña' ti igaa ca binni ni ridagulisaa para chindaana, ca donda guna lu guenda nazaca xti' binni, guenda ribaana binni, guenda ribaana xcarru binni, guenda rutoo binni, ne ra guihuini xcadxi donda ri la?:

a) Neca caru' guiree ndu' xtuuba diidxa' ni gului naa de que uca xiixa donda la?, peru nuu xiixa ni gului na de que guca ni, casi ca ni biquiiñe cabe ra bí'ni' cabe guenda naxoo que.

b) Nuu xiixa que niquiiñe cabe ra bí'ni'cabe guenda naxoo la?, huaxa biquiiñe cabe ni ra bicachí cabe ca donda ni bí'ni' cabe que, ne jma pa binni cabe ni casi na lu neza die'lana ni cau doo ndí'.

c) Ca xiixa ni caquiĩne xtobi ti ganda guni ne ni ti guenda naxoo, neca xpixuana ni gunna ne que ni nini' o binni xiixa ti nuchugu lu ni.

d) Pa nuu tuuxa ni gulaana xti' xtobi ne ca caga, cayuni xtini.

III. Tuiisi binni ni gulaana cabe xti' zanda guchiña' xiixa gu'chí' ni guliu de xti' nga ni biniti que, ne guni nayaa do', zaqueca guni' de que ganna pa biquiĩne cabe xti' ti chindaana ne cabe.

Ndaaga 23. que zanda di guchiña cabe tuuxa jma de chona bieque neza lu xa ique. Que zanda di cu' cabe tuuxa ndaaní lidxi guiiba' chupa bieque de ni maca uca. Nin ti xaque diidxa' bia' que zanda di gundaa tuuxa binni de laa si.

Ndaaga 24. Tutiisi binni zanda che ra yu'du' ni galadxi ne guni ni na, xiudu', sin guche ne ni na lu diidxa' ro' bia'.

Ca xa ique ni ruzuhua lu xtiidxa' binni que zanda di cue' cue ti diidxa' bia, ni ucueza binni de che intica yu'du'.

Ca binni ni runi xiiña' yu'du' la?, ndaaní xiudu'ca' nga guni ca ni. Neca ni que guni ni ndaaní xiudu' ca' la?, ne guni ca ni xti' ladu la?, napa ca xi chi nanda ca' casi na diidxa' ro' bia'.

Ndaaga 25. Guidxi ro' nga gu'ya' guirooba' ca xquidxi ne gapa bidxichi bia' ganda iquiĩne', ne gu'ya' isaca' binni biaca biaca, ne chu xtale dxiiña', ti guiixa cabe bia'ti' naquiĩne' guaxa cabe, ti zaca guirooba' xpidxichi cabe, ne zaca, cada tobi zabaquidxi xquenda biaani, ne zuni ni galadxi ti diidxa' ro' bia' ri' zapa laacabe.

Guidxi ro' zuni, zazananda, zuciene ne quixhe chahui, ca dxiiña' xti' guidxi ro' ra riete xpidxichi guidxi, ne zaqueca lu ca dxiiña' ni ruzete' gu'chí' ro' bia' ri gaca ra rini' de xpidxichi guidxi. Ra guirooba' xpidxichi guidxi la?, napa xi chu guirá' binni ni chiguiete ri': ca binni guidxi, ca binni guidxi ni bidaagu lisaa, ne ca binni ni que riucha ne binni guidxi Al desarrollo económico nacional concurrirán, con responsabilidad social, el sector público, el sector social y el sector privado, ne guni cabe xiiña' cabe jneza ti gaca ne guirooba' xpidxichi guidxi ro'.

Ca binni guidxi zapa ca' lu na ca' guirá' ni na ti nda lu ti ndaa lu guidapa xti' z8 ni ca lu gu'chí' ro' bia' ri', ne xa ique ro' xti' guidxi, nga gu'ya' gaca ca dxiiña' ri jneza ne naya do' ti maca biete de que laabe naga gu'ya' be ni.

Ne zaqueca zanda gúni ni xtubi o laca zanda guinaaba' gaca ne xcadxi binni lá, guirooba' ne guidale ca layu' ni ribee ndu bidxichi ti gapa binni dxiiña' casi na diidxa' ro' bia'. Ti zaca zanda gaca ne ni binni gaca biaca biaca ra guni ca' xiiña' ca' ti gapaca' ti ndaa bidxichi xtica', ne guni ca ni casi na binni guidxi, ti gaca ne ni guirá xixe ti zaca zanda guipa' guirá' layu' ni ribeedu' xpidxichi guidxi.

Diidxa ro' bia' nga cuaqui ne gusine xi modo zanda guni binni guidxi ti ganda guidagu lisaa ne ganda gútale ca' xpidxichi ca' casi: ca binni ni napa ti layu ni gusigade guidxi lá, ra guidaagu'lisaa binni ti guni dxiiña', ca guidxi huala'dxi', ca dxiiña' ni nuu lu na xtale bin ni ni runi dxiiña' ne guirá' xixe dxiiña' ni gutagú lisaa binni, ra guza ca' xiixa ni iquiiñe' binni ti naquiiñe guireche na ca ni.

Diidxa' ro' bia' nga guya ne gaca ne ca dxiiña' ni guni binni guidxi ti ganda gapa ca' ti ndaa bidxichi ne laca zuya' gaca ca xiiña' ca binni guidxi ni que ridagulisaa tutiisi gacane guidale xpidxichi guidxi casi na lu guio'chi' ro' bia' rí.

Ndaaga 26.

A. Guidxi ro' zuni ti dxiiña' nadipa' ti gaca binni biaca biaca, ne gaca ca' nadipa', guni ca' dxiiña' jneza ti guidale xpidxichi guirá guidxi ro' dagu lisaa, ti zaca maque zaca lu guirutí' gaca ne lá, ra guirooba' ca guenda ne xpia' xti' xquidxi.

Ca dxiiña' ni raca ladxi guidxi gaca la?, zeeda guirá'ni lu gu'chi' ro' bia' rí, ne la nga cuaqui modo gaca ca ni. Ca dxiiña' ni biete niru do' ca la?, zaca ni tobisi para guirá xixé. Lu ca dxiiña' ni runi binni guidxi la?, sutopaca' ne zuya ca' xi guirá caquiiñe' binni ndaaní' guidxi, ne guca ni tobi si ne zugu ca ni lu ca dxiiña' ni raca ne xa ique guidxi ro' zaguita (mexicu), ti guidale jma dxiiña'. Lu ca dxiiña' ni chi gaca ne binni guidale xiiña' la?, napa xi gaca ni casi ná, ca binni ni chi gudii bidxichi gaca ni que.

Diidxa' ro' bia' nga gudii ti guenda ca xa ique ruzuhua lu xtiidxa' binni, ti gu'ya' ca' xi zanda guni binni ra cadí cayene de lu ca dxiiña' ni cayuni guidxi ti chu' binni tobi si, ne xi guirá' nga chi iquiiñe' lu ca dxiiña' ni chi gaca ne binni, ti guirooba' ca xiiña'. Zaqueca zuya cabe gaca chahui ca gu'chi' ni guini' modo gaca ca dxiiña' ni chigaca ne ca binni ca' jneza, ti ca xa ique ni ruzuhua lu xtiidxa' binni ca, gusiene ca xa ique xti' guirá guidxi modo gaca guirá dxiiña' rí.

Lu ca dxiiña' ni chicane binni chu' tobi si la?, diidxa' ro' bia' nga guini' para nga zanda cu' rua' ca binni ni runi dxiiña' ndaaní yoo, ra runi ca xa ique ni ruzuhua lu xtiidxa' binni ca dxiiña'.

B. Zapa guidxi ro' ti yoo ra gaca dxiiña' de guenda rugaaba' binni ndaaní guirá guidxi, ne ca guenda rugaaba' binni ca la?, naquiiñe gaca ni jneza ti que quite ni binni. Guirá ca guenda rigaaba' binni ndaaní ca guidxi ro' ne guidxi huiini la?, napa xi gaca ca ni ti zaca nabaquí diidxa' ro' gaca ni.

Ca binni ni runi dxiiña' ndaaní ca yoo ra raca dxiiña' de guenda rigaaba' binni la?, laaca si ca nga nanna ca, ximodo guni ca ni sin chu' tu cu' rua' lu xiiña' ca' ne xpidxichi pe cabe nga iqiiiñe cabe ra guni ca' xiiña' ca', ne zuni ca dxiiña' ca ne guenda biaani ti ganda guseegu ca' o quixhe chahui ca' ne uca ca' ca dxiiña' ca ti ganna binni ne gu'ya' xi ma b'ni' cabe.

Lu ca dxiiña' ni runi xa ique guidxi la?, ziu gaayu' binni gutaagú diidxa' ne tobi de lacabe la?, zaca xa ique xti' ni; xa ique guidxi ro' nga cui lacabe ne xtiidxa' ca xa ique ruzuhua lu xtiidxa' binni, ne pa que cadí cayuni ca binni di dxiiña' la?, ma gadxe xa ique ruzuhua lu xtiidxa' binni nga gudii xtiidxa' gaca ni.

Ra guni ca binni ni runi dxiiña' ndaaní yoo ra raca dxiiña' de guenda rigaaba' binni la?, diidxa' ro' bia' nga cuaqui xi guni cabe, ne naquiiñe guni cabe ca dxiiña' naya, ne gana binni xi cayuni cabe ne xtubi cabe nga guni cabe ni sin iqiiiñe' cabe xiiña' xtobi ti guni cabe ni; diidxa' ro' bia' nga quixhe' pabia' dxi guni ca binni ni rutaagú xtiidxa' que dxiiña', ne xiguirá' nga naquiiñe guni cabe, ne xi zanda guni cabe ti quiiba cabe jma.

Ca binni ni rutagu diidxa' ne runi xiiña' xa ique guidxi la?, zanda guiree cabe de lu ca dxiiña' ca' pa lácabe biche cabe o pa huara cabe ne que zanda di icaa cabe xti' dxiiña'; ne cani que zanda di uchugú cabe lá de lu xiiña' nga, ca binni rusiidi' ndani ca yoo ra riziidi binni gun' da, ne ca binni ni rusiidi xquenda ne xpia' binni huala'dxi, ne ca binni ni runi dxiiña' ndaaní ca yo ora raca ne cabe titiisi binni ne laaca la?, zuna ca' xtiidxa' ni lá guidapa' xti' gui'chi' ro' bia' ri'.

Ndaaga 27. Guidxi ro' nga xti' ca layu ne ca nisa do' ni nuu ndaaní guidubi naca ndaaní guidxi xti' zaguita (mexicu), ne lá nga quiizi ni lu binni, ti cada tobi gapa xti'.

Pa iqiiiñe guidxi ro' layu xti' tuuxa la?, napa xi quiixe xpixuana layu que.

Que ziana dxi di guidxi ro' de guini xi canaaba' binni guidxi la, ne napa xide gabi ni ca binni ni napa layu, ne zaqueca gacane ni guidxi, ne icaani guirá' ni cue ndu ca layu xtini, ti ganda guiu bidxichi ndaani' guidxi, ne naquiñe guiapa' ca layu ca, ti chu' guidxi sicaru ti cadí guiadxa ni goo binni guidxi ni nabeza ndaani' ñaa ne ndaani' guidxi.

Ca diidxa' ni ma ca luguia ca la?, laani nga usiene ni binni paraa nga zanda ucuí liidxi ti guiapa' ca layu, nisa ne ca guixh' xti' guidxi layu', ne zaca ganda gaca chahui guidxi, ne guirooba'; zaqueca guhuini paraa nga xti' ca binni ni napa xirooba' layu'; ti zaca gaca ni na diidxa' ro' bia' ni ruciene binni rañaa, ti guidagulisaa ca' ne ganda cue ndu' ca' xiiña' xlayu ca', ti zaca guidale xpidxichi ca'; ne guirooba' dxiiña' raña xti' ca', ne guidale ca xiuze ca', ti ganda guirooba' xpidxichi de guirá' xixe binni napa rañaa ne guirá' ru jma ni napa ca', zaqueca guirugu' lu guenda runi dé, ca guixhi xti' guidxi layu, ti cadí chu' binni huati guni ná ca ni.

Xti' guidxi ro' nga guirá' ni guiree ndaani' ca nisa do' xti' casi; guie zicaru ni guire ndaani' ni, casi nisa gas, zidi ni ribee ca nisa do' ca', guie sicaru ni rusaaba ca daani xti' ni, ne guirá' ru ni ribee ni ca la?, xti' guidxi ro ni' ne laa nga guini' para zanda iquiiñe ca ni o paaxa xi guni xcaadxi guidxi ro' dxaaga guidxi ro' zaguita (mexicu). Xti' guidxi ro' guirá'a nisa do' baani ne nisa do' yatí ni dagu lisaa ne guirá'a xiixe ra da' nisa zia casi, guirá' guiiгу' de ra ruzulu ca' ne ra riluuxe ca' casi na ca guidxi ro' dxaaga zaguita (mexicu); ne pa ti guiiгу' o xiixa nisa sia didi laaga ndaani' xti' guidxi ne reda ndaani' ndaani' guidxi zaguita (mexicu) la?, laani nga rindaani' ne ruilui para nga xlayu ne nisa xti' guidxi xtinu, ti guihuini xi guie sicaru zanda cue zaguita (mexicu) ndaani' ca nisa ca' ti zaca na diidxa' ro' bia' gaca ni. Ndaani' ca nisa ca la?, zanda chu biaani ndaani' ca ni, ne zanda uquiixhe xpixuana layu ca ni binni, ne pa ucaa lu guidxi ni la?, ca xa ique ni ruzuhua lu xtiidxa' binni ca sutaagu ca ni ne ma que zudi che binni ndaani' ca ni, ne zaqueca xacadxi nisa xti' guidxi ro'. Ca nisa ni que ñete o que nica lu ca diidxa' ni ma ucuá luguia' ca la?, ra guxhoñe ca ni o ra chi guiana ca ni la?, pa chi guiaana cá ni lu chupa layu la?, ma zaquiiñe binni guidxi ni ne ma xquidxi cabe nga guya' gaca ni.

Lu chupa ndaaga diidxa' ni ma biete niru do' ca la?, ra ribee ndu guidxi ro' guirá'a ni nuu ndaani' xlayu la?, guiruti' zani' xiñee cayuni ni, ne pa guidxi gacaladxi guni xiixa la?, naquiiñe guinaaba cabe ti gu'chí', ni gudii ca xa ique ni ni ruzuhua lu xtiidxa' binni, ti gaca ni casi ná ca diidxa' ro' bia' xti' zaguita (mexicu).

Ca gu'chí' ni gudii ca xa ique ni ruzuhua lu xtiidxa' binni que la?, napa xi chinanda ni casi na diidxa' ro' bia' ti gaca ca dxiiña' ni ribee ndu ca layu xti' zaguita (mexicu) ca jneza ne gaca ni casi ná lu guidapa ndaaga xti' diidxa' rí', ne pa que gaca ni jneza la?, ziaxa cabe ca gu'chí' que ne ma que zuni di cabe dxiiña'.

Xa ique ro' xti' guidxi la?, zanda guini' guiapa' ca layu ne nisa xti' guidxi ne ucuezabe binni cadí guni dxiiña' lu ca ni. Ca ni nexhe gaca la?, diidxa' ro' bia' nga guini' gaca ca ni. Pa guire nisa gas o xiixa guiiba' o guie sicaru ndaaní' ca layu o ndaaní' ca nisa, xti' guidxi ro' zaguita (mexicu) la?, que zanda di guni binni dxiiña' cue ca ni ne que zaca di cabe ti gu'chí' guni ne cabe ni, ti zaca naguxhe diidxa' ro' bia' gaca ni ti guidxi ro' si nga zanda guni ca ni. Gudxi ro' nga nexhe guni ca dxiiña' ni guinaaba' guidxi laa, casi, cu' baaani ndaaní' guidxi ne gaca ne binni ti guchaa guenda nabaani xti'. Lu dxiiña' ri la?, que zanda di ica binni xiixa gu'chí' ti guni ca dxiiña' ni ma biete rí', guidxi ro' si nga zanda guni ca ni ne la si nga zanda iquiiñe ca bidxichi ni gudiini ne iquiiñe ni. En esta materia no se otorgarán concesiones a los particulares y la Nación aprovechará los bienes y recursos naturales que se requieran para dichos fines.

Ne laca xti' guidxi ro' nga ca ni guni guidxi layu ne de ra rugaanda bia' xti' casi bii ra guni baaani' ti ganda iquiiñe ca ni ne guni ca ni guidxi jma nandxo ne gapa xtale dxiiña'. Ne maca nuu nga ra iquiiñe ca ni gudii guidxi layu rí'.

Ne laca zuni xti' guidxi ro' ca bidxichi ni rudii ca nisa do' ni nuu lu xlayuni ca' ne ca ni guidí' cue ni, neca cadí nuuni ndaaní' nisa do', ti zaca na ca binni ni ruza diidxa' ro' bia' ca gaca ni. Ne ca luyu ne nisa do' ni napa guidxi ro' la?, napa xi chu' bia' ni chupa gayua bia' rigaaba' nisa do' La zona económica exclusiva se extenderá a doscientas millas náuticas, medidas a partir de la línea de base desde la cual se mide el mar territorial. Ne pa ndaaní' guidxi zaguita (mexicu), chu' chupa guidxi xti' ne guidagulisaa xlayu ca' o nisa xti' ca la?, naquiiñe chu' ca' tobi si ti guihuni pabia' nga xti' tobi ne xti' xtobi.

Ti ganda sii tuuxa binni ti ndaa layu ni nuu gaxha de xiixa nisa la?, naquiiñe chinandani casi ná xaguite rí':

I. Casi ca binni ni gule ndaaní' guidxi zaguita (mexicu), ca binni ni gule ndaaní' xti' guidxi ro' ne bichaa ca' de guidxi ne ma xiiñí' zaguita (mexicu)

laaca', ne ca binni zaguita (mexicu) ni dagu lisaa laaca nga zanda sii ca' layu ni nuu gaxha de nisa, o icaaca ti gu'chí', ti ganda guni ca' dxiiña' lu nisa do' ti ganda guinaase ca' benda ne guindaaca' gudxi layu pa xi cue ca' ndaaní' ni. Zanda gudii gudxi ro' ca guenda rí' ca binni ni cadí xiiñí' zaguita (mexicu), binni ni zeeda de xtí' guidxi zitu ni cadí nuu lu xlayu zaguita (mexicu), ca binni ri la?, naquiiñe chee cabe ra yoo ra ripa' xquenda binni de xtí' guidxi, ne ziunda ca lu cabe de que, pa guinaaba xa ique xquidxi cabe guzuhua lu xtiidxa' cabe rarí' la?, ziaxha cabe guirá ni ma guzii cabe ni nuu ndaaní' guidxi rí'. Que zanda di sii ca binni rí' ca layu ni nuu gaxha de de nisa do' bia' chupa late gande bi chí' zitu de nisa ne ti gayua bia' zitu de layu de ra dxaaga ca ni.

Gudxi ro' nga guiní' modo raca ladxi guni ca binni ni runi dxiiña' ndaaní' yoo ra riapa' xquenda ca binni de xtí' guidxi ca dxiiña' ti ganda gudii cabe ca binni cadí xiiñi xhiiñi zaguita (mexicu), binni ni zeeda de guidxi zitu ca cueza ndaaní' ti yoo ni iquiiñe ca' ra guni ca xhiiña' xquidxi ca' bia' dxi gaca ladxi cabe guiana cabe guni cabe xiiña' cabe,

II. Ca binni yuudu ni ná ndaaga 130 xtí' gu'chí' ro' bia' rí' zanda sii ca' guirá' ni iquiiñe ca' ndaaní' xiuudu ca' casi na guio'chí' yudu bia' xtica';

III. Ca binni ni runi dxiiña' ndaaní' yoo ra raca ne cabe binni huala'dxí' o ca binni goola guiziidi, ca binni ni ruyuubi guenda nanna xtí' guiiba', gucheeche ca' diidxa' ni rusiidí', ca guenda raca ne lisaa binni, o intiisi dxiiña' jneza la?, que zanda di sii cabe jma yoo o layu ni bia' ma nexhe si, sicabe casi ná diidxa' bia' xticabe;

IV. Ca binni ni rutagu lisaa xpidxichi zanda si ca' layu o xiixa yoo yooxho' huaxa bia' chiquiiñe si ca' jma la?, ma có'.

Ca binni ni rutagu lisaa xpidxichi di la que zanda di gapa cabe layu ra raca dxiiña' biní' jma de gande bi gayu bia' de ni ná nda XV xtí' ndaaga rí' ne gapa cabe yuuze ndaaní' ni o gutoo cabe yaaga huiini.

Diidxa' bia' nga guni chaahui xqu'chí' ca binni ni rutaagu lisaa xpidxichi ca' ne pa bia nga binni zanda guidagu lisaa ti zaca guihuini pa bia' nga layu xtí' cada tobi cabe ne que chu' yaya lade cabe. Ne sicarí' zanda igaaba' xtí' cada tobio cabe. Ne diidxa' ro' bia' la?, zuilui ná xi zanda guni binni ni que cadí xiiñi zaguita (mexicu), ti ganda chu lu ca dxiiña' ni cayuni ca binni rí'. Ne laca diidxa' ro' bia' nga quixhe ca neeza ni gusiene ti gaca ca dxiiña' ni canaaba' ndaaga rí'.

V. ca yoo ra riapa' bidxichi ni ma napa gu'chí' ni bidii ti diidxa' bia' lá, ti ganda guni dxiíña' la?, zanda uquixhe bidxichi ca binni chindaqui xqu'chí' xlayuca' o gu'chí' yoo xtica' lu ná cani runi dxiíña' ndaaní' ca yoo ra riapa' bidxichi ca, ne naquiiñe chinandaca casi ná ca diidxa' bia' xtica', ne que zanda di gapaca' jma layu o yoo bia' nexhe si gapa ca'.

VI. Ca guidxi ro' ne ca guidxi huiini xtí' guidubinaca zaguita (mexicu), zanda sii ca' guirá'a layu o yoo ni iquiiñe ca' ti ganda guni ca binni ni runi xiiña' guidxi ca dxiíña' ndaaní' ca ni.

Ca diidxa' ro' bia' xtí' guidxi ro' zaguita (mexicu), ne diidxa' bia' xtí' ca guidxi ni liibi lisaane lá la?, zabaqui ca' paraa nga zanda iquiiñe binni guidxi ca yoo o layu xtí' tuuxa, ne ca xa ique xtí' ca dxiíña' rí' guini' modo gaca cani casi ná diidxa' bia' xtica'.

Pa binni quixe zaca cayuni dxiíña' ndaaní' xiixa layu xtí' guidxi la?, napa xi quixe ni bia nexhe' guiaxa ndaaní' ca yoo ra riixa gu'chi yoo ne gu'chi layu, ne zanda quixe ni bia' na o bia nexhe' guiaxa ni. Pa tuuxa binni guye yenduu gu'chí' yoo o gu'chí' layu xtí' ndaaní' yoo ra riapa' xqu'chí' yoo o layu, ne ma nuuni ndaaní' que ne guni chaahui ni o guxha ni la?, ma ni guca si despue ca nga gapa ca binni ni runi dxiíña' ndaaní' yoo que pa chu dinde ne cabe layu o yoo que.

Laca zacaca' gaca pa nuu xiixa ni risaca ne cadí ca lá lu gu'chí' xtí' yoo ni ruquixhe xiixa.

Ca dxiíña' ni runi guidxi ro' casi na lu ti ndaa gu'chí' di la?, zaca ni casi na justicia, huaxa zacani casi runi ca binni ni runi dxiíña' ndaaní' ca yoo ra raca xiiña' justicia, ne napa xi gaca ni lu ti beu, ne ca xa ique ni runi xiiña' justicia la?, zanda icaaca' ca layu o ca nisa xtí' guidxi gutoo ca ni o zanda gapa' cani, ni nuu dinde ne binni, ne guiruti' zanda guchia ni ma b'ni' ca xa ique xtí' justicia ra cue ndu' xtiidxa' diidxa'.

VII. ziapa' ca layu xtí' binni hula'dxi' ni nabeeza ndaaní' ca layu ni ma bidii xa ique xtí' guidxi ro' laaca ti ganda ucui ca yoo o cu' ca' bini' lu ni ne laca zacaca' xqu'chí' ca ni. Se reconoce la personalidad jurídica de los núcleos de población ejidales y comunales y se protege su propiedad sobre la tierra, tanto para el asentamiento humano como para actividades productivas.

Zapa diidxa' ro' bia' ca layu xtí' ca binni hula'dxi ti cadí chi xiixa guenda naxoo lade ca'.

Ti cadi chu' ti guenda naxoo lade ca binni huala'dxi ni napa layu la?, diidxa' ro' bia' zapa ca layu xticabe ti ganda ucui cabe yoo lu ca ni, ti zaca zanda guiapa' ca layu, ca nisa ne guixhi ni jma riqiuiñe ndaaní' guidxi, ti zaca jma ziu guenda nabaani lade cabe.

Ti cadi chu' xiixa guenda naxoo lade ca binni hula'dxi' ni ma ucua layu ni bidii xa ique ro' laaca la?, diidxa' ro' bia' nga gu'ya' cue ndu' ca binni rí' xlayu ca' ne zaca, zacani para cada binni napa layu ra ñaa. Ne zaqueca zabaquini xi zanda guni ca xpixuana ca ni ti ganda guidagu lisaaca' ne laaca' zanda guidagulisaca' necabe gudxi ro' la?, ne xtobi ti ganda gaca dxiiña' lu ca; ne, pa gaca ni ca binni ni napa layu ni bidii xa ique ro' guidxi ti guni dxiiña' lu ni la?; ne pa ma que ganda guni dxiiña' lu ni la?, napa xi gudiini xtobi ni zanda guni dxiiña' lu layu xti'.; zaqueca ca xa ique layu ni riguiizi layu lu binni zuya ca' ica binn xqu'chi xlayu ca'. Ne pa icaa xti' binni ni la?, naquiuiñe gaca ni ná diidxa' ro'.

Ndaaní' ca layu ri la?, que zanda di gapa tuuxa jma layu bia 5% ne ni maca ca icaa. Ne pa icaa tuuxa xtale layu la?, napa xi chinandacabe casi na ndaga XV xti' gu'chí' ro' bia' rí'.

Diidxa' ro' bia' nga gu'ya' gaca guirá' ca guenda ruchaaga xtiidxa' xti' guirá' ca binni huala'dxi' ni ma ucua ti layu ni bidii guidxi ro' la ti guni dxiiña' raña' ne laca zadxiña ca binni ni que gapa xqu'chi' ni. Ca binni ni cú' guidxi nga zanda gu'ya' gaca guenda ruí' diidxa' rí'(comisariado ejidal ne xti' xa ique ni ribicabe presidente de bienes comunales) ne casi na diidxa' ro' bia' nga gaca ni, ti ca diidxa' ni gui cabe cabe ca la?, chine cabe ni ra un ca xa ique ro' xti' guidxi.

Guenda rinichahui layu, nisa ne guixhi' la?, zaca ni casi na diidxa' ro' bia';

VIII. Ni que zaca la?, ni ca rari':

a) Que zanda di ica ca xa ique xti' guidxi, ca politicu ne ca xacaadxi xa ique, layu xti' ca binni guidxi ne ca binni ni napa layu raña, ne que guni cabe ni diidxa ro' ni ucua lu gande bi gayu lu beu san juan iza xhiapa xhono gayua gayu ne xhoopa lu, ne ni xcaadxi guidxi ro';

b) Laca que zanda di icaacabe o gutoocabe layu, nisa, ne guixhi, xti' ca binni huala'dxi' ni nabeeza ndaaní' ñaa ni b'ni' yoo ni rabi cabe secretaria xti' fomento ne hacienda o ni biidi tutica xa ique guidxi xti' guidxi ro', ni

biete niru do' xti' beu pascua lu iza xhiapa xhono gadxe gayua xhoopa, ni ucuca de dxique la?, ne dede yanna, ni maca ucuca ca binni guidxi.

c) Guirá ca guenda rigu' bia' layu ni na ndaaga ni ma biete niru do' ni ca luguia ca la?, ni guni xa ique xti' guidxi huiini o gudxi ro' la?, quezanda di icaacabe guni xticabe o cu' bia' cabe ca layu, nisa ne guixhi' ni maca biazí lu ca binni huala'dxi' o ni maca ucaaca'.

Ca layu ni maca ucuacabe ni bizete diidxa' ro' ni ucuca lu gande bi gayu lu beu pascua iza xhiapa xhono gayua gayu ne xhoopa que la?, zaree cani de lu ca diidxa' rí pa ma napaca cabe chii iza de nuu cabe lu ni, ne pa que tiidi ni jma de chupa late gande bichii bia de layu.

IX. Ra guilaa o ra guiazí layu lu bnini la?, ne ca binni ni nabeeza ndani guidxi huiini que, que chu' ladxi ca' bia' gundaacabe o bidiicabe la?, zanda guini ca' xiñee guca ni zaque, ne zanda guchia ca', ca dxiiña' ni guca ra ucuca' xcaadxi binni layu ni biazí que.

X. (diidxa' bixa)

XI. (diidxa' bixa)

XII. (diidxa' bixa)

XIII. (diidxa' bixa)

XIV. (diidxa' bixa)

XV. Ndaani' guidxi zaguita (mexicu), la?, que ziu di tuuxa gapa jma o xirooba' layu ñaa que xtobi, ti maca nexhe pa bia' nga zanda gapa cabe.

Zanda gabinu ti layu rañaan nga, ti layu ra rizee o de gudxa ni que tidi de ti gayua bia' layu, ra zeda gaca casi ca layu rí.

Ti layu rañaan la?, zeda gaca ca ndí, ti bia' layu ni rizee, ne chupa ni que rizee ni raca dxiiña' biní lu ra riaba si nisa guie, ne tapa bia' layu ra goo yuuze, ne xhono de guixhi', ne layu biidxi ni que rapa guixhi'.

Laca zanda gabinu ti layu rañaan nga ni gapa tuuxa, ra ti layu ni que tidi jma de ti gayua chupa late gande bichii bia' layu, ra riu biní xiaa, ne pa rizee ni; ne chona gayua pa ruzuhucabe yaga bidua, nite, (biziaa yase), duba' ni

raca doo, yaga tini ni rigaa, ziña, yaga uva, yaaga aceituna, quina, vainilla, bizia, duba' xtí' nisa dxu'ni', bia gueta o yaga cuananaxhi.

Laca zanda gabinu ti layu rañaan nga, ra napa tuuxa binni yuze huaxa que chidi dí' jma de gayu gayua yuze ro', ne ganda गयाana láacame bia' xlayu, ne pa cadí' yuuze ni la?, zanda gaca ni bihui, o dendxu'', ti zaca na diidxa' ro' bia' gaca ni.

Pa lu ca layu ni biete rari' dí' xpixuana ca ni guzaa biasa, ti ganda guizee ni o cue nisa lu ni la?, neca ma guca chahui ni, zaca ru ni ti layu rañaan ne que zadxa di laa ni, neca tiidi ni bia' layu ni ma naguixhe ndaaga di gaca ni, huaxa naquiiñe chinanda ni casi ná diidxa' ro' bia'.

Pa lu ca layu rañaan ra riapa' yuuze, gaca chahui ti ganda gaca dxiiña' biní' lu ni la?, que zanda di gaca ni jma bia' layu ni ma biete lu ca ndaaga chupa ne chonna, xtí'' diidxa' ro' bia' dí', ne naquiiñe gaca ni bia' layu ni ma naca ante gaca chahui ni;

XVI. (Diidxa' bixa)

XVII. Ca xa ique ni ruzuhua' lu xtiidxa' binni ne xtiidxa' ca ni ca lu gu'chi' xtí' ca guidxi ca la?, zuni ca' diidxa' bia' ni guini' ne gaca ne ni ca lu ca ndaaga IV ne XV xtí' ndaa rí'.

Ca binni ni napa layu ne tiidí' jma que bia' nexhe icaacabe la?, zaguixe ca' o guiaxha ca' layu dede lu ti iza bidii cabe lá quixe ni. Ne pa tiidi bia' dxi ni guta gaca ni que la?, zabi cabe binni cadoo ni. Ne laca zuya cabe xi ná diidxa' ro' bia' ti guni cabe ni ná.

Ca diidxa' bia' huiini xtí' tuuxa guidxi la?, zapa ca' ne zuni chahui ca' ca layu o bidxichi xtí' ca lisaa ni nabeeza ndaaní' guidxi que, ne guini xi guirá nga ni zanda gúni xtí' ca binni que, ne guini' ca' deque, que zanda guidoo ni, ne que zanda di guiaxa ca' binni que, ni ma napaca' o quiixe ca' zaca ni ma ucuaca';

XVIII. Zanda guibia ca gu'chi' layu ni gúzi' o ni ucuca ca xa ique guidxi ni gúri dede ti guixhiapa' xhono gayua gaadxé nuu xhoopa iza lu que dede nagasi, ti gu'ya' cabe xi guirá' layu, nisa ne guirá' ni risaaca ni guzii ca' xtí' guidxi ro', ne pa gúnina ni guenda nazaaca xtí' guidxi la?, zanda gabi cabe xa ique guidxi que guxha ni ucuca que, enquita si pa guni na ni guenda nazaaca xtí' guidxi;

XIX. Casi na gu'chí' ro' bia' ri la?, guidxi ro' zuuya guni ca yoo ra riapa' xquenda ca binni raña'a ca dxiiña' jneza, ti ganda guipa ca layu xtica' binni raña'a, ti cadí chu' dinde ca' ne laaca guidxi ro' guisiene laaca' de ca diidxa' rí' ti cadí chu' tu quite' laaca.

Ca binni ni runi dxiiña' ndaaní' ca yoo ra riapa' xquenda ca binni raña'a ca la?, guidxi ro' nga gu'ya' guni cabe xhiiña' cabe, ne gu'ya' guirá, ra nuu dinde binni raña'a runi ra ridxaaga xlayu ca' ne zaqueca guirá ca ni guizacalú ca binni huala'dxí' ni napa layu raña'a.

Ti ganda gaca ca dxiiña' ri la?, diidxa' ro' bia' zucui yoo ra guipa' xquenda binni raña'a, ne laani que zaquiiñe di ni xtipa' xtoobi ra guni dxiiña', xa ique ro' guidxi nga gu'ni' tu ca xa ique ni ruzuhua lu xtiidxa' binni nga guni dxiiña' ndaaní', ne pa que cayuni ca binni di dxiiña' la?, jma dxe xa ique ni ruzuhua lu xtiidxa' binni naga guni ni.

Diidxa' ro' bia' nga quixhe ca yoo rí', ne

XX. Guidxi ro' zuyuubi xi guirá' zanda gaca ne ca binni ni nabeeza ndaaní' ca ñaa, ti ganda guni ca' dxiiña' ti zaca guihuini caroba xiiña' guidxi ro', ne zacane ni binni gunichahui xlayu ra gudii ni laaca' bidxiichí'. Ne zaqueca zabee ni ti gu'chí'bia' ti gaca ne gurooba' ne guidoo ni gudii layu xtica' ti zaca gana binni xi cutoo cabe.

Ndaaga 28. Ndaaní' guidxi ro' zaguita (mexicu) la?, que zanda di guiu ti binni gutaguna ti xiixa ni caquiiñe guidxi casi xuba' o xiixa ru', ne que ziu di tu la uquiixe binni ti cayuni xiiña' ti zaca ná diidxa' ro' bia' gaca ni. Ne cadí ná ca binni ni napa tienda ro' ca la?, zanda gúni ca ni.

Ne pa laacabe guni cabe ni la?, zusabana diidxa' ro' bia' laacabe, ne ca binni ni runi xiiña' justicia la?, zazabinanda ni gutaguná ni jma riquiiñe guidxi casi xuuba' ne bizaa ne gutoo ca ni jma caru lu binni guidxi ti zaca ganda gaxha ca' jma bidxichi.

Ca diidxa' ro' bia' nga quixhe' pa bia' nga guisaca ca ni jma riquiiñe binni ndaaní' liidxi, ne zaqueca laaca nga cuaqui chahui ca' xiixa ni chi guidoo ca' ne gucheche ná ni lu ca ni rutoo ti cadí chu' tobi si tu gutagú ná ca ni ne gusisaca ni jma, de ni bia' ni ma nexhe guidoo ni. Zapa diidxa' ro' bia' ca binni ni rizii ne zacane ni laaca gúsisaca ca' guenda lisaa xtica' ra chisiica' xiixa ni gutoo ca'.

Que zanda di guini' cabe de que guidxi ro' gutaguná xiixa casi: ca diidxa' ni riapa' ne rica lu gu'chi' o ca diidxa' ni rica lu guiiba'; nisa gas, ne guirá ni riree ndaan' guidxi layu; biaani ne guirá ru' ná diidxa' ro' bia' ne guini' ca xa ique ni ruzuhua lu xtiidxa' binni. Ca guenda riui diidxa' guiiba' ruzaabi diidxa' ne ca tren laca ni nga jma riquiñe ca ni ti ganda guidaagú lisaa binni de ti guidxi ne xtí guidxi casi n acá lu ndaaga 25 xtí gu'chi' ro' bia' rí; ne ra guiana ni lú ná guidxi ro' la?, laa nga gapa ni ne la gu'ya' tu zanda gúdií gu'chi' ti ganda guni ne ca ni dxiiña' casi na diidxa' bia' ni ca ni lú.

Guidxi ro' zapa binni ni guni xhiiña', ne zapa tienda ro' ra guidoo xtí ne laaca zadagulisaane binni guidxi guni dxiiña' o laca zanda guidagulisaane ca tienda ro' ti ganda gunica' dxiiña'.

Zapa guidxi ro' ti yoo ra guiapa' bidxichi ne que zaquiñe di ni xtipa xtí xtobi ti ganda guni xhiiña'. Ni racalaadxi ni nga cadí quiete lu guenda risaca xpidxichi guidxi, ti zaca zuzuhua' dxiiçh' guidxi ro'. Nin ti xa ique que zanda di uca' ca binni ni runi dxiiña' ndaan' ca yoo ra riapa' bidxichi xtí guidxi ro' ca' uquiixe bidxichi.

Cadí na binni xiñe guidxi ro' si nga zanda gúza' bidxichi ne cu' ni ndaan' ca yoo ra riapa' bidxichi que. Ca xa ique ne yoo ra riapa' bidxichi ca la?, zutagulisaaca' xtiidxa' ca' casi ná diidxa' ro', ti ganda guni yoo ra riapa' bidxichi ca dxiiña' jneza, ne zaqueca ra uquiixe bidxichi la?, laa si nga nana xi modo guni ni.

Ca binni ni gúni dxiiña' ndaan' yoo riapa' bidxichi ca la?, xa ique gudxi ro' zaguita (mexicu), ne xtiidxa' ca xa ique ni ruzuhua lu xtiidxa' binni ca nga guini' tu la zanda guni dxiiña' ndaan' ni, ne pa cadí cayuni ca binni di dxiiña' la?, jma dxe xa ique ni ruzuhua lu xtiidxa' binni nga guini tu laa, zanda gúni dxiiña' ndaan' ni; ne zuni cabe xiiña' cabe xtubi cabe bia' dxi si nexhe guni cabe ni; ne zanda guiree cabe de lu ca dxiiña' ca pa guni cabe xiixa guenda naxoo, ne ma que zanda guni cabe xtí dxiiña', zanda guni cabe xtí dxiiña' casi guenda ruzuhua lu xtiidxa' yoo ra riapa' bidxichi, ne ca binni ni que gapa bidxichi casi; ca binni ni biziidi para gusiidi, ca binni raca ne binni guidxi, ca ruyubi guenda nana xtí guiiba', n era raca ne cabe guenda ne xpia binni hual'dxi'. Ca binni guni dxiiña' ndaan' yoo ra riapa' bidxichi que la?, zanda guxhuuba donda cabe laaca casi, ruxhuuba donda ca polticu ca, ne zaca ni casi ná ti ndaa 110 xtí gu'chi' ro' bia' rí.

Cadí ná cabe cutaguná ca binni ni napa tienda ro' ca, ca xtí ne gutooni lu ca binni ni nabeeza, ndaan' xtí guidxi ro' ni cadí xtí zaguita (mexicu),

huaxa zanda guni cabe ni la?, ne xtiidxa' xa ique ro' xti' guidxi zaguita (mexicu) la?, o ne xtiidxa' xa ique xquidxi cabe.

Ca diidxa' bia', laasi la?, o ne xtiidxa' ca xa ique ni ruzuhua lu xtiidxa' binni zanda guxha ca' xiixau diidxa', o xiixa gu'chi' ni ucua' ni yegú lisaa ra gutoo xti' ndaa guidxi ro' ni cadi xti' zaguita (mexicu), pa na binni guidxi gaca ni la?, zanda guni cabe ni.

Ne laca que zanda di ná cabe de que laca naca ti guenda rutaguná nga ca dxi si ni icaa ca binni runnda, guyaa o ca ni rucaa diidxa guie' ca, ra gusuhuini ca' xiixa ni b'i'n' ca' neza lu binni, ne ra icaa ca binni d'i' xiixa ni gaca ne laaca lu ni runi ca'.

Ne xtiidxa' diidxa' ro' bia' la?, guidxi ro' zanda gudii xiixa gu'chi' binni ti ganda gapa xiixa carru gune dxiiña', zuni ni paaxa xi ná diidxa' bia'. Ca diidxa' ro' bia' nga gu'ya' gaca ca dxiiña' r'i' jneza, ti ganda gaca ne ca ni binni, ti cadi chu' binni lu xiixa guenda naxoo.

Guirá ni gaca ladxi guidxi guni la?, napa xi chinanda ni ni ná gu'chi' ro' bia' r'i', ne naquiiñe gaca ni casi diidxa' bia'.

Guidxi ro' zanda gaca ne ca dxiiña' ni raca chupa chona si gubidxa, ra gudiini laa ti ndaa bidxichi, huaxa que chi gaca ni xtale ti que guxie xpidxiachi. Ne laaca guidxi ro' nga gu'ya' gaca ca dxiiña' ca' jneza de ra guzu lu ni la?, ne ra guiluuxe ni.

Ndaaga 29. pa gueeda chu' binni de xti' guidxi ro' ni cadi xti' mexicu, ndaani' ne gueda gucheela niid' ndaani' guidxi guti' o ucalu ca binni ni nabeeza ndaani' guidxi ri la?, xa ique guidxi ro' zaguita (mexicu) ne xtiidxa' ca xa ique ni ruzuhua lu xtiidxa' binni la?, zanda guini ca' gabi ca' guiazaca', guidxiluca', ca binni ni seda guxhata ñee xquidxi ca'; zanda guni ca ni huaxa bia' dxin si nexhe ucaalu cabe ca binni r'i', ne cadi na cabe guiaana ne cabe tuuxa binni. Ra gusaana dxi cabe de guidxii lu cabe la?, ca xa ique ni ruza' diidxa' bia' la?, zanda guinica' de que ca gudxilu ca xa ique ni ruzuhua lu xtiidxa' binni cani cayaca r'i', ne pa cadi cayuni ca xa ique ni ruzaa diidxa' bia' ca dxiiña' la?, zanda ucuidxi cabe laaca gu'ya' ca' xi zanda guni ca'.

Diidxa' lá II

Ca xiiñi' zaguita (mexicu)

Ndaaga 30. Pa gacu xiiñi' zaguita (mexicu) la?, zanda gale lú ndaaní ni la?, o zanda guchaa lu de guidxi pa chibiilu'.

A. Xiiñi zaguita (mexicu) nga ca ni gale ndaaní xquidxi:

I. Ca ni gale ndaaní ca xquidxi zaguita (mexicu) neca de gadxe guidxi ro' laaca'.

II. Xiiñi' ca guna ne nguii xiiñi' zaguita (mexicu), ni gule ndaaní xquidxi ca gringu la?, laaca xiiñi' zaguita (mexicu) laaca, ne zaqueca xiiñi' ca guna ni gule ra que;

III. Ca ni gale ndaaní xquidxi ca gringu, xiiñi' ca gunaa ne nguii ni ma bichaa xquidxi.

IV. Ca ni gale ndaaní balaaga ne ndaaní guiiba' ripapa xti' zaguita (mexicu) neca nuu ca xti' guidxi la? laaca xiiñi' zaguita (mexicu) laaca, neca ndaaní ca ni riqiuiñe cabe ra nuu dinde guidxi la?, o ca ni riqiuiñe binni para chi gutoo xti' guidxi;

B. Laaca xiiñi' zaguita (mexicu) ca ni guchaa de guidxi gueeda bí ndaaní ni:

I. Ca gringú ni ica gu'chi' ni gudii yoo ra riapa' xquenda binni ni cadí xiiñi' zaguita (mexicu) laa. Los extranjeros que obtengan de la Secretaría de Relaciones carta de naturalización.

II. Ca gringa o gringu ni guchaaga ná guná o nguii xiiñi' zaguita (mexicu), ni nabeeza ndaaní guidxi ca xquidxi zaguita (mexicu), ne guni ca guirá' guinaaba diidxa' ro' bia' laaca.

Ndaaga 31. Ni naquiiñe guni ca xiiñi' zaguita (mexicu):

I. Guseenda ca xiiñi' ca' che guiziidi ca' ndaa ni ca yoo ra riziidi ba'du' gunda ne uca' naca ni xti' guidxi la?, o co' ne guiziidi ca' xiiña' dxu' soldadu casi ná diidxa ro'.

II. Guidxiña ca' ndaaní dxi ne xigaaba dxi, ni cuaqui xa ique guidxi huini ra nabeeza ca, ti ganda guiziidi ca' xi guirá' guenda napa binni, ne guiziidi ca' uca guí ca' guiiba' ro' ne guziidi ca' guirá xiiña' ca dxu' soldadu;

III. Uca' diaga ca' pa uca' riidxi guidxi ro' laaca, ti gaca ne ca' guidxi pa nuu dinde ne xti' guidxi ro', ti zaca gudxii lu ne ca' guidxi, ti que chu' tuuxa guxhate ñee yanni ca', naquiiñe gaca guirá'a ni canaaba ni dí, ti zaca ná diidxa' ro'bia' gaca ni.; ne

IV. Naquiiñe gaca ne ca' guidxi ti ganda guirooba' xpidxichi, neca nuu ca' ndaaní ca guidxi huini huala'dxi' xti' zaguita (mexicu) ti zaca nabaquí diidxa' ro' bia' gaca ni.

Ndaaga 32. Diidxa' ro' bia' nga gu'ya' que chi gapa binni chupa gu'chí xti', xti guidxi ti cadí chu' ti bichenda de pade pe' nga laa, pa xiiñí zaguita (mexicu) laa la?, o co'.

Pa tuuxa gacaladxi chu' lu ca dxiiña' xti' guidxi ri la?, naquiiñe gaca cabe xiiñí zaguita(mexicu), ni gule ndaaní' ni, huaxa ca binni ni ma bichaa de guidxi la?, ma co' ti zaca na gu'chí ro' bia' rí' gaca ni. Ne zaqueca zaca ni, de lu ca dxiiña' ni gulu' ná xcaadxi diidxa' ro' bia' xti' yoo ra ria' diidxa' bia'.

Ca binni de xti' guidxi ni cadí xiiñí zaguita (mexicu) la?, que zanda di chu' cabe lu ca dxiiña' xti' guidxi pa nuu dxi guidxi, ne laca que zanda di gaca cabe gendarme, pa gacaladxi cabe chu' cabe lu ca dxiiña' rí' la?, naquiiñe gaca cabe xiiñí zaguita (mexicu), ni gule ndaaní' ni.

Laaca ndica diidxa' chinanda ca binni ni rusa balaaga ro' ne ca binni ni rusa guiiba' ripapa' ne guirá'a' ca binni ni runi dxiiña' ndaaní' ca ni ra chigutoo ca' xiixa la?, naquiiñe chine ca' lari ndxo' xti' zaguita (mexicu) cue' ca ni. Zaqueca ca binni rinu dxiiña' ne napa guenda ndaaní' ca yoo ra riree ca, ca balaaga ro' ne guiiba' ripapa ca la?, naquiiñe gaca ca' xiiñí zaguita (mexicu).

Ca xiiñí zaguita(mexicu) la?, niru doo laaca nga icaaca' gu'chí' ne dxiiña' ndaaní' ca yoo ra raca xiiña' guidxi, neca caru gusaaca iza ni nexhe gapaca' ti ganda gaca ca' binni huanisi, r a ma nuu ca' binni rí' dxiiña' la?, ma zanda icaa ca binni ni cadí xiiñí zaguita (mexicu) dxiiña' guni ca'.

Diidxa' ni riree chu de xt' diidxa' III

Ca binni ni cadí xiiñi' zaguita (mexicu)

Ndaaga 33. Ca binni ni cadí xiiñi' zaguita (mexicu) nga, ca binnini cá lu ndaaga 30. Son extranjeros, los que no posean las calidades determinadas en el NDAAGA 30. Laaca be la?, napaca ca guenda ni rudii ca diidxa' ni riree chu de xt' diidxa' I, ni ca lu niru doo xt' gu'chi' ro' bia' ri'; pa ca binni ri' cadí cayuni ca jneza ndaaní guidxi ri la?, xa ique ni runi dxiiña' ndaaní ca yoo ra ria' diidxa' ro' bia' ca la?, zanda cue o guiladxi laacabe de ndaaní guidxi ri'.

Ca binni ni cadí xiiñi' zaguita (mexicu) la?, que zanda di chu' cabe lu ca dxiiña' ni runi ca politcu xt' guidxi ri'.

Diidxa' ni riree chu de xt' diidxa' IV

Ca binni huanisi xiiñi' zaguita (mexicu)

Ndaaga 34. Xiiñi' zaguita (mexicu) nga ca gunaa ne nguiiu ni ma napa ca ndí: Son ciudadanos de la República los varones y mujeres que, teniendo la calidad de mexicanos, reúnan, además, los siguientes requisitos:

I. Ni ma bisaa chíi bixhono iza, ne

II. Guibaani pipi do'.

Ndaaga 35. Ni racaladxi diidxa' ro' bia' ri' guni ca binni huanisi xiiñi' zaguita (mexicu):

I. Che guzee ca' lu ca gu'chi' ra chindi cabe xa ique guidxi;

II. Zanda cui cabe laaca', gaca ca' xa ique guidxi, o cui cabe laaca' guni xiixa xhiiña' guidxi, huaxa naquiiñe gapaca' ca guenda ni naguixhe diidxa' ro' bia';

III. Zanda gudaagu' lisaa ca' ne gutaagu ca xtiidxa ca' ti gu'ya ca' guirá ca ni cayaaca ndaaní' guidxi rí';

IV. Zanda guinaaze ca' guiba' ro' xti' ca dxu'' soldadu, ti ganda gapaca' guidxi ro' la?, ne ca yoo ro' xti' guidxi casi na ca diidxa' ro' bia'; ne

V. Zanda sii ca' ne gutooca' ni raca laadxi ca'.

Ndaaga 36. Ni naquiiñe guni ca binni ni nabeeza ndaaní' guidxi zaguita (mexicu):

I. Che ca' chi ica laaca' lu ca xqu'chí' ca binni ni runi dxiiña' ndaaní' yoo lahui xti' ca', ne guini' ca' pa xi ni risaaca napa ca', xi dxiiña' runi ca'; ne laaca' naquiiñe chee ca' chi ica laaca ra rica laa binni ni nabeeza ndaaní' guidxi rí' ti ganna guidxi pa bia' binni nga nabeeza nadaani, ti zaca naguxhe diidxa' ro' bia' gaca ni.

Binni ne guidxi ro' nga napa ca' xi gu'ya ca' gapa binni gu'chí' ni guíni' de que xiiñí' zaguita (mexicu) laaca' ti zaca nabaquí' diidxa' ro' bia' gaca ni;

II. Uca' diaaga ca' pa cuiidxi guidxi ro' laaca';

III. Ná diidxa' ro' bia' la?, naquiiñe che cabe chi guzee ca' lu ca gu'chí' ra chindi cabe xa ique xquidxi cabe;

IV. Zanda cui cabe laaca ti guni ca' dxiiña' ndaaní' ca yoo xti' guidxi ro' o ndaaní' ca yoo xti' guidxi huiini xtica' huaxa ra guni ca' dxiiña' ri la?, napa ca' xi guiiixa ca'; ne

V. Zanda guni ca' dxiiña' ndaaní' yoo lahui' ra nabeeza ca', ne laaca zanda guni ca' dxiiña' rua' mexa ra chindi cabe xa ique guidxi.

Ndaaga 37.

A. Nin ti xiiñi zaguita (mexicu) ni gule ndaaní', que zanda di' gaxha cabe laa gu'chí' ni na de que xiiñí' zaguita (mexicu) laa.

B. Ca binni bichaa de guidxi ne b'ni' xiiñí' zaguita (mexicu) laaca la?, pa gucheeca' lu na la?, ziaxha ca gu'chí' ni ná de que xiiñí' zaguita (mexicu) laa, ne ca ni ca xaguete ri nga laaca ni:

I. Pa guínaaba' ca' de que gaca ca' xiiñi' xti' guidxi ni cadi xti' zaguita (mexicu) la?, o pa gacaladxi ca che ca' xti' guidxi ne guíni de que cadi xiiñi' zaguita (mexicu) laaca', o iquiñe ca' xqu'chi' xti' guidxi ra che ca paaxa ra',

II. Pa cueza ca gayu iza ndaaní xti' guidxi ni cadi xti' zaguita (mexicu).

C. Ziaxa ca' gu'chi' o ca guenda ni gúdii zaguita (mexicu), laaca pa guni ca' ca ni ca xaguete rí':

I. Pa che ca' xti' guidxi ne guíni ca pur xti' guidxi ni cadi xti' zaguita (mexicu);

II. Pa che ca' chi gúni ca' xiiña' xti', xti xa ique ro' guidxi ni cadi xti' zaguita (mexicu) la?, ne que gabica, ni ca xa ique ni ruzuhua lu xtiidxa' binni ni runi dxiiña' ndaaní ca yoo ra ria' diidxa' bia';

III. Pa icaaca' xiixa xti', xti guidxi ni cadi xti' zaguita (mexicu) ne gusichahui ne cani, ne sin xtiidxa' ca xa ique ni ruzuhua' lu xtiidxa' binni la?, ziaxa ca' ca guenda rí';

IV. Pa icaaca xiixa gu'chi' ni gudii ca xa ique ro' xti', xti guidxi ni cadi xti' zaguita (mexicu) laaca', ne sin xtiidxa' ca binni ni runi dxiiña' ndaaní ca yoo ra ria' diidxa' bia' la?, ziaxhaca' ca guenda rí', ni zanda si icaacabe nga ca diidxa' guie', ne ca diidxa' ni gusiidí binni;

V. Pa gaca ne cabe, tuuxa binni o xa ique ni cadi xiiñi' zaguita (mexicu), o gacaladxi cabe guzuhua cabe lu xtiidxa' ca' lu ti guenda naxoo neza lu tuuxa xa ique bia' xti', xti guidxi ni cadi xti' zaguita (mexicu), ne guíni cabe cadi gapaca' ngue donda ni cayaani luguia ca que, ne

VI. Xcaadxi diidxa' ni cuaqui' o guni diidxa' ro' bia'.

Ca diidxa' ni ca lu II de ra nuu IV ca la?, ca xa ique ni ruzuhua lu xtiidxa' binni ca la?, zuni ca' diidxa' bia' ni gu'ya' gaca ca dxiiña' rí', ne xi gacaladxi ca binni ri gaca o guni ca la?, zanda gúdii cabe ti gu'chi' ca binni ca, ti ganda gunica' ca ni ca lu guía ca', ra guizaa dxi nabaqui' diidxa' ro' bia' ne ra guluí cabe ca gu'chi' ni ma ucua cabe.

Ndaaga 38. Ca guenda ni ma ucua' ca binni xiiñi' zaguita (mexicu) la?, zanda guiaxha' ca ni o cueza dxi ca ni paque guni ca' ni ná xaguete rí':

I. Pa que guni cabe ni ná ndaaga ni 36. Ca guenda ni ma biaxha cabe la?, zabisgueta canil u ná cabe de lu tubiiza o jma pa za ná diidxa' ro' bia';

II. Pa caguiiba' ti donda ique cabe ra bĩni' naabe xquenda xtoobi, ne cu' ni laabe ndaaní liidxi guiiba';

III. Pa ma nuube ndaaní liidxi guiiba' ne gueda gatibe;

IV. Pa saacabe xhuudxi cabe ne que guni cabe dxiiña', casi nabaqui diidxa' ro' bia' guni cabe;

V. Dede niru do' dxi sabi nanda justicia laacabe ne de ra guiree xia xtonda cabe; ne

VI. Ma gaxti' ru' ni ganda gulaa laacabe.

Zuya diidxa' ro' bia' paraa nga zanda guiaxha cabe ca guenda ri' ne xi zanda guni cabe ti guibigueta' ca ni lu ná cabe.

DIIDXA' LÁ GUIROPA

Diidxa' ni riree chu de xtí diidxa' I

Ca xhiiña' xa ique guidxi ne xhiiña' ca binni xquidxi

Ndaaga 39. Xtipa' guidxi ro' la?, nuu ni lu ná binni guidxi. Guirá' xtipa' xtí guidxi la?, riale ni ndaaní' guidxi, ne racane cani ti guirooba' ni jma. Ora gacaladxi guidxi la?, zanda guchaa ca dxiiña' ni runi xa ique guidxi ti lu ná nga nuu guenda ca'.

Ndaaga 40. Pa ná guidxi guidaagú gaca ti guidxi ro' nayaa, ra guirá'a ca cui' xa ique xquidxi ca, ni jma gacaladxi ca' gaca xa ique xtica'; ne ca gadxe gadxe ni ná' ique ca' guni ca' napa ca xi chinada ca' ni ná diidxa' ro' bia' guni ca'.

Ndaaga 41. Sin xtipa' xtí' ca binni ni runi dxiiña' ndaaní' ca yoo ra ria' diidxa' bia' ca la?, binni guidxi que zanda di guni xiixa ni gacaladxi, paaxa ca binni ri ne ca guidxi ro' xtí' zaguita (mexicu) gutaagu ca xtiidxa' ca la?, zuni ca' dxiiña' bia' ra ruganda si xtiidxa' ca ne xtipa ca' casi na guí'chí' ro' xtí' zaguita (mexicu) rí' ne xquí'chí' ro' bia' xtí' xquidxi ca' la?, napa ca ni xi guzuuba' ca ni xtiidxa' guí'chí' ro' bia' xtí' zaguita (mexicu).

Ra guidxa ca binni ni runi dxiiña' ndaaní' ca yoo ra ria' diidxa' bia' ca la?, zaca ni cada lu chonna iza, ne binni guidxi nga che guzé lu guí'chí' ti gu'ya' tu laa zanda gaca ni la?, ne gu'ya' ca' gaca ni jneza casi ná ca diidxa' rí'.

I. Ca políticu ca nga, ca ni jma raca laadxi ca' guni ca xhiiña' guidxi; ne diidxa' ro' bia' nga guiní' xi guirá' naquiiñe gúchiña ca binni rí' ti ganda chu' ca' lu ca dxiiña' ra chindí binni xa ique guidxi. Ne ca políticu ro' xtí' zaguita (mexicu) la?, zanda chu' ca lu ca dxiiña' ra chindi binni guidxi xa ique ro' xtí' zaguita (mexicu), xa ique guidxi la?, ne guidxi huiini.

Ca políticu ca nga guni dxiiña', gusiidi ne uca' riidxi ca' binni guidxi che chi guzee lu guí'chí' rua meexa ra chindi cabe xa ique guidxi, ne gaca ne cabe guidxela ni guzuhua lu xtiidxa' guidxi zaguita (mexicu) ne laaca ca binni ri nga gutaagu lisaa binni guidxi, ti ganda ganna binni guidxi de guirá ca dxiiña' ni chi gaca rí', ne naquiiñe chinanda ca' ca dxiiña ni baqui diidxa' ro' bia' ti ganda cuidxi cabe binni che chi guzé lu guí'chí' xtí' cabe ndi la?, zaca ni nagachí' ne binni nga ma nana tu pur nga che chi guzé. Binni guidxi ni ma huanisi si nga zanda guni ti partidu ne guidagulisaa

laacabe; ne que zanda di guidaagu lisaa ca binni rí, ca binni ni maca napa ti guenda ni que gapa ca politicu ne ni ru gacaladxi ca guni ca'.

Ca xa ique ni ruya' che binni che guzee lu gu'chi' la?, zugú rua ca' lu ca dxiña' ni raca ndaaní si dxiña' xti' ca partidu politicu casi ná gu'chi' ro' bia' rí la?, ne diidxa' bia' ro'.

II. Zuya' diidxa' ro' bia' gapa ca partidu politicu ca bidxichi ni guni ne ca xhiña' ca' ne laaca laa nga quixhe neeza guni cabe xhiña' cabe, ne naquiiñe ganna cabe la?, de que jma risaca xpidxichi guidxi ni cacaacabe que xpidxichi tuuxa.

Ca xpidxichi guidxi ni icaa ca partidu politicu ni que guixha' ra ma biluuxe ca guenda ribii xa ique guidxi la?, sacaaca chupa si ndaa bidxichi ti ganda guni ca dxiña' ni maca runi ca' ne gapa ca' xtale binni ni bizee lu gu'chi' xtica'. Zacaaca ni sicari', ne casi na diidxa' bia' ro' bia' nga icaaca ni:

a) Ca xpidxichi guidxi ni icaa ca partidu politicu ti ganda guni ca dxiña' ni maca runi ca la?, zacaacabe ni cada iza, ne pa che binni chi ica lál lu ca gu'chi' xti' yoo ra rie binni ica lál ti gapa credencial la?, bia' binni guidxiña' ca la?, zadale ne ni bia' ti dxi dxiña' ni riixa binni ndaaní guidxi ro' zaguita (mexicu), bia' gueda gúdií ni ca la?, bia' ca nga icaacabe.

Lu bidxichi ni ma ucuacabe que la?, zaree gande nuu chií beexu lu ti gayua, ti guiazi ni lu xcaadxi partidu que, ne biaca biaca nga icaacabe ni, ne xcadxe gayua ni riana que la?, zalaa ni lu ca binni ni gudxite de diputadu ni bichiña' jma binni o ni gupa jma binni bizee lu xqu'chi'.

b) Pa lu iza ra chindi cabe xa ique ro' xti' guidxi ro' sa ruguita (mexicu), ne laca lu iza caca, cui cabe ca xa ique ni ruzuhua lu xtiidxa' guidxi ni runi dxiña' ndaaní yoo ra ria' diidxa' bia' ni ribi cabe diputadu ne senador zacacabe galaa de cada gayua de lu xpidxichi guidxi; ne pa dipitadu ro' si cui cabe la?, zacaacabe gande nuu chií si de cada gayua, ti guni cabe dxiña' ni maca runi cabe.

c) Bia' xpidxichi guidxi ni icaacabe ca la?, zacaacabe chonna beexu lu cada gayua ti guiquiiñe ne gaca ne ca ni lu ca dxiña' ni jma naquiiñe ndaaní guidxi casi, guenda rusiidí binni uca ne gun'da' ne guirá' ru' dxiña' ni gaca ne binni, casi guenda ruca' lu gu'chi' guenda ruyuu bi xiixa, guirá ndi la?, laaca ricaabecabe ni cada iza ti ganda guni cabe dxiña' ni maca runi cabe. Lu bidxichi ni ma ucuacabe que la?, zaree gande nuu chií beexu lu ti

gayua, ti guiazí ni lu xcaadxi partidu que, ne biaca biaca nga icaacabe ni, ne xcadxe gayua ni riana que la?, zalaa ni lu ca binni ni gudxite de diputadu ni bichiña jma binni o ni gupa jma binni bizee lu xqu'chí'.

Diidxa' ro' bia' nga quixhe' pabia' bidxichi icaa cada partidu ti ganda iquiiñeca' ra guni ca xiiña' ca' ne ra cuiidxi ca binni chi guzee lu xqu'chí' ca'. Ca binni ni runi dxiiña' ndaaní' ca partidu ca la?, diidxa' ro' bia' nga gu'ya' pa bia' icaacabe ne que zanda di gaca ni jma de ni ricaacabe cada iza ne laaca diidxa' ro' bia' nga gu'ya', que chi tiidi ni de bia' ucuá binni n' gudxite ti gaca xa ique xti' guidxi ro'; ne laaca lá nga gu'ya' paraa nga biree ca bidxichi ni caquiiñe cabe ca la?, ne xi pára caquiiñe cabe ni, ne laaca laa gusaaba ná laaca be pa que guni ca jneza. Ne laaca diidxa' ro' bia' nga quixhe' neeza ti ganda guiaxa ca partidu ni guixha', ne laa nga guya' guibigueta ca ni biquiiñe cabe lu ná guidxi ro'.

III. Ca partidu ni jma narooaba' ni nuu ndaaní' ca guidxi xti' zaguita (mexicu) la?, zanda iquiiñe ca' ca guiiba' rucheche diidxa' lu bii (radio) biaani zahui (tv), ne gu'chí' rucheche diidxa' lade binni (periódico), ti ganda cuiidxi ca binni che chi guzee lu xqu'chí' ca'.

Lana Ngoola A. Yoo ra rie binni ri ica' laa ti gapa credencial la?, la nga gaca tobi lucha xa ique gu'ya' pa bia' dxi nga zanda gucheeche ca binni r' xtiidxa' ca lu bii casi lu biaani zahui ne guiiba' rucheche diidxa' lu bii ra cuiidxi ca binni che guze lu xqu'chí' ca' naquiiñe gunicabe ni casi nabiquí' diidxa' ro' bia' rí:

a) Dede bia' dxi ma chi guzulu ca binni ni chichite ti ganda gaca xa ique guidxi la?, ne dede dxi ma che binni chi guzee lu xqu'chí' cabe la?, ca binni ni runi dxiiña' ndaaní' yoo ra rie binni ti ganda icaa credencial xti'ca la?, zutiidí' xtiidxa' cabe lu guiiba' rucheche diidxa' lu bii ne lu biaani zahui, bia' xigaaba' chupa late gande nuu xhono huiini lu pur ti xigaaba' dxi casi nabaquí' lana huiini d) xti' ndaaga rí;

b) Dede bia' dxi ma chi guzulu ca binni ni chichite ti ganda gaca xa ique guidxi ca uca' ca' riidxi che binni chi guzee lu xqu'chí' ca la?, ca partidu políticu ca la?, zapaca cabe ti xigaaba' huiini xti' dxi ti ganda tiidí' xtiidxa' cabe lu bii ne lu biaani zahui; xcaadxi xigaaba' dxi ca la?, ma diidxa' ro' bia' nga gu'ya' paraa iquiiñe ni;

c) Dede bia' dxi ma chi guzulu ca binni ni chichite ti ganda gaca xa ique guidxi ca uca' ca' riidxi ti che binni chi guzee lu xqu'chí' ca la?, ca partidu

politicu ca' la?, laaca be nga naquiiñe icaacabe xhono de lu chíi bia' ni naquiiñe icaacabe ni ná lu lana huiini a) xtí ndaaga rí;

d) Ca diidxa' ni guzeete' ca guiiba' rucheche diidxa' lu bi ca, ne ca ni guzeete' biaani zahui ca la?, ndaaní xigaaba' dxi xtí' ra runi ca ni dxiiña' ca nga guiete xtiidxa' ca binni rí' ne lu xhopa xigaaba' dxi ne gande bi tapa xigaaba dxi nga guiete ca ni;

e) Bia' xigaaba' dxi neexhe' ica ca partidu politicu ca, guiete xtiidxa' ca la?, zalaani lu cabe sicarí: de lu ti gayua la?, gande bi chíi la?, biaca biaca ne xtí' ndaa o xcadxe gayua ni riadxa que la?, ca partidu ni guye jma binni yeguzee lu xqu'chí' ra guliica' xa ique ni ruzuhua lu xtiidxa' binni guidxi ni rabi cabe diputadu ca nga icaani;

f) Ca partidu politicu ni cadí ca lá ndaaní yoo ra rica lá ca partidu ni jma narooba' nuu ndaaní guidxi rí' la?, ziete xtiidxa' cabe lu guiiba' rucheche diidxa' lu bii ne lu biaani zahui bia dxi si ni ná lu lana huiini ni biete lu guía rí, ne

g) ca diidxa' ni bizeete ca lana huiini A ne B que la?, yoo ra rie binni ica lá ti ganda gapa credencial xtí' ca la?, laa nga ica' a chíi bi chupa xigaaba' dxi bia' ra ruzeete guiiba' rucheche diidxa' lu bii ca ne biani zahui ca diidxa' ni chi ica guidxi ro' ti guzeete xtí, ndi la?, neca que gaca dí' ni ndaaní ca dxi ra rucaa ca politicu ca' riidxi binni che chí guzee lu xqu'chí' ca', ti diidxa' ro' bia' nga nabaquí' gaca ni zaca; xcaadxi ni biadxa que la?, yoo rí' ma quiizi chupa late gande bi chíi ca lu ca partidu ca biaca biaca; ne xtí' galaa ni riaana que la?, ma yoo ri gu'ya' pa iquiiñeni la?, o pa gudii ni tuuxa xa ique ni laaca runi ca dxiiña' rí' ca xa ique ri la?, zanda ca gaca be de ndaaní guidxi ro', o de ndaaní ca guidxi huiini xtí' zaguita (mexicu). Ca partidu ro' ca la?, zaquiiñe cabe dxiiña' ra tiidí' xtiidxa' cabe lu bii, ti gu'chí' ro' bia' rí' ma bidiini laacabe ne lu ti beu xtí' xigaaba' dxiiña' xtí' ca guiiba' ruzaabi diidxa' lu bii ne lu biaani zahui ca nga tiidí' xtiidxa' cabe ca, ne lu xigaaba' gayu huiini xtí' ti dxi nga tiidi ni, ne xcaadxi xigaaba' ni riana que la?, zanda guiete xtiidxa' cabe, lu gande xigaaba' huiini, ndi la?, zaca ni tobi ne tobi. Ne pa xirú' de ca diidxa' ni cuzeete lana huiini ri la?, zacani bia' xigaaba' dxi ni ma nabaquí' yoo ra rie binni ica lá ti gapa credencial ca, ne ni ná lana huiini d) xtí' ndaga rí. Ne pa yoo rí' gaca ne tuuxa partidu guzete' xtiidxa la?, napa ni xi guini' ni xiñee chi gaca ne ni ngue.

Nin ti partidu politicu que zanda di sii o sii xtí' binni xigaaba' dxi xtí' guiiba' rucheche diidxa' lu bii o lu biaani zahui ti ganda tiidi xtiidxa' ca lu bii.

Nin ti binni que zanda dī quiixe ne xpidxichi o ne xpidxichi xtobi, xiixa xti' guiiba' rucheche diidxa' lu bi o xiixa biaani zahui ne gucheeche xtiidxa' xti' tuuxa partidu ra guini' che binni chi guzee lu xqu'chi' ngue o guini' xiixa ni gaca ne o ni gunina tuuxa binni ni caguite ti ganda gaca xa ique guidxi. Ndaani' guidxi ro' zaguita (mexicu) la?, que zanda dī tiidī xiixa diidxa' de ca ndiidi ca, neca guca ni ndani xquidxi ca gringu.

Ca diidxa' ni ma bizeete guiropa' die' lana ngoola ni ma biete lu guía rī la?, napa xi gaca ca ni ndaani' ca guidxi ro' ne ndaani' ca guidxi huiini xti' zaguita (mexicu) ne casi ná diidxa' bia' ni runi ca dxiiña' rī.

Lana Ngoola B. Ra ma chi gaca ca dxiiña' de guenda ribii xa ique guidxi nadaani ca guidxi huiini ca la?, yoo ra rie binni chi ica lá ti gapa credencial ca la?, la nga gu'ya' pa bia' dxi ne xi, xigaaba' nga zanda tiidi xtiidxa' ca binni ca lu ca guiiba' rucheche diidxa' lu bii ne lu ca biaani zahui ni nuu ndaani' ca guidxi huiini ra chi gaca ca gueda ribii xa ique guidxi que, zaca ca ni sicari' la?, ne paaxa xi diidxa' ru' ná diidxa' ro' bia' gaca:

a) Pa, ra gaca ca dxiiña' ra ribii cabe xa ique guidxi ro' zaguita (mexicu) ca gaca ne ni tobisi, ra cui ca guidxi huiini ca, ca xa ique xtica' la?, ca dxi ca la?, zaca cani bia' dxi ni nabaqui ca lana huiini a),b) ne c) xti' lana ngoola A ni ca lu guía' ca;

b) Ca dxiiña' ra ribii cabe xa ique guidxi ne que chi guiaba ne xti' dxiiña' xti', xti guidxi huiini la?, zaca ni casi ná diidxa' ro' bia' la ne ni ná gu'chi' ro' bia' rī, ne

c) Ra guilaa xigaaba dxi ca lu ca partidu ca la?, ne ca partidu ni nuu ndaani' ca guidxi huiini ca la?, zuni ca ni casi ná lana ngoola A ni ca luguia rī ne ni ná diidxa bia' xti' ca dxiiña' rī.

Pa yoo ra rie binni ica lá ca', gu'ya' de que cadī cazaa dī xigaaba' dxi xti', lu ca guiiba' rucheche diidxa' lu bii ne lu ca biaani zahui ca la?, zuya' xi zanda gūni, ti guizaa chahui xhigaaba dxi xti' lu ca guiiba ca' huaxa naquiiñe guni ni casi cayabi diidxa' ro' bia' laa guni ni.

Lana Ngoola C. Ca diidxa' ni guzete' ca partidu ca ra ma cana uca' ca' riidxi binni chee chi guzee lu xqu'chi' ca la?, que zanda di gaca ni xiixa diidxa' naná ni gūni ná xiixa yoo, o xti' partidu o pa cue ca' xiixa diidxa' lu guía tuuxa binni.

Dede bia' dxi guzulu ne guiluuxe ca dxiiña' ra rucaa ca partidu politicu ca binni chee chi guzee lu xqu'chi' ca la?, xa ique guidxi la?, napa xi guchuugu lu ca diidxa' ra guini de guirá ca ni ma guca ne binni, ca diidxa' ri la zeeni pa ra ca xa ique ni ruzuhua lu xtiidxa' binni guidxi, ne ca xa ique ro' xti' ca guidxi huiini ca'. Ca ni zanda si quiete lu ca guiiba' ni rucheeche diidxa' lu bi ne lu ca biaani zahui ca nga ca de ni gaca binni lu xquenda nabaani, ca ni gusiidí binni gun'da' ne uca o ca ni guzeete yoo ra rie binni ti icá crdecial xti' o ca ni gaca ne binni pa nuu lu xiixa guenda nagaana casi ra caree guiigu'.

Lana Ngoola D. Ca donda ni quiiba' ique ca binni ni guchee lu ca dxiiña' ri la?, yoo ra rie binni ica lá ti gapaa credencial ca nga gudxiiba' ni, ne pa laaca be guchee cabe la?, yoo ri ma que zutiidí dí xtiidxa' cabe lu ca biaani zahui ca ne lu ca guiiba' rucheeche diidxa'.

IV. Diidxa' ro' bia' nga cuaqui' padxi nga ma zanda cui' ca partidu ca binni ni gacaladxi gaca xa ique guidxi, ne laaca laa nga cuaqui' ca neeza ni chinanda ca partidu dí dxi laaca ma gaca laadxi ca' uca' riidxi ca binni che chi guzee lu xquichi' ca'

Ca dxiiña' ra rica riidxi binni che chi guzee lu gu'chi' ti ganda guibii xa ique guidxi la?, zanda'a ni chonna beu ne ca dxi ri nga chinanda ca binni ni gacaladxi gaca xa ique ro' xti' guidxi ro' zaguita (mexicu); ne ca binni gacaladxi gaca xa ique ni ruzuhua lu xtiidxa' binni guidxi' ni ribi cabe diputadu ne senador ca la?, napa cabe xi chinanda cabe chupa si beu. Ne ca dxi ra ruzulu ca binni ri' uca ca' riidxi binni guidxi la?, que zandaa dí ni bia' dxi ni nabaqui diidxa' ro' bia' dí gaca ca dxiiña' ro' ni dxandipe ica riidxi binni che chi guzee lu gu'chi' ti ganda cui ca' xa ique guidxi.

Ne pa chu' binni o tuuxa partidu que guiiene ca diidxa' ni cayabi diidxa' ro' bia' ri' laa la?, zusaaba ná ni laa.

V. Guirá dxiiña' ni raca, ra rica riidxi binni che chi guzee lu gu'chi' ti guibii tuuxa xa ique guidxi la?, yoo ra rie binni ica lá ti ganda gapa credencial xti' ca nga guni guirá bieque ri', yoo ri la?, que riquiiñe di ni xpidxichi xtobi ti ganda guni ni xiiña' ni, ne ra runi ni xiiña' ni ca la?, zadaagu ni ca partidu ro' ni nuu ndaaní guidxi ro' zaguita (mexicu), ne laaca zadaagu ni binni guidxi, ne laaca zadagu ni xti' yoo ra ria' diidxa' bia', ne ra guni ni ca dxiiña' ri la?, napa ni xi chinandani casi nabaqui diidxa' ro' bia' guni ni dxiiña'. Ne ca dxiiña' ri la?, napa xi gaca ca ni jneza, nayaa ne que zacane di cabe tobi ne xtobi co', napa cabe xi gusia cabe lu xtiidxa' cabe ti que chu' xiixa yaya lade cabe.

Yoo ro' ra rie binni ica lá ti gapa credencial ca nga gaca xa ique ni gu'ya' gaca ca dxiiña' rí, guruti' zabii laa xi zanda guni lu xhiiña' ne laa si nga gu'ya' xi zaca zanda guni lu guirá bieque xti' ca dxiiña' rí; ne laaca zapa ni tu gúni xhiiña' ni casi ca binni ni saa nanda gaca ca dxiiña' ri jneza, binni ni gapa' ti gaca ca ni naya do', ne binni ni nanna de xpieque dxiiña' dxi xti' ca biaani zahui.

Yoo ro' ri la?, zapani ti xa ique ro' ne xhono binni ni gaca ne xa ique ro' rí ti gaca ca dxiiña' ri jneza, ca binni ri la?, zanda guiní' ca', huaxa que zanda dí' uca' ca riidxi, ca binni ni biete ri ne ca xpinni ca partidu ca la?; diidxa' ro' bia' nga ma nabaqui xi guni cabe ne tu laa nga gaca xa ique xti' ca binni biete guiropa ca. Ca yoo ne ca xa ique ra raca ca dxiiña' de guenda ribii xa ique guixi la?, zapa cabe binni ni nuu xpiani ne nanna guni ca dxiiña' rí ti gaca ca dxiiña' ra chindi cabe binni gaca xa ique guidxi ca gaca jneza la?, ne naya do'. Zapa ni binni gu'ya' que chi guiadxa guirá ni chi iquiiñe ndaaní' ni ne xi guirá cue cabe ndaaní' ni. Ca diidxa' ni ca lú diidxa ro' bia' ra raca dxiiña' ra ribii cabe binni gaca xa ique guidxi ne ca diidxa' ni Bui' ca be ca la?, laaca ca ni gu'ya' ca ni guni ca binni ni chi guni dxiiña' ndaaní' yoo ra rie binni ica lá ti gapa credencia la?, guni ca dxiiña' jneza. Ca xpinni, ca partidu ca nga gapá ca gu'chi' ra rica lá binni ti ganda guzee lu gu'chi' ra chindi tuuxa gaca xa ique guidxi. Binni guidxi naga cui ruaa mexa ra chi guzee cabe lu gu'chi' ne cui cabe xa ique guidxi.

Binni ni gaca xa ique xti' ca dxiiña' ra chindi cabe xa ique guidxi ca la?, zandaa be xhoopa iza lu dxiiña' ca' ne ti bieque si nga cui cabe laabe. Ca xa ique huiini ni chi gaca ne xa ique ro' rí' gaca ca dxiiña' ri la?, zandaa cabe ga' iza lu ca dxiiña' rí' ne ma zidxaa cabe tobi ga cabe, ne ma que zanda dí' guibii cabe xti' bieque ti guni cabe dxiiña' rí'.

Nuu de ca binni ri la?, zabii ca xa ique ni ruzuhua lu xtiidxa' binni guidxi ca laacabe, huaxa naquiñe gu'ya' cabe xi naa guidxi ti guni cabe ni, ne ti zaca nabaqui ca xa ique ca gaca ni.

Ne pa gueda guiaadxa xa ique ni ruya' gaca ca dxiiña' ri la?, zabi cabe xtobi ni gunduuxe ca dxiiña' rí'. Ne ma diidxa' ro' bia' quixhe ca neeza ca dxiiña' ni gaca ti cui cabe xti' xa ique ca.

Ca xa ique ri la?, que zanda dí' guni cabe xti' dxiiña', o chi guni cabe xiixa, ni zanda si guni cabe nga ca dxiiña' ra chine cabe xtiidxa' yoo ro' rí' xti' ladu, ne pa rusiidi' cabe xcuidi uca ne gun'da', pa rusiidi cabe de guenda ne xpia binni o pa dxiiña' ra ruyubi cabe gaca ne ca binni ne sin quiixe.

Zanna ca xa ique ni ruzuhua lu xtiidxa' binni guidxi ca pa bia' guiaxa ca xa ique ni runi dxiiña' ndaaní yoo ra rie binni ica lá ti gapa credencial.

Binni ni chi guiana ndaaní yoo ra chu' ne guiree guirá ca ni chi iquiiñe ndaaní yoo ra rie binni ica lá ti gapa credencial ca la?, jma de galaa de ca xa ique ni ruzuhua lu xtiidxa' binni guiixi ca nga cui tu laa guiana guni ni, ti zaca ma bilui ná ca binni runi dxiiña' ndaaní yoo ra riziidi cabe binni uca ne gun'da, ne ti diidxa' ro' bia' ma nabaquí gaca ni zaca. Zandaabe lu dxiiña' ca xhoopa iza, ne zanda ru cui cabe laabe xtí bieque si. Durará seis años en el cargo y podrá ser reelecto por una sola vez. Ne ziu be lu ná xtí xa ique ra guni be dxiiña' rí ti guihuni paraa zee ca xpidxichi yoo ro' xtí guidxi ro'. Binni ni guni xqu'chí xa ique ri la?, jma de galaa de ca xa ique ni ruzuhua lu xtiidxa' binni guidxi ca nga cui laabe, huaxa laaca naquiiñe gudii xa ique xtí cabe xtiidxa' ti ganda gacabe ni. Guirá' binni ni ma biete luguia rí ne ma chigaca ca' xa ique xtí ca dxiiña' ra ribii cabe xa ique guidxi la?, diidxa ro' bia' naguixhe xi guchuiiña cabe ti ganda gaca cabe ni; ca binni ni guca xa ique xtí ca dxiiña' ra ribii cabe xa ique guidxi la?, lu chupa iza de ra ma biree cabe de lu ca dxiiña' ri la?, ma que zanda dí guni cabe xhiiña' guidxi ro' ti lu ca dxiiña' ca nga bí'ní' cabe dxiiña'. Ca binni ni chi gaca xa ique ni chi guni xhiiña' ca xa ique ni ruzuhua lu xtiidxa' binni guidxi la?, zabii cabe laaca la?, huaxa pa napa ca xiixa partidu ni rinanada ca ne naca ca' xa ique ndaaní yoo ra ria' diidxa' bia'. Lu ra ridagu lisaa ca xa ique ni ruzuhua lu xtiidxa' binni guidxi ni rabi cabe diputadu nesenador la?, zabi cabe ti xa ique ro' ni guzuuba cabe xtiidxa' ne guzuhua' lu xtiidxa' cabe xi dxiiña' raca ladxi cabe guni cabe.

Lu ná yoo ra rie binni ica lá ti gapa credencial ca nga guiaana guirá dxiiña' ni chiguiete rí ne xcaadxi ru' ni cuaqui diidxa' bia' casi; ra che binni guiziidí de guirá ca dxiiña' de ra ribii cabe xa ique guidxi, ra ganna guirá binni ni chiguni ca dxiiña' rí paraa nga chi gata mexa ra chi guizee lú, ne de guirá guenda xtí ca partidu ca, ne guirá gu'chí ra ica lá binni guidxi ni che chi guzee lu gu'chí, ne ca gu'chí ni chi iquiiñe' ca xpinni cabe ti ganna ca' xi guirá dxiiña' nga chi guni ca' ra chindi cabe ca xa ique guidxi, ne ra igaaba' ca gu'chí ni bizee ti gaca ni casi nabaquí diidxa' ro' bia', ne gudiini gu'chí ca binni ni yene de xa ique guidxi, ne ra bigaaba' gu'chí ti guihuini tu yene de xa ique ro' guidxi zaguita (mexicu), lu cada tobi de ca guidxi ra rata' mexa ra che binni chi guzee lu gu'chí, ne laaca lu ná ni nga guiaana ca xigaaba' ni raca ndaaní guidxi ti guihuini pabia' binni nabeeza ndaaní.

Guirá ca guenda rui diidxa' ni runi ca xa ique ni ruzuhua lu xtiidxa' binni guidxi ca la?, napa xi ganna binni ca ni ti zaca nabaqui diidxa' ro' bia' gaca ni.

Ra igaaba' guirá bidxichi ni chi iquiiñe ca partidu ro' ca ra guni ca dxiiña' de ra ribii c abe xa ique guidxi ca la?, guirá ca dxiiña' ne ca xtipa ri la? ziana ni lu ti xa ique ni xtí' yoo ra rie binni ica lá ti gapa credencial, ne que zaquiiñe dí' de xtobi ti ganda guni xhiiña', n era cui cabe xa ique ni guni ca dxiiña' ri la?, zabii jma de galaa ca xa ique ni runi dxiiña' ndaaní' yoo ri laabe.

Diidxa' ro' bia' nga cuaqui guirá ca neeza ni iquiiñe ca binni rí' ti ganda guni ca' xhiiña' ca', ne laaca laa nga gusaaba' ná laacabe pa que guni cabe jneza. Ne ra gaca ca dxiiña' ri la?, cadí ná dí' ca xa ique ni riana ca bidxichi ca lu ná de que ca yoo ra riapa' bidxichi ca que znaaba' diidxa laacabe xi guirá cayuni ne cabe ca bidxichi ca.

Ca binni nuu xpiani ni gulii ca xa ique ni runi dxiiña' ndaaní' yoo ra rie binni ica lá ca nga gaca neeza ni ca ni ca diidxa' ni biete lu guía ca'.

Ra guibii tuuxa xa ique huiini ndaaní' xiixa guidxi huiini ne guinaaba cabe, yoo ra rie binni ica lá ti gapa credencial gacane laacabe gaca ni la?, zanda gaca ni huaxa zaca ni casi nabaqui diidxa' bia' xtí' cabe ca la?, ne yoo rí' zinanda casi ná cabe.

VI. Ti ganda gaca guirá ca dxiiña' ra ribii cabe xa ique guidxi ni nabaqui gu'chí' ro' jneza ne naya do' la?, laani napa ni ti neeza ra gudxii lu tuuxa binni ni gudxite ti ganda gaca xa ique guidxi, pa ná de que que nigaaba' dí' ca gu'chí' ca jneza huaxa naquiiñe chinanda cabe lu dxi ni nabaqui diidxa' ro' bia' ne gu'chí' ro' bia' rí' gaacani. Ne ra gaca guirá dxiiña' caní' ndaaga 99 xtí' gu'chí' ro' bia' ri, casi ca guenda ni gapa binni guidxi ti che chi guzee lu gu'chí' ti ganda cui tu raca laadxi gaca xa ique xquidxi, ne ganda cui cabe laa ti ganda gaca tuuxa xa ique.

Lu ca dxiiña' ra ribii cabe xa ique guidxi ca la?, ne ca dxiiña' ni racane tuuxa binni gualadxi gaca xa ique guidxi, gudxii lu ti igaaba' chahui ca gu'chí' ni bizee cabe lu que casi nabaqui gu'chí' ro' bia' rí' la?, que zanda dí' ucueza cabe o guxha c abe ca diidxa' ni ma biree xia.

Diidxa' ni riree chu de xti' diidxa' II

Ca ni nuu ndaaní' lu xlayu zaguita (mexicu) ne ca ni napa

Ndaaga 42. Ca ni napa zaguita (mexicu) lu layu xti':

I. Ca ni nuu ne guidxi ro' tobisi;

II. Guirá layu ni nuu lu nisa do' ne ca ni nuu ndaaní' ni;

III. Ca layu ni nuu lu nisa xti' Guadalupe ne ni nuu lu Revillagigedo ni nuu ndaaní' nisa do' ro' ni rabicabe Océano Pacífico;

IV. Bia' guete nisa do' ca layu ni nuu lu;

V. Bia' dede ra rungaanda ca nisa ni napa nisa do', casi ná diidxa' ro' bia' ne xquenda guirá guidxi ro' ni risisaca ca nisa do' ni nuu lu ndaaní' guidxi layu;

VI. Bia' ca ni zuuba' lu layu xti' guidxi ro' zaguita (mexicu), de nayula' ne de xilaaga ne ca ni nabaqui' guirá xquenda guidxi ro' dxaaga ni.

Ndaaga 43. Ca guidxi ni dxaaga guidxi ro' zaguita (mexicu) nga ca ndí', Aguascalientes, Baja California, Baja California Sur, Campeche, Coahuila, Colima, Chiapas, Chihuahua, Durango, Guanajuato, Guerrero, Hidalgo, Jalisco, México, Michoacán, Morelos, Nayarit, Nuevo León, Oaxaca, Puebla, Querétaro, Quintana Roo, San Luis Potosí, Sinaloa, Sonora, Tabasco, Tamaulipas, Tlaxcala, Veracruz, Yucatán, Zacatecas y el Distrito Federal.

Ndaaga 44. Guidxi ro' zaguita nga naca México, ne lu nga nuu guiira xtipa' xti' ca guidxi ro' dxaaga lu xlayu ne laani nga guidxi ro' xti' guirá guidxi ni nuu lu ni. Ne pa ca xtipa' ri' che ni xti' ladu la?, zie ni ndaaní' guidxi lahui daani xti' zaguita (mexicu), ne ca xigaaba' bia' ni gudii yo ora ria' diidxa' bia', ne guiduubi ni nga bia' ca layu ni ma biete ca.

Ndaaga 45. Ca guidxi ro' xti' zaguita (mexicu) dede dxi guyuu bia' ca ni la?, ganga layu xti' ca ni, paaxa que chu' xiixa guenda nayuudxu' lu ca ni.

Ndaaga 46. Guirá guidxi dagúlisa zaguita (mexicu), la?, zanda gutaagú xtiidxa' ca' ti guihuini pabia' nga xlayu ca'; ti guisaca ca diidxa' ni Biui' ca

la?, naquiiñe gaca ni ne xtiidxa' ca binni ni runi dxiiña' ndaani' ca yoo ra ria' diidxa' bia'. Pa tobi de ca guidxi ca' que nugutaagú diidxa' la?, tutiisi de laacabe zanda guyuubi ca xa ique ni runi dxiiña' ndaani' ca yoo ra ria' diidxa' bia', ti gúni ca' ca dxiiña'ca, casi ná ndaaga 76, ndaa XI, xti' diidxa' ro' bia' rí.

Ca diidxa' ni guini' ca binni ri la?, nga nga laani ne guirutí zuxha ni. Pa ca xa ique ni runi dxiiña' ndaani' ca yoo ra ria' diidxa' bia' ca que ñanda nutagu ca xtiidxa' ca xa ique guidxi ni nuu dinde runi layu la?, ma ca xa ique ro' ni rabi cabe Suprema Corte de Justicia de la Nación ca nga gu'ya' ganda gutaagú xtiidxa' cabe.

Ndaaga 47. Bia' layu ni napa Tepic la?, bia' ca nga layu xti' Nayarit.

Ndaaga 48. Ca layu ni nuu lu nisa do' ne guirá xixe ni nuu ndaani' ni la?, laaca xti' guidxi ro' zaguíta (mexicu) ca ni, paaxa guihuini pa nuurú xcaadxi ni.

DIIDXA' GUIONNA

Diidxa' ni riree chu de xti' diidxa' I

Ra rilaa xtipa' guidxi ro'

Ndaaga 49. Lu ca xtipa' xti' guidxi ro' zaguita (mexicu) la?, rilaa ni chonna nda: ca xaique ni runi diidxa' bia' xti guidxi ro' zaguita (mexicu), ca xaique ro' ni rucaa diidxa' bia' lu gu'chi' ne ca xaique ro' ni ruuya' chu' guidxi ro' jneza ne sin ti guenda naxoo casi ca xaique diidxa' ro' bia'.

Ca xtipa' ri la?, que zanda di guiana ca ni lu ti binni si, ne laca que zanda di guiana Legislativo ca lu na tobi si, paaxa xi ná ndaaga 29, xti' gu'chi' ro' rí. Ne laaca guihuini xi naxa guiropa ni die' lana xti' ndaaga 131, ti ma guihuini tu lu ná nga guiaana ca xtipa' rí.

Diidxa' ni riree chu de xti' diidxa' II

Xtipa' xti' ca xa ique ni ruzuhua lu xtiidxa' binni

Ndaaga 50. Xtipa' xti' ca xa ique ni ruzuhua lu xtiidxa' binni ca la?, naca ni ti yoo ra ria' diidxa' bia' ti ganda guiapa' xquenda ca binni guidxi, ra runi ca binni ni napa guenda de diputadu la?, ne senador.

Nirú do' ndaaga diidxa'

Dxiiña' ra ribii cabe paraa xa ique ni ruzuhua lu xtiidxa binni guidxi

Ndaaga 51. Cada lu chonna iza la?, ribii cabe binni ni gaca xa ique ni ruzuhua' lu xtiidxa' guidxi ro', binni ni rabi cabe Diputadu. Ne cada tobi de ca binni ri la?, ziu xtobi cue'.

Ndaaga 52. Ra ribii cabe ca diputadu ca la?, 300 gayua nga ruca riidxi ne ruyubu binni che chi guzee lu gu'chi' xti', ti ganda gaca ca' xa ique ni ruzuhua lu xtiidxa' guidxi, ne 200 gayua ca la?, que zucaa di ca riidxi ne que zuyuubi di ca binni che chi guzee lu xqu'chi ca' laaca huaxa zaca laca lu ti gu'chi' xti' ca politicu ca ti guihuini pa zanda gaca ca ni.

Ndaaga 53. Guirá' guidxi huiini xti' zaguita (mexicu) la?, zalaacani lu 300 gayua distritu ni napa guidxi ro' ra chindi cabe xa ique guidxi'. Ra guilaa ca guidxi huiini di la?, zacaacabe ultim xigaaba xti' guirá' xixe xigaaba xti' binni ni nabeeza ndaaní' guidxi ro', ne napa xi chu' chupa o jma diputadu ni guzuhua lu xtiidxa' guidxi.

De lu 200 gayua ni, que zucaa di ca riidxi ne que zuyuubi di ca binni che chi guzee lu xqu'chi que la?, gayu de laaca' ziu ndaaní' guidxi huiini ra chindio cabe xa ique guidxi que. ra laaca huaxa zaca laca lu ti gu'chi' xti' ca politicu ca ti guihuini pa zanda gaca ca ni. Ne ma diidxa' ro' bia' nga gu'ya' pade ti ruganda xalayu cabe ne pabia' binni nuu napa ca ni.

Ndaaga 54. Ra guibi 200 gayua dioputadu ca la?, de ca ni que zucaa di ca riidxi ne que zuyuubi di ca binni che chi guzee lu xqu'chi que la?, huaxa zaca laca lu ti gu'chi' xti' ca politicu ca ti guihuini pa zanda gaca xaique guidxi que la?, napa ca xi chinanda ca', ca diidxa' ni naquí' diidxa' ro' bia':

I. Ti ganda cu' ca partidu politicu ca xpini ca' lu ca gu'chi' ra chindi cabe tu la zanda gaca xa ique guidxi, de ca ni que zucaa di ca riidxi ne que zuyuubi di ca binni che chi guzee lu xqu'chi que la?, napa cabe xi guzuhuini cabe de que napa cabe chupa gayua guidxi huiini lu guidxi ro' xti' cabe;

II. Guirá ca partidu politicu ni ugaanda, chupa de ti gayua de binni ni guzee lu gu'chi' la?, zanda cu' ca binni ni de ca ni que zucaa di riidxi ne que zuyuubi di binni che chi guzee lu xqu'chi ti ganda gaca xa ique guidxi;

III. ca partidu ni guni ni ná ca diidxa' ni mabiete ca la?, ne ca que uganda di xpinni ca' chu' la?, zanda chu' ca' ti bitaagu lisaa ca' guirá binni de guirá guidxi xti' zaguita (mexicu) ni bizee lu gu'chi' xtica, ne ca ni guiu nga ca ni caa lá lu xqu'chi' cabe. Huaxa naquiiñe chinanda cabe ca ni ca lá niru do' lu xqu'chi' cabe ti ganda gaca xa ique guidxi ni guzuhua lu xtiidxa' binni.

IV. Nin ti partidu que zanda cu' jma de 300 gayua binni ti ganda quite para xa ique ni guzuhua lu xtiidxa' binni ni rabi cabe Diputadu.

V. Ca partidu ca que zanda di cu' cabe jma binni de bia' ni ma nexhe chu' gaca xa ique ni guzuhua lu xtiidxa' binni guidxi, binni ni runi dxiiña' ndaaní' yoo ra ria' diidxa' bia', ne que zanda tiidi xhono xigaaba' de bia' binni ni yeguzee lu gu'chi' guiduubi ndaaní' guidxi ro' zaguita (mexicu). De ca diidxa ni biete ri la?, que zanda di guni cabe ni ca politicu ni gupa

jma de xhono xigaaba lu ca xtipa' xti' ca xa ique ni runi dxiiña' ndaaní' ca yoo ra ria diidxa' bia' ca; ne

VI. Ca ni ca lu guiona ndaa ni ma biete rí' III, IV ne V ca binni ni biaana ni que ñuu lu ca dxiiña' rí' la?, zanda gaca ca' xa ique ni ruzuhua lu xtiidxa' guidxi' ni cuzeete IV o V xti' ndaa ri, ziu cabe lade xcaadxi partidu politicu ni jma napa xtipa' lu guía cabe, de lu ca xigaaba' xti' ca gu'chi' ni bizee guirá binni guidxi ca la?. Diidxa' ro' bia' nga gu'ya' gaca ca ni jneza.

Ndaaga 55. Pa nuu tuuxa binni raca laadxi gaca xa ique ni ruzuhua lu xtiidxa' guidxi ni rabi cabe diputadu la?, naquiiñe gapabe guirá ni ca xaguete rí':

I. Naquiiñe gaca be binni huanisi ne gale be ndaaní' guidxi ro' zaguita (mexicu), ne gaca be binni nuu xpiani;

II. Dxi chiguzee cabe lu gu'chi' ra chindi binni xa ique que la?, naquiiñe gapabe gannde ne ti iza;

III. Naquiiñe gaca be de ndaaní' guidxi ra chindi cabe xa ique o naquiiñe cueza be jma de xhoopa beu ndaaní' guidxi que, ante cui cabe xa ique guidxi.

Ti ganda ica laa tuuxa lu gu'chi' ra chindi cabe binni ti ganda quite' de diputadu, de ca binni ni que rucaa riidxi binni che chi guzee lu xqu'chi', naquiiñe gaca cabe de ndaaní' xiixa guidxi huiini xti' zaguita (mexicu), ra chindi' cabe xa ique ca, ne guihuini dxandi' nabeza be ndaaní' de xhoopa beu ndaaní' guidxi ca.

Ne que zuni di tuuxa guenda vecinu pa laabe gacabe tuuxa xa ique guidxi.

IV. Que chi gaca di be dxu' soldadu ne que chi gaca di be xa ique xti' ca dxu', ra chin di cabe xa ique guidxi que, lu chonna beu ra gaca ca dxiiña' xti' guenda ribi xa ique guidxi.

V. Que chi gaca di be tuuxa xa ique ne que chi guni dibe xiixa dxiiña' ni bidii gu'chi' ro' bia' ri laabe gúni be, ne pa raca laadxi be quite ti ganda gaca be xa ique guidxi la?, naquiiñe gusaana be xiiña' be chonna beu ra gaca ca dxiiña' xti' guenda ribi xa ique guidxi.

Que zanda di quite be diputadu pa naca be xa ique xti' ca xa ique diidxa'

bia', nin pa napa be xiixa guenda ndaan' yoo ra riapa' xquenda ca binni ni riguite ti ganda gaca xa ique guidxi, o pa laaca napa be xiixa guenda ndaan' ca yoo ra ri ica laa binni ti gapa credencial, pa raca laadxi be quite be la?, naquiiñe gusaana be xiiña' choona iza ante guzulu ca dxiiña' ra chindi cabe xa ique guidxi que.

Ca xa ique guidxi casi ca Gobernador o xa ique ni rapa ndaan' guidxi ro' zaguita (mexicu)(jefe de gobierno), que sanda di quite ca' ti ganda gaca ca' xa ique guidxi, pa nuu ca' lu xiiña' ca' o neca gusaana ca' dxiiña' ni napa ca'.

Ca xa ique ni runi xiiña' ca xa ique guidxi ro', ne ca xa ique xti' ca xa ique diidxa' bia' xti' guidxi huiini ne guidxi ro' ne ca xa ique xti' ca guidxi huala'dxi' la?, que zanda di' cui cabe laaca ti ganda quite' casi xti' xa ique xti' xquidxi ca' pa que gusaana dxiiña' ni cayuuni ca que lu chonna beu ante guzulu ca dxiiña' ra ribi cabe xa ique guidxi;

VI. Que chi gaca di be xa ique xti' xiixa yuudu', ne

VII. Que zanda di' gaca cabe ni pa nuu cabe lu ca dxiiña' ni ná ndaaga 59.

Ndaaga 56. Ndaani' ca yoo ra ria' diidxa' bia' ca la?, ziu ti gayua gande bi xhono binni guni dxiiña' ndaa ni, de ca ndi la?, cada guidxi huiini ne guidxi ro' la?, ziu chupa de ni rie binni riguzee lu xquičhi' ne tobi de ca ni qui rucaa riidxi binni chi guzee lu xquičhi'. Ti gaca can di la?, ca partidu politicu ca la?, napa ca xi cu' ca' ti guičhi' de guiropa ndaa ri'. Ti ganda gaca tuuxa senador, de ni que rucaa riidxi che binni che guzee lu xquičhi' que la?, naquiiñe ica laabe niru do' lu nguīchi' ni biu que, ne chinanda xpartidu be ca lu guiropa ra caguite que.

De lu gande bi chií nuu chupa lu de ni riaana ca la?, zabi cabe laaca casi ná xquīchi' cabe, guīchi' ni maca biguu xpartidu cabe. Ne diidxa' ro' bia' nga quixhe' ca neeza ti ganda gaca ca dxiiña' ri jneza.

Ca xa ique ni ruzuhua lu xtiidxa' binni guidxi ne runi dxiiña' ndaano ca yoo ra ria' diidxa' bia' la?, zadxaaca' cada lu xhoopa iza.

Ndaaga 57. Ra chu' tuuxa quite' ti gaca senador la?, naquiiñe che xtoobi cue be.

Ndaaga 58. Ti ganda gaca tuuxa binni senador la?, naquiiñe gapa cabe ni lu

diidxa' ni riní xhiíña' diputado que, iza ca nga có', ndi la?, naquiiñe gapa cabe gande bigayu iza dxi chí guzee cabe lu gu'chí' ti ganda gaca cabe xa ique.

Ndaaga 59. ca Senador ne ca Diputado ni nuuru' cayuni dxiiña' ndaani' yoo ra ria' diidxa' bia' la?, que zanda cui binni laaca laacabe ti gaca cabe xa ique guidxi xti' bieque.

Ca binni ni rie cue ca Senadores ne Diputado la?, zanda cui guidxi laaca be ti quite de senador ne diputado, huaxa pa cadí cayuni cabe dxiiña'; ca xa ique ni cayunin dxiiña' nadaani yoo ra ria' diidxa' bia' la?, que zanda di cui cabe laaca xti' bieque che ca cue ca' binni rí'.

Ndaaga 60. Ca diidxa' ni ca lu ndaaga 41 xti' gu'chí' ro' bia' rí', ne ca diidxa' ni guini' diidxa' ro' bia' la?, zaca ni dxandi' ti laaca nga gudii ca' gu'chí' ca binni ni chine de xa ique de diputado ne senador ca ndaani' xquidxi ca'; ne laaca laacani nga gudii ca ni gu'chí' ca binni ni gupa jma binni yeguzee lu xqu'chí' ti gaca xa ique ni ribi cabe senador casi na lu ndaaga 56 xti' diidxa' ro' bia' ne gu'chí' ro' bia' rí'. Ne laaca laani, gudii ni xqu'chí' ca binni chine de diputado casi ná lu ndaaga 54 xti' gu'chí' ro' bia' ri la?, ne ni ná diidxa' ro'.

Ca diidxa' ne ca gu'chí' ni ma ucua' ca binni ni bibí ti gaca diputado ne senador la?, zanda gudxiiña' tuuxa binni neeza lu ca binni ni runi dxiiña' ndaani' yoo ra rigaaba gu'chí' bizee lu ne guinaaba' guixa ni ca gu'chí' nima ucua ca binni que, huaxa naquiiñe guni ni casi nabaquí diidxa' ro' bia' gaca ni.

Ca diidxa' ni ma bichaaga bia' ca xa ique ni runi dxiiña' ndaani' yoo ra rigaaba' ca gu'chí' ni bizee lu ca la?, ca xa ique ro' xti' ca binni ni ma biete rari' di la?, zanda gudxiee nacabe ni tu gu'ya' cabe pa jneza nuu ca ni o pa có', ti ganda gaca ndi la?, ca politicu ca zanda cu' ca' ti gu'chí' ni guini' igaaba' ca gu'chí' que jneza, ne guihuni gacachahui ca gu'chí' ne diidxa' ni bichaaga bia' ca xa ique ri ca que. Ne ca diidxa' ni gunii ca xa ique ri la?, guruti' zanda guxha ca ni. Diidxa' ro' bia' nga gu'ya' ca diidxa' ne ca neeza xti' ca bieque rí'.

Ndaaga 61. Ca diidxa' ni guini' ca xa ique ni runi dxiiña' ndaani' yoo ra ria' diidxa' bia' ni rabi cabe diputado ne ca senador ca la?, guiruti' zanda guchia ca ni, nin laacabe quezanda guchia cabe ni ma gúni' cabe. Xa ique xti' ca binni ni ruzuhua lu xtiidxa' guidxi la?, zapa' ca, ca binni ni ma napa ti guenda ni bidii gu'chí' ro' bia' rí' laa, ti guni ca' dxiiña' ndaani' yoo ra ruchaaga bia' ca xtiidxa' ca'.

Ndaaga 62. Ca diputadu ne ca senador ni ma naca ca' xa ique ni ruzuhua lu xtiidxa' binni guidxi la?, que zanda dī gapa cabe xti' dxiiña' xti' guidxi ne guiāxa cabe zaca cayuuni cabe ni, pa laa cabe cayuuni cabe dxiiña' ndaanī yoo ra ria' xtiidxa' xiidxa' bia', ne sin xtiidxa' ca xa ique xti' cabe; pa laaca be guni cabe ni laa zaree ga cabe de ra que, laga guiluuxe xti' dxiiña' ni ucua' cabe que. Laaca diidxa' ri ca gusiene ca ni runi xhiiña' cabe ra guina cabe de xhiiña' cabe chupa chonna beu. Pa laacabe guchee cabe la?, ziaxha cabe guenda de xa ique ni ruzuhua lu xtiidxa' guidxi ca diidxa' ri la?, cusiene ni ca diputad une ca senador.

Ndaaga 63. Ca xa ique ni ruzuhua lu xtiidxa' binni guidxi, ne runi ca dxiiña' ndaanī yoo ra ria' diidxa' bia' la?, que zanda dī guzulu ca' guchaaga bia' ca' xtiidxa' ca' pa caru guidxiiña' jma de galaa de laaca; ca xa ique ni bidxiiña' que la?, napa ca xi guidxiiña' ca dxi nabaqui diidxa' ro' bia' guidxiiña' ca', ne laaca' la?, zanda guchiiña' ca' xacaadxi xa ique ni que nidxiiña' que?, bia' lu ti beu, ne ziunda ca lu ca' pa laaca que gudxiiña' ca' bia' dxi nexhe que la?, ca binni rī zani' ca de que, laacabe que ná cabe guni cabe dxiiña' que, ne ca ndila?, zabiidxi cabe ca ni zee cue' cabe que, ne pa laaca laca que guidxiiña' can la?, ca dxiiña' ca la?, ziana ca ni sin binni guni ni. Ca dxiiña' ni bisaana ne que nuzulu ca binni ni gudxite ti ganda gaca ca diputadu ne senador ndaanī yoo ra ria' diidxa' bia' la?, xcaadxi xa ique ni riana que la?, ma laaca cuaqui ca' ti neeza ti ganda guibii xcaadxi xa ique ni guni dxiiña' ni biana que ñuuni ca binni ni yene de xa ique ni rabi cabe diputadu ne senador ne ca xa ique ri la?, zuni ca ca dxiiña' de guenda ribii xa ique ca casi na ndaa IV xti' ndaaga 77 xti' gu'chi' ro' bia' rī; dxiiña' ni bisaana ca diputadu de ca ni bicaa riidxi che binni che guzee lu xqui'chi' que la?, ma xpinni cabe ni biaana que ñanda ñaca xa ique ni ruzuhua lu xtiidxa' binni guidxi que la?, ma laaca nga guiu ca guni ca ca dxiiña' rī; ca senador de ca ni bicaa riidxi che binni che guzee lu xqui'chi' ca' la?, ma xpinni cabe ni biaana que ñanda ñaca xa ique ni ruzuhua lu xtiidxa' binni quiidxi que la?, ma laaca ca nga guiu ca guni ca ca dxiiña' rī, binni rī la?, zanda gaca be xa ique pa laabe nanda be de lu guiropa de lu xqui'chi' cabe.

Ne laaca ziunda ca lu ca xa ique ni ruzuhua lu xtiidxa' binni guidxi ni rabi cabe diputadu ne senador ca, pa laaca guiadxa ca' chíi gubidxa ne sin xtiidxa' xa ique xti' cabe la?, zaree cabe lu dxiiña' ni cayuni cabe ne xa ique rī zusenda ca' xa binni ni guye cuebe que guni xiiña' cabe. Pa gasti' binni uchaga xtiidxa' la?, zaata ti diidxa' ti ganda guseenda cabe xa binni ni guyee cue' xa binni ni yene de xa ique guidxi que chu' guni xiiña' be, ne lu ti beu nga naquiiñe guidxiiña' ti bia' ca' nabaqui' diidxa' bia' gaca ni.

pa ca binni ni gudxite ne yene de xa ique ni ruzuhua lu xtiidxa' guidxi, ni rabi cabe diputadu ne senador ca que guidxiña guni xiiña' la?, zaguiba' donda ique ne laaca zusaba ná diidxa' ro' bia' laaca que guni' ca' xiiñe biaadxa ca'. Ne laaca zusaba ná diidxa' ro' bia' ca partidu ro' ni nuu ndaaní' guidxi zaguita (mexicu), ca ni bicaa laaca xpinni ni yene de xa ique guidxi ni rabi cabe diputadu o senador ne que guchiiña laacabe chi guni cabe xiiña' cabe.

Ndaaga 64. ca diputadu ne senador ni guiadxa ndaaní' yoo ra ria' diidxa bia' sin xtiidxa' xa ique xti' ca la?, que zaixa dí' ca' dxi guiadxa ca que.

Ndaaga 65. ca binni rí' ruchaaga xtiidxa' ca' niru do' dxi xti' beu nativita (septiembre) de lu cada iza nga runi cabe ni, ne guiropa la?, runi cabe niru do' dxi xti' febrero.

Lu ca dxi ra riu cabe guchaaga xtiidxa' cabe la?, guirá' cabe zandinde diidxa' cabe ti gu'ya' cabe xi diidxa' bia' nacubi guiree, ne gu'ya' cabe de guirá' ru' dxiiña' guni cabe ti zaca nabaquí' guí'chí' ro' bia' rí' guni cabe.

Cada dxi guiu cabe guchaaga xtiidxa' cabe la?, ca xa ique ni runi dxiiña' ndaaní' yoo ra ria' diidxa' bia' ca la?, laaca nga gu'ya' ca' de ca ni guini' diidxa' bia' ni rapa laacabe.

Ndaaga 66. Ra chu' cabe ndaaní' yoo ra ria' diidxa' bia' guchaaga xtiidxa' cabe la?, zanda guindaa cabe bia' tiisi dxi gueeda ndee xiaa cabe ca diidxa' ni ucua yuu ne cabe que ti naquiiñe guni cabe ni casi ná ndaaga ni ca luguia rí'. De lu niru do' dxí' chu' cabue guchaaga xtiidxa' cabe que la?, que zanda guinda cabe jma de lu 15 dxi xti' beu pascua de lu iza cayuni cabe ni, paaxa lu iza ca cadxaa xa ique ro' xti' guidxi ro' zaguita (mexicu) casi nabaquí' ndaaga 83, zacatí' zanda guindaa cabe dede 31 de beu pascua de iza ca biu cabe cuchaaga xtiidxa' cabe. Ra guiropa' bieque guiu cabe guchaaga xtiidxa' cabe la?, que zanda dí' tiidí' cabe jma de lo 30 de lu beu nabaana (abril) de lu iza ni biu cabe que.

Ne pa guiropa ca yoo ra ria' diidxa' bia' ca que chu' ca' tobi si, ti gunduuxe ca' ca diidxa' ni cuchaaga bia' ca, lu dxi ni ma nexhe' guiluuxe cabe la?, ma xa ique ro' xti' guidxi ro' zaguita (mexicu), gu'ya' guni ne laacabe.

Ndaaga 67. Yoo ro' ra ria' diidxa' bia' o xtubi tobi si de ca yoo ri la?, zanda guidxiña' ca gúi ca diidxa' pa xi cayaca ca', zadagu' ca' dxi gusenda ca' lisaaca laaca; huaxa ca diidxa' ni quiete si la?, ngasi nga quiete ne gaxti' ru'

jma. Ne ca ni chiguite ca la?, zaca ca ni lu gu'chi' ni bicaa xa ique ca, ti ganda guseenda ca' laacabe

Ndaaga 68. Guirá ca xa ique ni runi dxiiña' ndaaní yoo ria' diidxa' bia' la?, napa ca xi chu ca' ndaaní tobi si yoo ne que zanda di guchaaca' de yoo pa caru' guiu ca diidxa', ne naquiñe cuaquí ca' pará zanda guidaagu ca' ti guiu ca' diidxa'. Pa ra cutaagu cabe diidxa' ca, que chu' cabe tobi, padxi, paraa ne xi xigaaba' dxi che c abe la?, ma xti' xa ique ro' gu'yu' pa neeza zanda guiu cabe diidxa'. Nin ti tobi de ca yoo ra ria' diidxa' bia' ca que zanda ucueza dxi guenda ruiiu diidxa' ca jma de choona gubidxa, ne sin xtiidxa' xti' yoo que.

Ndaaga 69. Lu niru do' dxi guzulu ca xa ique di' guni ca xiiña' ca la?, xa ique ro' xti' guidxi' ro' zaguita (mexicu), zuseenda ti gu'chi' ra nuu cabe ra guini' xi nuu xa guidxi ro' ne xi dxiiña' cayuni.

Lu niru do' dxi guzulu ca xa ique di' guni ca xiiña' ca la?, tobi de ca xa ique ni runi dxiiña' ndaaní yoo ra ria' diidxa' bia' ca la?, zani xiñee cuseenda ca cabe ca xa ique ri'.

Cada tobi de ca binni ni runi dxiiña' ndaaní ca yoo ri la?, zunda ne zacayuu ne ca diidxa' ni ca lu gu'chi' ni bidii cabe laa que, rama biluuxe de biinda ni que ne pa que ñene be ni la?, zuni be ti gu'chi' ra guinaaba be xa ique ro' xti' guidxi ro' zaguita (mexicu) ca, guni ni jma naya, ne guseenda cabe xa ique ni runi dxiiña' xti' xa ique ro' xti' guidxi, ne xa ique ni rapa guidxi ra ma nuu binni lu guenda naxoo, ne ca xa ique ca dxu', ne ra guidxiiña' ca la?, napaca' xi guinica dxandi de ni guinaaba' diidxa cabe laca. Ne diidxa' ro' bia' nga gu'ya' ca dxiiña' ri gaca jneza.

Ndaaga 70. Guirá ca diidxa' ni cue' xia yoo ra ria' diidxa' bia' ca la?, zaca cani diidxa' bia'. Toda resolución del Congreso tendrá el carácter de ley o decreto. Ne ca diidxa' bia' ni guire di la?, napa cabe xi guseenda cabe ni ra nuu xa ique ni rine ca diidxa' bia' ri' ra nuu binni guidxi, ne gu'chi' ri la?, napa in xi chine ni ca firma xti' ca xa ique xticabe ne firma xti' ca ni runi xiiña' ca xa ique ri' ne zacani sicari': " yoo ro' ra ria' diidxa' bia' xti' guidxi ro' zaguita (mexicu), la gulee diidxa' ro' ri' (diidxa' bia' ni gulee ca xa ique ni ruzuhua lu xtiidxa' binni guidxi)". "El Congreso de los Estados Unidos Mexicanos decreta: (texto de la ley o decreto)".

Yoo ro' ra ria' diidxa' bia' la?, zabaquí ti diidxa' ro' bia' ti ca ni guni dxiiña' ndaaní ni la?, napa ca' xi chinandaca' ni ná ni.

Diidxa' ro' bia' nga cuaqui ca neeza ne ca dxiiña' ti ganda gudaagu lisaa ca xa ique ni ruzuhua lu xtiidxa' guidxi ni ribi cabe diputadu, neca gadxe gadxe ni ná xpiani ca' la?, ne gadxe xpartidu ca'.

Ne diidxa' bia' rí' la?, que zanda di guchia cabe ni, ne cadi caquiiñe di ni xtiidxa' xa ique ni rine ca diidxa' rí' ra nuu binni ti guisaca ni.

Lu guiropa ndaa xtiidxa' gu'chí' ro' bia' rí'

Ra raca dxiiña' n era cu' cabe gu'chí' yachí'
ni gacaladxi cabe gaca diidxa' bia'

Ndaaga 71. Ca ni zanda guzulu guni ti diidxa' bia' nga ca xa ique rí':

I. Xa ique ro' xti' guidxi ro' zaguita (mexicu);

II. Ca xa ique ni ruzuhua lu xtiidxa' binni guidxi ni rabi cabe diputadu ne senador;

III. Ca xa ique xti' ca guidxi ro' ni nuu ndaani' guidxi xti' zaguita (mexucu).

Ca diidxa' bia' ni guni Xa ique ro' xti' guidxi ro' zaguita (mexicu), ne ca diidxa' ni runi ca xa ique xti' ca guidxi ro' ni nuu ndaani' guidxi xti' zaguita (mexucu) la?, o xtiidxa' ca xa ique ni ruzuhua lu xtiidxa' binni guidxi ni rabi cabe diputadu ne senador, ca diidxa' bia' ni guchiiña' ca diputad une ca senador di la?, napa ca ni xi chinanda cani ca diidxa' n i rusiene laacabe ndaani' yoo ra ria' diidxa' bia' xticabe.

Ndaaga 72. Ca diidxa' yachí' ni nuu cabe gaca diidxa' bia' ne que guiree de ndaani' ca yoo ra ria' diidxa' bia' ra runi ca xa ique ni ruzuhua lu xtiidxa' guidxi ca dxiiña' la?, zaca yuu ne cabe ni, ne ziui ne cabe ni diidxa' ti gu'ya' cabe pa zanda gaca ni diidxa' bia' o pa co'.

A. Pa ti diidxa' yachí' ni ma ucuu yuu ne ca senador ne naaca' ma nuu ni jneza ti laaca gulee ca ni la?, napa ni xi tiidi ni lu ca diputadu ti gu'ya' ca pa dxandi nuu ni jneza. Ne pa can di naaca' de que laaca nuu ni jneza la?, zutiidi' ni lu ná ca xa ique ni rucaani lu gu'chí' bia' ne pa can di naaca de que laaca nuu ni jneza la?, zucaaca ni lu gu'chí' xti' guidxi ro', gu'chí' rucheche diidxa' lade binni.

B. Xtipa' guidxi ni rine diidxa' bia' ca neza lu binni la?, zani de que ma nuuni jneza, guirá' ca diidxa' yachi' ni que guibigueta lu chii' gubidxa de ra biree la?, zanda ca gudxigueta cabe ni lu niru do' dxi ra guni ca xa ique ri' dxiña', ti pa dxi guyee ca diidxa' ri que cayuni di' cabe dxiña'.

C. Guirá diidxa' yachi' ni gacaladxi cabe gaca diidxa' bia' la?, ca xa ique ni rucaa ni lu gu'chi' ne chine ni neza lu binni ca la?, zului ná ca' de guirá diidxa' narenda napa ni, ne gúdxigueta ni ra biree ni. Ra guibigueta ni ca la?, zaca yuu ne cabe ni xti' bieque, ne pa jma de galaa de laacabe guini' de que ma nuu ni jneza la?, zabigueta ni ra nuu ca xa ique ni bidxigueta ni que. Ne pa jma de galaa de ca ndi' naaca ma nuu ni jneza la?, ma zaca ni diidxa' ro' bia' ne zabi cabe xa ique ni rucaani lu gu'chi' rucheeche diidxa' ca ucaani, ti ganna binni de que ma biree xti' diidxa' bia'.

Ca diidxa' ni guiete ra cacayune cabe ti diidxa' la?, zaca ni chupa chonna si.

D. Pa xiixa diidxa' yachi' ni gacaladxi cabe gaca diidxa' bia' la?, zabigueta ni ra biree ni, ne gúluiná guirá diidxa' narenda ni bidxeela lu ni. Ra guibigueta ni ca la?, zaca yuu ne cabe ni xti' bieque, ne pa jma de galaa de laacabe guini' de que ma nuu ni jneza la?, zabigueta ni ra nuu ca xa ique ni bidxigueta ni que. Ne pa jma de galaa de ca ndi' naaca ma nuu ni jneza la?, ma zabigueta ni lu ná xa ique ni rucaa ni lu gu'chi' que ne ma gaca ni ná lu ndaa A ni ca lu guía ri'; pa que tiidi' ni la?, ma que zanda di' guibigueta ni lu ná ca xa ique ri' xti' bieque la?, ne laaca lu iza dxi guca ni que.

E. Pa, ti diidxa' yachi' ni nuu cabe gaca diidxa' ro' bia', guibigueta ti napa diidxa' narenda lu ti ndaa o lu guidubini, o pa bi'ni' chaahui cabe xiixa lu ni la?, ca xa ique ni ruzuhua lu xtiidxa' binni ca zaca yuu neca ca diidxa' ni cadí ca jneza que, ne que chi guchaahui di' ca, ca ndaaga ni ma nuu jneza. Pa ca diidxa' ni bi'ni' chahuí' ca xa ique ri', guini' jma de galaa de laacabe naaca ma nuu ni jneza la?, ma zabigueta ni lu ná xa ique ni rucaa ni lu gu'chi' que ne ma gaca ni casi ná lu ndaa A ni ca lu guía ri';

Pa ca diidxa' yachi' ni nuu cabe gaca diidxa' bia' ca, que tiidi' la?, zabigueta ni xti' bieque lu ná ca xa ique ri' neca laaca, laacabe bi'ni' cabe ni, ne pa ra guibigueta ni xti' bieque ca, na ca xa ique ri' de que caru' di' chu' jneza la?, ma que zadidi' di ni lu ná xtobi, ne ma zaca ni casi ná ndaaga A ni ca lu guía ri'; Pa yoo ro' ra ría' ca diidxa' bia' ca, ica tema lu ca xa ique ni ruya' ca diidxa' ca' ti ganda gaca diidxa' bia la?, neca ma gudxi cabe laa de que cadí nuu diidxa' yachi' xti' jneza la?, guidubi naca ni ma que zanda di' guibigueta ni lu naaca be lu iza que ca, ne zabeeza

ni xti' iza ti ganda tiidí' ni, paaxa ca xa ique ni ruzuhua lu xtiidxa binni guidxi ca' guidaagu ca ne guni' ca' ica neca ca diidxa' ro' ni nuu jneza ca' ica lu gu'chí', ne guiaana ga ca ni cadí nuu jneza ti ganda uca ne cabe laa xti' bieque.

F. Ra gusiene cabe diidxa' bia', guni chaahui laa, o guxha' cabe diidxa' bia' o ra cue cabe xti' diidxa' bia' nacubi la?, laaca ca dxiiña' ne ca neeza rí' gusiene laacabe xi guni cabe.

G. Guirá diidxa' yachi' ni gacaladxi cabe gaca diidxa' bia' ne que tiidí' ra guya' que la?, ma que zanda di gudxigueta cabe ni xti' bieque lu iza que ca.

H. Guirá diidxa' yachi' ni gacaladxi cabe gaca diidxa' bia' la?, zanda guzulu cabe ni ndaaní' intiisi yoo ro' ra ria' ca ni, ni que zanda gaca ndaaní' intiisi de ca yoo ri nga, ca dxiiña' ra riete de bidxichi, o ra cutopa cabe binni ti gaca dxu', guirá dxiiña' ri la?, niru do' ra icaa yuu ne cabe ni nga ndaaní' yoo ra runi ca diputadu ca dxiiña'.

I. Guirá diidxa' yachi' ni gacaladxi cabe gaca diidxa' bia' la?, zaca yuu ne cabe ndaaní' ti yoo ra ribee cabee xia cabe ti diidxa' bia', ne pa tiidí' ti beu de gudiidí' ni lu ná ca ni cayua gaca chaahui ni, ne pa ca ndí' que guiní' ca' xi modo nuu ni la?, ma zadiidí' ni lu ná xcaadxi xa ique ni ruzuhua lu xtiidxa' binni guidxi ni nuu ndaaní' xti' yoo ra ria' diidxa bia' que, ne ma icaa yuu ne ca ni.

J. Xa ique ro' ni rucaa diidxa' bia' lu gu'chí' ni rireeche lade binni, que zanda di ugu rua' lu xiiña' ca xa ique ni ruzuhua lu xtiidxa' binni guidxi ni ribi cabe diputadu ne senador, pa laaca cayuuni ca dxiiña' de ra ribii cabe xa ique guidxi o pa laacabe cabii cabe tu guni dxiiña' que, ne laca pa yoo ra runi ca diputadu ca dxiiña' gudxiiba' ca donda ique tuuxa xa ique ro' xti' guidxi ro' rí' pa bichee lu xiiña'. Laaca que zanda di guni cabe ni lu xiixa gu'chí' ra guseenda ca' cabe tuuxa xa ique ne gabi cabe ni laa.

Lu guionna ndaa xtiidxa' gu'chí' ro' bia' rí' Ca ni zanda guni ca yoo ro' ra ria' diidxa' bia'

Ndaaga 73. Yoo ro' ra ria' diidxa' bia' la?, zanda guni ca ndí':

I. guiu xcaadxi guidxi ndaaní' guidxi ro' zaguita (mexicu);

II. (Diidxa' bixa)

III. Pa chu' xiixa guidxi huiini guinaaba' gaca guidxi ro' ndaaní' ca layu xti' zaguita (mexicu), la?, naquiiñe gapa ni can di:

1. Ca guidxi huiini ni gacaladxi gaca guidxi ro' ca la?, naquiiñe gapa ca ni neca ti gayua gande mil binni ndaaní' ni.

2. Naquiiñe guzuhuini cani neeza lu ca binni ni runi dxiiña' ndaaní' yoo ra ria' diidxa' bia', ca de que napa ca ni xtale xtipa ra guni ni intiica' dxiiña' gacaladxi ni.

3. Ti ganda gaca ca guidxi huiini ca, guidxi ro' la?, naquiiñe guihuini xtiidxa' ca xa ique ro' xti' guidxi' ro' ra chi guiré guidxi huiini que, pa ná cabe de ya o pa co' la?, lu xhoopa beu la?, naquiiñe guseenda cabe xtiidxa' cabe ra nuu ca xa ique ro' ni nuu ndaaní' guidxi ro' zaguita (mexicu).

4. Laca naquiiñe guihuini xtiidxa' xa ique ro' ni ruzuhua lu xtiidxa' binni guidxi ni runi dxiiña' ndaaní' yoo ra ria' diidxa' bia' ni nuu ndaaní' guidxi ro' zaguita (mexicu) ca, lu gadxe gubidxa' pa zaca ni guidxi ro' la?, o pa co'.

5. Naquiiñe guindisa ná jma de galaa ca xa ique ro' ni ruzuhua lu xtiidxa' binni guidxi ni rabi cabe diputadu ne senador ca pa cayuni ca' dxiiña' ndaaní' yoo ra ria' diidxa' bia' que.

6. Ca diidxa' ni gulee xia ca xa ique ni ruzuhua lu xtiidxa' binni guidxi ne xtiidxa' ca xa ique ro' xti' ca guidxi dxaaga lisaa zaguita (mexicu), la?, zasaca ca ni jma, huaxa guchiña ca ni copia xti' ca gu'chi' ni icaa cabe, ne gudii xtiidxa' ca xa ique guidxi ra chi guiree guidxi huiini ca.

7. Ne pa ca xa ique ni ruzuhua lu xtiidxa' binni guidxi ra guiree guidxi huiini ca, que gudii xtiidxa' la?, ma jma de xcalaa ca xa ique ro' de xcaadxi guidxi ro' ca nga gudii ca' xtiidxa' ca' ti gaca ni;

IV. (Diidxa' bixa)

V. Ti guchaa ca xa ique ro' ni ruzuhua lu xtiidxa' binni guidxi ca de yoo;

VI. (Diidxa' bixa)

VII. Ti ganda gata pa bia' bidxichi caquiiñe ti ganda gaca xiiña' guidxi;

VIII. Laaca guidxi ro' nga cuaqui ca neeza, ti ganda gutiñe ca xa ique ni ruzuhua lu xtiidxa binni guidxi ca, bidxichi xti' guidxi ro' zaguita (mexicu) binni guidxi, ne laaca laani nga cuaqui neeza ti ganda guzuhuini ca xa ique paraa cayee ca bidxichi ri', ti ganda guseenda ni guiaaxa xtiñe' guidxi ro' zaguita (mexicu). Guidxi ro' que zanda di' gutiñe xpidxichi pa cadí bidxichi ni ze que gutale jma dxiiña' guni binni xquidxi, huaxa ca bidxichi ni rudii xa ique ro' xti' guidxi ro' zaguita (mexicu), ca binni guidxi pa guizaaca ca' xiixa, ca ndi nga ca bidxichi ni que zabigueta, casi ná lu ndaaga gande bi ga' xti' gu'chi' ro' ri'. Ne zaqueca, ica ca bidxichi ni zabí ca lu diidxa' bia' ni ruya' pa bia' nga bidxichi riu ndaaní guidxi, ti zanda ca ti zanda ca guinaaba' diidxa' xa ique xti' zaguita (mexicu), ne xa ique huiini ni runi xiiña' ni, casi naqui diidxa' bia' xtini. Xa ique ro' ni ruzuhua lu xtiidxa' binni guidxi ca la?, guirá iza napa ni xi guseenda guidxi ni yoo ro' ra ria' diidxa' bia' ca xi guirá' runi ni ne ca xpidxichi guidxi, ti xa ique xti guidxi zaguita (mexicu) zuseenda gu'chi' ca ra nuu ca xa ique ca. Xa ique xti' guidxi zaguita (mexicu) ni ruzuhua lu xtiidxa' binni guidxi ca la?, laaca zuseenda guidxi ni ca binni ni runi xiiña' zaguita (mexicu) xi cayuni ne be ca xpidxichi guidxi;

IX. Gu'ya' ni que chu' xiixa ucueza ni tuuxa guidxi chi gutoo ndaaní xti' guidxi;

X. Ti quixhe ni ca neeza ni gaca ne ca guidxi xti' zaguita (mexicu), casi, nisa gas, guirá guie' sicaru ni riree xagute yu, ca ni ricagui casi gueere' guí, ca yoo ra ridopa xtuuba' binni ne xtuuba' biaani, ra ridoo xiixa, ra riguite binni xiixa ne bidxichi, ne guzuhua ni lu xtiidxa' ne lu xpidxichi ca', ne quixhe diidxa' bia' xti' ca ni runi dxiiña' casi na ndaaga 123;

XI. Zanda gutale ni jma dxiiña' ne guchuugu ni binni de lu xhiiña' guidxi ro' ne zanda guni' ni guiaxa ca jma la?, o guiaxa ca' jma huaxie;

XII. Zanda gucheela nidi di' ni xti' guidxi ro', pa zaca guinaaba' ca xa ique ro' ni ruzuhua lu xtiidxa' binni guidxi;

XIII. Guzá ni diidxa' bia' ra guini' ni pa jneza gudaagu yoo ca nisa xti' nisa do', ne ca layu ca, ne laaca zanda guni ni diidxa' bia' ni guzuhua lu xtiidxa' ca nisa do' ca pa chu' xiixa guenda naxoo lu ca' ó pa chu' ca jneza;

XIV. Guindisa ni ne gudii ni xtipa' ca yoo ro' ra riu ca dxu' ni rapa binni guidxi, casi ca dxu' ni runi dxiiña' lu nisa do', ne ca dxu' ni rapa binni guidxi ndaaní ca layu xti' zaguita (mexicu);

XV. Gudii ni neeza ne quixhe chaahui ni ne gusiidi ni ca dxu' ni rapa binni guidxi, ne que chiguiete ca binni ni nuu ndaaní ni, ne icaa ca dxu' rí ti guí'chí' ni guini' xi guenda napa ca', laaca zaaca ca guidxi ro' ca ti guí'chí' ni gusisaca xhiíña' ca' saca bisiidi' ca', ca dxu' ni ni rapa xquidxi ca', casi nabaqui ca diidxa' bia' ni rusiidi xi guni dxu';

XVI. Guini ni diidxa' bia' ni gaca ne ca binni zeeda de ndaaní xti' guidxi zitu ni cadí xti' zaguita (mexicu), ne ca binni ni nuu o nabeeza ndaaní ca xquidxi ni, ne ni gaca ne ca binni ni guca laadxi ca' gaca ca' xiiñí zaguita (mexicu), ca binni ni bíni' ca' ti ndaa guidxi, ne ca binni ni zee ne zeeda de xti' guidxi ti guni ca dxiiña' ne ca ni gaca ne ca guenda nazaaca xti' binni guidxi.

1ª. Ca yoo ro' ra riapa xquenda ca binni guidxi la?, lu ná xa ique ro' xti' zaguita (mexicu) nga nuu cabe, ne sin cu' rua' xti' yoo ro' xti', xti xa ique ni ruzuhua lu xtiidxa' binni guidxi, ne xtiidxa' ca ni la?, napa ca ni xi gaca ca ni ndaaní guidxi xti' zaguita (mexicu).

2ª. Pa gueeda guiaba xiixa guenda huara ni guni ná binni, o ti guenda guiidxa ni gueda guiahui lu guía xiixe' binni guidxi la?, ca xa ique xti' yoo ni nuu ti gapa xquenda ca binni huara la?, napa cabe xi guini' cabe nagueenda si xi zanda guni binni ti que chi ica ni laa, ne pa laacabe que guni cabe ni la?, suzaaba ná xa ique ro' xti' zaguita (mexicu) laacabe.

3ª. Binni ni runi dxiiña' ndaaní xiixa yoo ti que chu' guenda huara la?, zaca be xa ique ro' ne ca diidxa' ni guini' be la?, guirá' ca xa ique huiini ni runi dxiiña' ndaaní ca yoo ra rianda binni ni nuu ndaaní guidubi guidxi di la?, napa cabe xi guni cabe ni ná be.

4ª. Ca diidxa' bia' ni cue ca yoo ra riapa' xquenda binni guidxi casi, ca diidxa' ni rizaabi lade ca binni re' nisa dxu'ni' o ca diidxa' ni rizaabi lade ca binni ni re' intiisi ne guni ná guenda nasaaca ca', ne ca diidxa' ni guiete ti cadí gaca ná ca guixhi' xti' guidxi la?, napa ca ni xi guiete ca ni neza lu ca xa ique ni ruzuhua lu xtiidxa' binni guidxi ti guihuni pa nuu ca ni jneza;

XVII. Ra cue ni diidxa' bia' ni gapa xqui'chí' binni ra guseenda ni ra nuu xtobi, ne ra cue ni diidxa' bia' ti iquiiñe binni guidxi nisa xti' guidxi ro';

XVIII. Guzaani o ucuni yoo ra ria' bidxichi, ne quixhe ni xi modo guni ca binni ca dxiiña' nadaani ni, ne cuaquini pabia' nga guisaca xpidxichi ca gringu ca ndaaní guidxi rí' ne gapani ti xiixa ni cu' bia' pabia' nana ca bidxichi ca;

XIX. Quixhé ni pa bia' guisaca ti layu ni nuu xtubi, ne modo iquiiñe ni, ne pa zanda icaa xtobi ni.

XX. Quixhe ni diidxa' bia ni iquiiñe' ca xa ique ni ruzuhua lu xtiidxa' guidxi ro' (mexicu), neza lu xcaadxi xa ique de xti' guidxi ro' ni cadí xti' zaguita (mexicu);

XXI. Cuaqui ni donda ne xi modo gaca laadxi ni gusaaba ná ni ca binni ni gacaladxi guchee ne guidxi ro'; cueni diidxa' bia' ni gusaba ná ca binni ni ribaana binni, ne guini' ni xi donda nga cabeeni ne modo gacaladxi ni gusaaba ná ni ca ni bichee ne donda ni gulee ni ca, ne guidagu lisaa ni ca xa ique xti' guidxi ro', ne ca xa ique xti' ca guidxi huiini, ne guni' ni tu laa nga zanda guini ca dxiiña' ri', ne zaqueca gusaaba ná ni ca binni rudaagu lisaa ne cuana ca binni ne guinaaba' bidxichi.

Ca xa ique ro' rugaani donda la?, zanda gu'ya ca donda ni cayaca ndaaní ca guidxi huiini ca, jma pa nuu pa ca donda ni guca ca' nexhe ni lu ná guidxi ro';

Ca donda ni ma biete lu gu'chi' ro' bia' ri ne ca diidxa' ro' bia ni nexhe lu ná guidxi ro' la?, ma laaca ni guini' ca ni para nga zanda cue xia ca xa ique huiini xtica' guidxi huiini ca donda ni nexhe lu ná guidxi ro';

XXII. Zanda guxha ni donda' xti' tuuxa pa ma bichee ne guidxi ro';

XXIII. Cue ni diidxa' bia' ti ganda guidagu lisaa ni ca xa ique xti' guidxi ro', ne ca xa ique xti' ca guidxi huiini, ne guini' ni tu laa nga zanda guni ca dxiiña' xti' guidxi ro', casi ná ndaaga 21 xti' gu'chi' ro' bia' ri'.

XXIV. Cueni diidxa' bia' ni guza' ca neeza ra guihuini xpidxichi guidxi ro' ne xcaadxi diidxa' ni guini' de bidxichi ne uca' ni ca xa ique guidxi ni ruzuhua lu xtiidxa' binni ca guini' ca' xi cayuni ne ca xpidxichi guidxi ro';

XXV. Gaca ne ni ne guzuhua dxiiichi guirá ca yoo ro' ra riziidi binni gun'da' ne uca ni nuu ndaaní' ñaa casi ra riziidi cabe de guenda ne xpia' binni hula'dxi', ne ra gusiidi' cabe b'ni' modo raca dxiiña' raña, ne guiziidi' ca be de guirá xixe dxiiña' ni ra ca ndaaní' xquidxi huiini cabe; ne zanda gunini diidxa' bia' ni gapa guirá ca yoo yooxho' ni nuu ndaaní' ca guidxi ca, ne ná guidxi ro' zaa guiapa' ca ni; ne zaqueca cue ni diidxa' bia' ni gutaagu lisaa guirá guidxi ro' ne ca guidxi huiini de lu ca dxiiña' ni rusiidi binni gun'da' ne uca, ne pabia' nga bidxichi guiaxa ca binni ni chi gusiidi' ca',

ti zaca gucheela' lisaa ni ca binni rí' ti guiziidí' guirá binni xiiñí' zaguita. Ca gu'chi' ni gudii ca yoo ra riziidí' binni gun'da' ne uca zapa ca ni xtipa' ndaaní' guidubi naca zaguita (mexicu). Laaca zabee ni diidxa' bia' ni gapa ca diidxa' ni ruca binni, casi diidxa' guie' ne ni ruza' binni.

XXVI. Gudiini gu'chi' xa ique ro' guidxi xti' zaguita (mexicu), pa gacaladxi guire o guiadxa lu ca dxiiña' xti' ne gu'ni tu zanda guiu ga guni xhiiña' xa ique ni chi guiree que, ti ganda gaca ni ná ndaaga 84 ne 85 xti' gu'chi' ro' bia' rí', ne zaqueca guiuni lu ca dxiiña' ni raca ra ribii cabe xa ique guidxi.

XXVII. Icaani gu'chi' ni gudii xa ique ro' xti' zaguita (mexicu), guidxi ca pa ma que raca laadxi guni dxiiña',

XXVIII. Guni ni diidxa' bia' ni gu'ya' igaaba' bidxichi ni cudii xa ique guidxi guirá binni guidxi ti zaca guihuni pabia' bidxichi cayaana ne caye lu ná binni, ne zaca guiu ca guidxi huini ne ca guidxi ro' xti' zaguita (mexicu), nayeche ne sin ti bichenda;

XXIX. Ti ganda guiu jma bidxichi gaca ne guidxi ro' la?, naquiiñe gaca ca ndí':

1º. Ra gutoo ni xiixa ndaaní' ca luguiaa ro' xti', xti guidxi;

2º. Ra gutoo ni ca ni cue ndu' ca xlayu ni casi ná ca lana 4º ne 5º xti' ndaaga 27 xti' gu'chi' ro' bia' rí';

3º. Ca yoo xtini ni ruquiixe bidxichi ne ca yoo ni rapa xquenda nabaani binni;

4º. Ca xhiiña' guidxi o ca dxiiña' ni ribee ndu' guidxi ro' lu ca xlayu; ne

5º. Ca dxiiña' ni jma risaca ne jma riguu bidxichi casi ca ni ca xaguete rí':

a) Biaani;

b) Ra ria' gueeza ni ruguuba binni;

c) Nisa gac ne xcadxi ni riree lu ni;

d) Guirí' biidxi ne ceriu;

e) Nisa naxi ne nisa dxu'ni' ni riree lu duba;

f) Ra rusaaba cabe guixhi', ne

g) Ra cha nisa dxu'ni' la ne ra guidoo.

Guirá' ca guidxi dagulisaa zaguita (mexicu) la?, zui ca la dxiiña' ni risaaca napa guidxi ro' ti zaca na guiropa diidxa' bia' guidxi ro' gaca ni; ca xa ique ni ruzuhua lu xtiidxa' binni guidxi xti' ca guidxi huiini ca la?, laaca nga cuaqui ca' pabia' guiaxa saca biaani.

XXIX-B. Ti guiapa' lari ndxo xti' guidxi ro' casi bisia, bia gueta ne beenda ni ca lu ni, ne saa ndxo' ni rixiidxi.

XXIX-C. Ra cue ni diidxa' bia' ni gudii xtipa' ca xa ique ro' ne ca xa ique xti' ca guidxi huiini ca, ne guni ca dxiiña' de ra rugaanda xtipa' xtica' ti gaca ca dxiiña' ni riní' paraa nga zanda ucui binni liidxi, ti zaca ganda gaca ca ni ca lu guiona lana xti' ndaaga 27 xti' gu'chi' ro' bia' ri';

XXIX-D. Ra cue ni diidxa' bia' ni guni ca neeza ti guidale xpidxichi guidxi ro', ne ca layu ni jma riu laadxi guidxi ro', ne ca diidxa' ni guini' xi modo nuu guidxi

XXIX-E. Ra cue ni diidxa' bia' ni guni dxiiña' ti chu' bidxichi ndaaní' guidxi casi ca ni jma rudoo ndaaní' luguiaa ne gotoo ni ca ni jma riqiuiñe xti' guidxi ro' ni cadí dagulisaa zaguita (mexicu);

XXIX-F. Ra cue ni diidxa' bia' ra gutiiñe ne gúsisaca guidxi ro' xpidxichi, ne ra ucueza ni xti' guidxi ni cadí dagu lisaa zaguita (mexicu), cu' xtale xpidxichi ndaaní' guidxi ri' ne ca dxiiña' ni jma riqiuiñe guidxi ro', ne ra guni ca dxiiña' ra guchaa lisaa o gutiiñe lisaa guidxi ca guiiba' ni nanna ni napa;

XXIX-G. Ra cue ni diidxa' bia' ni gudii xtipa' ca xa ique ro' ne ca xa ique xti' ca guidxi huiini ca, ne guni ca' dxiiña' de ra rugaanda xtipa' xtica', ti gaca ca dxiiña' ni raca ne lu ca diidxa' ni rapa' ca guidxi layu ti cadí gaca ná, ne ra guiapa' ca guixhi' xti' ne guzuhuaca' jma yaaga huiini naga lu ca guixhi' xtini ca;

XXIX-H. Ra cue ni diidxa' bia' ni gusiidi' ca yoo ra riree xia donda ca, ti laaca nga napa ca' xi gu'ya' ca' que chi chuu xiixa guenda naxoo lade binni

guidxi ne ca xa ique ni runi xhiiña' guidxi ro', ne laaca laani nga gusaba ná ni laaca pa que guni ca' ni ma guni' ni, ne laaca zabaqui ni neeza guni ca dxiña', ne ca xtipa' ni gúdxiiilu ne binni pa que chu' laadxi ca diidxa' ni ma biree ndu' o biree xia luguia ca';

XXIX-I. Ra cue ni diidxa' bia' ra guidagu lisaa ca guidxi huiini ne guidxi ro' xti' zaguita (mexicu), ti ganda gutaagu ca xhiiña' ca' ti guiapa' binni guidxi casi ra caree guiigu', ne

XXIX-J. Ra cue ni diidxa' bia' ra guiapa' ca dxiña' ni rapa ca binni ni riguite tapu' ti zaca guiana neeza ni gutaagu lisaa ca guidxi huiini ca ne ca guidxi ro' xti' zaguita (mexicu), ne laaca gutaagú ni ca binni guidxi ne ca binni nuu xtubi;

XXIX-K. Ra cue ni diidxa' bia' ra guiapa' ca dxiña' ra rie binni che chi iza rua nisa ne ra chi gana ca' yoo yooxho' ti zaca guiana neeza ni gutaagu lisaa ca guidxi huiini ca ne ca guidxi ro' xti' zaguita (mexicu), ca lu dxiña' rí' ne laaca gutaagú ni ca binni guidxi ne ca binni nuu xtubi;

XXIX-L. Ra cue ni diidxa' bia' ra guidagu lisaa ca xa ique xti' guidxi huiini ne ca xa ique xti' ca guidxi ro' xti' zaguita (mexicu), lu ca dxiña' re rie binni gúze benda ne ca binni runi dxiña' ndaani' nisa do' ne laaca gutaagu ni ca binni guidxi ne ca binni ni nuu xtubi, ne

XXIX-M. Ra cue ni diidxa' bia' ra guiapa' ca dxiña' ni gapa' binni guidxi, ne laaca zabaqui' ni ca neeza chinanda ca dxiña' rí' la?, ne de ra rugaanda si ca ni.

XXIX-N. Ra cue ni diidxa' bia' ni gaca ne dxiña' ra ganda guidaagu lisaa binni guni dxiña' ne laca laani ganda guchia ni laaca. Ca diidxa' bia' ri la?, zabaqui ni neeza ra guidaagu lisaa ca guidxi huiini ca ne ca guidxi ro' xti' zaguita (mexicu), ti ganda guni ca' dxiña' de ra ruganda xtipa' xtica';

XXIX-Ñ. Ra cue ni diidxa' bia' ra guidaagu lisaa ca guidxi huiini ca ne ca guidxi ro' xti' zaguita (mexicu), ti ganda guni ca' dxiña' de ca guenda ne xpia' binni, ne paaxa xiná ru' ndaa XXV xti' ndaaga rí'. Ti ganda guidaagu lisaa binni guidxi ne ca binni nuu xtubi, ti gaca ni ná lana ga' xti' ndaaga 4° xti' gui'chi' ro' bia' rí'.

XXIX-O. Cue ni diidxa' bia' ra gapa ni xqui'chi' binni ni nuu lu ná xtobi.

XXX. Ra cue ni guirá diidxa' bia' ni ganda iquiiñe, ti gaca guirá ni ma ucuá lu guía rí, ne xcaxdi diidxa' ni ma bidii gu'chí ro' bia' rí ca xa ique ni ruzuhua lu xtiidxa' binni guidxi guni ca'.

Ndaaga 74. Ca ni naquiiñe' guni ca xa ique ni ruzuhua lu xtiidxa' binni guidxi ni rabicabe Diputadu:

I. Cuidxi cabe binni guidxi ne uca cabe lari ndxo' ladxi do' binni ni yene de xa ique ro' xti' guidxi ne binni ni yene de xa ique guidxi rí la?, zani ne binni guidxi ti ganna cabe de que laa nga chi gaca xa ique ro xti' guidxi rí;

II. Quixhe chaahui ni, ne gu'ya' ni ca dxiiña' ni cayaca xti' guidxi ro', casi naquí diidxa' bia' gaca ni, sin guniti ni xtipa' xtini;

III. (Diidxa' bixa)

IV. Cada iza guini' cabe pabia' bidxichi nga guiree de ndaaní' guidxi, huaxa niru do' la?, naquiiñe, icaa yu ne cabe ni, guchaaga bia' cabe xtiidxa' cabe pa zanda guiree bidxichi ni gunaaba' xa ique ro' ni ruzuhua lu xtiidxa' binni guidxi que, ne pa na cabe guiree ni la?, zaree ni, ne ica xi modo guíaxa ni. Laaca zaqueca, zanda guini' cabe, pabia' bidxichi nga guiree lu ti iza, ti ganda guni binni guidxi dxiiña' ne zaca gaca ni na diidxa' bia' xti' ca dxiiña' rí; ca bidxichi ni chi guiree dí la?, zaca ni lu ca gu'chí ra rica pabia' xpidxichi guidxi nga caree.

Xa ique ro' ni ruzuhua lu xtiidxa' guidxi la?, zuseenda ti gu'chí ra ca ti diidxa' yachí ni guni' pabia' bidxichi guiree la?, ne guiu ndaaní' guidxi ro', gu'chí ri la?, napa ni xi chindaaní' lu 8 guibiidxa lu beu Nativita (septiembre), ne binni ni runi xhiiña' ca xa ique ri nga che guini' xi ze xa ni. Ca xa ique ro' ni ruzuhua lu xtiidxa' binni guidxi ni rabi cabe diputadu ca la?, napa cabe xi guini' cabe pabia' xpidxichi guidxi nga guiree ne zani cabe ni lu **chii bi gayu** guibiidxa lu beu noviembre.

Ra guzulu xa ique ni ruzuhua lu xtiidxa' binni guidxi ca guini dxiiña' casi nabaquí' ndaaga 83 xti' gu'chí ro' bia' ri la?, napa be xi guzeenda be ti gu'chí ra ica ti diidxa' yachí ni guini' pa bia' xpidxichi guidxi guiu ne guiree, ne naquiiñe guseenda be ni lu **chii bi gayu** gubidxa lu beu pascua (diciembre). Que zanda dí' guiree xiixa bidxichi nagachi de bia' ni ma nexhe guiree, de lu bia' bidxichi ni ma ucuá cabe; ne que zaree dí' ca ni neca ne xiixa gu'chí ni gudii xa ique ro' xti' guidxi rí laacabe. Pa gacaladxi cabe guindaa ca gu'chí ni ca diidxa' yachí lu ca jma dxi la?, napa cabe xi

chine cabe ne xtiidxa' ca xa ique ro' ni ruzuhua lu xtiidxa' binni guidxi ca ti gaca ni, huaxa laaca naquiiñe chine cabe ne xtiidxa' ca xcadxí xa ique ni ruzuhua lu xtiidxa' binni guidxi ni rabcabe diputadu ne senador ca ti gaca ca ni canaaba cabe que, ne pa co' la?, naquiiñe che xa binni ni runi xhiiña' xa ique guidxi ro' que guini' xiñe canaaba' ni;

V. Guini' cabe pa zanda quiiba' donda ique ca xa ique ni runi xhiiña' guidxi ca pa laaca' guchee ca' lu ca dxiidxa' ni nabaqui ndaaga III xti' gu'chi' ro' bia' ri'. Laaca naquiiñe ganna cabe xi donda caguiiba' ique ca xa ique ni runi xhiiña' guidxi ni ná ndaaga IIO xti' gu'chi' ro' bia' ri', ti ganda chu cabe laacabe gudxiiba' donda' ri' ique ca xa ique ca;

VI. Naquiiñe gu'ya' cabe pabia' bidxichi biniti guidxi lu iza gudí'dí que, ti ganna cabe xi modo nuu xpidxichi guidxi, ne ganna cabe de que dxandí biquiiñe ca binni ri' bia' bidxichi ni bidii cabe laaca que ti guni ca xhiiña' ca'.

Ni gu'ya' xi modo nuu xpidxichi guidxi nga ca xa ique ni ruzuhua lu xtiidxa' binni guidxi ni rabi cabe diputadu, ne zuni cabe ni ne ca neeza xti' ca xa ique ni ruya' de xpidxichi guidxi ro'.

Ne pa ra chi gu'ya' cabe xi modo ze ca dxiiña' xti' guidxi ne xpidxichi la?, napa xi chu' xqu'chi' cabe ne xqu'chi' ca xa ique ri tobi si, ti guihuni paraa nga caquiiñe cabe ca bidxichi ni ucuacabe que, ne pa que guzuhuini cabe ni la?, zabaquí diidxa' ro' bia' ti donda ique cabe.

Ne ra che ca xa ique ri' chi gu'ya' ca' pa nuu ca dxiiña' ri jneza la?, laacabe zabi ca binni ri' xi zanda guni ca ti gaca ca dxiiña' xti' ca jneza, ti zaca nabaqui diidxa' bia' gaca ni.

Ca bidxichi ni guiree ti ganda guni binni guidxi dxiiña' la?, napa xi chee ti gu'chi' ra nuu ca xa ique ni ruzuhua lu xtiidxa' binni guidxi ni rabi cabe diputadu ca ante ganda 30 de beu nabaaná de lu iza ni zeeda ca.

Ne zanda guindaani' jma casi ná ndaa IV, xti' ndaaga ra riluuxe ca diidxa' ri'; ne pa gaca laadxi cabe guindaani' jma la?, que zanda dí' tiiddi ni jma de lu 30 dxi, dxi racadxiiña' ca. Ne pa guindaani' bia' dxi ca la?, ca xa ique ni rugaaba' xpidxichi guidxi' ro' ca la?, laaca bia' dxi ca nga guindaacabe ti ganda guini' cabe pabia' bidxichi nga napa guidxi ro'.

Yoo ro' ra runi ca xa ique ni ruzuhua lu xtiidxa' binni guidxi ni rabi cabe diputadu ne senador ca la?, zaluuxe cabe de gu'ya' cabe pa bia' xpidxichi

guidxi nga nuu de lu 30 lu **beu nativita** de lu iza bidxiña' gu'chi' que ra nuu cabe, ne ca ni guini' cabe ca la?, **napa ni xi chinandani casi ná gu'chi' ni guye ra nuu cabe que**, ti gaca ni ná ndaaga 79 xti' gu'chi' ro' bia' rí, ne sin guni ná ni ca diidxa' ni ca lu gu'chi' ni guyee ra nuu cabe que, ti ca xa ique rí zie ca ziguziidi' ca' casi nabaquí ndaaga rí.

Ca xa ique ni ruzuhua lu xtiidxa' binni guidxi ni rabi cabe diputadu ca la?, zugu bia' cabe xpiani ca xa ique ni rugaaba' xpidxichi guidxi ro' ca ne zanaaba' diidxa' cabe laaca xi guirá dxiiña' cayuni ca';

VII. (Diidxa' bixa);

VIII. Ne guirá ru' xtipa' ni gudii gu'chi' ro' bia' ri laacabe.

Ndaaga 75. Yoo ro' ra runi ca xa ique ni ruzuhua lu xtiidxa' binni guidxi ni rabi cabe diputadu ca la?, ra cue cabe diidxa' de pabia' xpidxichi guidxi nga guiree la?, napa cabe xi guini' cabe pabia' nga guisaaca ti dxi dxiiña' casi nabaquí diidxa' bia'; ne pa guianda laacabe uca' cabe pa bia' risaca ti dxi dxiiña' la?, binni ma ziene deque maca ucuca ni lu diidxa' bia' ni ruya' gaca dxiiña'. Ne pa co' la?, napa ni xi chinanda ni ca diidxa' ni ca lu ndaaga 127 xti' gu'chi' ro' bia' rí ne lu ca diidxa' bia' ni cue yoo ro' ra ria' diidxa' bia' que.

Ca xa ique ro' ni ruzuhua lu xtiidxa' binni guidxi casi, xa ique ro xti' guidxi zaguita (mexicu), ca xa ique ni rapa binni guidxi, ca xa ique ni ruca diidxa' bia' lu gu'chi', ne ca xa ique ni que riquiiñe xtipa' xti' xa ique ti ganda guni dxiiña' ni ma nanna gu'chi' ro' bia' zaca runi ca dxiiña' la?, ne riquiiñe ca xpidxichi guidxi la?, napa ca xi guni ca ti gu'chi' ra ica pabia' nga raca laadxi ca guiiaxa ca binni ni chi guni xhiiña' ca. Ca diidxa' ri la?, napa ca ni xi chinanda ca ni casi ná ca diidxa' ni rini' de xpidxichi guidxi, ne casi nabaquí ndaa IV xti' ndaaga 74 xti' gu'chi' ro' bia' rí ne xcaadxi diidxa' bia' ni rini de xpidxichi guidxi ro'.

Ndaaga 76. Ca dxiiña' ni zanda guni ca xa ique ni ruzuhua lu xtiidxa' binni guidxi (senado):

I. Gu'ya' cabe pa cayaca ca dxiiña' xti' zaguita (mexicu), jneeza ndaaní xti' guidxi ro', ra ganna cabe de que cayaca ca dxiiña' ri la?, zunda cabe ni lu gu'chi' ni guzeenda xa ique ro' xti' guidxi zaguita (mexicu), ca ra nuu cabe, ne laaca zuseenda ca xa ique ni runi xhiiña' ca xa ique ro' guidxi ca ni ra nuu cabe. Laaca, zanda gudii xtiidxa' cabe de guirá ca dxiiña' runi xtipa'

ro' ni rzuhua lu xtiidxa' ne rapa binni guidxi ca guni ndaani' xti' guidxi ro' ni cadi dxaaga zaguita (mexicu), o ni cadi xti' zaguita (mexicu), casi ca dxiña' ra gunduuxe ni xiixa, ni guchaa ni, ni guni chaahui ni, o ra cuaqui chaahui ni xiixa diidxa' ni ma biete rí;

II. Guidii xtiidxa' cabe de que dxandi xtipa' ni napa ca xa ique ni chi quiete rari ca la?, jneza ca ni, casi ca xa ique ni gu'ya' chu' guidxi jneza ne sin ti guenda naxoo, ca xa ique ni rine xtiidxa' guidxi ro' xti' guidxi zitu ni cadi dagu lisaa zaguita (mexicu), ca xa ique xti' ca dxu' ni rapa guidxi ro' casi nabaqui' diidxa' ro' bia' gaca ni;

III. Laaca zanda gúdii xtiidxa' cabe guiree ca dxu' soldadu ca de ndaani' guidxi ro' rí, ne pan a cabe tiidí ca dxu' de xti' guidxi ro' ni cadi dxaaga zaguita (mexicu) la?, ndaani' ca layu xti' guidxi ro' la?, zanda o laca zanda gudii xtiidxa' cabe guiaana ca dxu' ca lu ca nisa do' xti' guidxi ro' jma de ti beu;

IV. Laaca zanda gudii xtiidxa' cabe, xa ique ro' xti' guidxi ro' zaguita (mexicu), ti ganda guzeenda ca dxu' ni rapa guidxi ro' ca xti' guidxi, huaxa naquiiñe guini' be pabia' xtipa' nga caquiiñe be;

V. Guini' cabe pa chu' dxi gueda guiniti' ca xtipa' ti guidxi ro' dxaaga zaguita (mexicu) pa gaca nga la?, zabi ti xa ique ro' ni chu' ga laga cui cabe xti' xa ique ro' xti' guidxi casi nabaqui' diidxa ro' bia' xti' xquidxi cabe. Gu'chi' ni ica xa ique ro' ni chi chu' ga que la?, ca xa ique ni ruzuhua lu xtiidxa' xa ique binni guidxi que nga gudii ni laabe, ra gaca ca dxiña' ri la?, xa ique ro' xti' guidxi ro' zaguita (mexicu) nga guini' tu laa zanda gaca ni, huaxa ne xtiidxa' jma de galaa de ca xa ique ni ruzuhua lu xtiidxa' binni guidxi ca nga gaca ni. Xa ique ni gulii cabe chu' ga que la?, que zanda cui cabe laa, ti ganda quite' ra ribii cabe binni ni gaca xa ique guidxi ro'. Ca diidxa' ri zaca ni pa ndaani' guidxi ra chindi cabe xa ique guidxi que ná de que zaca gaca ni;

VI. Cue xia cabe guirá ca guenda naxoo ni chu' lade ca xtipa xti' ca xa ique guidxi xti' ti guidxi ro' o pa ra guchee necabe gu'chi' ro' bia' ne ucueza cabe ca guenda nagaana ni napa ca xa ique. Ne pa gaca xiixa guenda nagana ni biete lugua ca la?, ca xa ique ni ruzuhua lu xtiidxa' ca binni guiidgxi ca nga guini' xi gaca?, huaxa naquiiñe chinandaca' casi nabaqui' gu'chi' ro' bia' xti' guidxi ro' ne gu'chi' bia' xti' guidxi que;

Diidxa' ro' bia' nga quixhe' ca neeza ne ca dxiña' ni gúni ca xa ique rí' lu ca guenda nagana ca.

VII. Guiu ca tobisi ne gutagu ixtiidxa'ca' ti ganda ganna ca de ca donda ni quiba' ique ca xa ique ni runi xhiña' guidxi, ra gúninaca' binni guidxi, casi nabaquí ndaaga 110 xti gu'chí ro' bia' rí;

VIII. Quixhe cabe tu gaca xa ique ro' ni guni dxiiña' ndaaní ca yoo ra ría' diidxa' bia' ne riapa' xquenda binni guidxi, ne tobi de ca ni guini' tu zanda gaca ni nga, xa ique ro' xti' zaguita (mexicu), ne laca zaqueca gu'ya' cabe pa za guiree o guiu tuuxa ni guni dxiiña' ni cayeté rí;

IX. Cui cabe tu laa zanda gaca xa ique xti' guidxi ro' casi nabaquí gu'chí ro' bia' rí;

X. Ra ma guni' jma de galaa de ca xa ique rí, pabia' nga xti' ca guidxi ro' ca la?, napa cabe xi gudii xtiidxa' cabe gaca ni;

XI. Napa ca be xi cue xia cabe pabia' nga layu ni napa ti guidxi', ra gaca ndi la?, napa guidxi ca xi guinaaba'ni laacabe pa zanda guni cabe ni, huaxa ti gaca ni jma nga ra guini' jma de galaa de ca xa ique rí gaca ni zaca;

XII. Ne guirá' ru' xtipa ni gudii gu'chí ro' bia' ri laacabe.

Ndaaga 77. Cada tobi de ca yoo ro' ca la?, zanda guni ca' xhiña' ca', pa que guini xcaadxi xa ique ni runi dxiiña' ndaaní ca yoo ro' ra ría' diidxa' bia' ca:

I. Zanda guini' ca' pa bia' bidxichi chi iquiiñe ca'

II. Zanda gúi ne ca diidxa' ca xcaadxi xa ique ni runi ne ca dxiiña' ne guseenda ca' chupa chonna binni che chi guini' ne ca xa ique ni ruca diidxa' bia' lu gu'chí;

III. Zanda cui cabe ca binni ni guni xhiña' cabe ne guni cabe diidxa' bia' ni cuaqui ca neeza ti gaca ca dxiiña' ri jneza ne naya; ne

IV. Cue cabe gu'chí' ra cuiidxi ca binni guidxi ni ca laadxi gaca xa ique guidxi, ne ra guiree gu'chí' ri la?, napa ni xi gaca ni lu 30 dxi, de dxi gusaana xa ique que de guzuhua lu xtiidxa' guidxi, ne zaca ni lu chonna beu ni ma zeeda dxiiña' xhi, ti ganda gaca ni ná ndaaga 63 xti' gu'chí' ro' bia' rí, ca dxiiña' ni gusaana ca diputadu ne senador ca la?, neca ma zeda dxiiña' dxi guiluuxe ca dxiiña' ri.

Lu guidapa ndaa xtiidxa' gu'chí' ro' bia' rí'
Ca xa ique ro' ni ruzuhua lu xtiidxa' binni guidxi
ni riaana guni dxiiña'

Ndaaga 78. Ra guíaana dxi ca xa ique ni runi dxiiña' ndaaní' yoo ra ria' diidxa' bia' ca guni ca dxiiña' la?, ziu xcaadxi xa ique ni gu'ya' gaca ca dxiiña' ni biaana que, de lu ca xa ique ni chi chuu ri la?, napa xi chu' 37 xa ique, de lu ndi la?, 19 ca diputadu ne 18 senador, ti chu' cabe ndaaní' ca dxiiña' ri la?, ca xa ique ni runi dxiiña' ndaaní' yoo ra ria' diidxa' bia' ca nga cui tu laa gúni ca ni ne ra ziluxe iza nga guiu cabe guidagu lisaa cabe guí' cabe diidxa'.

Ra chu' ti xa ique ni runi dxiiña' ndaaní' yoo ra ria' diidxa' bia' la?, zabi cabe xtobi guni xhiiña'be pa guíaadxa be.

Ca dxiiña' ni chiguni ca xa ique ni chi chu' lu ca dxiiña' ni cayeté ri, ne xcaadxi dxiiña' ni gudii gu'chí' ro' bia' ri laacabe la?, zuni cabe ca ndí':

I. Guiní' cabe pa zanda iquiiñe binni guidxi ca dxu' ni rapa guidxi casi nabaqui nadaa IV xtí' ndaaga 76 xtí' gu'chí' ro' bia' rí';

II. Icaacabe xtiidxa' xa ique ro' xtí' guidxi ro' zaguita (mexicu);

III. Cue xia cabe guirá' ca guenda nagana o guenda naxoo ni naquiiñe guinicabe; icaacabe ca diidxa' yachí' ni nuu cabe gaca diidxa' bia' ne gutiidi cabe ni ra yoo ra che ni que, ti guiuba guiniibi guirá' xpieque dxiiña' ni maca raca que;

IV. Zanda guni cabe o ne xtiidxa' ca xa ique ni ruzuhua lu xtiidxa' binni ca, xiixa gu'chí' ni guiní' xi chi guni ca xa ique ni runi dxiiña' ndaaní' yoo ra ria' diidxa' bia' ca, ne pa gaca ni la?, naquiiñe gudii xtiidxa' jma de galaa de ca xa ique ni nuu gutaagu xtiidxa' que. Guí'chí' rí' guiní' xi guirá' dxiiña' chi gaca;

V. Zanda gudii xtiidxa' cabe o co' de ca ni ca ni guinaaba' xa ique ni ruya' chu' guidxi jneza ne que chu' xiixa guenda naxoo, ca tuuxa xa ique ni ruzuhua lu xtiidxa' guidxi.

VI. Pa guiadxa xa ique ro' xtí' guidxi ro' zaguita (mexicu) lu 30 dxi la?, zanda,

ti laacabe gudii cabe laa ti gu'chi', huaxa ra guiaadxa ca la?, naquiiñe cui cabe xtobi chu' ga guni xhiiña'be laga guibigueta;be;

VII. Gúdii xtiidxa' cabe de que dxandi xtipa' ni bidii xa ique ro' xti' zaguita (mexicu)ca, ca xa ique ri la?, jneza ca ni, casi ca xa ique ni gu'ya' chu' guidxi jneza ne sin ti guenda naxoo, ca xa ique ni rine xtiidxa' guidxi ro' xti' guidxi zitu ni cadí dagu lisaa zaguita (mexicu), ca xa ique xti' ca dxu'' ni rapa guidxi ro',ne ca xa ique ni rugaba xpidxichi guidxi ne naquiiñe gacani casi nabaqu' diidxa' ro' bia', ne

VIII. Naquiiñe gunibia' cabe ca dxiiña' ni guseenda ca xa ique ni ruzaa diidxa' bia' ca ra nuu cabe ne laaca naquiiñe cue xia cabe cani.

Lu gayu' ndaa xtiidxa' gu'chi' ro' bia' rí

Ra rigaaba xpidxichi guidxi ro' zaguita (mexicu)

Ndaaga 79. Yoo ro' ra runi ca xa ique ni ruzuhua lu xtiidxa' binni guidxi ni rabi cabe diputadu ca la?, ra guni ca xhiiña' ca la?, que zaquiiñe di ca xtipa xti' xtobi ti ganda guni cani, ne laca laaca nga cuaqui ca' neeza ra gunica' xhiiña' ca' ti zaca nabaqu' diidxa' gaca ni.

Ra gaca ca dxiiña' ri la?, napa xi chinadani casi nabaqui ca diidxa' rí: jneza, nayaa, ne que chi gaca ne di cabe tobi ne xtobi co', ne runi cabe xhiiña' guidxi nga gapa cabe bidxichi.

Ne ra gapa ca binni ri ca xpidxichi guidxi la?, laaca napa cabe xi guni cabe can di:

I. Gapa chahui cabe ca xapidxichi guidxi ni chi guire ne ni chi chuu; casi paraa chi iquiiñe ca ni ne ca bidxichi ni chi iquiiñe binni guidxi, ne laaca naquiiñe cu' bia' cabe xpiani ca xa ique ni chi iquiiñe xpidxichi guidxi ca, casi nabaqui ca gu'chi' xti' guidxi ro' huaxa ra gaca ca dxiiña' ri la?, naquiiñe chinandani casi nabaqu' diidxa' bia'.

Ne laaca laani nga gapa ni ca bidxichi ni chi iquiiñe guidxi ro' zaguita (mexicu), ne ni chi iquiiñe ca guidxi ro' ne ca guidxi huiini ni dagu lisaa ne ca ni chi iquiiñe ca politicu ca', huaxa zuni ni ca dxiiña' rí la?, ra ugaandasi ca xtipa ni napa ni, ni que zanda gapa ni nga ca ni napa guidxi ro': laaca, zapa ni ca bidxichi ni napa ca binni guidxi ne ca binni nuu xtubii o xiixa

ru naquiiñe gapa' ni ne guirá'ru ni guini' diidxa' ro' bia' ti que gunina ca xa ique ni runi xhiña' binni guidxi ca, ca ni chi iquiiñe binni guidxi.

Guirá ca diidxa' ni ca luguia ca la?, naquiiñe guiasa ti gu'chi' de guirá xigaaba' o bidxichi ni caaca guidxi ro' huaxa ra gaca ni la?, zaca ni casi nabaquí diidxa' ro' bia'.

Ra gaca ca dxiiña' de xpidxichi guidxi ri la?, que sanda di chinandacabe casi ná diidxa' de ni rini' de xpidxichi guidxi, ne ra igaaba' xpidxichi guidxi la?, yoo ro' ra rigaabani ca la?, zanda guinaaba diidxa' cabe dxi intiisi dxi gaca laadxi cabe ganna cabe xi guirá b'ni' ne cabe xpidxichi guidxi, huaxa ra gaca ca ndi la?, que chi guini ique cabe de que ma bixhale lu xpidxichi guidxi, paaxa gu'chi' ni che ra nuu cabe guinaaba diidxa' xi cayuni ne cabe xpidxichi guidxi o pa ma b'ni' cabe xiixa dxiiña' xtí' guidxi ro'. Ca diidxa' si ni naquiiñe ganna ca xa ique ri nga de ca diidxa' ni guini xi guirá cayunine cabe xpidxichi guidxi ro'.

Laaca que zinanda di cabe casi na ca xtiidxa' ni zeda ga de lu ca dxiiña' rí', paaxa xi guini' diidxa' bia' zaca ni, ne laaca zanda guxhuuba donda cabe ca binni rí' ti ganna cabe xiguirá cayuni ne cabe xpidxichi guidxi. Pa ra gaca ca guenda rinaaba diidxa' rí' jneza lu bia' dxi nabaquí diidxa' bia la?, zata' ti donda ique cabe.

Yoo ro' ra rigaabaa' xpidxichi guidxi ro' ca la?, napa ni xi gusendani ti gu'chi' ra nuu ca xa ique ni ruzuhua lu xtiidxa' binni guidxi ni rabi cabe diputadu ca xi guirá' dxiiña' nga cayaca, o pa co' la?, zuyaca cabe xi zanda gunine cabea xpique ca dxiiña' rí';

II. Huaxa ra che gu'chi' ni biete luguia ca la?, naquiiñe cheni ra nuu ca xa ique ni ruzuhua lu xtiidxa' binni guidxi ca lu 20 xhi beu febrero de lu xtí' iza ni zeeda que, ti ma ca xa ique ri gutagu xtiidxa'ca' pa zanda ganna binni guidxi xiini.

Ne lu gu'chi' ni icabinecabe ca la?, napa xi che ca guenda rinaaba diidxa' de xi guirá b'ni' ne cabe xpidxichi guidxi ro', ne guirá ca gu'chi' ni guini' de que dxandi' guca ca dxiiña' xtí' guidxi ro' ne laaca naquiiñe ucacabe lu ca gu'chi' ca, ca neeza biquiiñe cabe para guca ca dxiiña' xtí' guidxi ro' deni caní' ca diidxa' ni ca luguia ca.

Ante guidxiiña ca gu'chi' ni cacabinecabe ca, ra nuu ca xa ique ni canaaba diidxa' de ca dxiiña' xtí' guidxi ro' la?, naquiiñe guchiiña cabe caadxi de ca

gu'chí' ca ra nuu xa ique ni runi dxiiña' ndaaní' yoo ra rigaaba ne rigaaba' xpidxchi guidxi ca ni niru do', ti ma ca xa ique ri guini' ca' xi ca neeza nga biquiíne para guca ca dxiiña' rí', huaxa ra gaca ca ndi la?, naquiíne cheni niru do' ra nuu ca xa ique ro' nipe rapa ne rugaaba' xpidxchi guidxi ro' ca ti ma laaca gu'ya'ca' pa dxandi guca ca dxiiña' ne pabia' bidxichi nga biquiíne cabe.

Ra guidxiiña' ca gu'chí' ri ranuu ca xa ique ni ruzuhua lu xtiidxa' binni guidxi ni rabi cabe diputadu que la?, lu chí' gubidxa dxi si raca dxiiña' nga chee ni ra nuucabe, ne ra gudxigueta cabe ca gu'chí' ri la?, napa cabe 30 dxi, dxi raca dxiiña', ne huaxa naquiíne' gucaacabe xi guirá ni zanda guni xa ique rí' ne ni co', ne pa laacabe que guni cabe ni la?, diidxa' ro' bia' zusabana' laacabe. Ca diidxa' ni biete ri la?, que zaca dí' cani casi ra cayuuya' cabe pa guca ca ni jneza, ne ra ra gaca cani ca la?, napa cani xi chinadacani casi nabaquí' diidxa' ro' bia'.

Yoo ro' ra rigaaba xpidxchi guidxi ro' ca la?, napa cabe xi guzeete cabe xtiidxa' cabe lu 120 dxi, dxi racasi dxiiña', ne pa que guni cabe ni la?, lu bia' dxi ma bete ca la?, ca xa ique rí' ma zani' ique ca' de que ma zaca na cabe guiaana ni.

Ne pa ná cabe de que ma zaca guiaana ca ni ne ma que zani' di cabe xi zanda gaca ne ni co' la?, napa cabe xi gusenda guidxi cabe ra nuu ca xa ique ni rugaaba' xpidxchi guidxi ro' ca xi guirá ma bí'ní' cabe, o laaca zanda guini' cabe xiíne ma que zaca di guni cabe ni gunaaba' xa ique ri laacabe.

Ca xa ique ni runi dxiiña' ndaaní' yoo ro' ra rigaaba' xpidxchi guidxi ro' ca la?, napa cabe xi guseenda cabe ti gu'chí' ra nuu ca xa ique ni ruzuhua lu xtiidxa' binni guidxi ni rabicabe diputadu ca, gu'chí' ri la?, napani xi che ni cada **niru do' dxi** xti' beu **mayu** ne **noviembre** lu gu'chí' ni guseenda cabe ca la?, napa xi uca cabe xi ni ma bí'ní' cabe, ni ma biiya cabe, ne ni ma guni' cabe xi zanda gaca ne ni co'.

Ca xa ique ro' ni runi dxiiña' ndaaní' ca yoo ro' ra rigaaba' xpidxchi guidxi ro' ca la?, napa cabe xi cueza cabe xtiidxa' ca xa ique ro' ni ruzuhua lu xtiidxa' binni guidxi ni rabi cabe diputadu ca, ti gaca ca diidxa' ni ca lu ndaaga rí'; ne diidxa' ro' bia' nga gudxiiba' donda ique ca ni guchene ca diidxa' ni ma gulaqui rí';

III. Guyuubi ne gu'ya' cabe xi guirá' gaca lu ca dxiiña' ra riu xpidxchi guidxi ro' zaguita (mexicu), o xi cayuni ne cabe cani, ne chi gu'ya' cabe

ra nuu ca binni ni caquiiñe xpidxichi guidxi ca, ne pa che cabe la?, para gu'ya' cabe xi cayaca ne guinaaba' cabe ca gu'chi ni rucaa ca binni ca xi guirá' cayuni ne xpidxichi guidxi huaxa ra gaca ca dxiiña' ri la?, napa cabe xi chinda cabe casi ná diidxa' ro' bia', ti laa ma gulaqu' gacani zaca, ne

IV. Gata ca donda ni guni ná yoo ro' ra rigaaba' xpidxichi guidxi ro', ne ucaa cabe binni ni guniná ca xquenda yoo ro' rí' quiixe ca ni b'ni'ca', ne laaca zanda che cabe neeza lu ca xa ique rugaani donda ca guini'ca xi xti' donda zanda quiiba' ique ca ni guchee ne ni; ne guni cabe ni ná ca diidxa' lá xti' gu'chi' ro' bia' rí' ne guchiiña cabe xi donda guca ra nuu ca xa ique rugaani donda ca, ti diidxa' ro' bia' ma gulaqu' ca neeza modo gaca ca dxiiña' rí'.

Guirá ca donda ne diidxa' ni ma gulee xia ca xa ique ni runi dxiiña' ndaaní' yoo ro' ra rigaaba' xpidxichi guidxi ro' ca la?, zanda guxhacabe ni o gusaana ná ca xa ique ni gunaaba cabe pabia xpidxichi guidxi ro' ma biquiiñe cani ne laaca zanda guni ca binni ni runi dxiiña' ndaaní' yoo ro' cani pa naaca de que cayuni ná ni laaca, ne ra nuu ca xa ique ro' ri nga che cabe chi guni cabe ni o laaca zanda che cabe ra nuu ca xa ique ni cani' ndaa XXIX-H xti' ndaaga 73, xti' gu'chi' ro' bia' rí'.

Ca xa ique ro' ni ruzuhua lu xtiidxa' binni guidxi ca la?, laaca nga cui ca' binni ni gaca xa ique ro' xti' yoo ro' ra rigaaba' xpidxichi guidxi ro', huaxa ra cui cabe xa ique ri la?, napa xi guini' jma de galaa de de ca xa ique rí' ti gaca ni. Ne diidxa' ro' bia' nga cuaqu' ca neeza xtini. Ni gaca xa ique ro' xti' ca dxiiña' ri la?, zandaabe xhono iza lu ni, ne zanda cui cabe laabe xti' iza si. Zanda ca pa gueda guidxaabe la?, pa nuu xiixa donda ni gului ná diidxa' ro' bia' de que naca ti donda, o pa laca zanda gacani pa laaca jma de galaa de ca xa ique ca' guini ca de guidxabe o pa chinanda cabe ca ni ca lu Diidxa' lá Guidapa xti' gu'chi' ro' bia' rí'.

Ti ganda gaca tuuxa xa ique xti' yoo ro' ra rigaaba' xpidxichi guidxi ro' la?, napabe xi gusaabe ca ni canaaba, ca ndaa I,II,IV,V ne VI xti' ndaaga 95 xti' gu'chi' ro' bia' rí' laabe la?, ne xcaadxiru ni guinaaba' diidxa' ro' bia' laabe. Ne bia' dxi guni ca xa ique rí' dxiiña' ndaaní' yoo ri la?, que zanda di chu' be lade xiixa partidu o gunibe xiixa dxiiña' ra guiiaxabe, huaxa ni zanda si guni be nga guisiidi be binni gun'da ne uca o gusiidi be laaca gunica xiixa.

Ca xtipa' ro' xti' guididxi ra runi ca xa ique ro' ni ruzuhua lu xtiidxa' binni guidxi ro' ca ne guirá ca guidxi ni riquiiñe xpidxichi guidxi ro' la?, napa cabe xi gaca ne cabe yoo ro' rí' guni xhiiña', ne pa que guni cabe ni la?, diidxa' ro' bia' zusaaba ná laacabe.

Guirá' ca xaque ni runi xhiiña' ca guidxi huiini ne xhiiña' guidxi ro', ne ca binni guidxi, ca binni nuu xtubi o guirá ru' binni guidxi ni riquiiñe xpidxichi guidxi ro' la?, napa cabe xi guchiiña cabe ca gu'chi' ni guinaaba' yoo ro' ra rigaaba' xpidxichi guidxi ro' ca laacabe, huaxa naquiiñe chinanda cabe casi nabaqu' diidxa' ro' bia' ne si ná ca xcaadxi xa ique ca de que cacanaca'. Ne pa que guchiiña cabe ca gu'chi' ni canaaba' ca xa ique ri laacabe la?, ca xa ique ni naquiiñe guseenda ca ni ca la?, diidxa' ro' bia' napa xi guiaaba ti donda ique cabe

Xtipa ro' xti' guidxi ro' ni ruca diidxa' bia' lu gu'chi' que la?, laa nga cuaqui ca neeza ra gutopa guidxi ro' xpidxichi ca binni guidxi ni gucheene diidxa' bia' casi nabqu' ndaa IV xti' ndaaga ri'.

Diidxa' lá guionna

Xtipa' xti' xa ique ni rucaa diidxa' bia'

Ndaaga 80. Ca xtipa' ro' xti' guidxi ro' zaguita (mexicu) la?, ziaana ni lu ná ti binni ni rabcabe "xa ique ro' xti' zaguita (mexicu)".

Ndaaga 81. Ra cui cabe xa ique ro' ri la?, napa cabe xi chinanda cabe casi nabaqu' diidxa' bia' xti' ca dxiiña' ra ribii cabe xa ique guidxi.

Ndaaga 82. Ti ganda gaca tuuxa binni xa ique guidxi ro' zaguita (mexicu) la?, naquiiñe gapabe ca ndi':

I. Naquiiñe gale be ndaan' guidxi ro' zaguita (mexicu), ne gacabe binni nuu xpiaani ni que huyuni xiixa guenda naxoo, ne gacabe xiiñ' gune o nguii ni gule ndaan' guidxi ro' zaguita (mexicu), ne napa be xi gapa gande iza de nabeeza be ndaan' guidxi ri'.

II. Ne pa ma bisaabe 35 iza dxi ganda dxi chi guzee cabe lu gu'chi';

III. Guhuini de que guleezabe ndaan' guidxi ri' bia' ti iza ante ganda ra chindi cabe xa ique guidxi. Ne gasti naca pa bireebe de ndaan' guidxi ri' bia ti be;

IV. Que chi gaca dibe xa ique xti' xiixa yuudu';

V. Pa nacabe dxu' ne raca laadxibe gacabe xa ique la?, napebe xi gusaanabeni lu xhoopa beu ti ganda guiube lu ca dxiiña' ra ribii cabe xa ique ro' xti' guidxi ro' zaguita (mexicu).

VI. Que chi gacabe xa ique ni runi xhiiña' guidxi ro', xa ique ni ruya chu' guenda nazaca ndaan' guidxi ne que chu' xiixa guenda naxoo, o pa nacabe xa ique xti' xiixa guidxi ni dagulisaa zaguita (mexicu) o xa ique xti' guidxi ro', huaxa pa raca ladxibe gacabe xa ique ro' xti' guidxi ro' zaguita (mexicu) la?, naquiiñe gusaanabe ni xhopa beu ante guzulu ca dxiiña' ra ribii cabe xa ique ro' guidxi, ne

VII. Ne que chi guiaabe lu ca guenda nana ni nabaqui ndaaga 83 rí.

Ndaaga 83. xa ique ro' xti' guidxi ro' zaguita (mexicu) la?, zuzulube gunibe xhiiña'be lu niru do' dxi xti' beu pascua, ne zandaabe lu dxiiña' ca xhopa iza. Binni ni gullii cabe gaca xa ique xti' guidxi ro' zaguita (mexicu), o ni gullii cabe laa, chu' ga si o ni guiana pa guiree xa ique ro' que la?, ma que zanda di cui cabe laa, ti ganda guni dxiiña' ca xti' bieque.

Ndaaga 84. Pa lu chupa iza de bizulu xa ique ro' xti' guidxi ro' zaguita mexicu guni dxiiña' ne guiaadxa la?, ca xa ique ni runi dxiiña' ndaan' yoo ra ria' diidxa' bia' ca la?, ne ca xa ique ni runi dxiiña' ndaan' yoo ra rie binni ica lá ti ica credencial ca la?, ne ca xa ique ni runi dxiiña' ra yoo ra ria' diidxa' bia' ca la?, ziu jma de galaaca gutaagu xtiidxa' ca' ti ganda cui ca' xti' xa ique ni guiaana ga jlugar xa ique ro' que, ne ra ma gullii cabe xa ique ni guiaana ga que la?, laaca ca xa ique rí' cue ca' ti gu'chi' lu chií gubidxa ti ganda gaca dxiiña' ra cui cabe xti' xa ique ro' xti' guidxi ro' zaguita (mexicu), huaxa ra gaca ca dxiiña' rí' la?, naquiiñe gu'ya' cabe ca dxi chi gaca ca dxiiña' ri, ne bia' dxi guiree gu'chi' cuidxi binni, ne que chi tiidi di ni 14 beu ne jma de 18 beu.

Ne pa ca xa ique ni ruzuhua lu xtiidxa' binni guidxi ca que cayuni ca dxiiña' la?, ma ca xa ique ni biaana que nga cui xti' binni ni gaca xa ique ro' xti' guidxi ro' zaguita (mexicu), ne laaca zunica' ti gu'chi' ni cuidxi binni, ni gaca laadxi gaca xa ique guidxi casi na ca diidxa' ni ca luguia ca.

Ne pa xa ique ca guiaadxa lu xtpa iza cayaadxa laa que, ne pa ca xa ique ni ruzuhua lu xtiidxa' binni guidxi que cayuni ca dxiiña' la?, ma laacabe guyuubi cabe xti' binii gaca xa ique ro' xti' guidxi ro' zaguita (mexicu), ne ma laa gunduuxe chaahui ca dxiiña' biana ca que ñaca que; ne pa cadí nuu ca binni rí' cuchaaga xtiidxa' ca la?, zadxela ga ti binni guni dxiiña' que

laga guidaagu ga ca binni ri gu' ca diidxa' ne ma ca xa ique ni runi dxiiña' nadaani yo ora rie binni ica lá ti gapa credencial ca nga cui' xti' xa ique guidxi ro' xti' zaguita (mexicu) ni guni ca dxiiña' xti' guidxi ro'.

Ndaaga 85. Paaxa ganda dxi guzulu xa ique ro' xti' guidxi ro' zaguita (mexicu) ni gullii cabe que, ma chi guzulu chi guni dxiiña' que ne ni dxiiña' la?, o que niluuxe nibii cabe tu gaca ni, ne ma zeda yanda niru do' dxi xti' beu pascua la?, zaluxe ni ra que, ne dxa xa ique ni binduuxe iza xti' que nga guiaana ga guni ga ca dxiiña' ni chi guzu lu xti' iza zeda que, o ca xa ique ni ruzuhua lu xtiidxa' binni guidxi ca cui' tu laa nga zanda gaca ga xa ique ro' xti' guidxi ro' zaguita (mexicu), ti ma gaca ni casi ná ca diidxa' xti' ndaaga ni ca luguia ca.

Pa guiiadxa ca xa ique ro' xti' guidxi ro' zaguita (mexicu), chupa chonna si gubidxa la?, ca xa ique ni ruzuhua lu xtiidxa' binni guidxi ca la?, zanda cui ca ti binni chu' ga guni xhiiña' be bia' dxi guiaadxabe.

Pa xa ique ro' xti' guidxi ca guiaadxa jma chonna bi chií dxi la?, ne pa ca xa ique ni dxiiña' ra ria' diidxa' bia' ca cadí nuu cal u xhiiña' ca la?, ma ca xa ique ni ruzuhua lu xtiidxa' binni guidxi ni biaana que nga gutaagu xtiidxa' ca ti gu'ya'ca' xi zanda guni ca' o pa co' la?, ma laaca cuica' ti binni guni ga xhiiña' xa ique ique ro' xti' guidxi ro' zaguita (mexicu) que.

Ne pa ra guiiadxa xaque ni zee que ne ma que guibigueta la?, ma zuni cabe ni ná ndaaga ni ca luguia ca.

Ndaaga 86. Pa gacaladxi xa ique ro' xti' guidxi ro' xti' zaguita (mexicu) ca gudxii ca dxiiña' xti' la?, zanda gunibeni, huaxa pa nuube lu ti guenda nagaana o lu ti guenda naxoo, ni guini' ca xa ique ni ruzuhua lu xtiidxa' binni guidxi ca, cadí jneeza cayaca.

Ndaaga 87. Ra gudii xtiidxa' binni ni chi gaca xa ique ro' xti' guidxi ro' zaguita (mexicu) ca xtiidxa' de que zuni xhiiña' jneza ne nayaa la?, naquiiñe guini'be ni neza lu ca xa ique ni ruzuhua lux tiidxa' binni guidxi ca sicari':

Zudii xtiidxa' gapa' ne gune guirá ni ná gu'chi' ro' bia' ra liibi lizaa guirá diidxa' xti' guidxi ro' zaguita (mexicu) ne gune guirá ni ná ca diidxa' ro' bia' ni riree lu ni, ne gune ca dxiiña' xtine jneza ne nayaa do' ti binni guidxi ma bidii na xtipa' ri', ne zuya' chu' guenda nazaca, guenda sicaru, ne guenda nabaani xti' guidxi ro' ri', ne pa que gune ca ni la?, guidxi ro' ri' guliidxi na ne cuaqui ti donda ique".

Ndaaga 88. Xa ique ro' xti' guidxi ro' rí la?, zanda guireebe de ndaaní' guidxi rí' gadxe gubidxa, huaxa naquiiñe gabi be ca xa ique ni ruzuhua lu xtiidxa' binni guidxi ni rabicabe senador ca xi chi gunibe, ne ca diidxa' ni bicheela be ndaaní' guidxi ra guyeebe que. Ne pa guiaadxabe jma la?, naquiiñe gabi be ni ca xa ique ro' ni ruzuhua lu xtiidxa binni guidxi que.

Ndaaga 89. Ca ndi nga ca ni naquiiñe guni xa ique ro' xti' guidxi ro' zaguita (mexicu):

I. Guni ne uca' diidxa' bia' ni guinaaba' yoo ro' ra ria' diidxa' bia' ca laa, huaxa naquiiñe gu'ya' pa nuuni jneza ti ucaa ni. Promulgar y ejecutar las leyes que expida el Congreso de la Unión, proveyendo en la esfera administrativa a su exacta observancia;

II. Guini' tu binni zanda chu' guni xhiiña' guidxi ne laaca zanda guchaabe ca xa ique ri la?, ne ca xa ique ni rine xtiidxa' guidxi ro' xti' guidxi ne ca xa ique ni rugaaba' xpidxichi guqueiidxi, ne laaca zaqueca zanda cu'be ne guchaabe xcaadxi xa ique, ra guni be can di la?, naquiiñe gu'ya'be xi ná diidxa' bia' ne gu'chi' ro' bia' rí';

III. Ucuibe ca xa ique ni rine xtiidxa' guidxi ro' zaguita (mexicu), ndaaní' xti' guidxi ro' ni cadí xti' zaguita (mexicu), huaxa ne xtiidxa' ca xa ique ni ruzuhua lu xtiidxa' binni guidxi ca nga gaca ni;

IV. Laaca ne xtiidxa' ca xa ique ni ruzuhua lu xtiidxa' binni guidxi ca nga ucuibe xa ique ro' xti' ca dxu' ne xcaadxi ru' xa ique xti' ca dxu' ca, ne ca xa ique ni rugaaba xpidxichi guidxi;

V. Ucuibe guirá ca xa ique xti' ca dxu' casi nabiquí' diidxa' bia';

VI. Guiapa guenda nazaca xti' guirá binni guidxi ni nabeeza ndaaní' guidxi ro' rí', casi nabaquí' diidxa' ro' bia', ne iquiiñebe xtipa xti' guirá dxu' ti guiapa guenda nazaca xti' guidxi ro' rí';

VII. Iquiiñebe ca dxu' ti guiapa guidxi ro' rí', ti zaca gaca ni ná ca diidxa' ni ca lu ndaa IV xti' ndaaga 76;

VIII. Guchelaniidibe xti' guidxi' ro' huaxa casi nabaquí' guirá diidxa' ro' ni ma gulaquí' ca xa ique ni runi dxiiña' ndaaní' yoo ro' ra ria' diidxa' bia' xti' guidxi ro' rí';

IX. Ra ucuibe xa ique ro' ni ru'ya' chu' guenda nazaca ne que chu' guenda naxoo ndaaní' guidxi ri la?, naquiiñe icaabe xtiidxa' ca xa ique ni ruzuhua lu xtiidxa' binni guidxi ca ti gunibe ni;

X. Chinebe xtiidxa' guidxi ro' xti' guidxi, ne gutagunebe diidxa' ca xa ique ro' xti', xti' guidxi' ro' ni cadí xti' zaguita (mexicu), o laaca guxhabe guirá' diidxa' ni ma bidaagu, laaca zanda gudxiiba' be xiixa donda, guchaabe o guni chaahuiibe guirá' diidxa' ni ma bitagunebe xti' guidxi, huaxa ra gaca ndi la?, naquiiñe gu'ya'be xtiidxa' ca xa ique ni ruzuhua lu xtiidxa' binni guidxi ca. Ra gaca ca dxiiña' ni cayeté ri la?, xa ique ni ruuya' cha' diidxa' bia' ne ica ni lu gu'chi' que la?, zuuya' gaca ca dxiiña' ri jneza ne nayaa do' casi ná ca diidxa' chi guiete rarí: niru do' zuuya' cabe xi na binni guidxi, ra guchugu lu cabe lu ti guenda naxoo; ra guilaadxicabe tuuxa ndaaní' guidxi pa ucalú guidxi, guirá' guidxi ro' chu' tobisi que chi chu d'í tobi jma que xtobi; ra gacane lisaa guirá' guidxi ro' laaca ti guirooba' xpidxichi ca'; ne ra gutaagu lisaa cabe xtipa xticabe ti ganda chu guenda nazaaca ne que chu' d'í guenda naxoo ndaaní' guirá' guidxi ro' ca;

XI. Cuiidxibe ca xa ique ni runi dxiiña' ndaaní' yoo ro' ra ria' diidxa' bia' ca gutaagu ca xtiidxa' ca', pa ná ca xa ique ni maca nuu que gaca ni;

XII. Gacanebe xa ique ro' ni ruuya' gaca diidxa' bia' ne ica ni lu gu'chi ca ora ma caquiiñe xtipa xtibe; Facilitar al Poder Judicial los auxilios que necesite para el ejercicio expedito de sus funciones;

XIII. Cu' be guitiisi layu ra chi iree ca guiiiba' ripapa o balaaga ro', cu' be dxu' gapa ca ra rireeca ca balaaga ro' ca, ne ni gapa lu ca layu xti' zaguita (mexicu), ne guini'be paraa gaca cani;

XIV. Guxha be donda xti' tuuxa binni ni b'ni' xiixa donda lu ná ca xa ique ro' ni rugaani donda ne ca ni cudxiiba' ca xa ique huiini xti' ca guidxi huiini ca donda ique, ne ca binni ni gudxiiba' donda ique ndaaní' guidxi ro' ne naquiiñe guxhuba donda cabe laa, ndaaní' xquidxi huiini;

XV. Gudiibe ti xiixa ca binni ni guidxeela o guni xiixa ni gaca ne binni guidxi, huaxa naquiiñe guni be ni casi nabaquí' ne bia' dxi ná diidxa' bia' gaca ni;

XVI. Pa cadí cayuni ca xa ique ro' ni ruzuhua lu xtiidxa' binni guidxi ca dxiiña' la?, xa ique ro' xti' guidxi ro' zaguita (mexicu) ca gudii ca gu'chi' ni guini' xi guenda chi ica ca binni ni cani' ca ndaa III,IV ne IX, ni ca lu

ndaaga rí, huaxa naquiñe gacani ne xtiidxa' ca xa ique ro' ni riana gaca dxiiña' xti' guidxi ro' que;

XVII. (Diidxa' bixa);

XVIII. Guchiñabe ti gu'chí' ra nuu ca xa ique ni ruzuhua lu xtiidxa' binni guidxi ca ti guhuiini tu laa zanda gaca xa ique ni ruuya guiapa guidxi, ne laaca zanda cu'be gu'chí' ra nuu ca pa gueda guiadxa ca binni ri lu xhiiña' ca', ne pa gacaladxi be gaxha be dxiiña' ri ca binni ri la?, zanda, huaxa ne xtiidxa' ca binni ni runi dxiiña' ndaan' yoo ra ria' diidxa' bia' ca;

XIX. (Diidxa' bixa);

XX. Ne xcaadxi xtipa ni gudii gu'chí' ro' bia' ri laabe.

Ndaaga 90. Guirá xhiiña' guidxi ro' la?, napa xi gidaagu ne guidxi ro' ne zacani casi nabaquí' diidxa' bia' ni cue yoo ro' ra ria' diidxa' bia' ca, ne paraa nga zanda cu' ruaa ca xa ique ni ruzuhua lu xtiidxa' binni guidxi cal u xhiiña' cabe. Ca diidxa' ro' bia' ca nga guni' ca' paraa zanda guchaaga bia' ca xa ique ri xtiidxa' ti ganda guninesaaca' dxiiña' guidxi.

Ndaaga 91. Ti ganda gaca tuuxa binni xa ique ni runi gu'chí' xti' guidxi ro' xti' zaguita (mexicu) la?: naquiñe gacabe xiiñi' zaguita (mexicu), ne gapabe 30 iza, ne binni nuu xpiaani laabe.

Ndaaga 92. Guirá diidxa' bia' ni cuee xa ique ro' xti' guidxi ro' zaguita (mexicu) la?, napa xi guni' firmar xa ique ni runi xiiña' guidxi ca ni, pa que che ni la?, que zasaca dí' ni.

Ndaaga 93. Ra guiu ca xa ique ni ruzuhua lu xtiidxa' binni guidxi ca gutaagu xtiidxa' ca la?, ca xa ique ni runi xqu'chí' guidxi ca la?, zie cabe ranuu ca xa ique ri gabicabe laaca que chi guxhaca' bia' bidxichi cacaacabe o cayaxa cabe.

Tutiica de ca xaque ni ruzuhua lu xtiidxa' binni guidxi naca diputadu o senador la?, zanda cuidxica', ca xa ique ni runi xqu'chí' guidxi, ca xa ique ruuya' chu' guidxi jneza ti que chu' xiixa guenda naxoo ne ca xa ique ni runi xhiiña' ca guidxi huiini ni nuu ndaan' guidxi ro' rí, ne laaca zabiidxi cabe xa ique ni que riquiñe xtipa xti' xtobi, checa' chi guini'ca' ra chi icaa yu necabe ti diidxa' bia' o chi guini'ca' de pabia' bidxichi cayaaxa

xpinnica' o pa che ca' chi guini'ca' de xiixa guenda rinadiidxa' ni guni cabe laaca.

Pa ndaaní' yoo ro' ra ria' diidxa' bia' ca chu' jma de galaa de ca diputadu ca ne xcaadxi, de ca senador ca la?, zanda guinaaba diidxa' cabe xi guirá dxiiña' cayuni ca binni ni runi dxiiña' ndaaní' ca yoo ni napa xtipa xti' casi ti yoo ra riziidi'cabe gun'da ne uca cabe ne ca tienda ro' ca, ne nuu ca' ndaaní' ca guidxi huiini xti' guidxi ro' rí'.

Guirá ca guenda ruyuubi o rinaaba diidxa' ni raca ndaaní' guidxi ro' rí' la?, napa xi ganna xa ique ni rucaa diidxa' bia' lu gu'chí' ca caní'.

Ca xa ique ro' ni runi dxiiña' ndaaní' yoo ro' ra ria' diidxa' bia' ca la?, zanda guinaaba diidxa' cabe o guseenda cabe xiixa gu'chí' ra nuu ca binni ni runi xhiiña' guidxi ro' ca ti ganna cabe xi guirá dxiiña' cayunica', ne ra icaabi ca binni ri la?, napa cabe xi icaabi cabeni de lu 15 dxi, raca dxiiña' ne ca xigaaba dxi ri la?, rigaabani dede niru do' dxi che gu'chí' r ira nuucabe.

Ra gaca ca dxiiña' ni biete ri la?, zaca caní' casi ná ca diidxa' bia' xti' yoo ro' ra ria' diidxa' bia' xti' cabe.

Diidxa' lá guidapa

Xtipa' ro' xti' guidxi ro'

Ndaaga 94. Ra raca dxiiña' xti' guidxi ro' ne ra riapa la?, racani tapa ndaa tobi ca la?, lá yoo ro' ra riguiiba' donda ique binni, guiropa ca la?, yoo ro' ra rie binni guidxi ica lá ti gapa credencial, ne guidapa ca la?, guionna ca la?, lá yoo ro' ra riree xia donda, ne xtobi ca la lá yoo ra riree xia donda ni riguiiba' ique binni.

Ca dxiiña' ne ca xtipa' ni runi ca xa ique ri ndaaní' guidxi ro' la?, lu ná ca xa ique ni rapa guirá xtipa' ro' xti' guidxi ro' nga guiaana cabe, ne napa cabe xi chinandacabe casi nabaqui' gu'chí' ro' bia' rí' ne casi nabaqui' diidxa' bia' xti' cabe, ni que ziana lu ná cabe nga, ca xa ique ni runi dxiiña' ndaaní' yoo ro' ni ribee xia donda ique binni que.

Yoo ro' ra riree xia donda ique binni ca la?, chíí bi tobi binni nga gúni dxiiña' ndaaní' ni, ne pa guiu guinteru chíí bi tobi ca gutaagu xtiidxa'

la?, ma rabi cabe ni sala, ne ca ndi nga ni ruuya' ca donda jma naxoo, ne pa huaxie cabe la?, ma rabi cabe ni pleno ne ndi la?, ma huaxie nga tu chu' ne rari' riu ca xa ique ni ruuya' guenda naxoo ni cadí jmape nagaana

Ca ra riree xia ca donda jma naxoo ne caní huxie ca la?, diidxa' ro' bia' nga gu'ya' ti ganda ganna binni guidxi xi caní, ne pa laaca laca, ná ca' que zanda di ganna binni guidxi xi guirá diidxa' o donda biree xia ca la? que zanna di ganna binni ni.

Ca ra ridaagu xtipa' xti' ca dxiiña' ni runi ca xa ique ro' ri', casi ca xa ique ribee xia donda ne lu ca dxiiña' xti', ne ra ridaagu xtipa' xti' ca dxiiña' ni rudii gu'chi' ro' bia' binni guidxi ti gudxiilu pa nuu xiixa donda biree xia ne que ñuu laadxi ni rabi cabe amparo can e pa nuu ndaani' guidxi ro' o pa nuu ndaani' ca guidxi xti' zaguita (mexicu), ne ca xtipa' xti' yoo ro' ra rie binni ica lá ti gapa credencial, ne ca donda ni guni ca xa ique ro' ni rapa binni guidxi ca la?, napa cabe xi chinandacabe casi nabaqui gu'chi' ro' bia' ri ca dxiiña' ca, ne casi ná ca diidxa' bia' ni ruuya' gaca ca dxiiña' ri' jneza.

Yoo ro' ni nuu ndaani' guidxi ro' ne rapa' xpidxichi guidxi ne ruuya' guni ca xa ique bia' ca dxiiña' jneza la?, laaca nga guuya'ca' pabia' ne paraa naga zanda chu' xti' yoo xtica' ndaani' guidubibi guidxi rio ri', ne laaca paraa zanda gata ca yoo ni rudii xtipa' binni gudxiilu lu xiixa guenda naxoo ra biree xia donda ique ne que ñuu laadxi ni rabi cabe ti amparu que.

Ca xa ique ni runi dxiiña' ndaani' pleno que la?, laaca zanda gutagu ne cue xia cabe diidxa', ti zaca ganda gaca ti dxiiña' nayaa jneza na sicaru, ne zaca cadí guiaana ca guirá ca dxiiña' ni ribee xia donda ni cayaaca ndaani' guidxi ro' ri'.

Ca diidxa' ni guiree xia rari la?, zapanicani xtipa' ra gapani chupa chonna guidxi de ucaca ni lu gu'chi'.

Diidxa' ro' bia' nga gu'ya' pabia dxi nga gudxiilu diidxa' ni gulee xia jma de gayu xa ique diidxa' bia' que, ne ca diidxa' ni gusiene ca diidxa' ni ca lu gu'chi' ro' bia' ri', ne ca diidxa' bia' xti' guidxi ro' ri la?, ne ca diidxa' bia' ni gutaagu zaguita (mexicu) ndaani' xti' guidxi ro' ne laaca xi zanda ucueza ni o gusaana dxi ni o xi guchaani ti que guni ni dxiiña'.

Bia' bidxichi ni chi guiaaxa ca xa ique diidxa' ro' bia' ni runi dxiiña'

ndaani' ca yoo ra riree xia diidxa', ne ca ni riixa ca xa ique diidxa' bia' ca, ne ca xa ique diidxa' bia' ni nuu ndaani' ca guidxi ri neca xa ique ni rapa xpidxichi guidxi o ne ruuya' guni ca xa ique rugaani donda ca dxiiña' jneza, ne ca xa ique ni ruuuya gaca dxiiña' ra ribii cabe xa ique guidxi ca jneza la?, que zanda di' guiruugu lu xpidxichi cabe pa cayuni cabe xhiiña' cabe.

Ca xa iquedo' diidxa' bia' ni runi dxiiña' ndaani' yoo ro' ra riree xia donda la? zandaa cabe chií bi gayu iza ndaani' yoo ca, pa guiree cabe de ndaani' ca dxiiña' ri la?, napa cabe xi xi guuya' cabe xi ná diidxa' guidapa xti' gu'chi' ro' bia' rí ne ra guiree cabe la?, zapa cabe ti gu'chi' ni guini' xi dxiiña' b'ni' cabe.

Nin ti binni ni hayaca xa iquedo' xti' ca dxiiña' rí que zanda di' cui cabe laaca ti gacaca xa ique ri xti' bieque, huaxa pa biu ga cabe chupa chonna gubidxa si la zanda.

Ndaaga 95. Ti ganda gaca tuuxa xa ique ro' xti' ca xa ique diidxa' bia' ne guni dxiiña' ndaani' yoo ra riree xia diidxa' bia' la? naquiiñe ca ndí:

I. Gacabe xiiñ' zaguita (mexicu) ne gacabe ndaani', ne gacabe binni nuu xpiaani;

II. Gapabe chonna bi chií nuu gayu iza dxi cui cabe tu gaca ni ca;

III. Dxi cui cabe tu gaca xa ique ca la?, naquiiñe gapabe gu'chi' ni guini' de que binni ruzuhua lu diidxa' laabe ni bidii xiixa yoo ro' laabe, ne gapabe ni neca chií iza;

IV. Gapabe ti guenda nuu xpiaani' ne que huayuube ndaani' liidxi guiiba' o que huaguiiba' xiixa donda ique be ne que huaguu laabe ndaani' liidxi guiiba' casi; pa gulaanabe, pa bitagu nábe xiixa xpidxichi binni ne que nudiibeni, o intiisi donda ni biguu laabe ndaani' liidxi guiiba' la?, que zanda di gacabe xa ique ca.

V. Naquiiñe cuzabe ndaani' guidxi rí neca chupa iza ante cui cabe xa ique que; ne

VI. Que huayacabe xa ique ni runi xqui'chi' guidxi ro', o que huayacabe xa ique ni ruuya' gaca guidxi jneza ne sin guenda naxoo ndaani' guidxi ro', xa

ique ni ruzuhua lu xtiidxa' binni guidxi ni rabicabe diputadu ne senador o xa ique xti' guidxi ro' lu bia' dxi ma zeda yanda dxi cui cabe xa ique que.

Ra ribii cabe xa ique ri la?, jma naguenda nga gudii cabe ni ca binni ni b'ni' xhiiña' jneza ne nayaa dō' casi ca xa ique diidxa' bia' ni b'ni' jneza, ne maca huayuni ca dxiiña' ri naguenda.

Ndaaga 96. Ti ganda cui cabe xa iquedo' ni ribee xia diidxa' bia' ca la?, xa ique ro' xti' guidxi ro' ca la?, zuguube ti gu'chi' ra nuu ca xa ique ni ruzuhua lu xtiidxa' binni guidxi que, lu gu'chi' que la?, napa xi ica lá chonna binni, ti gu'ya' cabe tu laa zanda gaca ni, huaxa laaca naquiiñe guzeete cabe ni lu ca binni ni chichite ti ganda gaca xa ique que. Ra cuicabe xa ique ri la?, napa xi chu' jma de galaa de ca xa ique ni ruzuhua lu xtiidxa' guidxi ca, ne naquiiñe gacani lu chonna bi chí' dxi. Ne pa ca xa ique ni ruzuhua lu xtiidxa' binni guidxi ca que cue xia ca ca diidxa' ri bia' dxi nexhe gaca ni ca la?, ma xa ique ro' xti' guidxi ro' zaguita (mexicu) guini' tu tobi de guionna que zanda gaca ni.

Ne pa ca xa ique ni ruzuhua lu xtiidxa' binni guidxi ca gudxigueta ca' gu'chi' ra ca lá guionna binni ni biseenda xa ique ro' xti' guidxi ro' zaguita (mexicu) que la?, zanda guseenda be ni xti' bieque lu biaaca dxi ni biete luguia ca. Ne pa ra guiropa gu'chi' r' laaca gudxigueta cabe laa la?, xa ique ro' xti' guidxi ro' zaguita (mexicu) la?, zabii tobi de guionna ca binni ni ca lu gu'chi' que, ti ganda gaca xa iquedo' ni cue xia diidxa' bia'.

Ndaaga 97. Ca xa ique diidxa' ro' bia' ne ca xa ique diidxa' bia la?, ca xa ique ni rapa xpidxichi guidxi ro' ne ruuya' guni ca xa ique diidxa' bia' ca xhiiña' ca jneza nga cui laacabe, huaxa zaca ni casi nabaqui' ca neeza xti' diidxa' ro' bia'. Lu xhoopa iza de ma nuucabe lu dxiiña' ca la?, zanda guidxaa cabe peru pa che cabe lu xti' dxiiña' jma narooaba, ra guiree cabe maca tobisi tiru de lu ca dxiiña' ri la?, naquiiñe chinanda cabe casi nabaqui' diidxa' bia'.

Ca xa ique ro' ni ribee xia diidxa' bia' la?, zanda cuica tuuxa de ca xpinnica o tobi de ca xa ique diidxa' bia' o ti xa ique diidxa' ro', pa zaca raca laadxica gúnica, o pa guinaaba' ca xa ique ni rucaa diidxa' bia' ca gaca ni, ne laaca zanda guinaaba' tobi de ca yoo ro' ra ria' diidxa' bia' ca ni o laaca zanda guinaaba' ti xa ique xti' guidxi ro' ni, ti ganna cabe pa cadí cayunina ca xa ique diidxa' bia' ca xquenda binni guidxi. Laaca zanda guinaaba' cabe ca xa ique ni rapa xpidxichi guidxi ne ruuya' gúni ca xa ique diidxa' bia' ca xhiiña' ca jneza guni ni, ti laa pe ca nga jmape naquiiñe ganna ca' pa ca xa ique ri cayuuni ca' xhiiña' ca' jneza.

(Diidxa' bixa).

Ca xa ique ni runi dxiña' ndaaní yoo ro' ra ríree xia diidxa' bia' ca la?, zanda cui cabe ne zanda guchaa cabe ca xa iqueni ni runi xqu'chí' guidxi ne xcaadxi xa ique ni runi xhiña' guidxi. Ca xa ique diidxa' ro' bia' ne ca xa ique diidxa' bia' la?, zanda guchaa cbe ne cui cabe ca binni ni runi dxiña' ndaaní ca yoo ro' ra ríree xia diidxa' bia' la?, ne ndaaní yoo ra ríree xia donda ique binni, zaca cani casi nabaquí' diidxa' ro' bia' la?, ne casi nabaquí' xtiidxa' cabe.

Lu cada tapa iza la?, ca xa ique ni ribee xia diidxa' bia' ca la?, de lade nga cuicabe tu gaca xa ique xticabe, ne ra cui cabe xa ique ri la?, nanna dxichi ca deque ma que zanda di cui cabe laa para xti' iza ni zeeda que.

Cada tobi de ca xa ique xti' yoo ro' ra ríree xia diidxa' bia' ca la?, zudii xtiidxa' cabe neza lu ca xa ique ni ruzuhua lu xtiidxa' binni guidxi ca sicarí':

Xa ique ro': " zudii xtiidxa' lu' gúnu xhiña' lu jneza ne naya ra gacu xa ique ro' ni ribee xia diidxa' bia' ne gunu guirá ni ná gu'chí' ro' bia' ra liibi lizaa guirá diidxa' bia' xti guidxi ro' zaguita (mexicu) ne gunu guirá ni ná ca diidxa' ro' bia' ni ríree lu ni ca , ne galalu' guenda nazaaca xti' guirá' binni guidxi, ni nabeeza ndaaní' guidxi ro' ri la?,

Xa ique ribee xia diidxa' bia': "Zudie xtiidxa'".

Xa ique ro': "Ne pa que gunu ni la?, guidxi ro' rí' gusaaba ná lii ne gusaaba ti donda iquelu'.

Guirá ca xa ique diidxa' bia' ro' la?, ne ca xa ique diidxa' bia' la?, zudii xtiidxa' cabe neza lu ca xa ique ro' ni ruuya' guni cabe xhiña' cabe jneza ne neza lu ca xa ique ni ribee xia donda ndaaní' guidxi ro'.

Ndaaga 98. Pa ti xa ique ni ribee xia diidxa' bia' gueeda guiadxa jma de ti beu la?, xa ique ro' xti' guidxi ro' zaguita (mexicu), zanaababe ca xa ique ni ruzhua lu xtiidxa' binni guidxi ca pa zudii xtiidxa' ca' pa ziu xtobi guni ga xhiña' ni biaadxa que ne gacani casi ná ndaaga 96 xti' gu'chí' ro' bia' ri gaca ni.

Pa gueda gati' tobi de ca xa ique ni ribee xia diidxa' bia' ca o guiadxa de lu ca dxiña' maca tobisi bieque la?, xa ique ro' xti' guidxi ro' zaguita (mexicu) ca zabii xti' xa ique ni guni xhiña' ni biadxa o ni guti' que, huaxa ne xtiidxa'

ca xa ique ni ruzuhua lu xtiidxa' binni guidxi nga gacani, ne napa xi gacani casi na ca diidxa' ni ca lu ndaaga 96 xti' gu'chi' ro' bia' rí.

Ca xa ique ni runi dxiiña' ndaaní' ca yoo ra riree xia diidxa' bia' pa guinaabaca' guiree ca' o gacaladxi ca gusaana ca' xhiña'ca' tobi bieque la?, jma pa lu ca dxiiña' ca nuu xiixa guenda naxoo la?, zanda guni cabe ni; ne zuseenda cabe ti gu'chi'ni guini' de que chi gusaana cabe xhiña cabe lu ná ca xa ique ro' ni rucaa diidxa' bia' ca, ne pa can di icaani la?, ma laaca guseendaca caní ra nuu ca xauque ni ruzuhua lu xtiidxa' binni guidxi ni rabicabe senador ca, ne ma laaca guini ca' pa zaa guireecabe o pa co'.

Ca guenda rinaaba guiaadxa ni rinaaba' ca xa ique ni ribee xia diidxa' bia' ca la?, que zanda d'í tiidini jma de ti beu, ne ni gudii xtiidxa' guiadxa cabe ca nga ca xa iquedo' ni ribee xia donda ndaaní' guidxi ro', ne ca guiaadxa jma de ti beu ri la?, xa ique ro' xti' guidxi ro' zaguita (mexicu) nga gudiiini laacabe, huaxa ne xtiidxa' ca xa ique ni ruzuhua lu xtiidxa' binni guidxi ni rabi cabe senador. Nin ti guenda riaadxa la?, que zanda d'í tiidi ni jma de chupa iza.

Ndaaga 99. Yoo ro' ni rapa ca dxiiña' ra ribii cabe xa ique guidxi ca la?, la nga gaca yoo ro' jma risaca ne jma napa xtipa lu ca dxiiña' rí' ne laa nga ni jma nanna guirá ca bieque rí' ti yoo ro' ni rapa binni guidxi ca ma bidii xtipa' ni, huaxa naquiíne guihuni ni ná ndaaga xti' 105 xti' gu'chi' ro' bia' rí.

Ra guni yoo ro' d'í xhiña' la?, napa xi gapani chupa neeza tobi ca ti yoo jma narooba' ni gu'ya' gaca caní ndaaní' guidubi guidxi la?, ne xtobi ca ti yoo nahuiini ni gu'ya' gaca ca dxiiña' ri ndaaní' ca guidxi huiini xti' zaguita (mexicu); ne ra guiu cabe gutaagu xtiidxa' cabe la?, zacani nezalu binni guidxi, ne zacani casi nabaqui' diidxa' ro' bia'. Ti ganda guni ni xhiña' ni jneza la?, zapani binni guni xhiña' ni casi ca binni ni ruzuhua lu xtiidxa' binni guidxi.

Ra ca gaca dxiiña' ri la?, ndani yoo ro' ra raca dxiiña' ti cui cabe xa ique guidxi la?, napani xi gapani gadxe binni ni cue xia diidxa' bia' xti' ca dxiiña' ra ribii cabe xa ique guidxi. Ne laaca laacabe nga cui cabe tu gaca ca xa ique xti' ca dxiiña' ra ribii cabe xa ique guidxi ri, ne zanda guiaana tapa iza lu ca dxiiña' rí.

Yoo ro' ni rapa ne ruuya' gaca ca dxiiña' ra ribii cabe xa ique guidxi la?, lu ná nga nexhe guiluuxhe ca dxiiña' rí' ne gaca ni casi nabiqui gu'chi' ro' bia' rí' ne casi guini' diidxa' ro' bia' gaca ca dxiiña' ni ca xaguete ri:

I. Ra guinaaba' ca binni ni gudxite ti ganda gaca ca' xa ique ni ruzuhua lu xtiidxa' binni giidxi ni rabcabe senador ne diputadu ca, igaaba chahui ca gu'chi' ni bizee lu que;

II. Yoo ro' ni ruuya' gaca dxiiña' ri ndaaní guidxi ro' la?, ra nuu si nga zanda guidxiña' ca binni ni gudxite ti ganda gaca xaique ro' xti' guidxi ro' zaguita (mexicu) ca guinaaba ca igaaba chahui ca gu'chi' bizee binni lu que.

Ca yoo huiini ne yoo ro' ra riapa ca dxiiña' de ra ribii cabe xa ique guidxi ca la?, zanda gusaana dxi ca' o guchuugu ca' lu ca dxiiña' ra ribii cabe xa ique guidxi ca pa xi guini' diidxa' ro' bia'.

Ca xa ique ni runi dxiiña' ndaaní yoo ro' ni nuu ndaaní guidxi ro' zaguita (mexicu) ca nga ugaaba chaahui guirá gu'chi' ni bizee lu dxi gullii cabe xa ique ro' xti' guidxi ro' zaguita (mexicu), ne pa que chu' tuuxa binni ni gudxite ti ganda gaca xaique ro' xti' guidxi ro' zaguita (mexicu) ucueza ca dxiiña' ri' la?, ma zanda guini' cabe deque biluuxe ca dxiiña' ca sicaru ne zanii cabe tu laa nga jma bizee cabe lu gu'chi' xti', ne zudii cabe laa ti gu'chi' deque ma laa nga gaca xaique ro' xti' guidxi ro' zaguita (mexicu).

III. Ra ra guchuugu cabe o gusaana dxi cabe ca dxiiña' ri' ne ra cue xia ca xa ique ri' ca xpieque ca dxiiña' ra ribii cabe xa ique ro' xti' guidxi ro' ri', ndi la?, ma gadxeni de ca ni ca lu guiropa ndaa ni ca luguia ca, ti raca cani de ca ni gucheene ca diidxa' xti' gu'chi' ro' bia' ri';

IV. Ra gaca ca xiixa ni ruchuugu lu ca dxiiña' ra ribii cabe xa ique ro' xti' guidxi ro' ri' la?, nabepe nga ruzuhua dxiichi' ca xa ique ri' lu xtiidxa'ca' ra gunica' guirá xpieque ca dxiiña' ri' ne ra cue xia ca guirá diidxa' ne guenda nagaana xti' ca dxiiña' ri'. Ca dxiiña' ri la?, rapa ni xtipa' pa cani canaaba' cabe ca naca ni ti xiixa ni chi guiaaxa ne pa gaca ni ndaaní ca dxi cayaca ca dxiiña' ra ribii cabe ca xa ique ro' xti' guidxi ro' ri' o ante gudii cabe gu'chi' ca binni ni yene de xa ique ro' que;

V. Ca xiixa ni guchuugu lu guenda xti' binni guidxi ti que che' chiguze lu gu'chi' ti cui tu raca laadxi gaca xaique guidxi ro' o que cui cabe laa o que guiu lade xiixa partidu, ti ganda guini' ni raca laadxi ndaaní ca dxiiña' ni cayaca ndaaní guidxi ro' ri' la?, napabe xi chinandabe casi nabaqui' gu'chi' ro' bia' ri' ne ca diidxa' ni ca lu diidxa' ro' bia'. Ti ganda che tuuxa binni guidxi chi guini' ra nuu ca xa ique ro' ni runi dxiiña' ndaaní yoo ra riree xia ca bieque xti' ca dxiiña' ni raca ra ribii cabe xa ique guidxi ro' xi bi'ni' tuuxa partidu ni nuu cabe lade ca la?, naquiine gunduuxebe de gu'ya'be xi guirá

diidxa' bia' xti' ca partidu ca, ti diidxa' ro' bia' ma nanna ne ma gulaqui' ca neeza ne ca dxi guidxiiñabe guini'be xi guca cabe;

VI. Ca guenda nagaana ni riu lade ca binni ni runi dxiiña' ndaaní yoo' ro' ra riapa ca dxiiña' de ra ribii cabe ca xa ique guidxi ne ca xa ique ro' xti' ca dxiiña' ri';

VII. Ca guenda nagaana ni riu lade ca binni ni runi dxiiña' ndaaní yoo ra rie binni ica lá ti gapa credencial ne ca xa ique xtini;

VIII. Ca donda ni gudxiiba' ca xa ique ni runi dxiiña' ndaaní yoo ra rie binnni ica lá ti gapa credencial ca ique ca binni, ca partidu o ca xhiñi zaguíta, o ca gringu, ni guchee ne ca gu'chi' ro' bia' ri' ne ca diidxa' bia' xtini la?, zaca cani, ne

IX. Guirá'ru' ni quixhe diidxa' ro' bia'.

Ca xa ique ni runi dxiiña' ndaaní yoo ro' ra riapa ca dxiiña' de ra ribii cabe xa ique guidxi que la?, ne ra cue xia cabe donda ca la?, zacani casi ná ca diidxa' ro' bia' xti' ca dxiiña' ri'.

Sin nacabe de que cacaná ndaaga 105 xti' gu'chi' ro' bia' ri' la?, yoo ro' ni rapa ca dxiiña' de ra ribii cabe xa ique guidxi ca la?, zanda cue xia cabe ca diidxa' bia' ni rapa ca dxiiña' de ra ribii cabe xa ique guidxi ni que chu' ne tobisi ca diidxa' ni ca lu gu'chi' ro' bia' ri'. Ca diidxa' ni guiré xia ndaaní ca dxiiña' ri la?, ziana dxi ca ni ti guihuini xi cani. Raca gaca ca bieque ri la?, ca xa ique ni runi dxiiña' ndaaní yoo ra caree xia ca diidxa' ri la?, zabi cabe ni ca xa ique ni rapa guidxi ro' ti que chu' xiixa guenda naxoo que.

Pa ti yoo ro' ra riapa ca dxiiña' ra ribii cabe xa ique guidxi ro' ca guzuhua dxichineca ti gu'chi' ni guini' deque cadí ca di caadxi diidxa' lu gu'chi' ro' bia' ri' jneza la?, tobi de ca yoo ra riapa' ca dxiiña' ra ribii cabe xa ique guidxi ro' ca zanda guini'ca' de que cadí jneza di nuuni ti laaca ma napa ca tobi de ca diidxa'ca ni cabee xia xtiidxa' gu'chi' ro' ri', huaxa zinanda cabeni casi nabaqui' diidxa' ro' bia', ti yoo ro' ra riree xia diidxa' bia' ca guini' guna tobi de ca diidxa' bia' ca nga guiaana. Ca diidxa' o ca donda ni ma biree xia la?, ma que zanda di guibigueta cani ti ma biree xti' diidxa' bia'.

Ra rieegu lisaa xtipa' xti' ca xa ique ro' ni runi dxiiña' ndaaní yoo ro' ra riree xia diidxa' bia', ne ca neeza ni nexhe guire xia intiisi diidxa' la?, ne zaqueca ca diidxa' ni nexhe ti ganda cue xia jma de gayu xa ique diidxa' ro'

bia ca diidxa' bia' la?, napa cani xi gaca cani, casi nabaqui gu'chi' ro' bia' rí ne ca diidxa' ro' bia' ca.

Ca xa ique ro' ni riegu lisaa ca xtipa' xti' ca xa ique ni runi dxiiña' ndaaní yoo ro' ra ribee xia cabe diidxa' cani ruyuubi cue xia dxiiña' xti' ne guyuubi ca ni gacani nayaa ca ni nanna de ca dxiiña' dí can ganga guuya' guiree xia ni ná gu'chi' ro' bia' rí ne ca diidxa' bia' ca'.

Ca xa ique ni runi dxiiña' ndaaní yoo ra riree xia ca dxiiña' de ra ribii cabe xa ique guidxi la?, napaca xi gu'yu' ca' xi dxiiña' nga zanda guiaana lu ca', casi yoo ro' ni nuu ndaaní guidxi ro' ca la?, zanda guseendabe ca dxiiña' xti' ca yoo huiini ni nuu ndaaní ca guidxi huiini ni guyee lu nacabe que, ti cada tobi cabe la?, napa cabe xi gu'ya' cabe ne cue xia cabe ca dxiiña' xti' cabe. Diidxa' ro' bia' ma gulaqui' ca neeza, ne ca dxiiña' xti' cani.

Ca xa ique ni runi xhiiña' guidxi, ne ca ni rapa ndaaní yoo ro' ra riapa ca dxiiña' de ra ribii cabe xa ique guidxi ro' la?, zuni cabe casi nabaqui' diidxa' ro' bia', ne sicari nga riu ca binni ri guni ca xhiiña' ndaaní ni; ziu ti xa ique ro' xti' ca dxiiña' rí, ne ni gaca xa ique ri la?, ti xa ique diidxa' ro' bia' nga gaca ni, ne zacaabeni lu ti guenda ribii xa ique, ne choona binni ni runi dxiiña' ndaaní yoo ra riapa xpidxichi guidxi ne ruuya'ca' guni ca xa ique diidxa' bia' ca xhiiña' ca jneza.

Yoo ro' ra riree xia diidxa' xti' ca dxiiña' ra ribii cabe xa ique guidxi la?, zabibe xa ique ro' xti' yoo ro' ra riree xia diidxa' bia' ca pabia' nga guiaaxabe, ti ganda cu' ni lade ca dxiiña' de ra riguu ca xa ique ni rapa binni guidxi ca, ca xqu'chi' ti guiree xpidxichi guidxi ro' guiaxaca'. Ti ganda gaca dxiiña' jneza ndaaní yoo ro' ra riree xia diidxa' xti' ca dxiiña' ra ribii cabe xa ique guidxi la?, xa ique xtini nga quixhe ca neeza ni gunineca dxiiña'.

Ca xa ique diidxa' ro' bia' xti' ca dxiiña' de ra ribii cabe xa ique guidxi la?, ni nuu ndaaní guidxi ro' ne ndaaní ca guidxi huiini ca la?, jma de galaa de ca xa ique ni ruzuhua lu xtiidxa' binni guidxi ca ni rabi cabe senador ca nga cui laacabe, huaxa ne xtiidxa' ca xa ique ni runi dxiiña' ndaaní yoo ro' ra riree xia diidxa' bia' ca nga gacani. Ra guibii ca xa ique ri la?, napa cabe xi gu'ya' cabe, ca ni jma ma b'ni' dxiiña' la?, ne pa tu zeedaru lá niru do', ti gacani casi ca dxiiña' ne ca neeza ni ma gulaqui' diidxa' ro' bia'.

Ca xa ique diidxa' ro' bia' ni ruuya' gaca ca dxiiña' de ra ribii cabe xa ique guidxi ro' la?, que chi gaca di cabe jma nahuiini de bia iza nexhe gaca cabe xa ique diidxa' ro' ni ribee xia diidxa' bia', ti diidxa' ro' bia' ma gulaqui gaca

ni zaca, ne zandaa cabe ga' iza lu ca dxiiña' ca, ne que zanda di guidxaa cabe o guiree cabe. Pa gacaladxi ca xa ique diidxa' ro' bia' ni ruuya' gaca ca dxiiña' de ra ribii cabe xa ique guidxi ca guiree ca tobisi bieque de lu xhiiña' ca' o guinaabaca' guiaadxa ca la?, xcaadxi xa ique ni runi dxiiña' ndaaní'ni que nga guni ca xpique ni, ti gaca ni casi nabaqui ndaaga 98 xti' gu'chí' ro' bia' rí'.

Ca xa ique diidxa' ro' bia' ni ruuya' gaca ca dxiiña' de ra ribii cabe xa ique guidxi la?, ni runi dxiiña' ndaaní' yoo ra raca ca dxiiña' ri la?, napa cabe xi guni cabe ni ná diidxa' bia', ne que zanda dí' gaca cabe jma nahuiini de bia' iza ni naquiiñe gaca cabe xa ique diidxa' ro' bia' ni ni rebee xia diidxa' bia' ne rudii gu'chí' ni laa ampuru que. Ne zandaa cabe ga' iza lu ca dxiiña' ca, ne pa guidxaa cabe la?, pa chi caacabe ti dxiiñ' jma narooa'.

Ne pa gueda guiiadxa tobi de ca xa ique diidxa' ro' bia' ni ruuya' gaca ca dxiiña' de ra ribii cabe xa ique guidxi ca tobisi bique la?, zabii cabe xtobi ni guiaana gunduuxe xhiiña' ni biree que.

Ca binni ni runi dxiiña' ndaaní' yoo ra raca ca dxiiña' ni cayeté ri la?, zuni cabe xhiiña' cabe casi nabaquí' ca xa ique ni runi dxiiña' ndaaní' yoo ro' ra riapa' binni guidxi ne casi nabaquí' diidxa' ro' bia'.

Ndaaga 100. Ca xa ique ni runi dxiiña' ndaaní' yoo ro' ra riapa xpidxichi guidxi ne ruuya' ca' guni ca xa ique diidxa' bia ca xhiiña' ca jneza la?, zuni ca xhiiña' ca modo gacaladxi ca' ne zanda guinaabaca' guirá ni iquiiñe ca' ne laca zanda cue xia ca intiisi diidxa'.

Sicari nga riu ca binni ri guni ca dxiiña' ndaaní' yoo ro' dí', zaca cabe gadxe, tobi de la cabe ca gaca xa ique ro' ni ribee xia diidxa' bia', laca laa nga gaca xa ique ro' ti ca dxiiña' rí'; xhonna ca la?, zabi xacadxi xa ique diidxa' ro' bia' laaca, huaxa pa cui jma de galaa de ca xa ique ca laacabe nga gaca cabe ni, ne lade ca xa ique diidxa' bia' ne ca xa ique ribee xia diidxa' bia' ne rudii gu'chí' ni la amaparu ca naga guihuini tu gaca ni, xhupa ca la?, ca xa ique ni ruzuhua lu xtiidxa' binni guidxi ca nga cui laaca; ne xtobi ca la?, xa ique ro' xti' guidxi ro' nga cui laabe.

Xcaadxi binni ni guni dxiiña' ndaaní' yoo ro' ri la?, napa cabe xi guchiiña' cabe ca ni lu ndaaga 95 xti' gu'chí' ro' bia' rí' ne gaca binni nuu xpiaani ne guizá nana de lu ca dxiiña' xti' guidxi ni huayuni, gacabe binni nachahui, ne pa guiaana ca gulli ca xa ique ro' ri la?, napa xi icaacabe ti gu'chí' xi guenda napa cabe.

Ca xa ique ri la?, zuni ca dxiiña' ra guidaagu lisaa guirá ca, o ra chupa choona si. ra guiu guirá ca xa ique ri' gutaagu xtiidxa' ca la?, zanda guini' cabe tu gaca xa ique o guchaa cabe ca xa ique diidxa' ro' bia', ne ca xa ique diidxa' bia', zaqueca ca xcaadxi dxiiña' ni quixhe' diidxa' bia' gaca.

Xa ique ro' xti' yoo ri' la?, zanda jma iza lu ca dxiiña' ri', que xcaadxi xa ique ca, nca xcadxi di la zandaa cabe gayu iza lu ca dxiiña' ne tobi ga nga guidxaa cabe, ne ma que zanda di cui cabe laaca gaca ca' xa ique para xti' iza.

Ca xa ique ri la?, que zandi guzuhua cabe lu xtiidxa' ca xa ique ni gulii laacabe, ti napa cabe xi guni cabe xhiiña' cabe jneza, naya do' la?, ne que zunu di cabe pur tobi ne xtobi co'. Ne pa guidxa cabe la?, napa cabe xi chinanda cabe ni diidxa' lá guidapa xti' gu'chi' ro' bia' ri'

Diidxa' ro' bia' nga cuaqui' ca neeza, ra guidxaa ne ra chu' xcaadxi xa ique nacubi, zaqueca ra guiroonba' ca guenda nana xti' ca xhiiña' cabe, ne laani la?, napa ni xi gacani casi ná ca diidxa' ri', gaca ni sicaru, ne ra guziidi cabe jma de lu ca xhiiña' cabe, gunicabe jneza ne chu' ca' pur tobi ne pur xtobi co.

Casi nabaqui' diidxa' bia' la?, yoo ro' ra raca dxiiña de ra ribii cabe xa ique guiidxo ro' ca la?, bia' ra rugaandasi xtipa xti' la?, zanda cue xia diidxa' bia'. Ca xa ique ro' ni runi dxiiña' ndaani' yoo ro' ra riree xia didxa' bia' ca la?, zanda guinaaba' cabe ca xa ique ni runi dxiiña' ndaani' yoo ra raca ca dxiiña' de ra ribii cabe xa ique guidxi ro' ca, guirá ca diidxa' ni cue xia de ra rugaanda xtipa' xti' guidxi ro'.

Ca xa ique ni runi dxiiña' ndaani' yoo ro' ra riree xia diidxa' bia' ca la?, zanda gu'ya' o ucuezadxi ca diidxa' ne ca dxiiña' ni cue xia ca xa ique ni runi dxiiña' ndaani' yoo ra raca ca dxiiña' de ra ribii cabe xa ique guidxi, huaxa zacani pa xhono de laacabe guini' cabe de que gacani. Ti diidxa' ro' bia' ma gulaqui' ca neeza ra gaca ca dxiiña' ri'.

Ca diidxa' ni guini ca xa ique ni runi dxiiña' ndaani' yoo ra raca ca dxiiña' ti guibi xa ique guidxi ro' la?, zaca guirutu zuxhani ne guiriti que zanda di gacaladxi ucalu ca ni, huaxa ca diidxa' ni guzeete cabe de ca xa ique diidxa' bia' ne ca xa ique diidxa' ro' bia' ca diidxa' ri si nga zanda guya' ca xa ique ribee xia diidxa' bia' ca, ti ganna cabe de que pa cayuuni ca xa ique ri ni casi ca neeza ni ma gulaqui diidxa' bia' xti' ca dxiiña' ri'.

Ca xa ique ni runi dxiiña' ndaani' yoo ro' ra riree xia diidxa' bia' ca la?, laaca nga cuaqui' ca' pabia' guiaxa ca' ne ca xa ique ruuya' gaca ca dxiiña' de ra

ribii cabe xa ique guidxi ro' ca la?, zabaqu' pabia guiaxa guirá ca xa ique ni runi dxiiña' ndaaní' yoo ro' ra riapa xquenda guidxi ro' ca, ne cadí de que cacaná ndaaga 99 xti' gu'chi' ro' bia' rí. Ca dxiiña' ni gaca o gata de pabia' bpdxichi guiaaxa ca xa ique ri la?, napa xi cheni ra nuu xa ique ro' ni ribee xia diidxa' bia' ti ganda guiu cani lu ca dxiiña' de ra riree xpidxichi guidxi. ca binni ni runi xhiiña' ca xa ique ni runi dxiiña' ndaaní' yoo ro' ra riree xia diidxa' bia' la?, napa cabe xi gabi cabe xa ique ro' xti' cabe xi chi guni cabe.

Ndaaga 101. Ca xa ique ro' bia' ni ribee xia diidxa' bia', ne ca xa ique ni ribee xia diidxa' ne rudii gu'chi' lá amparu, ne ca xa ique diidxa' bia', ne ca xa ique ribee xia diidxa' ndaaní' yoo ra riapa ca dxiiña' de ra ribii cabe xa ique guidxi que la?, que zanda dí' guni cabe xti' dxiiña' xti' guidxi ro' o xti' ca guidxi ro' dagu lisaa zaguíta (mexicu), ca ni zanda si gunicabe nga, ca dxiiña' ra gusiidi cabe binni guidxi xiixa o ra gaca necabe guidxi, huaxa ra guni cabe ni la?, que ziaxa dí' cabe ni ti ndaa bidxichi.

Guirá xa ique ni chi guiete rí' la?, que zandadí' guzuhua cabe lu xtiidxa' tuuxa binni de lu chupa iza de de ma biree cabe de lu ca dxiiña' rí, ne ca ndi nga ca xa ique rí; xa ique ro' ni ribee xia diidxa' bia', ca xa ique ni ribee xia diidxa' ne rudii gu'chi' lá amparu, ne ca xa ique diidxa' bia', ne ca xa ique ribee xia diidxa' ndaaní' yoo ra riapa ca dxiiña' de ra ribii cabe xa ique guidxi.

Ca binni ni ma guca xa ique ni ribee xia diidxa' bia' la?, ma que zanda dí' gaca cabe xa ique ni cuzeete ndaa VI xti' ndaaga 95 xti' gu'chi' ro' bia' rí, huaxa ca ni gyyuu ga si lu xhiiña' cabe que nga zanda guibi gaca xa ique ni cani ndaa ne ndaaga ni biete rí.

Ca diidxa' ni biete luguia ri la?, laaca zuchuugu ni lu xtipa' xti' ca xa ique ni gacaladxi gacani, neca gunaaba' ca' guiaadxa ca' lu xhiiña' ca'.

Cani guizaaca ca xa ique ni que guna de ca diidxa' ni ca lu die' lana ni biete luguia ri la?, zaree cabe de lu xhiiña' cabe, ne laaca ma que zaca di cabe guirá ca ni maca ricaacabe o ni riaaxa cabe, ne paaxa xiiru' donda gusaaba diidxa' ro' luguia cabe.

Ndaaga 102.

A. Ca xa ique ro' ni rucaa diidxa' bia' lu gu'chi' ca nga cui tu laa gaca xa ique rugaani donda xti' guidxi ro' ne laaca laacabe nga guchaa cabe ca xa

ique rí, huaxa ra gaca cani la?, ne xtiidxa' diidxa' ro' bia' nga gacani. Yoo ro' ra riguiiba' donda ique binni ca la?, zapani ti xa ique ro' gu'ya' gaca ca dxiiña' ri jneza ne laabe nga xa ique ro' ni rapa guidxi ti que chu' xiixa guenda naxoo, xa ique ro' ni rucaa diidxa' bia' lu gu'chí' ca nga cui laabe huaxa ne xtiidxa' ca xa ique ni ruzuhua lu xtiidxa' binni guidxi ca ti gacani. Ti ganda gaca tuuxa binni xa ique ni rapa guidxi ti que chu' guenda naxoo la?, naquiiñe ca ndi; gacabe xiiñi' zaguita (mexicu), gapacabe chonna bi chíi ne gaayu' iza dxi cui cabe binni ni gaca xa ique que, gapabe chíi iza de cayuunibe dxiiña', ne gapabe gu'chí' ni guini' de que binni ruzuhua lu diidxa' laabe; gapabe ti guenda nabaani jneza, ne pa que huaguiba' donda iquebe. Ne ni gaca xa ique rí la', zanda guchaa xa ique rucaa diidxa' bia' ca laabe ora tiisi.

Ca xa ique rugaani donda xti' guidxi ro' di la?, napa cabe xi gu'ya' cabe guirá' guenda naxoo ne donda ni gaca ndaani' guidxi ro'; ne ngaruni naquiiñe laacabe nga guinaaba' cabe igá ca binni ni bíni' guenda naxoo que, huaxa ra gudxiiba' cabe donda ri la?, naquiiñe guyuubu cabe xtuuba' donda ca ne guchiiña cabe xiixa ni guini' de que dxandi buqué biní ni, ne naquiiñe guni cabe ni jneza ti ganda gaca ca dxiiña' naguenda; guinaaba quiiba' pe' donda que ique buqé ne guiu cabe lu ca dxiiña' ni ná diidxa' ro' bia' guiucabe guni cabe.

Xa ique ro' ni rapa guidxi ro' ti que chu' guenda naxoo ndaani' guidxi ro' ca la?, zanda guiube gu'ya'be guirá ni ná ndaaga 105 xti' gu'chí' ro' bia' rí.

Guirá' dxiiña' ni ruuya' guidxi ro' di la?, xa ique ni rapa guidxi ro' ti que chu' guenda naxoo que la?, zanda gu'ya'be guirá' xpieque cani o laaca zanda gannabe de laacani ti ca xa ique rugaani donda ca gabi cani laabe, ne laca zannabe de ca ni runi ca xa ique ni rine xtiidxa' guidxi ro' zaguita (mexicu) xti' guidxi ro'.

Xa ique ro' ni rapa guidxi ro' que chu' guenda naxoo que ne ca xa ique rugaani donda ni runi xhiiña' be que, ne pa gueda gaca xiixa o gacana diidxa' bia' la?, laacabe nga napa cabe donda' pa que guni cabe xhiiña' cabe jneza ne ni na ni.

Diidxa' ro' bia' nga cuaqui' tuuxa ni ruzuhua lu xtiidxa' binni, ti gusiene xa ique ro' xti' guidxi ro' rí' guirá' ni guni ne xa ique ni ruca diidxa' bia' lu gu'chí' ca nga gu'ya' gacani.

B. Yoo ro' ra ria' diidxa' bia' ca ne ca yoo huiini ra ria' diidxa' bia' xti' ca guidxi

huiini ca la?, zuni cabe dxiiña' de ra rugaanda xtipa' xticabe, ne zabaqui' cabe ti yoo ra guiapa xquenda binni guidxi, ti ra yoo ca nga icaacabe xtiidxa' guirá' binni ni b'ni'na ca xa ique ni runi xhiña' binni guidxi que binni, ca ni que zanda chi ndaqui cabe ni b'ni' nga ca xa ique ro' ni rapa guidxi ro'.

Ca xaique ni runi dxiiña' ndaaní ca yoo ro' ni cuzeete' die' lana ni ca luguia ca la?, zuni cabe xhiña' cabe jneza, ne zuchiiñacabe guirá' guenda naxoo ni cayacaca ra nuu ca xaique ni naquiiñe guya' cani. Ca dxiiña' ni raca de ra ribii cabe xaique ro' guidxi, ne ca dxiiña' ra runiná cabe ca guenda xtí' ca binni runi dxiiña' la?, que zanda dí' guya' ca xaique ri ni.

Yoo ro' ni cuaqui ca xa ique ni runi dxiiña' ndaaní yoo ro' ra ria' diidxa' bia' ca la?, zaree laa ni Yoo ro' ra riapa xquenda binni guidxi; yoo ri la?, zunini xhiña' ni xtubini ne zapani xpidxichi ni ne laaca zacani ti yoo ndxo'.

Yoo ro' ri la?, zapani chií xa ique guni xhiña'ni, ca xa ique ri la?, jma de galaa de ca xa ique ro' ni ruzuhua lu xtiidxa' binni guidxi ni rabi cabe senador ca nga cui laacabe, ne pa cadí cayuni ca xa ique ri dxiiña' la?, ma ca xa ique ni riaana que nga guni ni, ne laaca chií xa ique, queca nga cui laacabe. Ne ma diidxa' ro' bia' nga cuaqui' ca neeza ni chinanda ca xa ique ni runi dxiiña' ndaaní yoo ra ria' diidxa' bia' ca ti ganda cuica, ca xa ique ni guni dxiiña' ndaaní yoo ro' ra riapa xquenda binni guidxi rí'. Ne cada iza nga guidxaa ca xa ique ni ma xadxi ca yuuni dxiiña' ndaaní yoo ro' rí', huaxa pa cui cabe laaca xtí' bieque la?, zanda ca guiaana ca.

Xa ique ro' xtí' yoo ro' ra riapa xquenda binni guidxi ca la?, laaca laabe nga gacabe xa ique ni gutaagu xtiidxa' ne ca xa ique ro' xtí' guidxi ti guziidí' binni gun'da ne uca, ne ra cui cabe laabe la?, napa cabe xi chinandacabe casi na die' lana ni ca luguia ca. Zandaa cabe gaayu' iza lu ca dxiiña' rí', ne zanda cui cabe laabe xtí' bieque, casi nabaqui' Diidxa' lá Guidapa xtí' gu'chí' ro' bia' rí'.

Xa ique ro' xtí' yoo ro' ra riapa xquenda binni guidxi ca la?, cada iza napabe xi guseendabe ti gu'chí' ra yoo ro' ria diidxa' bia ca ti ganna ca xa ique ri xhi guirá' cayunibe. Ne laaca zadxiña' be ra yoo nuu ca xa ique ni ruzuhua lu xtiidxa' binni guidxi ca bia' dxi ma gulaqui' diidxa' bia'.

Xa ique ro' xtí' yoo ro' ra riapa' xaquenda binni guidxi ca la?, napa cabe xi gu'ya' cabe guirá' ca ni cayaca ndaaní ca guidxi ro' rí'.

Ndaaga 103. Ca xa ique diidxa' ro' bia' ni runi dxiiña' ndaaní yoo ro' ra riree xia diidxa' bia' la, zanda cue xia cabe can di:

I. Ca diidxa' bia' o ca diidxa' ni cue xia tuuxa xa ique ni guni ná xquenda binni;

II. Ca diidxa' bia' o ca diidxa' ni cue xia tuuxa xa ique ni guniná o guchugu lu ca xquenda ca guidxi ro' dagu lisaa guidxi ro' zaguita (mexicu), ne

III. Ca diidxa' bia' o ca diidxa' ni cue xia ca guidxi ro' dagu lisaa guidxi ro' zaguita (mexicu), ni chi chu ra rugaanda xtipa' xti' ca xa ique ro' xti' guidxi ro'.

Ndaaga 104. Ca yoo' ra riree xia' donda ca la?, napa cabe xi gu'ya' cabe de guirá' dxiiña' rí:

I. De guirá' xixe guenda naxoo ni gaca lu ca dxiiña' xti' ca xa ique diidxa' bia' casi ra ribaana acbe xti' binni o ra gutí cabe binni, ne laaca ra ra nuu dinde binni runi xiixa yoo, ni gaca ndaaní guidxi ro' o ca diidxa' ni gutaagu xtiidxa' ro' bia' xti' guidxi ro' rí ne xti' guidxi ro' xti' ca gringu. Guirá' ca diidxa' ni ma biree xia ndaaní nuru do' yoo zanda guinaaba' cabe gu'ya' xti' xa ique diidxa' bia' cani pa cayuni nani xquenda cabe;

I-B. De ca diidxa' ni guire xia ne que chu' laadxi binni ni ti cayuninani ca guenda nazaca xti' laacani nga ca ni lu ndaa XXIX-H xt' ndaaga 73 ne ndaa IV xti' die' lana e) xti' gu'chí ro' bia' ri la?, zacani paaxa xi guini' diidxa' ro' bia'.

Ra guibigueta ca diidxa' bia' rí guiré' xia ca xti' bieque la?, zieni ra nuu ca xa ique ni rudii ti gu'chí' bia' laa amaparu, ti que gacanape jma ca guenda naya xti' tuuxa binni, ne ra gaca ca dxiiña' ri la?, naquiíne chinandani, ni ná ca ndaaga 103 ne 107 xti' gu'chí' ro' bia' rí, ti laacani nga quixhe cani xi neeza chinanda ca binni guidxi ni bí'ni'na ca xa ique runi xhiíña' guidxi ro' ca xquenda ca';

II. De guirá' ca guenda naxoo o guenda nagana ni gapa xaquenda ca nisa do' ca;

III. De lu guirá' ca dxiiña' ra nuu guidxi ro';

IV. De gurá' ca guenda naxoo ne guenda nagaana ni ca ndaaga 105 xti', guichí' ro' bia' rí', huaxa laaca naquiñe ganna ca xa ique ni rapa guidxi ro' ti que chu' gunda naxoo ca guirá' ni;

V. De guirá' ca gunda naxoo o guenda nagaana ni gapa ca guidxi ro' xti' zaguita (mexicu), ne

VI. De lu ca dxiiña' ni cayuni ca xaque ni rine xtiidxa' guidxi ro' xti' guidxi ni cadí xti' zaguita (mexicu).

Ndaaga 105. Yoo ro' ra riree xia diidxa' bia' ca la?, napa ni xi gu'ya' ca dxiiña' rí' ti diidxa' bia' xti' cabe ma gulaquí' zaca:

I. De ca ra riu dinde ca diidxa xti' gu'chí' ro' bia' rí' nga gu'ya' ni, haxa ca dxiiña' ni que zanda gu'ya' ni nga ca ni gaca ra ribii cabe xa ique guidxi ro' ne ca ni ca lu ndaaga 46 xti' gu'chí' ro' bia' rí' ne ca ni guizaacaneni cani ca xaguerí':

a) Ca guidxi ro' ne ca guidxi liibi lisa ne zaguita (mexicu);

b) Guidxi ro' ne ca guidxi huiini;

c) Lu ca xtipa' xti' ca xa ique ni rucaa diidxa' ro' bia' lu gu'chí' ne yoo ro' ra ria' diidxa' bia' o pa co la?, de lu cani gaca lu xhiiña' ca xa ique ni ruzuhua lu xtiidxa' binni guidxi ni riaana guni dxiiña' que, o gacacani xti' guidxi ro';

d) Ti guidxi ro' xti' zaguita (mexicu) ne xtobi;

e) Ti guidxi ro' xti' zaguita ne guidxi ro';

f) Guidxi ro' ne ti guidxi huiini;

g) Chupa guidxi huiini xti' intiisi guidxi ro';

h) Chupa xtipa' xti', xti guidxi ro' xti' zaguita, lu ca cani bí'ni cabe ne diidxa' xti' gu'chí' ro' bia' rí';

i) Ti guidxi ro' xti' zaguita ne ti guidxi huiini xti', de lu ca cani bí'ni cabe ne xtiidxa' gu'chí' ro' bia' rí';

j) Ti guidxi ro' xti' zaguita ne ti guidxi huiini xti', xti guidxi ro' xti' zaguita, de lu ca cani b'ni cabe ne diidxa' xtiidxa' gu'ch'i' ro' bia' ri'; ne

k) Chupa yoo ro' ra raca xhiina' guidxi ro', de lu cani b'ni cabe ne xtiidxa' gu'ch'i' ro' bia' ri'.

Huaxa naquiiñe gacani lu ca guenda naxoo xti' ca guidxi ro' xti' zaguita, ne ca guidxi huiini xti', ni bisaana dxi guidxi ro', ne ca guidxi huiini ca ne bisaana dxi xiixa' guidxi ro' xti' zaguita ni o cani ca lu lana c), h) ne k) ni ca lugua ca o paaxa guini' ca xa ique ni runi dxiiña' ndaani' ca yoo ra riree xia diidxa' bia' ca gacani, ne pa gacani la?, napa xi gudii xtiidxa' xhono de ca xa ique ca.

Lu guirá' cani gaca, ca la?, ca xa ique ni ribee xia diidxa' ro' bia' ca la?, zuya' chaahui cabe diidxa' bia' ni cayunina xaquenda binni que.

II. Ca xiixa ra riu dinde xtiidxa' gu'ch'i' ro' bia' ri' ne ca ra gacaladxi xiixa' diidxa' ro' bia' ucalu gu'ch'i' ro' bia' ri'.

Ca ra chu' dinde ca xtiidxa' gu'ch'i' ro' bia' ri' la?, zanda gudxiiluni lu chonna bi chií dxi raca dxiiña' dede dxi ma ucuca o biete xi chi' guni diidxa' ro' bia' ri' ne pur;

a) Ca xa ique ni ruzuhua lu xtiidxa' binni guidxi ni rabi cabe diputadu ca la?, naquiiñe gudii xtiidxa' cabe biaca guisaca chonna bi chií nuu chonna lu, ti que guni ca diidxa' ro' bia' ni cue yoo ro' ra ria' diidxa' bia' ca;

b) Ca xa ique ni ruzuhua lu xtiidxa' binni guidxi ni rabi cabe senador ca la?, naquiiñe gudii xtiidxa' cabe biaca guisaca chonna bi chií nuu chonna lu, ti que guni ca diidxa' ro' bia' ni cue yoo ro' ra ria' diidxa' bia' ca o ca diidxa' ni gutaagu ca guidxi ro' zaguita (mexicu) ne xti' guidxi ro' xti' ca gringu;

c) Ra uca lu xa ique diidxa' ro' bia' ni ribee xia diidxa' bia' ca diidxa' bia' xti' guidxi ro' xti' guidxi ro' zaguita, ne ca guidxi ro' ni liibi lisaa ne zaguita (mexicu), ne ca diidxa' ni gutaagu guidxi ro' zaguita (mexicu) ne xti' guidxi ro' xti' ca gringu;

d) Ca xa ique ni ruzuhua lu xtiidxa' binni guidxi ri la?, naquiiñe gudii xtiidxa' cabe biaca guisaca chonna bi chií nuu chonna lu, ti que guni ca diidxa' ro' bia' ni cue yoo ro' ra runi cabe dxiiña' ca xhiina'; ne

e) Yoo ro' ra riu ca xa ique ni ruzuhua lu xtiidxa' binni guidxi ni nuusi ndaaní guidxi ro' ni rabi cabe diputadu ne rutaagu xtiidxa'ca' la?, naquiiñe gudii xtiidxa' cabe biaca guisaca chonna bi chíi nuu chonna lu, ti que guni ca diidxa' ro' bia' ni cue yoo ro' ra rutaagu xtiidxa' cabe ca; ne

f) Los partidos políticos con registro ante el Instituto Federal Electoral, por conducto de sus dirigencias nacionales, en contra de leyes electorales federales o locales; y los partidos políticos con registro estatal, a través de sus dirigencias, exclusivamente en contra de leyes electorales expedidas por el órgano legislativo del Estado que les otorgó el registro.

g) Ra chu dinde xa ique ro' xti' yoo ro' ra riapa xquenda binni guidxi ca ne ca diidxa' bia' xti' guidxi ro' ne ca guidxi huiini xti' zaguita ne ca diidxa' ni gutaagu guidxi ro' zaguita (mexicu) ne xti' guidxi ro' xti' gringu ne gudii xtiidxa' ca xa ique ni ruzuhua lu xtiidxa' binni guidxi ni rabi cabe diputadu xti' guidxi ro' ca gaca cani, ne guni nani ca guenda nazaca xti' binni guidxi ni cayapa lu gu'chi' ro' bia' ri'. ne laaca r aucalu binni ni rucaalu guiapa xquenda binni guidxi que ch guizaacaca' xiixa. Ca diidxa' bia' ni que gacaladxi binni gaca la?, lu ndaaga ri nga ca ni.

Ca diidxa' ro' bia' ne ca didxa bia' xti' ca guiidxi huiini ni ruuya' guiapa ca dxiiña' de ra ribii cabe xa ique ro' guiidxi la?, pa ñannda nicacani lu tapa late gande bi chíi dxi ante guzulu ca dxiiña' ri', ne pa ma bizulu ca dxiiña' ri' la?, ma que zanda di' guidxa xiixa lu ca ni.

Ca diidxa' bia' ni guiré' xia' ndaaní yoo ro' ra riree xia diidxa' bia' ca la?, zanda guiaanaca' ca diidxa' bia' ca pa gudii xtiidxa' bia' xhono de ca xa ique ni runi dxiiña' ndaaní ni ca.

III. Pa ca xa ique ro' ni ribee xia diidxa' bia' ni rudii gu'chi' lá amparu binni guiidxi ni cayaca na guenda xti' ca la?, zanda cu' cabe gu'chi' o laape cabe chi guuya' cabe de ca donda ni ma gulee xia' ca xa ique diidxa' bia' ne jma pa nuu guidxi ro' lu ca ni ne pa caquiiñeni gacabe cabe cani.

Ra guini' cabe de que cadí jneza nuu ca donda o ca diidxa' ni biree xia ni cani' ca ndaa I ne II xti' ndaaga ri la?, que zanda di guibigueta cani xti' bieque, huaxa pa gacani xti' yoo ro' ra riree xia donda ique ca binni ribaana ra ca nga zanda gaca cani biete ri'.

Ne pa que gaca cani ná ca ndaa I ne II xti' ndaaga ri la?, zaca ni na lu guiropa die' lana xti' ndaa XVI de lu ndaaga 107 xti' gu'chi' ro' bia' ri'.

Ndaaga 106. Xa ique ro' ni rapa guidxi' ro' ti que chu' guenda naxoo ndaaní guidxi ro' ca nga cue xia ca diidxa' bia' pa chu' dinde ca yoo ro' ra ribee xia diidxa' bia' xti' guidxi ro', ne laaca ra chu' dinde neni tuuxa guidxi' ro' liibi lisaa ne ca guidxi ro' zaguaita (mexicu) o ti guidxi ne xti' guidxi.

Ndaaga 107. Guirá' ca diidxa' nuu dinde ni cani ndaaga 103 xti' gu'chi' ro' bia' ri' napa cani xi chinanda cani casi nabaquí diidxa' bia' xti' guidxi ro' ne casi ca xagueri:

I. Ra guzulu ca dxiiña' de ra gaca ne cabe binni ni guca na ca xquenda ne gudii cabe laa gu'chi' ni lá amparu que la?, napa xi ni gucaná ca nga saa nandani;

II. Ca diidxa' ni guiré' xia ca la?, napa xo gaca cani, zapani ti binni si ne que zapadini pur xtale tobi ga nga gapani, ra gapani xaquenda binni la?, naquiiñe che chi guini' xi cayuuni ti diidxa' ro' bia' laa o pa que ñuu laadxi ca diidxa' bia' ni biree xia lu guía que;

Lu ca dxiiña' ra raca gu'chi' lá amparu ca la?, napa xi guchiiña' cabe xi donda ni ti gacani casi nabaquí diidxa' ro' bia' ne ca ndaaga 103 ne 107 xti' gu'chi' ro' bia' ri'.

Pa cani chi ucaa lu cabe icaacabe gu'chi' lá amparu ca, gacani ca binni rañaaxa cayaxha cabe laaca nisa, layu gu'xhi' ni napa ca binni rañaaxa la?, napa xi guchiiña cabe de guirá' xixe ca xiixa ni chi guluiná ni gacane ca binni ni biete ri' ne ica xi dxi nga zanda guidxiiña cabe ti ganna cabe xi guirá' guenda ni rapa laacabe nga nuu ne zaqueca ca xi nga canaaba' acbe gaca.

Ca diidxa' ni biete luguia ri la?, que zunina di ni xquenda ca binni rañaaxa ne que uca nani ti ti ma bisaana dxi cabe ni, huaxa ra guiré' xia ca diidxa' ri la?, napani xi guiré'ni jneeza ti gaca neni laacabe. Ne pa laaca gacana guenda xti' guirá' xixe cabe la?, laaca que ziana ca dí' cani, nin ni biete niru do' ca la?, nin guiropa dí', huaxa pa ni ca niru do' can a ca cabe de que gacani zaca o guiropa ca guireeni de lu ca diidxa' ri'.

III. Ra uca lu cabe cani guni ca yoo ra rire xaia donda, xti' dxiiña' o xti' ca xa ique runi xhiiña' guidxi gu'chi' lá amparu ca la?, zuni ni xhiiña' casi ca ni ca xague ri':

a) Guirá' ca diidxa' o donda ni guiré' xia o ca diidxa' guiré' xia xti' ca binni runi dxiiña' ne ucuezadxiini guenda rinde xti' binni guidxi, ne que chi

chu'di' xiixa diidxa' ucueza dxi o guchaa ni ma uca, ne ra guiré' xia ni ca la?, que chi guninani ca guenda xti' ca binni ni cayacaná; huaxa nirudó' ra yendaquí' cabe donda xti' ca dxiiña' ni nuguu dinde binni xiixa layu o yoo, ne que ni na cabe nicaa cabe ni la?, naquiiñe icani lu guiropa neeza ra chinduu cabe donda ca. Gu'chi' ni lá amparu di la?, que zanda di guireeni pa chi guininani guenda nazaca xti' tuuxa lisaa;

b) Ra chu' dinde neni xiixa diidxa' ni biree xia ne que zanda gacachui ca guenda nana xti' binni ni guca na que, zanda gacani lu dxiiña' ni cayaca ca la?, o fuera ne jma pa ma bira biluuxe guirá' ca neeza ni ganda gacane laabe, ne

c) Ca diidxa' ni chu' dinde ne gunina xti' binni ne que ganna pa ne laa zeeda luni.

IV. Laaca randa gacaneni ca binni ni cayuni xhiiña' guidxi, ne jma pa cani cayacaca' ma zanda guni chaahui guenda nazaca xti' ca binni ri', neca biyuubi ca' xti' neeza ni ganda cue xia cani jneza. Cadi necesariu di' guyuubi cabe ca neeza ni cani diidxa' ni ca luguia ca pa cadi diidxa' bia'ca nayaa xtiidxa', ti cadi gacani dxandipe casi ná ca neeza xti' ca dxiiña' ni rudii gu'chi' ni lá amparu que, ti ganda guiaanadxi ca dxiiña' ni cayuni na ca guenda nazaca xti' ca binni ri';

V. Ra chu' dinde neni xiixa diidxa' bia' ni biree xia de lu ca diidxa' de ra runi binni dxiiña' xti', ne pa gacani ndaani' dxiiña' ra caree xia diidxa' bia' o diidxa' bia' ni caree xia ca laaca guni na cani xquenda ca binni ni nuu dinde que la?, zanda chindaquí' cabe nezalu xcaadxi xa ique diidxa' bia' ni zanda gu'ya' gaca chaahui cani, ti diidxa' ro' bia' xti' yoo ro' ni rapa binni guiidxi que chu xiixa guenda naxoo ca ma gualaquí' ca neeza ne ca xa ique diidxa' bia' ni zanda gu'ya' ca dxiiña' ri', ne xaguete ri' cani naquiiñe gaca:

a) De lu ca dxiiña' ra caree xia donda ique tuuxa ni bití' o ni gulaana', ne pa maca chi nde xia ca xa ique ni rapa guidxi ti que chu xiixa guenda naxoo ca, cani tobisi bieque, ne pa cadi laabe naquiiñe cue xia beni, ne jma pa ca dxu soldadu o ca xa ique diidxa' ro' bia' xti' guidxi ro' naquiiñe guni ni.

b) Lu ca diidxa' bia' gulee xia ca diidxa' xti' ca binni runi xhiiña' guidxi, pa guinaaba' tuuxa binni guiré' xia ni tobisi bieque, ne xiixa diidxa' bia' ni biree xia ne biluuxe ca, ne que zandadi' gaca chaahui.

c) Ra ucaalu cabe ne guiní' cabe xiñee gulee xia xa ique diidxa' bia' ni runi

dxiiña' ndaaní' guidxi ro' ca xiixa diidxa' bia' de ra nuu ra nuu dindene binni xiixa layu o yoo, o neca cue xia ca xa ique diidxa' bia' xti' ca guidxi huiini cani. Ra chu' dinde binni guni xiixa yoo o layu ni guiree xia ndaaní' yoo ro' ni nuu ndaaní' guidxi ro' ca la?, zanda ucaa lucabeni ne gu'chi' ni lá maparu que, ndi la?, zanda guni tobi de ca binni ni nuu dinde cani, laaca zanda guni ca guidxi ro' ni, ti pa cayaca ladxi cabe gaxha cabe laa xiixa xti', ne

d) Ca diidxa' bia' ni guiree xia ra yoo ni rapa xhiiña' binni guidxi, pa ucaa lucabe xiñee biree xia diidxa' bia' xti' ca diidxa' bia ri' zaca, neca gulee xia yoo ra riapa ca dxiiña' rini, o yoo ro' xti' ca yoo ra riapa xhiiña' binni guidxi ca ni.

Pa ca xa ique ni runi dxiiña' nadaani yoo ro' ra ríee xia diidxa' bia ni nuu ndaaní' guidxi ro' zaguita (mexicu) ca gacaladxi ganna xini la?, zanda guseenda ca' ti gu'chi' ne pa gacaladxi de que laape che chi guuyaca' xiini la?, laca zanda.

VI. Ca diidxa' ni bizete ndaa ni ca luguia ca la?, diidxa' ro' bia' xti' ndaaga 103 ne 107 xti' gu'chi' ro' bia' ri nga cuaqui' ca neeza ne ca xigaaba' chinanda ca yoo ro' ni biete luguia ca, ti ganda cue xia ca' xiixa' diidxa' bia';

VII. Ra gacane gu'chi' ni la amparu di binni, fuera de ca dxiiña' ri la?, o ra ma ziluuuxe o ca diidxa' bia' ni ma biree xia guninaca xti' binni ni que ganna de ca dxiiña' ni cayaca ri' la?, zanda chi chindaqui cabe ni neza lu xa ique diidxa' bia' ni naquiiñe guuya' de laacani ne gudii gu'chi' ni lá amparu ca laacabe, ne ra guni cabe guirá' xpieque ca dxiiña' ri la?, que zanaba di quiete xtiidxa' xa ique ni biini' guenda nana que, ti ma despue guseenda cabe ti gu'chi' ra nuu xa ique ni biini' guenda nana que, de ra ca la?, ma naquiiñe guchiiña' ca binni ni gucana xquenda ca ti xiixa ni guluina de que dxandi gucani, ne cada tobi de laacabe la?, zususacabe xtiidxa' cabe ne laaca racaca nga guiree xia ca diidxa' bia' ri';

VIII. Ne laaca ra cue xia tuuxa xa ique diidxa' bia' ni nuu ndaaní' ca guidxi huiini ca xiixa diidxa' bia'. De laacani la?, laaca zanda ca gu'ya' ca xa ique ni rapa guidxi ca cani:

a) Pa bibezadxi ra ninaaba' binni gu'chi' ni lá amparu que, ne gacani ti guenada nana de cani ca lu gu'chi' ro' bia' ri' o gacani ca diidxa' ro' bia' xti' guidxi ro' o ca diidxa' ni bitaagu guidxi ro' zaguita (mexicu) ndaaní' xti' guidxi ro' xti' gringu neca cani lu ndaaga 89 xti' gu'chi' ro' bia' ri' o ra gacana ca diidxa' bia' ni cue ca xa ique ro' xti' xiixa guidxi ro' xti' zaguita (mexicu);

b) Pa gueda gacani lu ca ndaa II ne III xti' ndaaga 103 xti' gu'chi' ro' bia' rí la?. Ca xa ique ni runi dxiiña' nadaani yoo ro' ra riapa guidxi ti que chu xiixa guenda naxoo la?, zandaca guseenda ti gu'chi' o laape ca cheeca ra nuu ca xa ique ni rudii gu'chi' ni lá amparu ca ti ganda ganna xi cayaca, huaxa ra guseendacabe gu'chi' o cheecabe laacabe la?, ne xtiidxa' ca xa ique ni rudii gu'chi' ni lá amparu ca la?, o ne xtiidxa' xa ique ro' ni ribee xia diidxa' bia' ca nga gacani.

De cani que nica lu ca diidxa' ni ca luguia ca la?, ca xa ique ni runi dxiiña' ndaaní tobi de ca yoo ni rudii gu'chi' lá amparu ca la?, ma laaca nga guyaca' de laacani ne ra cue xia ca' diidxa' la?, ma guiruti zanda guyuubi xti' neeza ni gaca ne laaca;

IX. Ca diidxa' ni guiré' xia ndaaní ca yoo ro' ni rudii gu'chi' ni lá amparu que la?, ma que rapa di ni xti' neeza ti ganda gudxiilu binni, huaxa pa gu'chi' ro' bia' rí guini' o gapa xiixa diidxa' ni gacane chu' xti' neeza gacane gudxiilu ne binni nga ma zacani, laaca ne xtiidxa' ca xa ique ni ribee xia diidxa' bia' ca gacani, huaxa gaca ca diidxa' ca nayaa ne jneza. Ra gueda gacasi sicari nga, zanda guya' ca xa ique ni ri ribee xia diidxa' bia' ca guenda nana ni guca xa binni que, huaxa que zuuya' di cabe ca neeza ni gacane binni ri ucaalu, ni guya' si cabe nga ca diidxa' xti' gu'chi' ro' bia' rí' ni que niree xia jneza;

X. Ca xiixa ni gaca ne ucuezadxi ca dxiiña' rí' la?, zacani casi nabaquí diidxa' ro' bia', ti guihuini pabia' gucanabe, ne pa zanda gacachaahui ca guenda nana ni gupabeque, ne pa bininá ca diidxa' bia' ni biree xia que laabe, ne pa xiiru gunini xcaadxi binni.

Ra guiré' xia ca diidxa' bia' ni chi gunina binni que la?, ma ridxeela ti gu'chi' lá amparu que ti que guiaaba'be ndaaní liidxi guiiba', ne lu ca dxiiña' ra nuu dindenecabe xiixa layu o yoo la?, binni ni cayacana que la?, napabe xi quixebe ti ndaa bidxichi ti ganda gusaanadxi gu'chi' lá amparu que de gusaaba xa ique diidxa' bia' que donda que iquebe ne pa laabe quixebe ne gunibe cani cayabi ca diidxa' rí' laabe la?, ma zaca cani ca xague rí';

XI. Ca xiixa ni gusaanadxi que chi guiaaba' donda ique binni ca la?, ra nuu ca xaiuque ni rudii gu'chi' lá amparu ca nga che cabe, ti ganda icaacabeni, ne xa ique ni binina ca guenda xti' binni que la?, ma gu'ya' xi guni. Binni ni gucana que la?, napabe xi guchiiñabe ti gu'chi' yachi' xti' amparu, ra nuu xa ique ni binina ca guenda nazaca xtibe que, ne laaca naquiiñe guchiiñabe copia xtini, ne laca napabe xi guseendabe tobi ra nuu ca xa ique rugaani

donda, ne xtobi guiaana ndaaní yoo ro' ra runi ca xa ique ni rudii gu'chí' lá amparu que dxiiña'. Ne ra gaca xcaadxi dxiiña' ri la?, ma ca xa ique ni nuu ndaaní ca guiidxi huiini ca guni ni o ma raca cani ndaaní yoo ro' ni nuu xtubi ndaaní ca guidxi huiini ne laaca rudiica' gu'chí' amparu ca binni.

XII. Ca guenda nana ni gaca binni ni ca lu ca ndaaga 16, 19 ne 20 la?, napa cabe xi chi guinaaba' diidxa' cabe o ucalucabe xiñee gucani zaque, ra nuu ca xa ique ni biini ni que, o laaca zanda chee cabe ra nuu xa ique diidxa' bia' ni biiya' ni que o ra nuu ca xa ique ni runi dxiiña' ndaaní ca yoo ni nuu ndaaní ca guidxi huiini ne laaca rudiica' gu'chí' maparu que, o laaca zanda gu'ya' cabe xi zanda guni cabe pa gucana cabe de xiixa ni ca lu ndaa VIII ni ca luguia ca.

Pa xa ique diidxa' bia' ni nuu ndaaní guidxi huiini que o ca xa ique ni runi dxiiña' ndaaní yoo ra rudii cabe gu'chí' lá amparu que, cadí nuuca' o nabeezaca' ndaaní tobisi guiidxi ra nabeeza xa ique ni bininá binni que la?, ma diidxa' ro' bia' nga quixhe paraa ne tu xa ique diidxa' bia' zanda guchiiña' cabe gu'chí' yachí' xti' amparu que, ne ma ca ngue zanda ucueezadxi ga ca donda ni caguiiba' ique binni que, ti zaca gacani casi ma gulaquí' diidxa' ro' bia';

XIII. Pa tobi de ca yoo ro' ra ríree xia diidxa' ro' bia' ca o ca xaique diidxa' ro' bia' ni runi dxiiña' ndaaní ni ca gusisacaca' ti diidxa' ro' ra cuchaaga bia' ca xtiidxa'ca' de gu'chí' lá amparu que la?, xaique ro' bia' xti' ca xaique ri o ca binni ni nuu dinde lu ca dxiiña' rí' la?, zanda guini'ca' de que cadí jneza nuu ca ca diidxa' ni cusisaca cabe que, ne ma xaique ro' ni ribee xia diidxa' bia' que, guini' gunaa tobi de ca diidxa' ni cusisaca cabe que nuu jneza. Ca diidxa' ni guiree xia ndaaní tobi de ca yoo ro' o ndaaní ca yoo ro' ra ríee xia diidxa' bia' ni cani' guiropa ndaaga diidxa' ca lu guía ca la?, que zanda dí' gudxiilu cabeni, o guni cabeni laacabe ni zandasi guni cabe nga ca diidxa' bia' ni ribee xia xhono si xaique, ne que zuniná dini ca diidxa' ni bíree xia ra guyuu dinde diidxa' ne bisisaca cabe que?;

XIV. Huaxa xi guini' ra ziluxee ndaaga diidxa' xti' ndaa II xti' gu'chí' ro' bia' rí', zanda guiaana ca' o que guiré' dí' gu'chí' lá amparu que, paaxa binni ni gucana que gusaana de zanandani, o gueda gacani de ca binni ni runi xhiiña' guidxi, o de ca ra nuu dinde binni runi yoo o layu. Neeza ni biyuubi cabe gacane laacabe que gusaana dxi diidxa' ni bíree xia que;

XV. Xa ique ro' ni rapa guidxi que chu xiixa guenda naxoo que o xa ique rugaani donda ne runi dxiiña' ndaaní guidxi ro' que la?, o tobi de laacabe zanda chu' lu

ca dxiiña' ra ricaayuucabe pa guiré' gu'chí' lá amparu que; ne pa ca diidxa' ni chi guiré' xia que que nabe narendani la?, que ziudicabe lu cani;

XVI. Ne pa biree gu'chí' lá amparu que, ne xa ique ni b'ni' na guenda xti' binni que, icaru tema de que gacaru' ni na que la?, xa ique ro' ni runi dxiiña' ndaani' yo' ro' ra riree xia diidxa' bia que guini' de que cadí jneeza ni cayunibe que la?, zabee laabe de lu ca xhiiña' be, ne zutiidi laabe lunaaxa ique ni rudii gu'chí' lá amparu que ti gu'ya' xi nga na ique be. ne pa ra guidxiña' be que guini' be xiñee nabe gacani que la?, ma xa ique ni runi dxiiña' ndaani' yoo ro' ra riree xia diidxa' que guseendaca laabe ne zudii laabe ti chupa chonna gubidxa ti guni ni na que. Ne pa xa ique que, que guni ni gudxicabe laa que lu bia' dxi que la?, ma ca xa ique ni ribee xia diidxa' que guni ni.

Ra ganda la?, xa ique ni runi dxiiña' ndaani' yoo ro' ra riree xia diidxa' que la?, zanda guseenda ti gu'chí' ti guiree gu'chí' lá amparu que, ndi la?, zacani pa que ñuni cabe jneeza, ne pa ra guiree diidxa' ni biree xia que guninani tutiisi binni o binni guidxi ne pa jma nadipani que xtipa ni chi gacane binni gucana que la?, ma zaca gaca cani na ca diidxa' rí. Ne laaca pa ganda la?, binni ni gucana que la?, zanda guinaababe guiree ti gu'chí' casi ti amparu gacane laabe.

Ne pa ma que guizaa laadxi cabe saa nanda cabe guiree xia xtiidxa' amparu que la?, ziaana cani ti diidxa' ro' bia' ma gulaqui' gacani sicaca.

XVII. Pa xa ique ni b'ni' na binni que que gusaanadxi diidxa' bia' ni cayunina laabe que la?, ne zanda ca guni ni la?, o guinaaba bidxichi ni cadí bia' naquiiñe o que guinaaba cadí bia laani la?, zuseenda cabe la ra nuu xa ique ni rucaa riidxi laa que.

XVIII. (Diidxa' bixa)

DIIDXA' LÁ GUIDAPA

Cani guni ca binni runi xhiiña' guiidxi ne ca ni napa
guidxi ro' zaguita (mexicu)

Ndaaga 108. Ti gaca cani chi guiete lu diidxa' lá rí la?, naquiíne' guiuhini tu ca binni runi xhiíña' guidxi ro' ne laacabe nga cani chi guiete rí'; cani cui cabe ra ribii cabe xa ique guidxi, ne ca xa ique ro' ni rapa guidxi ti que chu' xiixa guenda naxoo, o tutiisi binni ni guni o ni cayuni xhiíña' guidxi ro' casi cani nuu ndaaní' yoo ro' ra ria' diidxa' bia', o cani nuu ndaaní' ca yoo ro' ra riree xia diidxa' bia' o ca binni ni gudii gu'chi' ro' bia' rí' dxiiña' laaca ne que gunica' xhiíñaca' jneza.

Zanda gudxiiba' cabe donda ique xa ique ro' xti' guidxi ro' zaguita (mexicu), lu bia' iza gunibe xhiíña' guidxi, ne donda ni gudxiiba' cabe ca naga pa laabe gudxii dechebe binni guidxi ne pa laabe gunibe xiixa guenda naxoo ne guininabe guidxi.

Ca xa ique ro' xti' xiixa guidxi, ca xa ique ni ruzuhua lu xtiidxa' guidxi, ca xa ique diidxa' ro' bia' xti' guidxi huiini o xti' guidxi ro' ne ca xa ique ni rapa xpidxichi guidxi ne ruuya' guni ca xa ique didxa' bia' dxiiña' jneza la?, ne pa laacabe que guni cabe ca ni na diidxa' ro' bia' ne ca ni na gu'chi' ro' bia' ri la?, zata ti donda ique cabe, ne laaca pa iquiíne' cabe xpidxichi guidxi ro' lu ra cadí' chi iquiíne'.

Lu ca' gu'chi' ro' bia' xti' ca guidxi ro' xti' zaguita (mexicu) la?, laaca zaca cani ca lu niru do' ndaaga diidxa' xti' ndaaga ri, ti gannaca' tunga ca binni ni runi xhiíña' guidxi ro' ne ca guidxi huiini xti' guidxi ro' rí'.

Ndaaga 109. Pa ca xa ique ni runi xhiíña' guidxi gueda guchee ne cani la?, ca xa ique ni runi dxiiña' ndaaní' ca yoo ro' ra ria' didxa' bia' ca ne xcaadxi yoo ro' ra ria' diidxa' bia' ca la?, zabee ca' diidxa' bia' ni ni quiiba ique ca xa ique rí', ne diidxa' bia' ni guiree ca la?, de ra ruganda xtipa' xti' cabe nga guni cabe ni, ne casi ca xhagueri nga cani gaca ca';

I. Casi ca dxiiña' ni raca ra ruxhuba donda cabe ca politicu ca nga, gaca ti guxhuba donda cabe ca xa ique ni runi xhiíña' guidxi pa laaca guchee neca guidxi, ne casi ca lu ndaaga 110 xti' gu'chi' ro' bia' r inga gacani.

Pa laacabe cadí' nuu cabe cadí' cutaagu xtiidxa' cabe lu ti dxiiña' la?, que zanda di guxhuba donda guidxi laacabe.

II. Pa ca xa ique guidxi ni guchee ne guidxi o guianane xti' guidxi la?, diidxa' bia' xti' ca xa ique rudxiiba' donda ca nga gusu xhuba donda ne cabe laaca; ne

III. Ca xa ique xti' guidxi ro' nga gudxiiba' donda ique ca xa ique ni runi xhiiña' guidxi o ca binni ni runi xhiiña' guidxi pa laaca que guni ca' xhiiña' ca' jneza, nayaa la?, ne nadxo', o chu' ca' pur tobi ne pur xtobi co', o guiaananeqa' xti' guidxi.

Ca neeza ni ma guta ra ca gaca ca dxiiña' ri la?, xtubi xtubi can nga guiree xpique cani. Que zadadi' gudxiiba' cabe donda o gusu xhuba donda cabe tuuxa chipa bique ne nguca donda.

Diidxa' ro' bia' nga quixhe paraa ne xi neeza nga gusuxhuba donda cabe ca xa ique ni runi xhiiña' guidxi ra gusirooba' ca' xpidxichi ca' ne ca xpidxichi guidxi lu bia' iza nuu ca lu ca dxiiña' ni cayuni ca que, o gunixti' ca xiixa ni napa guidxi ne que guzuhuinea' paraa biree guiraa ni napaca' que. Ca diidxa' ro' bia' ni riquiiñe ca xa ique radxiiba donda ique binni ca nga gu'ya' xi guni ne laaca diidxaza' bia' ca nga guini' guiaxha cabe cani napa cabe o cani ma biaana necabe xti' guidxi.

Tutica binni guidxi zanda, cuaqui ca donda de cani cani' ndaaga ri' ra nuu ca xa ique ni ruzuhua lu xtiidxa' binni guidxi ni rabi cabe diputadu.

Ndaaga 110. Guirá ca xa ique ni zanda guxhuba donda cabe nga cani chiguiete ri' casi: ca xa ique ni ruzuhua lu xtiidxa' binni guidxi, ca xa ique diidxa' ro' bia' ni ribee xia diidxa' bia', ca xaquie ni rapa xpidxichi guidxi ne ruya guni ca xa ique didxa' bia ca xhiiña' ca', ca xa ique ni runi xqui'chi' guidxi, xa ique ro' xti' ca xa ique guidxi, xa ique ni rapa guidxi ti que chu' xiixa guenda naxoo, ca xa ique diidxa' ro' bia' ne ca xa ique diidxa' bia' xti' ca guidxi huiini ca, ca xa ique ni rusiene ca xa ique ro' ni runi dxiiña' nadaani ca yoo ro' ra rie binni ica lá ti gapa credencial, xa ique ro' xti' yoo ra rie binni ica lá ti gapa credencial, ca xa ique diidxa' bia' xti' ca dxiiña' de ra ribii cabe xa ique ro' guidxi, ca xa ique xti' ca yoo ra riziidi' binni gun'da ne ucaa ne ca xa ique ro' ni napa tienda ro' xti' guidxi ro' lu ná.

Ca xa ique ni chi guiete ri la?, zanda guxhuba donda cabe laaca casi ruxhuba donda cabe ca politicu ca, pa laacabe gunina cabe ca diidxa' xti' gu'chi' ro' bia' ri' ne ca diidxa' ro' bia' xtini, ne pa laacabe iquiiñe cabe xpidxichi guidxi nga gaca guirá bieque ri', ne ca xa ique ri nga laacabe; ca xa ique ro' xti' ca guidxi ro' liibi lisaane guidxi ro' zaguita (mexicu), ca xa ique ni ruzuhua lu xtiidxa' ca binni ni nabeeza ndaani' ca guidxi huiini ca, ca xa ique diidxa' ro' bia' xti' ca guidxi huiini ca, pa ganda la?, laaca ne ca xa ique ni rapa xpidxichi ca guidxi huiini xti' zaguita (mexicu), huxa ra gaca

ca dxiiña' ra quiiba' donda ique cabe ca la?, zigatani ra nuu ca xa ique ro' ni ruzuhua lu xtiidxa' binni guidxi xti' cabe.

Pa ca xa ique ri gunina ca diidxa' xti' gu'chi' ro' bia' ri' la?, donda ni quixe cabe nga guiree cabe de lu ca dxiiña' ni cayuni cabe que, ne maque lica zanda di guni cabe xhiiña' guidxi xti' bieque.

Ra gudxiiba cabe ca donda cayeté lu diidxa' ri la?, ca xa ique ro' ni ruzuhua lu xtiidxa' binni guidxi ni rabi cabe senador ca la?, zie cabe zindaquicabe ni ra nuu ca xacadxi xa ique ni lá diputadu ca, huaxa ra gaca cani ca la?, naquiiñe xtiidxa' ca xcaadxi xa ique ro' ni ruzuhua lu xtiidxa' binni guidxi ni ranbi cabe senador ca ti gacani, ne neza lu xa ique ni chi guxhuba donda cabe que nga ica yuucabe guirá' ni biini que.

Ne ra ma biree xia donda que la?, ca xa ique ni ruzuhua lu xtiidxa' binni guidxi ni rabi cabe dipúdadu ne jma de gala de laacabe que nga cuaqui' cabe xi donda ne xi gacabe.

Guirá' ca diidxa' bia' o donda ni cue xia ca xa ique ro' ni ruzuhua lu xtiidxa' binni guidxi ni rabi cabe diputadu ne senador ca la?, guirutí' zanda guxha ca ni.

Ndaaga III. Ti guxhuba donda cabe Guirá' ca xa ique ni chiguiete ri' casi: ca xa ique ni ruzuhua lu xtiidxa' binni guidxi, ca xa ique diidxa' ro' bia' ni ribee xia diidxa' bia', ca xa que ni rapa xpidxichi guidxi ne ruya guni ca xa ique didxa' bia ca xhiiña' ca', ca xa ique ni runi xqu'chi' guidxi, xa ique ro' xti' ca xa ique guidxi, xa ique ni rapa guidxi ti que chu' xiixa guenda naxoo, ca xa ique diidxa' ro' bia' ne ca xa ique diidxa' bia' xti' ca guidxi huiini ca, ca xa ique ni rusiene ca xa ique ro' ni runi dxiiña' nadaani ca yoo ro' ra rie binni ica lá ti gapa credencial, xa ique ro' xti' yoo ra rie binni ica lá ti gapa credencial, ca xa ique diidxa' bia' xti' ca dxiiña' de ra ribii cabe xa ique ro' guidxi, lu bia' iza chi guni cabe xhiiña' guidxi ne que guni cabe ni jneza, ca xa ique ni ruzuhua lu xtiidxa' binni guidxi ni rabi cabe diputadu ca zani ca' xhi gaca pa que guinni xcadxi xa ique ni runi dxiiña' ndaani' yoo ro' ra ria diidxa' bia' ca, ti quiiba donda ique xa ique ni biini' guenda naxoo que.

Pa ca xa ique ni ruzuhua lu xtiidxa' binni guidxi ca, ra gulee xia ca diidxa' bia' ne guini' ca' de que gastí xiixa donda la?, ziaanadxi xcaadxi xpique ca dxiiña' ni cayaca ne ni zeeda ru', huxa cadí nga gaca de que guiaanadxi de quiba' donda ique xa ique que ne jma pa biluuxe iza ra cayuuni cabe dxiiña' que.

Ne pa ca xa ique rí guíni'ca' de que nuu xiixa donda la?, lu ná gadxe xa ique nga guiiánabe, ne ma ca nque guuya'ca' xi gunine ca laabe casi nabaquí diidxa' ro' bia'.

Ne pa xa ique ro' xtí guidxi ro' zaguita (mexicu), guchene gu'chí ro' bia' ri la?, ra nuu ca xa ique ro' ni ruzuhua lu xtiidxa' binni guidxi ni rabicabe diputadu nga chi gata donda xtibe, ti gacani casi nabaquí ndaaga 110 xtí gu'chí ro' bia' rí. ra gaca guenda nagana ri la?, ca xa ique ni ruzuhua lu xtiidxa' binni guidxi ni rabi cabe diputadu ca cue xia donda ni caguiiba' iquebe que.

Ti ganda guxhuuba donda cabe ca xa ique ro' ni chiquiete rí casi; ca xa ique ro' xtí ca guidxi ro' liibi lisaane guidxi ro' zaguita (mexicu), ca xa ique ni ruzuhua lu xtiidxa' ca binni ni nabeeza ndaani' ca guidxi huiini ca, ca xa ique diidxa' ro' bia' xtí ca guidxi huiini ca, pa ganda la?, laaca ne ca xa ique ni rapa xpidxichi ca guidxi huiini xtí zaguita (mexicu), huaxa ra gaca ca dxiiña' ne bieque ra quiiba' donda ique cabe ca la?, napani xi chi nandani casi nabaquí ndaaga rí, ne ca xa ique ni yegata ca donda rí ra nuu ca la?, napa ca xi gunica xhiña' ca jneza ne naya do'.

Ca diidxa' bia' o ca donda ni cue xia ca xa ique ruzuhua lu xtiidxa' binni guidxi ni rabicabe senador o ca diputadu ca la?, guirutu zanda guxha ca ni.

Ni raca ra caguiiba' donda ique ca xa ique ro' ri la?, riree ga cabe de dxiiña' xtí cabe laga guxhuuba donda cabe. ne pa ra gueda guiree xia ca diidxa' bia' ra caguiba' donda que iquebe, guihuini de que cadí dxandi bíni' be ni ne cayaadxa ru' guluxe iza xtí ca dxiiña' ni cayube que la?, zabigueta ru be lu ca dxiiña' ca. Ne ra biree xia diidxa' o donda que guhuini de que xa ique que napa donda que la?, guirutu' ztiidi laadxi laabe, ne ziube ndaani' liidxi guiiba'.

Pa donda ni gata xtí ca xa ique ro' ri cadí nacani de ca donda ni ca luguia ca la?, que zanaaba diidxa' di cabe de pade zeeda donda ca.

Pa ca donda ni biini' xa ique ro' ca, caní lu diidxa' ro' bia' ni riquiiñe ca xa ique rugaani donda ca la?, napabe xi quixe be ni casi ca lu diidxa' bia' xtí ca xa ique ni biete que, ne pa donda ni biini' be ca gacani de ca donda de ra ribaana cabe xpidxichi guidxi la?, napa xi quiiba' lu donda ca jma ne bia' bidxichi ni ucuabe ca, ne laaca pa naabe quixebe nebe ni ne ni ma ucaabe xtí guidxi que.

Ca donda ni quixe ca xa ique ri la?, que zacadini jma de chonna bia' de ni ucuacabe que, o de ca donda ni bíni' cabe que.

Ndaaga 112. Pa tobi de ca xa ique ni cuzete' ndaaga III, ma biluxe ca xhiiña' ca la?, ne gacaladxi ca xa ique ni ruzuhua lu xtiidxa' binni guidxi ni rabi cabe diputadu ca guini' ca o ucaaca ridxi de ni biini cabe la?, ma que zanda di gacani.

Ne pa xa ique ca guibigueta guni tobi de ca dxiiña' ni ca lu ndaaga III, xti' gu'chi' ro' bia' rí, ti ma gulli cabe laa xti' bieque la?, napani xi casi nabaqui ndaaga ni biete rí.

Ndaaga 113. Ca diidxa' ro' bia' ni rinii de ca ni guni ca xa ique runi xhiiña' guiidxi la?, laani nga cuaqui' ca neeza guni ca xique ri dxiiña' jneza, nayaa do', ne ra gunica' xhiiña' ca' la?, que zanda di chu' ca' pur tobi ne pur xtobi co', ti zaca ma gulaqui' diidxa' ro' bia' caní. Ca donda ni quiiba' ique ca xa ique ni guchee ne ca diidxa'n ro' bia' ni ma biete ri la?, tobi de lacan inga guiré' cabe lu ca dxiiña' xticabe ne laca zaguiixe cabe ca donda ni b'ni' cabe que, ne pa ucuacabe xiixa xti' guidxi ni ma bizeete ndaa III xti' ndaaga 109 xti' gu'chi' ro' bia' rí, huaxa que ca donda ni quiixe cabe ca la?, que zanda di tiidini jma de chonna bia' deni ucuabe xti' guidxi o de ca donda ni biini'be.

Guirá' donda ni guni guidxi' ro' rí lu xti' tuuxa binni la?, que zaca dini nagacahí, napa xi guihuini xi caní. Ca binni ni guiré' de lu ca dxiiña' ri o icaa guidxi ro' xti' ca la?, napaca xi icaaca' ti ndaa bidxichi, ti zaca nabaqui' diidxa' ro' bia' gaca ni.

Ndaaga 114. Ra guxhuba donda cabe ca xa ique ri la?, zacani pa cayununi ca xa ique rí xhiiña' guidxi ne lu bia' ti iza de ma cayuni cabe dxiiña' ca nga gacani. Donda ni quiiba' ique cabe cala?, que zadidí di ni jma de ti iza, dede dxi bizulu ca xpieque ca dxiiña' rí.

Ca donda ni gaca lu bia' iza ra cayuni ca xaque runi xhiiña' guidxi ca dxiiña' la?, napa xi gacani casi nabaqui diidxa' bia' ni rquiiñe ca xa ique rudxiiba' donda ca, huaxa ra guiré' xia ca donda rí la?, que zandaadini jma de chonna iza. Pa gacani ndaani' ca dxi o ca iza ni ma gulaqui' ndaaga III, xti' gu'chi' ro' bia' rí la?, zarugulu caní.

Diidxa' ro' bia' nga guini' paraa nga zanda guirugulu ca dxiiña' ra cuxhuba donda cabe ca xa ique runi xhiiña' guidxi ca, huaxa niru do' naquiiñe guihuni xi donda ca ne xi na lu ndaa III xti' ndaaga 109 xti' gu'chi' ro' bia' rí. ne pa ca donda ca gacacani jma naxoo la?, que zandaadini jma de chonna iza.

DIIDXA' LÁ GAYU'

Ca guidxi ro' liibi lisaane guidxi ro' zaguita
(mexicu) ne guidxi ro'

Ndaaga 115. Guirá' ca guidxi ro' liibi lisaane guidxi ro' zaguita (mexicu) la?, napa cani xi gaca cani ti guidxi ra guidaagu lisaan binni ne ganda cuica xa ique xquidxi ca', ne cada tobi de laacani la?, naquiiñe guihuini paraa nga riniti o riluuxe lu xlayuuca, ne ca guidxi huiini xti' cani ca la?, napa xi gapa cani ti xa ique, casi ná ca diidxa' ni ca xaguete ri':

I. Guirá' ca guidxi huiini xti' ca guidxi ro' ca la?, napa cani xi gapacani ti xa ique ni cui guidxi, ne laaca zapa cani xcaadxi xa ique ni guni dxiiña' ndaaní yoo lahuí xtini, huaxa ra cui cabe xcaadxi xa ique ri la?, diidxa' ro' bia' nga cuaquí pabia' nga guiu. Ne ra gudii gu'chi' ro' bia' ri' xtipa' ca xa ique xti' ca guidxi huiini ca la?, ma que ziudi xti' binni o xti' xa ique ni guzuhua lu xtiidxa' cabe, pa gacaladxi cabe guinaaba cabe xiixa xa ique ro' xti' guidxi ro' xti' cabe ca. Ca xa ique xti' ca guidxi huiini que, ne xcaadxi xa ique ni runi xhiiña' guidxi huiini que la?, ma que zanda di guibicabe xti' bieque lu iza ni zeeda que, ti ganda gaca cabe xa ique guidxi huiini que xti' bieque.

Ca binni ni gullii cabe gacaca tobi de ca xa ique, xti' ca guidxi huiini ca, o pa chu' tuuxa xa ique cui laacabe gacacabe xa ique guidxi la?, o gacacabe tobi de ca xa ique ni runi dxiiña' ndaaní yoo lahuí xtini la?, ma que zanada di cui cabe laaca gacaca xa ique xti' bieque lu iza ni zeeda que. guirá' ca xa ique xti' ca guidxi huiini, ni laapeca zanirú' ca lu xhiiña' guidxi la?, que zanda di guibi cabe checabe cue tuuxa binni ni gacaladxi gaca xa ique, huaxa ca binni ni guyee cue ca binni ni gudxite ti ganda gaca xa ique que la?, zanda quite ti ganda gaca xaique guidxi, huaxa pa biu cabe bíni' cabe xhiiña' xa ique ni guyee cabe cue que nga ma que zanda dí'.

Jma de galaa de ca xa ique ni runi dxiiña' ndaaní ca yoo ro' ra ria' diidxa' bia' xti' ca guidxi huiini ca la?, zanda guseegu cabe ti yoo lahuí xti' ca guidxi huiini ca, ne laaca zanda guini' cabe de que ma gastini ni la?, ne guxha cabe ni ma guni o ni ma bíni' tobi de ca xa ique ni runi dxiiña' ndaaní ni que, ti pa guca xiixa guenda naxoo de ca ni ca lu ca diidxa' bia' xti' ca guidxi huiini ca la?, napa ca xa ique ca xi guzuhuínica' guirá' ca xiixa ni guluinaca ti guihuini de dxandi guca ni, ne laaca naquiiñe gusisaca cabe xtiidxa' cabe ti guía lu ca diidxa' ni chi gaca que.

Pa chu' tuuxa xa ique ni runi dxiiña' ndaaní ca yoo lahuí xti' ca guidxi huiini ca guidaaxa cal u xhiiña' ca la?, ca binni ni guyee cue cabe que nga guiu guni xhiiña' cabe, o pa có' la?, ma gacani casi nabaquí diidxa' ro' bia'.

Pa gueda guixa guenda riapa ne ti guenda xa ique xti' ti yoo lahui' o pa gastí' xa ique ni guni dxiiña' ndaaní' caní, ne pa diidxa' bia' guini' de que nin ca, ca binni ni guyee cue cabe que, que zanda chu' guni dxiiña' ndaaní'ni o que gaca di dxiiña' ra cui cabe xti' xa ique la?, ma ca xa ique ro' ni runi dxiiña' ndaaní' ca yoo ro' ra ria' diidxa' bia' xti' ca guidxi huiini xticabe ca guini' de que chu' xti' binni guni o guduuxe dxiiña' ni biaana ndahui que; ca binni ni guni ca dxiiña' ri la?, diidxa' ro' bia' nga guini' pabia' nga chu' ne ca ni chu' guni xhiiña' guidxi ca la?, napa cabe xi guni cabe caní guini' ca xcaadxi xa ique ni runi dxiiña' ndaaní' yoo lahui que;

II. Ca yoo lahui xti' ca guidxi huiini ca la?, zaca caní ti yoo nandxo' ne xtale guenda ne zapani ca xtini casi nabaqui' diidxa' ro' bia'.

Ca xa ique ro' ni runi dxiiña' ndaaní' ca yoo lahui' xti' ca guidxi huiini ca la?, laaca zanda guni cabe xiixa diidxa' bia', ni gusiene ca binni ni nabeeza ndaaní'ni ca, ne gusiene ca gendarme xtini ne ca xcaadxi xa ique ni runi dxiiña' ndaaní' ca yoo lahui xti' ca guidxi huiini ca ne ca diidxa' bia' ni cue cabe ca la?, zunini xhiiña'ni de ra rugaandasi xtipa' xti' ca guidxi huiini ca, ti ganda chu' ca guidxi huiini ca jneza ne sin ti guenda naxoo.

Cani raca ladxi ca diidxa' bia' ni biete lu ca ndaaga diidxa' ca luguia ca la?, can ndi nga ni raca ladxini gaca:

a) Ca neeza ni iquiiñe ca xa ique ni runi dxiiña' ndaaní' ca yoo lahui' xti' ca guidxi huiini ca la?, zacacani nayado' ne napa xi gapa caní ti ti yoo ni cue xia ti guenda naxoo, huaxa ra gaca ca ra guiré' xia ca guenda naxoo ca la?, zacacani nayaa, jneza la?, ne neza lu binni;

b) Ca ra iquiiñe xtiidxa' ca xa ique ni runi dxiiña' ndaaní' ca yoo lahui xti' ca guidxi huiini ca, casi ra guiré' xia ti guenda naxoo ni gunina caní napa guidxi huiini que o ra gudii xtiidxa' cabe lu ti xiixa ni naquiiñe guni guidxi huiini que;

c) Ca diidxa' bia' ni guini' xi gaca de ca ni cuzete ca ndaa VII xti' ndaaga 116 xti' gu'chi' ro' bia' ri';

d) Que zanda di guiu xa ique ro' xti' guidxi ro ni nuu ca guidxi huiini ca lu na ca, guni dxiiña' ndaaní'ni pa caru gutaagu xtiidxa' cabe, ne pa caru gutaagu xtiidxa' cabe la?, ca xa ique ro' ni ruzuhua lu xtiidxa' ca binni guidxi ni nabeeza ndaaní' ca guidxi huiini ca la?, zani' ca' de que, que

zanda di gaca xiixa dxiiña' ndaaní' ca ni ti caru guidaagu diidxa' que; ne pa gaca ladxi cabe de que xa ique xti' guidxi ro' ca guni xiixa dxiiña' ndaaní' ca guidxi huiini que la?, napa xi gudii xtiidxa' jma de galaa deca xa ique ni runi dxiiña' ndani ca yoo lahuí' xti' ca guidxi huiini que, ne

e) Ca yoo lahui xti' ca guidxi huiini ni que gapa cabe xiixa gu'chí' o xiixa diidxa' bia' ni gului laacabe xi guni cabe.

Ca xa ique ni ruzuhua lu xtiidxa' ca binni guidxi xti' ca guidxi huiini ca la?, zabee ca diidxa' bia' ni cuaquí' ca neeza ni gacane ca guirá' xia ca guenda nagana ni chu' lade ca xa ique xti' guidxi huiini ca ne ca xa ique xti' ca guidxi ro' ni nuu cabe lu que, ti pa guizaca ca ni ca lu ca ndaa c) ne d) ni biete luguaia ca;

III. Ca yoo lahuí' xti' ca guidxi huiini ca la?, napa cabe xi gapa cabe ca ni chi quiete xaguerí';

a) Nisa bize, drenaje, ra guiiaba' nisa beñe, ra guía ca nisa yuudxu xti' cabe ti ganda iquiiñe cabeni xti' bieque;

b) Gapa cani biaaní' ndaaní'.

c) Guia ndaaní' cani, ne gudopa xquiixi cani, ne che cani xti' ra yoo ti iquiiñe cani xti' bieque;

d) Gapacani luguaia huiini la ne luguaia ro'

e) Gapacani yoo ba'.

f) Ra chi gata guixi.

g) Neeza ra ganda tiidi binni guidxi, ti parque ne ti jardín;

h) Chu' dxu' ni gapani ti que chu xiixa guenda naxoo, casi nabaquí' ndaaga 21 xti' gu'chí' ro' bia' rí'.

i) Ne guirá' ru' ni guini' ca xa ique ro' ni ruzuhua lu xtiidxa' cabe que, ne laca naquiiñe guihuini pabia' layu napa cabe ne pabia' bidxichi nga iquiiñe cabe, ti ganda guni cabe xhiiña' guidxi huiini xti' cabe.

Ca xa ique xti' ca guidxi huiini ca la?, cadi na cabe ti ma bidii gu'chí' ro' bia'

ri laacabe xtipa' la?, ma zanda guni cabe ni gacaladxi cabe, laaca naquiiñe chinandacabe ca diidxa' bia' xti' guidxi ro' zaguita (mexicu) ne lu diidxa' bia' xti' guidxi ro' ni nuu cabe lu na que.

Pa gacaladxi ca xa ique ni runi dxiiña' ndaaní ca yoo lahui xti' ca guidxi huiini ca guidaagu lisaacabe ca ti ganda gunica' xhiiña' ca jneza ne nayaa la?, zanda guni cani. Ne paa gacaladxi chupa o jma xa ique xti' ca yoo lahui' xti' ca guidxi huiini xti' ca guidxi ro' ca gudaagu lisaaca ti ganda guni ca xhiiña' ca jneza ne nayaa do' la?, naquiiñe' gudii xtiidxa' ca xa ique ni runi dxiiña' ndaaní ca yoo ro' ra ria' diidxa' bia' xti' cabe. ne pa laaca gacaladxi ca xa ique xti' ca yoo laguí xti' ca guidxi huiini ca gutaagu ne ca diidxa' ne guidxi ro' ca la?, zanda, ti xa ique ro' xti' guidxi ro' ca guiaana ga guidxi huiini que lu ná o laca zanda guidaagu lisaacabe ti guni cabe dxiiña'.

Ca guidxi huiini huala'dxi ca la?, zanda guidaagu lisaacabe ti guinaaba cabe cani cayaadxa laacabe, huaxa naquiiñe guni cabe casi nabaquí diidxa' ro' bia'.

IV. Ca xaique ro' xti' ca yoo lahui xti' ca guidxi huiini ca la?, laacani nga quixhe cani pabia' bidxichi nga iquiiñe cani, ne laaca laacabe nga gu'ya' cabe xi guni ne cabe ca bidxichi ni ni cue ca xaique ni ruzuhua lu xtiidxa' ca binni nabeeza ndaaní ca guidxi huiinni ca, ne pa co' la?, zaca ca ndí:

a) Laaca zacaacabe ca bidxichi huiini ni cue guidxi ro' xti' cabe, ti ganda guchaa cabe cani chi iquiiñe cabe.

Ca yoo lahui' xti' ca guidxi huiini ca la?, zanda gutaagu xtiidxa' ne cabe ca guidxi ro' xti' cani cani ca, ti ganda guni cadxi dxiiña' xti' cani.

b) Ca dxiiña' ni chi guni ca xaique ro' xti' zaguita (mexicu), ndaaní xiixa guidxi huiini ca la?, guidxi ro' zaguita (mexicu), nga quiixe ca dxiiña' ni gaca ca, ne bia' bidxichi cue ca xaique ro' ni ruzuhua lu xtiidxa' ca binni ca nga guini' pabia' guiaxa cabe.

c) Ca bidxichi ni cue ndu ca dxiiña' ni guni cabe.

Ca diidxa' ro' bia' xti' guidxi ro' zaguita (mexicu) la?, que zanda di ucuezadxi ni ca guidxi ro' liibilisaanenica, ra gunica' ni ná ca ndaa a) ne c) ne que zanda di guni cani xiixa.

Ca diidxa' bia' xti' ca guidxi ro' liibilisaane guidxi ro' zaguita (mexicu) la?, que zanda di gapani xiixa diidxa' ra guini'ni de tobi zanda quixe ni guinaabani laa ne xtobi co'. Cani que zanda quiixhe zaca cayuni dxiiña' nga cani napa guidxi ro' ne ca ni napa ca guidxi huiini ca, huaxa pa binni zacasi iquiiñeni nga quiixhe, jma pa chi iquiiñeneni lu dxiiña' xti'.

Ca xaique ni runi dxiiña' ndaaní' ca yoo lahuí' xti' ca guidxi huiini ca la?, zanda guseenda cabe ti gu'chi' ra nuu ca xaique ro' ni ruzuhua lu xtiidxa' cabe ra guini' cabe pabia' raca laadxi cabe guiaxa ti xiixa ni chi guitiiñe cabe xti' guidxi, ti ganda guidxela cani iquiiñe xquiidxi cabe.

Ca xaique ro' ni ruzuhua lu xtiidxa' ca guidxi huiini que la?, zabee cabe diidxa' bia' xti' ca guidxi huiini ca, ti ganda ugaaba cabe pabia xpidxichi. Ca xaique ni runi dxiiña' ndaaní' ca yoo lahui ca nga guini' pabia' xpidxixhi xquiidxi huiini ca' guiré' huaxa niru do' naquiiñe gu'ya' cabe pabia bidxichi riu ndaaní' xquidxi huiini cabe, ne ra guni cabe gu'chi' de pabia' xpidxichi xquiidxi huiini cabe guiu ne guiré' la?, napa ca xi ucaacabe pabia' riaxa ca binni ni runi dxiiña' ndaaní' ca yoo lahuí' xticabe, huaxa naquiiñe chinanadacabe cani ca lu ndaaga 127, xti' gu'chi' ro' bia' ri'.

Ca bidxichi ni gapa ca yoo lahui xti' ca guidxi huiini ca la?, casi pe na cabe iquiiñe cabe ni la?, zanda, o pa nabaquí' cabe tu iquiiñeni la?, napacabe xi chinanda cabe ni na diidxa' bia';

V. Ca diidxa' ro' bia' xti' guidxi ro' zaguita (mexicu) ne diidxa' bia' xti' ca guidxi ro' ni nuu ca guidxi huiini ca lu na ca la?, laacani ni nga cuaquí' cani, ni guni ca xaique xti' ca guidxi huiini ca:

a) Gunicabe guirá' cani iquiiñe xquiidxi cabe, ne ucaacabe pabia' layu xticabe;

b) Guiucabe lu ca dxiiña' ra guiapa ca guixhi, layu ne ca nisa do' xti' cabe;

c) Guiucabe lu guirá' xixe dxiiña' xti' xquiidxi huiini cabe, huaxa ca dxiiña' ni gaca ca la?, naquiiñe chu' neni tobisi ca dxiiña' ni maca nexhe gaca. Ra gacaladxi ca xaique huiini ne ca xaique ro' xti' guidxi ro' zaguita (mexicu), guni xiixa gu'chi' yachi ti gande guiré' xiixa dxiiña' ti guni binni la?, naquiiñe cu' cabe ca guidxi huiini ca;

d) Gudii xtiidxa' cabe xi guni ca binni ni chi guni dxiiña' xtí xquidxi huiini cabe, ne gu'ya' cabe xi guirá' cayaca ndaani' guidxi huiini xtí cabe, ne zuni cabe de ra ruganda xtipa' xtí cabe;

e) Guiu cabe lu ca dxiiña' ra guiapa layu ni nuu ndaani' guidxi;

f) Gudii cabe gu'chí' binni ti ganda ucuí liidxi;

g) Guiu cabe lu ca dxiiña' ra guiapa ca yaga huiini xtí ca guixhi' xtí cabe, ne lu ca dxiiña' ni gaca ne guidxi xtí cabe guirooba' casi cani ma biete ca;

h) Gu'ya' cabe ne cu' rua' cabe lu ca dxiiña' de ra rie binni lu carru, pa cadí cayuni ca binni ca xhiiña' ca jneza, ne

i) Gutaagu xtiidxa' ne cabe ca xaique ro' xtí zaguita (mexicu), ti ganada gaca xhiiña' guidxi jneza, ne ti guiapa ca layu xtí guidxi ro' zaguita (mexicu).

Ra gaca ca dxiiña' ni biete ri la?, jma pe sicuru nga chinandani casi ca lu guionna ndaaga diidxa' xtí ndaaga 27 xtí gu'chí' ro' bia' rí, ti la ama nabaqui xi gaca xa de ca layu xtí guidxi ro';

VI. Pa chu' chupa luguiaa huiini ndaani' ca guidxi huiini ca la?, gacaladxi ca ucuica' yoo huiini ra gutooca' xiixa la?, ca guidxi huiinine ca guidxi ro' xtí cani ca la?, napa cani xi gaca cani tobisi ti ganda guni cabe ca dxiiña' ri jneza ne zaca zinandacabe casi nabaqui' diidxa' ro' bia' ni rini' de ca diidxa' rí.

VII. Ca dxu' ni gapa ca guidxi huiini ca la?, lu naa ca xaique xtí ca yoo lahui ca nga guiaana cabe ne laa nga guini xi guirá' zanda guni cabe ni co', ti ca diidxa' ro' bia' xtí ca guidxi ro' ni nuu ca guidxi huiini ca lu naaca ma hulaqui' zaca. Ne xaique yoo lahui que la?, zuna xtiidxa' xaique guidxi ro' xtí ti guni xhiiña' xquidxi jneza la?, ne naya.

Lu ná xaique ro' xtí guidxi' ro' ni rucaa diidxa' bia' lu gu'chi ca nga guiaana ca dxu' ni rapa guidxi;

VIII. Ra cui cabe xaique guidxi xtí ca guidxi huiini ca la?, napani xi gacani casi na baqui' diidxa' bia', ca binni ni gacaladxi gaca xaique xiixa guidxi huiini la?, napa ca xi cuidxi ca o ucaaca riidxi binni che chi guzee lu xqui'chí' ca.

Ca dxiña' ni guni ca binni guidxi ndaan' ca yoo lahu' xti' ca guidxi huini ca la?, napacani xi chinanda cani ni na lu ndaaga 123 xti' gu'chi' ro' bia' ri'.

IX. (Diidxa' bixa)

X. (Diidxa' bixa).

Ndaaga 116. Ca xtipa' xti' ca guidxi ro' ca la?, zalaani chonna ndaaga, tobi ca la?, ca xaique xti' ca dxu' ni ruca diidxa' bia' lu gu'chi', guiropa ca la?, cani runi dxiidxa' bia' ne guionna ca la?, xaique ro' xti' ca dxu' ni rapa guidxi ne ca xa ique diidxa' bia', ne que zanda di guiaana ca xtipa' ri lu na ti xaique si, ne ca xaique ni ruzaa diidxa' bia que la?, laaca que zanda di guiaana ni lu na ti xaique si.

Ca xtipa' xti' ca guidxi ro' liibi lisaane zaguita (mexicu) la?, zuni ca xhiña' cani casi cuaqui' gu'chi' ro' bia' xti' cani, ne casi na ca diidxa' ca xagueri'.

I. Ca xaique xti' ca guidxi ro' liibilisaane zaguita (mexicu) la?, que zanda di guindaa cabe jma de xhopa iza.

Ra guibii ca xa ique xti' ca guidxi ca la?, zacani casi nabaqui' diidxa' bia' ni ruuya de ca dxiña' ra ribii cabe xa ique guidxi.

Ca xaique ro' xti' ca guidxi liibisisaane zaguita (mexicu) la?, ni gulii binni guidxi laa, gaca xa ique ro' xti' xquiidxi ca la?, ma que zanadi di guibiguetae gacabe xa ique xti' bieque, neca guyuu ga si, o biaana ga be laga chu' xtubi gaca xaique que.

Que lica zanda di' cui binni laacabe xti' bieque lu iza ni zeeda que:

a) Ca binni ni cui gulii binni guidxi gaca xa ique xtica' o ca binni ni gulii cabe laa gaca xa ique ti biaadxa ni gulii cabe niru do' que, neca gadxe modo gulii cabe laa;

b) Xaique ro' ni gulii ga cabe que, o tutiisi binni guidxi cabe gaca ga xaique ro', ne ca ra ma ziluuze xhupa iza xti' xtobi que.

Ni zabda gaca xaique ro' xti' ti guidxi ro' liibilisaane zaguita (mexicu) nga ca binni ni ni gule ndaan'ni, ne nabeeza ndaan' tobi de ca guidxi huini xti, o gapa gayu iza de nabeeza ndaan' ni, ne gapa 30 iza dxi ma chi guzee

binni lu xqu'chí' que ti ganda gaca xaique ro' que o laaca zanda pa nahuiini huaxa pa gu'chí' ro' bia' xtí' cabe guini' de zaca gacani.

II. Bia' binni ni gaca xaique xtí' ca guidxi ro' ca la?, zacani bia' binni nabeeza ndaaní' caní; huaxa que zanda di gacani huaxie de gadxe xaique ni ruzuhua lux tiidxa' ca guidxi huiini ca, pa que gapani bia' 400 mil binni nabeeza ndaaní' ni; de ga', o ca guidxi ni tiidi jma de bia' ni nexhe o que chindaa de 800 mil binni guidxi, ne 11 xtí' xcaadxi guidxi ro' que o tiidi jma de bia' ni ma biete rí'.

Ca binni ni guca xaique ni ruzuhua lu xtiidxa' ca guidxi huiini ca la?, que zanda di cui cabe laaca lux ti iza ni zeeda que pa laaca nuuru ca' cayuni ca xhiiña guidxi. Ca binni ni guyee cue ca ni guca xique guidxi que la?, zanda cui binni laacabe ti ganda gaca cabe xa ique ni ruzuhua lu xtiidxa' binni guidxi, paaxa guyuu cabe biini cabe dxiiña' jlugar ni dxandipe que la?, que zandadí', ne ca xaique ni guca xaique ni bizuhua lu xtiidxa' binni guidxi que la?, que la que zanda di chee cue xtí' binni ti gaca ngue xaique ni ruzuhua lu xtiidxa' binni guidxi que.

Ra gaca ca dxiiña' xtí' ca guidxi ro' liibilisaane zaguita (mexicu) la?, ne ca xaique ni ruzuhua lu xtiidxa' ca guidxi huiini ni racabe diputadu ca nga guiu guni dxiiña' ndaaní' ca yoo ro' ra ria' diidxa' bia' ca, ne zaca casi nabaquí' diidxa' ro' bia' xticabe;

Ne ca xaique ri nga guini' pabia' xpidxichi guidxi xtí' cabe ca nga zanda guiré'. Ne ra guni cabe ni ca la?, ne gacaladxi cabe guini' cabe pabia' guiaaxa ca binni ni guni xhiiña' guidxi la?, naquiiñe chinanda cabe casi nabaquí' ndaaga 127 xtí' gu'chí' ro' bia' rí'.

Guionna xtipa' xtí' ca guidxi' ro' liibi lisaane zaguta (mexciu) ne ca yoo ro' ni runi xhiiña' ca guidxi ro' ca la?, napa cabe xi guni cabe ti gu'chí' ra gunicabe pabia' naga riaxa ca binni ni runi xhiiña' cabe la?, ne xhiiña' guidxi ro' xtí' cabe. Ra gaca gu'chí' ni biete ri la?, napa cabe xi ucaacabe ca ndaaga xtí' gu'chí' ro' bia' rí' ti gacani jma nayaa ne jneza.

Ra raca dxiiña' xtí' ca guidxi ro' liibilisaane zaguita (mexicu) ne ra runi ca xaique ni ruzuhua lu xtiidxa' binni guidxi xtí' ca la?, zapa cabe ti yoo ro' ra igaaba' xpidxichi guidxi ne can di la?, guirutu zabi laacabe xi guni cabe, modo guni cabe dxiiña' cabe ne modo cue xia cabe diidxa' bia.

Ra igaaba xpidxchi guidxi la?, zacani nayaa, nagachi?, ne gati ga nga gacani, ti guihuini pabia' naga napa.

Ca xa ique ro' ni ruzuhua lu xtiidxa' ca guidxi huiini ca la?, laaca nga cui ca' binni ni gaca xa ique ro' xti' yoo ro' ra rigaaba' xpidxchi guidxi ro' xtica', huaxa ra cui cabe xa ique ri la?, napa xi guini' jma de galaa de de ca xa ique ri' ti gaca ni, ne ni gaca xa ique ro' xti' ca dxiiña' ri la?, zandaabe gadxe iza lu ca dxiiña' ri', huaxa naquiiñe guihuini pa nanna be de ca dxiiña' ri'.

III. Xtipa' ro' xti' ca guidxi ro' liibilisaane zaguita (mexicu) ca ni naca xaique ni rapa guidxi ca la?, ni ná gu'chi' ro' bia' xti' cabe nga guini' xi guni cabe.

Ra cue xia ca xaique diidxa' ro' bia' ne ca xaique diidxa' bia' xti' ca la?, guidxi ro' ca xiixa diidxa' bia' la?, naquiiñe chinanda cabe ni ná gu'chi' ro' bia' ne ca diidxa' ro' bia' xti' xquidxi cabe, ti lu cani nga ca guirá' xixe ni guni ca xaique ri'.

Guirá' ca xaique diidxa' ro' bia' ni nrundi dxiiña' ndaani' ca yoo ro' ra ria' diidxa' bia' xti' ca guidxi huiini ca la?, napa cabe xi guchiña cabe guirá' ni ca lu ndaa I de lu V xti' ndaaga 95 xti' gu'chi' ro' bia' ri'. Ca binni ni ma guca xaique ribee xia diidxa' bia', ca ni ma bizuhua lu xtiidxa' guidxi o cani biu ga guni ca dxiiña' ca la?, que zanda di cui binni laacabe lu bia' iza zeeda que, gaca cabe xaique ro' diidxa' bia' xti' ca guidxi huiini ca. Ca binni ni zanda gaca xaique diidxa' bia' o xaique diidxa' ro' bia' nga, ca binni ni ma bi'ni' xhiiña' guidxi huaxa pa bi'ni' ni jneza ne naya do' ne pa napabe gu'chi' ni guini' de que binni ruzuhua lu diidxa' laabe.

Ca binni ni gaca xaique diidxa' ro' bia' xti' ca guidxi huiini ca la?, zandaa cabe lu dxiiña' ni chi guni cabe ca bia' dxi guini' gu'chi' ro' bia' xti' ca guidxi liibi lisaa ne zaguita (mexicu), ne laaca zanda guibi cabe xti' bieque ne pa guiré' cabe o guxale cabe de lu ca dxiiña' ca la?, laaca gu'chi' ro' bia' xti' xquidxi cabe ca guni' o ca diidxa' bia' ni cue ca xaique ni ruzuhua lu xtiidxa' binni xquidxi cabe guini' xi gaca.

Ca binni ni gaca xaique diidxa' ro' bia' o xaique diidxa' bia' la?, ziaxa cabe ti ndaa bidxichi ni ganda tini ne cabe dxi ne que zanda di gudxiigueta cabeni, ne que zanda guidxaani o quiete lu ni lu bia' dxi cayuni cabe xhiiña' cabe que.

IV. Ca gu'chí' ro' bia' ne ca diidxa' ro' bia' xtí' ca guidxi liibi lisaa ne zaguita (mexicu), ra guni ca dxiiña' de ra ribii cabe xaique guidxi la?, napa caeb xi chinanda cabe ca diidxa' ni ca xaguete rí':

a) Ra gaca ca dxiiña' ra chin di cabe ca xaique xtí' ca guidxi ro' ca, ne ca xaique xtí' ca yoo lahui ca la?, biini guidxi nga guní' tu zanda gacani ne dxi ra chi guzee cabe gu'chí' ca la?, zacani niru do' dxi' xtí' beu santiago lu iza chi guizá guisa ni guiri niru do' que. Ca guidxi ra ni chi guni dxiiña' cui xaique guidxi xtí' ne que gueda guiaaba ne ni tobi si ra chindi cabe xaique ro' xtí' guidxi ro' zaguita (mexicu) la?, guirutu zucueza laacabe de guni cabe xhiiña' cabe;

b) Ra gaca ca dxiiña' ra guibi ca xaique xtí' ca guidxi ca la?, napani xi chinandani casi na ca diidxa' rí': nayaa, jneza, ne que zaquiñe di cabe xhiiña' xtobi ti ganda guni cabe xhiiña' cabe, ne que zaca ne di cabe tobi ne xtobi có'.

c) Ca xaique ni guiaana ca dxiiña' ri lu ná ca ne pa chu' xiixa bicheenda lu ca dxiiña' ni cayaca ca la?, guirutí' zanda gabi laaca zanda guni ca ti cue xia ca' xiixa guenda nagaana ni guca que;

d) Ca xaique ni runi xhiiña' guidxi ne cayuni ca' dxiiña' ndaani' yoo ra rie binni ica la?, ti gapa credencial ca la?, zanda guini ne cabe ca xaique ro' xtí' yoo rí' gu'ya' ca gaca ca dxiiña' ra chindi cabe xaique xtí' ca guidxi huini ca jneza;

e) Ra guidaagu ca politicu ca la?, binni guidxi si nga zanda cu' cabe lade cabe, ne zada di guidaagu lisaa cabe binni ni maca runi xtí' dxiiña' gadxé, ne jma pa caru icaacabe xiixa gu'chí' ni rudii ca politicu ca ti gaca cabe xpinni ca'.

Zaqueca napa cabe xi guinaaba cabe xiixa gu'chí' ti ganda ica la, xpinni cabe ti ganda quite gaca xaique guidxi, huaxa que chinanda di cabe ni ná ca ndaa III ne VII xtí' lana ngoola A, ni ca lu ndaaga 20, xtí' gu'chí' ro' bia' rí'.

f) Ca xaique ni ruuya' gaca ca dxiiña' ra ribii cabe xaique guidxi la?, zanda chu' cabe gu'ya' cabe xi cayaca lu xhiiña' ca politicu ca pa zaca gca ladxi cabe;

g) Yoo ro' ra rie binni ica lá ti gapa credencial ca la?, zudiini ca policu ca bidxichi guni ne ca xhiña' ca', ti ganda cuidxi ca binni che chi guzee lu xqu'chí' ca. ne laaca zaqueca zuyuubuni quiixe ni ca partidu ni guniti ne gueda guixa ca;

h) Gata pabia' bidxichi icaa ca partidu ca bia' dxi ma chi guzulu ca' ucaaca' ridxi binni che chi guze lu xqu'chí' ca' ne dxi ma chee ca' chi guze ca' lu cani, ne laaca pabia' ica ca binni ni riza nanda laacabe, huaxa bia' ca bidxichi ri ni cayate chi icaa ca binni ri la?, que zadí'dí' dini lu chí' bia' ni riquiñe ra guibi xaique ro' xtí' ca guidxi huiini ca; ne laaca ziu ti neza ni iquiiñe' ca binni ri ra gunica' ca dxiiña' rí; ne ganda gudxiiba' ca' donda ique ca binni ni que guni cani ná ca diidxa' bia' xtí' ca dxiiña' rí;

i) Guirá' partidu zanda che chi guini' xi guirá' chi guni lu ca biaani ruzaabi diidxa' lu bii ne lu ca biaani zahui ca, ne ra che cabe ca la?, naquiiñe guni cabe ni casi na lu lana ngoola B de lu III xtí' ndaaga 4I xtí' gu'chí' ro' bia' rí;

j) Naquiiñe' gata ca neeza ni chinanda ca politicu ca r ama chi guzu lu ca ucaaca ridxi binni che chi guizee lu xqu'chí' ca, laaca naquiiñe quiiba donda ique cani que guna ni cayabi ni laaca que. pa ca guidxi huiini ca chin di ca xaique ro' xtí' xquidxi ca la?, que zanda di tiidi ni jma de chonna beu, ni chupa beu pa chi ndi cabe ca xaique ni ruzuhua lu xtiidxa' binni guidxi o pa chin di cabe ca xaique xtí' ca yoo lahui xtí' cabe que; ne ra ma guzulu cabe ucaaceb ridxi binni guidxi che chi guze lu xqu'chí' cabe ca la?, que zanda di tiidi jma de chonna bia' xtí' dxi ra racape ca dxiiña' ni ribii cabe xaique guidxi;

k) Gata neza ni gandaiquiiñecaxaique ni runidxiña' ndaan'yoo ro' ni rapa cadxiña' ni raca raribii cabe xaiqueguidxineyoorariebinniicalá, ti gapa credencial ca, ti gu'ya' ca' pabia' xpidxichiguixingaiquiiñecapoliticuca dxi ma gaca dxiiña' ra chindi cabe xaique guidxi, huaxa ra gaca ni ca la?, napani xi chinandani casi nabaqui' guiropa ndaaga diidxa' ni ca lu ndaa V xtí' ndaaga 4I xtí' gu'chí' ro' bia' rí;

l) Gata ti neza ti ganda gaca ca dxiiña' ri jneza, ti ra cuexia ca xaique ni rapa ca dxiiña' de ra ribii cabe xaique guidxica xhiña' ca' jneza la?, ne naya. Laaca zaqueca naquiiñe chu' ti neza ti igaaba chahui ca gu'chí' ra yeguze binni guidxi ne guli xaique xquidxi;

m) Laaca naquiiñe gata ca neza ni guxa o ucuezadxi ca dxiiña' raribi cabe

xaique ro' xti' ca guidxi huiini, xaique ni ruzuhua lu xtiidxa' binni guidxi, ne ca xaique xti' ca yoo lahui ca ne que gaca cani jneza, ne laaca ca dxi ni iqiiiñe ca binni ca pa gacaladxi ca gudxiluca' pa que ñuu ladxi ca' ni biree xia que, huaxa ra guiré' xia ca diidxa' ne ca dxiiña' ri la?, naquiiñe chinanda cabe ni ná lu ca diidxa' xti' naya do', ne

n) Naquiiñe' gata cadonda ni quii baiquecabinni ni gucheenecadxiña' raribi cabe xaiqueguidxi, ne laca xi dondangaquii baique cabe ne xi modo quixe cabe ni.

V. Guirá' cagu'chi' ro' bia' xti' caguidxi ro' liibilisaane zaguita (mexicu) ca la?, zandacuaqui' ca' ti yoo ni cuexiaguirá' cadxiña' ni gaca ra chindi cabe xaique xquidxi cabe, neca xaique ni guni dxiiña' ndaani' ni ca la?, que zaquiiñe di ca xti', paxti' xtobi ragunica xhiiña' ca', ne caxaique ni guni dxiiña' ndaani' ca yoori la?, zabaquica' xi dxiiña' gacane binni guidxi lu, cadxiña' ni bireexia que ñu ladxica.

VI. Ca dxiiña' ni guni binni guidxi xti' guidxi la?, napani xi chinandani casi nabaqui' ndaaga 123 xti' gu'chi' ro' bia' ri'.

VII. Xaique guidxi ro' zaguita (mexicu) neca xaique guidxi liibi lisaa ne la?, ne casi nabaqui' diidxa' ro' bia' la?, zutagu xtiidxa' cabe ti guya' cabe xi dxiiña' nagachiguni cada tobi de laacabe, jma pa lu ca dxiiña' ni chiguni cabe ca chiiquiiñe xpidxichi guidxi.

Guirá' xaique xti' caguidxi ro' xti' zaguita (mexicu) la?, zanda gutaagu xtiidxa' ne cabe caxique xti' ca yoo lahui xti' cabe ca, ti ganda gaca xhiiña' guidxi jneza ne naya ne zaca ni ná lu ndaaga diidxa' ni ca luguiaa.

Ndaaga 117. Ca guidxi ro' liibi lisaane zaguita (mexicu), que zanda di guni ca ndi':

I. Que zanda di gutagu xtiidxa' ne cabe xti' guidxi ro' ne nin ca xti' guidxi gringu ni jma npa xtipa' de bidxichi,

II. (Diidxa' bixa)

III. Guzaca' bidxichi, o guni ca xiixa gu'chi' ni guidxi ro' zaguita (mexicu) si runi.

IV. Guzaaca neza xti' binni o xiixa neza xti' xiixa ni tiidi' lu xlayu cabe.

V. Que zanda di ucuezadxi cabe de guiu o guiré' xiixa xti' ca gringu ca ndaaní xquidxi huiini cabe, o ucaaca cabe xiixa xti' cabe cue ni.

VI. Que zanda ucaacabe ti binni quixe ti zedane xti' gutoo ndaaní xquidxi cabe, ne ca guca xhiini' zaguita o guca gringu, neca napa cabe diidxa' bia' ni ruquixe binni ti gutoo xiixa ndaaní luguiaa xti' cabe.

VII. Que zanda di cue cabe xiixa diidxa' bia' o gusaana cabe xiixa diidxa' bia' ti uquiixe ca binni ni zeeda gutoo ndaaní luguiaa xticabe ne zeeda de xti' guidxi ne ca naca binni xquidxi cabe o gringu, neca ni zeda gutoo cabinni ri zedaca gani casi ni rotoo cabe;

VIII. Que zanda di gutaagu xtiidxa' ne cabe ca xaique ro' xti', xti guidxi ro' ni cadí nuulu lisaa xti' zaguita (mexicu), o guinaaba' cabe xiixa bidxichi ti ganda cú' ngue xiixa xti' gutoo ndaaní luguiaa xti' cabe.

Guirá' caguidxi huiini neguidxi ro' xti' zaguita (mexicu) que zanda di guinaaba cabe xiixa bidxichi ora tiisi gacaladxi cabe, raguinaaba' si cabe ni nga ndaaní'ca dxi iquiiñe iquiiñe xquidxi cabeni o pa xi dxiiña' chiga ca ndaaní' xquidxi cabe, ne ra ra guiré' xiixa bidxichi ni iquiiñe cabe ca la?, naquiiñe gaca casi na ti diidxa' bia', nepa guiré' ni ca la?, zareeni cada lu ti iza. Ne raguini' ca xaique ni ruzuhua lu xtiidxa' binni guidxi ca xi guirá' dxiiña' cayunica la?, laaca zuzeteca' de laacani.

IX. Que zanda di gudxiiba' cabe lu gueza bia' ti na cabe, ti ca xaique ni runi dxiiña' ndaaní' yoo ro' ra ria' diidxa' bia' ca ma gudixhe pabia' guidooni.

Ca xaique ro' ni runi dxiiña' ndaaní' yoo ro' ra ria' diidxa' bia' xti' guidxi ro' zaguita (mexicu) ne ca xaique ro' ni uni dxiiña' ndaaní' ca yoo ra ria' diidxa' bia' xti' ca guidxi huiini ca la?, zabee cabe diidxa' bia' ni gacane ti ma que gueru binni nisa dxu'ni'.

Ndaaga 118. Laaca que zanda di guni cabe ne sin xtiidxa', ca xa ique ni runi dxiiña' ndaaní' ca yoo ro' ra ria' diidxa' bia' ca:

I. Cuaqui cabe pabia' xti' guidxi ro' guidoo, ne cuaqui cabe pabia' gusaca cani xiixa ni guiré' o ni chu' ndaaní' guidxi.

II. Que chu' di dxí, gapa cabe ti balaaga ro' ni rindindene dxu' lu naa cabe.

III. Guchelanidí' cabe ca guidxi gringu ne tindene cabe laaca, ne sin guini'

ique cabe xi gaca ru'. Pa gaca cani la?, naquiiñe gabi cabeni xa ique ro' xtí guidxi ro' zaguita (mexicu).

Ndaaga 119. Ca xaique ro' ni runidxiña' ndaaní ca yoo ro' raria' diidxa' bia' xtí guidxi ro' zaguita (mexicu) la?, napa cabe xi gapa' cabe caguidxi ro' liibilisaane zaguita (mexicu) ti que chu' xiixa guenda naxoo ndaaní cani. Ne pa gueda gaca xiixa guenda naxoo ndaaní ca guidxi ro' xtí zaguita (mexicu) ca la?, napa cabe xi guya' cabe xi zanda gacane cabe caguidxi ro' ca, huaxa pa guinaaba cabe ni nga zacane ca xaique ri laacabe.

Guirá' ca xaique ro' xtí ca guidxi ro' xtí zaguita (mexicu) ne laa la?, naguenda ga si napa cabe xi gusenda cabe cabinni ni caguiba donda ique o ca ni magudxiiba donda ique, ne laaca napa cabe xi guidii cabe cani biini ne ca binni ca donda ni caguiba ique que, ti pa chu' tuuxa xaique guidxi ro' guinaaba ni. Ca dxiiña' ra guseenda cabe cabinni ni biete luguia ca la?, zacani casi nabaqui ca xaique ni runi dxiiña' ndaaní ca yoo ra riguiiba donda ique binni, ne laaca modo na ca xaique xtí caguidxi ro' xtí zaguita (mexicu) ca. Ti ganda gaca ca dxiiña' ni cayeté rí jneza ne nayaa la?, ca xaique xtí ca guidxi ro' xtí zaguita (mexicu) la?, zanda gutaagu xtiidxa' ne cabe xaique ro' xtí guidxi ro' zaguita (mexicu), ti laa pe nga naquiiñe guya' gaca cani jneza.

Pa gacaladxi tuuxa xaique ro' xtí xiixa guidxi ro' xtí ca gringu ca guseenda caaca xpinni ca ti guxhubadondacalaacabexquidxica la?, napa xi gacani casi nabaqui' cadiidxa' xtí gu'chi' ro' bia' xtí guidxi ro' rí, casi ná ca diidxa' bia' ni bidxaagasaa ndaaní guirá' caguidxi ro' ni nuu ndaaní guidxilayu rí. Ne pa gueda gaca xiixa de ca dxiiña' ri la?, ca xaique diidxa' ro' bia' xtí guidxi ro' bia' xtí guidxi ro' ri la?, napa cabe chonna late gande dxi ti ganda guseenda cabe ca binni ni caguiba donda ique ca.

Ndaaga 120. Guirá' ca guidxi ro' xtí guidxi ro' zaguita (mexicu) la?, napa xi guni cabe guirá' cani guini' diidxa' ro' bia' ca.

Ndaaga 121. Guirá' dxiiña' casi ra quiiba donda ique tuuxa la?, ca xaique xtí ca guidxi ro' xtí zaguita (mexicu), zuziguenda neca dxiiña' rí, ti jneza nuuca'. Guirá' diidxa' bia' ni cue ca xaique ni runi dxiiña' ndaaní yoo ro' ra ria' diidxa' bia' ca la?, napa cani xi chinanda cani casi na xaguete rí:

I. Guirá' ca diidxa' bia' xtí ca guidxi ro' xtí zaguita (mexicu) la?, zapa cani xtipa' ne zuni cani dxiiña' ndaanisi ca guidxi guya' cani, ne que zanda di uca cani ridxi ndaaní xtí guidxi.

II. Guirá' ca xiixa xti' ti guidxi ro' xti' zaguita (mexicu) la?, casi ti yoo o xiixa guiiba' la?, ca diidxa' bia' xti' cani nga zanda uca cani ridxi.

III. Guirá' ca diidxa' bia' o ca donda ni guiré' xia ndaani ca yoo ro' xti' ca guidxi ro' xti' zaguita (mexicu) la?, ra guíete ca xiixa xti' ti guidxi ro' la?, ne nuuni ndaani xti' guidxi ro' la?, zapacani xtipa' ndaani xquidxi cani, huaxa pa zaca guini' ca didxa' bia' xti' cabe.

Ca diidxa' bia' ni guiré' xia, xti' binni la?, zanda ca ucani ridxi ndaani xti' guidxi ro', ndi la?, pa gueda guchaa binni que de ra chi ndeeza, o pa ca xaique ni bidxiba donda que guchaa de yoo o de guidxi, ne pa ca binni ri guseenda ca laabe chebe ra nuu.

IV. Ca diidxa' bia' ni guiré' xia ndaani xti' guidxi ro' ra riu dinde binni ne xiixa layu o bidxichi la?, laaca zanda gapani xtipa' ndaani xti' guidxi.

V. Ca gu'chi' ni gudii tuuxa xaique xti' ti' guidxi ro' tuuxa binni ne guini' ni xi guenda napa buque la?, zapani ti xtipa' ndaani xti' guidxi ti zaca ma gualaqui' diidxa' ro' bia' gacani.

Ndaaga 122. Ma ca lá ni lu ndaaga 44 xti' gu'chi' ro' bia' ri' xi guirá' nga zanda guni ca guidxi ro' xti' zaguita (mexicu), ca xtipa' xti' ca xaique xtini ca la?, rilaa cani choona ndaaga ne casi ná ndaaga r inga gacani.

Xaique xti' ca guidxi ro' xti' zaguita (mexicu) nga xaique ro' xti' guidxi ro', ne yoo ro' ra ria' ca xtiidxa' guidxi ro' ne yoo ro' ra riree xia donda ne diidxa' bia'.

Ca binni ni guli guidxi gaca xaique ni guzuhua lu xtiidxa' ca' ni rabi cabe diputadu ca nga guiu ndaani yoo ro' ra ria' xtiidxa' guidxi ro' gunica' dxiiña' ndaani ni, de ca binni ni guiu ndaani guni dxiiña' ca la?, ziu ca binni ni gudxite ne bica ridxi binni che chi guze lu xqu'chi' ne yene de xaique ri' ne laaca ziu ca ca binni ni ucuasi lá lu gu'chi' ne que nucaa di ridxi binni gudxi chi guze lu xqu'chi', huaxa ra gaca ca bieque ri la?, zacani casi nabaqui' gu'chi' ro' bia' ri', ne guini' lu xqu'chi' bia' xaique ro' xti' guidxi ro' zaguita (mexicu).

Xaique ro' xti' guidxi ca la?, lu ná be nga guiana ca xaique ni ruca diidxa' bia' lu gu'chi' que ne ca xaique ni runi xhiiña' guidxi, ne lu ná ti binni si nga zanda guiaana ni, ti ma gullii cabe laabe ne ngachi' nga gacani.

Ca xaique ni runi dxiiña' ndaani yoo ro' ra riree xia diidxa' ne donda, ne yoo ro' ra riapa xpidxichi guidxi ro' ne ruuya' guni ca xaique diidxa' bia' xhiiña' jneeza, ne xcadxi xaique ni cuaqui' xaique ro' xti' guidxi ro' zaguita (mexicu) ca la?, zutagu cabe xtipa' xti' cabe ti que chu' xiixa guenda naxoo ndaani ca guidxi huiini xti' guidxi ro' ri'.

Ca xtipa' xti' ca xaique ni runi dxiiña' ndaani yoo ro' ra ria' diidxa' bia' ca ne ca xaique ni runi xhiiña' guidxi ca la?, napa cabe xi chinanda cabe ca ni ná xaguete ri':

A. Ni zanda guni ca xaique ni runi dxiiña' ndaani yoo ro' ra riree xia diidxa' bia':

I. Guni cabe dxiiña' ne cue cabe diidxa' bia' ra rugada xtipa' xti' cabe, huaxa pa xi guni ca xaique ni runi dxiiña' ndaani yoo ro' ra ria' xtiidxa' guidxi ro' ca; eridas a la Asamblea Legislativa;

II. Gucheeche cabe ca diidxa' ni ca lu xqu'chi' xaique guidxi ro' zaguita (mexicu);

III. Guni cabe dxiiña' ne cue cabe diidxa' bia' ni guini' pabia' xpidxichi guidxi ro' caniti;

IV. Cue' cabe xiixa diidxa' bia' ni uca ca xaique ni ruzuhua lu xtiidxa' binni guidxi ca xhiiña' ca jneza la?, ne nayaa; ne

V. Ca xcadxi ru' diidxa' n i guini' gu'chi' ro' bia' ri'.

B. Ni naquiiñe guni xaique ro' xti' xti' guidxi ro' zaguita (mexicu):

I. Guza' be o gunibe diidxa' ni ganda iquiiñe ndaanisi guidxi ro' zaguita (mexcu);

II. Gabibe ca xaique ca xaique ni ruzuhua lu xtiidxa' binni guidxi ni rabi cabe senador ca, tu ganda guiu guni xhiiña' xaique xti' guidxi ro' ri' pa gueda guiadxa;

III. Lu cada iza napabe xi guseendabe ti gu'chi' ra nuu ca xaique ni runi dxiiña' ndaani yoo ro' ra ria' diidxa' bia' ca, ra ica pabia' nga xpidxichi guidxi ro' ma biniti ti guihuini pabia nga ma biree. Ra gaca ca dxiiña' ri la?, xaique ro' xti' ca xaique ni ruzuhua lu xtiidxa' binni guidxi ca la?,

zuseenda ti gu'chí' ra nuu xaique ro' xti' guidxi ro' (mexicu) xi guni ique ne ca gu'chí' ni guye ra nuu ca que, huaxa ra gaca ni ca la?, naquiiñe chinanda cabe casi nabaquí' diidxa' ro' bia';

IV. Guya' be guni ca diidxa' bia' ni cue ca xaique ni ruzuhua lu xtiidxa' binni guidxi ca xhiña' ca jneza ndaanisi ndaani guidxi ro', ne

V. Xcadxi ru' diidxa' ni guini' gu'chí' ro' bia' rí' la?, ne cani ca l u xqu'chí' bia' xaique ro' xti' guidxi ro' zaguita (mexicu) ne cani ca lu ca diidxa' bia' xtini.

C. Gu'chí' bia' xti' xaique ro' xti' guidxi ro' zguita (mexicu) la?, napa ni xi chinandani casi ná ca diidxa' ni ca xaguete rí':

NIRU DO' XTIIDXA' NI. Ni ná ca diidxa' ni xti' gu'chí' bia xti' guidxi ro' zaguita (mexicu):

I. Ca xaique ni ruzuhua lu xtiidxa' binni guidxi ni rabi cabe diputadu ca la?, ra guiu cabe guni cabe dxiiña' ndaani yoo ro' ra ria ca diidxa' xti' guidxi ro' ca la?, cada lu chonna iza nga guibi cabe guni cabe dxiiña' ndaani yoo ro' rí' ne ra guibi cabe ca la?, zacani nagachi', nayaa la?, ne jneza ti zaca ma gulaquí' diidxa' ro' bia' gacani, ne ca diidxa' ni biete ca la?, naquiiñe icaa ca xaique cani ti laani nga guziidi ni laacabe xi guni cabe ra gaca ca dxiiña' rí', ne pa gaca ladxi cabe guidii cabe xiixa gu'chí' binni guidxi ne ca neza ni iquiiñe binni ucalu pa que chu ladxi ca' ca dxiiña' o ca diidxa' ni biree xia, ne ca ni lu ca ndaaga 4I, 6o ne 99 xti' gu'chí' ro' bia' rí';

II. Ca binni ni galadxi gaca xaique ni ruzuhua lu xtiidxa' binni guidxi ni rabi cabe diputadu ne guni dxiiña' ndaani yoo ro' ra ria' xtiidxa' guidxi la?, naquiiñe gaca cabe jma nahuiini de ca xaique ni ruzuhua lu xtiidxa' binni guidxi xti' guidxi ro' zaguita (mexicu).

Guira cani ca lu ca ndaaga 5I, 59, 6I, 62, 64, ne ndaa IV 77 xti' gu'chí' ro' bia' rí', la?, zuca cani ridxi ca xaique ni runi dxiiña' ndaani yoo ro' ra ria' xtiidxa' guidxi ro' zaguita (mexicu) rí';

III. Ca partidu ni gapa jma binni che chi guzee lu xqu'chí' ndaani guidxi ro' zaguita (mexicu) la?, zanda cu' cabe xcadxi xaique ni ruzuhua lu xtiidxa' binni guidxi ni rabi cabe diputadu ca chu' guni dxiiña' ndaani yoo ro' ca;

IV. Cada iza la?, zabaqui' cabe dxi guiu cabe gutaagu xtiidxa' cabe, ne xi guni xcadxi xaique ni ruzuhua lu xtiidxa' binni guidxi ni riana guni dxiiña' que. Lu gu'chi' ni cuidxi ne cabe ca xaique ni nuu ndaani dxiiña' ca la?, ca xaique ni runine cabe dxiiña' ca nga guya' gacani o laaca zanda guni xaique ro' xti' guidxi ro' cani;

V. Ca xaique ni runi dxiiña' ndaani yoo ro' ra ria' diidxa' xti' guidxi ca la?, napa cabe xi chinanda cabe ni ná lu gu'chi' bia' xti' xaique ro' xti' guidxi ro' zaguita (mexicu), ne ca xtipa' ri nga napa cabe ti guni cabe cani:

a) Guni cabe diidxa' bia' xti' cabe, ne ra guni cabe ni ca la?, naquiiñe guseenda cabeni ra nuu xaique xti' guidxi ro' ti ucaani lu gu'chi';

b) Cada iza naquiiñe guya' chahui cabe, icaa yuu ne cabe ca ca diidxa' bia' ne ca gu'chi' ni guini' pabia' bidxichi chu' ne guiré' ndaani guidxi ro', huaxa naquiiñe ni cuee cabe niru do' nga bia' ni iquiiñe guidxi ro' ti guni caadxi dxiiña' xti'. Ra cue bia' ca xaique ri' pabia' bidxichi nga guiaxa ca xaique ni runi xhiiña' guidxi la?, napa cabe xi chinanda cabe ni ná lu ndaaga 127 xti' gu'chi' ro' bia' ri'.

Guionna xtipa' xti' guidxi ro' ne ca yoo ro' ni que riquiiñe xtipa' xti', xti' yoo ne nuu lu ná xaique ro' xti' guidxi ro' ri la?, ra guseenda cabe gu'chi' chi guiaxa ca binni ni runi xhiiña' guidxi ca la?, naquiiñe ucaa cabe pabia' guiaxa ca binni ni guni xhiiña' cabe. Ca gu'chi' ni guseenda ca xaique ri ti ganda guiré' xpidxichi guidxi ro' ti quixe ca xpinni ca la?, naquiiñe chinandani casi ná lu ca gu'chi' bia' xti' xaique ro' xti' guidxi ro' zaguita (mexicu), ti ganda gacani.

Lu ca gu'chi' ne diidxa' ro' bia' gaca ti ganda guiu xpidxichi guidxi ro' la?, que zanda ica ca bidxichi ni ma biniti guidxi ro' lu cani ti maca gulee ca xaique ni runi dxiiña' ndaani yoo ro' ra ria' diidxa' bia' cani ti zaca ná cabe guiu jma bidxichi ndaani guidxi ro'.

Ni naquiiñe cue o guni xiixa diidxa' bia' ti ganda guiu jma bidxichi ndaani guidxi ro' nga xaique ro' xti' guidxi ro' zaguita (mexicu). Ne lu dxi 30 xti' beu noviembre nga naquiiñe guchiña cabeni, ne pa lu iza ca gueda guidxaa xaique ro' xti' guidxi ro' zaguita la?, naquiiñe gacani lu dxi 20 xi beu pascua.

Ca xaique ro' ni runi dxiiña' ndaani yoo ro' ra ria' xtiidxa' guidxi ro' ca la?, cada iza nga naquiiñe guni cabe ti gu'chi' pabia' caquiiñe cabe ti guni cabe

xhiiña' cabe ne guseenda caben ira nuu xaique ro' xtí' guidxi ro', ti ma laa cu' ni lade ca diidxa' yachi' ni chi guni ti ganda gacani diidxa' ro' bia'.

Ne ca diidxa' bia' rí' la?, zaquiiñe ca binni ni runi dxiiña' ndaani ca yoo xtí' guidxi ro' zaguita, ti raca nga riguixe binni guidxi bidxichi ti guiapa ca xlayu ca', ti laaca be la?, que zanda di guya' cabe gaca ca dxiiña' rí', ne lu lana ngoola c) xtí' ndaa IV xtí' ndaaga 115 xtí' gu'chí' ro' bia' ri nga;

c) Guya' cabe o gudxienacabe lade ca gu'chí' ra ca xpidxichi guidxi ro' lu iza ni gudí'dí' que, huaxa zacani casi raca xhiiña' ca xaique ni runi dxiiña' ndaani yoo ro' ra rigaaba xpidxichi guidxi xtí' yoo ro' ra ria' xtiidxa' guidxi ro' rí', ne ra gaca ca bieque ri la?, naquiiñe chinadani casi ca lu ndaa VI xtí' ndaaga 74 xtí' gu'chí' ro' bia' rí'.

Lu ca gu'chí' ni bibiená ra ca xpidxichi guidxi ro' de lu iza ni guidí'dí' que la?, naquiiñe cheni ra nuu ca xaique ni runi dxiiña' ndaani yoo ro' ra rigaaba xpidxichi guidxi ro' que ne naquiiñe guidxii lu chí' gubidxa xtí' beu san juan. Bia' dxi ni biete ri la?, ne ca ni ca lu ca diidxa' yachi' ni riní' pabia' xpidxichi guidxi chu' ne guiré' ca la?, zanda guirooba' ca diidxa' ni ca lu cani ca la? ne bia' dxi ni ma biete ca pa xaique ro' ni rucaa diidxa' bia' lu gu'chí' ca guinaabani ne gusisaca xtiidxa' xiñee gacani zaca;

Binni ni gaca xaique xtí' yo ora rigaaba' xpidxichi guidxi ro' ca la?, jma de galaa de ca xaique ni runi dxiiña' ndaani yoo ro' ra ria' xtiidxa' binni guidxi ca nga cui laabe ne cada lu gadexe iza naga guidxaabe huaxa binni ni gaca xaique rí' la?, naquiiñe guzuhuinibe de que ma bí'ní'be ca dxiiña' rí' lu gayú iza, ti zaca ganda gaca ca dxiiña' de rigaaba xpidxichi guidxi rí' jneza ne nayaa.

d) Guyuubibe tu ganda guiaana ga' jlugar xaique guidxi ro' xtí' guidxi rí' pa laa gueda guiaadxa;

e) Guni cabe ca diidxa' ni gusiene ca binni ni guni dxiiña' ndaani yoo ro' ra riapa xpidxichi guidxi, ne pabia' xpidxichi guidxi nga guiré' ne chu', ne modo ganda igaaba' cani ti ca xaique ne ca binni ni guni dxiiña' ndaani, ni ca la?, que zaquiiñe di ca xtipa' xtí' xtobi ti ganda gunca xhiiña' ca'. Ra gaca ca dxiiña' ri la?, napani xi chinadani casi ná ca diidxa' za nirú, naguenda, jneza, dxiiña' biaca biaca, ne ti dxiiña' rizaca.

f) Cuebe diixa' bia' ni gusiene ca dxiiña' ra raca ca dxiiña' de ra ribii cabe xcaique guidxi huaxa ra gaca ca dxiiña' ri la?, zaca cani jneza nayaa ne nagachí'; huaxa cadí na cabe de que, que zinanada cabe casi na lu ca gu'chí'

bia' xaique ro' xti' guidxi ro' zaguita (mexicu), ti ca diidxa' ni ca lu ca lana ngoola b) de ra ca n) xti' ndaa IV xti' ndaaga 116, xti' gu'chi' ro' bia' ri', ti ca diidxa' ni ca lu ca lana ngoola j) ne m) xti' gu'chi' ro' bia' ri la?, gadxe ni rin' cani laacani la?, rin' cani de ca xtiidxa' ca xaique ro' xti' ca guidxi ro' xti' zaguita (mexicu ca, ne xtiidxa' ca xaique ni ruzuhua lu xtiidxa' binni guidxi ni rabi cabe diputadu que laaca zaqueca xtiidxa' ca xaique xti' ca guidxi huiini xti' zaguita (mexicu), ne xacadxi ru xaique xti' guidxi ro' zaguiata (mexicu);

g) Guni cabe diidxa' bia' ni gusiene ca xaique runi xhiiña' guidxi, ne ca bieque napa ca dxiiña' xti' ca';

h) Guni cabe diidxa' bia' ni gusiene ca xaique ni runi dxiiña' ndaani ca yoo ra riere xia donda naca de guenda guti o pa ra raaca chahui laa binni guidxi; ti zaca gaca ca dxiiña' ca jneza, ne laaca guiré' xiixa diidxa' bia' ni gusiene ca binni ni runi dxiiña' ndaani yoo ro' ra riapa' xquenda binni guidxi, ne ra chu' binni guni xhiiña', ra gacane che binni ti gusien cabe laa de ca guenda naxoo ni cad'i'di', ne laaca gaca xiixa diidxa' bia' ni gusien ca binni ni runi gu'chi' yoo xti' binni ti ganda gutoo ca xti';

i) Guni cabe diidxa' bia' ti ucaa ridxi guiapa guidxi ro' ri'; ne ni gacane chu' jma dxu' pa guiaadxa ti zaca guiu ti xaique ro' xti' guidxi ro' zaguita (mexicu) ri' gapa' jneza; ne laaca zaqueca cu' cabe cabe dxu' gapa' ca tienda ro' ni nuu ndaani guidxi ri'; ne laaca cha liidxi guiba' pa chu' tuuxa gucheene guidxi ro' ri'; ne chu' jma yoo ra guianda binni guidxi ne chu' binni gacane binni pa nuu lu xiixa guenda naxoo casi ra guiré' guigu';

j) Guni cabe diidxa' bia' ni gacane ca guidxi xti' zaguita (mexicu); casi ra guiapa' ca layu xti' guidxi ri'; ne gapa' ca yaga ne ca gu'xhi', gaca yoo huiini xti binni, ti gaca xtale neza; n era ganda iquiñe cabe cani cue ndu ca layu ni nuu ndaanipe guidxi zaguita (mexicu);

k) Guni cabe diidxa' bia' ni gacane binni guidxi gapa ti gu'chi' ni guini' zanda gusaa ti caru ; ne laaca guni cabe diidxa' bia', ni ucaa ridxi binni guidxi gusia, ne diidxa' bia' guini' zanda guiaana xti' binni guidxi ndaani guidxi zaguita (mexicu), ne guini' cha luguiaa huiini ne luguiaa ro', ra che guixi ne cha yoo ba';

l) Guni cabe diidxa' bia' ni gacane chu' jma bidxichi ndaani guidxi ro' ri' ne diidxa' bia' ni gapa guirá' xixe dxiiña'; ne gacane guirooba' dxiiña' xti' ca

binni guze'; yoo ra gacane cabe binni luguiaa; ne ra gacane binni guidxi guni xtí' casi ca lu ndaa VIII, xtí' ndaaga 3° xtí' gu'chi' ro' bia' rí';

m) Guni cabe diidxa' bia' ni gacane ne gusiene ca dxiiña' ni gaca ndaani ca yoo ro' ra riré' xia donda ne diidxa' bia' xtí' ca guidxi huiini ca ne ca ni nuu ndaani guidxi saguita (mexicu), ne ca diidxa' bia' ni guiré' ri la?, zani'ni xi gaca ca xaique diidxa' bia' ne ca binni ni runi dxiiña' ndaanini ca pa laaca guchee ne cani;

n) Guni cabe diidxa' bia' ni gusiene xaique diidxa' bia' ni runi xhiiña' guidxi;

ñ) Guni cabe diidxa' yachí' ni gacaladxi cabe gaca diidxa' bia' ne guchiiña' cabe ni ra nuu ca xaique ni ruzuhua lu xtiidxa' binni guidxi ne runi dxiiña' ndaani yoo ro' ria diidxa' bia' xtí' zaguita (mexicu); ne

o) Guirá' ru' diidxa' ni ni guini' diidxa' bia' rí' laacbe guni cabe.

GUIROPA XTIIDXA' NI. Ca dxiiña' ni naquiñe guni xaique guidxi ro' zaguita (mexicu):

I. Ziube lu dxiiña' ca' xhoopa iza, ne zuzulube gunibeni lu gayu gubidxa xi beu pascua iza gulií' cabe laabe que, huaxa ra cui cabe laabe ca la?, naquiñe chinandani casi ná ca diidxa' xtí' ca dxiiña' ra ribii cabe xaique guidxi.

Ti ganda gaca tuuxa xaique guidxi ro' zaguita (mexicu) la?, naquiñe gapa cabe cani ná ca diidxa' rí': naquiñe gacabe xiiñí' zaguita (mexicu) ne gabe ti binni nuu xpiaani', ne naquiñe cuesabe chonna iza ndaani guidxi ro' zaguita (mexicu) pa ndaani guidxi ro' pe' gulebe, ne gayu iza cuesabe ndaani guidxi ca pa laabe gulebe ndaani gadxe guidxi xtí' zaguita (mexicu); ne naquiñe gapabe chonna bi chíí' iza dxi cui cabe laabe que, ne pa que huayacabe xaique rí' ne pa ma gucabeni chupa chonna gubidxa la?, ma que zandadi' gacabeni. Pa gacaladxi tuuxa binni ma naca xaique rí' guchaa de guidxi ra chindeeza la?, cadí' nda dí' gaca guiré' be gacabe xaique guidxi.

Pa gueda guiré' xaique rí' de ndaani ca dxiiña' ri la?, ca xaique ni ruzuhua lu xtiidxa' binni guidxi ni rabi cabe senador ca ne xtiidxa' xaique ro' xtí' guidxi ro' zaguita (mexicu) ca la?, zabii cabe xtobi ni ganda gunduuxe dxiiña' biana' ca que. Ne pa gueda guiadxa xaique chupa chonna guibidxa la?, ma gu'chi' bia' xtí' xaique ro' xtí' guidxi ro' zaguita (mexicu) ca guini' tu guiaana ga guni dxiiña' que. Pa xaique que guini' de que ma chi guiré'

de lu dxiiña' cayuni que la?, ma ca xaique ni runi dxiiña' ndaani yoo ro' ra ria' xtiidxa' guidxi ro' ca cui tu guiaana guni ca dxiiña' que. Pa xaique ri' gacaladxi guiré' de ndaani ca dxiiña' ri la?, naquiiñe gusuhuiinibe de que napabe ti guenda naxoo. Ca gu'chi' ni guini' de que naca tuuxa xaique guidxi ro' zaguita (mexicu) la?, zacani casi ná lu gu'chi' bia' xti xaique ro' xti' guidxi ro' zaguita (mexicu).

II. Binni ni gaca xaique guidxi ro' zaguita (mexicu) ca la?, ca ndi nga ca xtipa' napabe ti ganda gunibe xhiiña'be jneza:

a) Gunibe ni ná ca diidxa' bia' ni cue ca xaique ni runi dxiiña' ndaani yoo ro' ra ria' diidxa' bia', hauaxa zacani de ra rugaandasi xtipa' xti' xaique ni rucaa diidxa' bia' lu gu'chi';

b) Ucaa cabe diidxa' bia' ni cue ca xaique ni runi dxiiña' ndaani yoo ro' ra ria' xtiidxa' guidxi ro', huaxa naquiiñe guni cabe casipe ná, ne ra gunibe ni ná ni ca la?, zunibe diidxa' bia' ni gusiene binni. Ne laaca zanda guni'be o ucaabe xiixa ni cadí cayuladxibe de lu ca diidxa' yachi' ni guseenda ca xaique ni runi dxiiña' ndaani yoo ro' ra ria' xtiidxa' guidxi ro' ca bia' chií gubidxa bia' racasi dxiiña'. Ne pa diidxa' yachi ni bidxiña' ra nuu cabe que gudii xtiidxa' jma galaa de ca xaique ni ruzuhua lu xtiidxa' binni guidxi cani la?, xaique xti' guidxi ro' zaguita (mexicu) ucaani lu gu'chi';

c) Guchiiñabe xiixa diidxa' yachi' ni gacaladxibe gaca diidxa' bia' ra nuu ca xaique ni runi dxiiña' ndaani yoo ro' ra ria' xtiidxa' guidxi ro';

d) Cu' be ne ganda be ca binni ni runi xhiiña' ca guidxi huiini ca ne lux tipa' xti' xaique ni rucaa diidxa' bia' lu ca gu'chi' ca, jma pa cadí ca cani lu gu'chi' ro' bia' ri' la?, ne ca diidxa' bia' xti' guidxi ri';

e) Gunibe xhiiña'be jneza ti binni guidxi caquiiñe gacani zaca, ne ti zaca canil u ca gu'chi' bia' xti' xaique ro' xti' guidxi ro' zaguita (mexicu); ne

f) Xcaadxi diidxa' ni guini' gu'chi' ro' bia' ri' ne diidxa' bia' xti' guidxi ro' ri' gaca.

GUIONNA XTIIDXA' NI. Modo raca xhiiña' guidxi zaguita (mexicu):

I. Zata' ti neeza ni guiene ca binni ni guni dxiiña' ndaani ca yoo xti' ra raca xhiiña' guidxi ro' rí' casi ca ni nuu lu ná ni ne cani co';

II. Zata' ti dxiiña' ni gusiene ca binni ni chi guni xhiiña' guidxi ro' ca ne guidubi ndaanini nga gacani.

Laaca zaqueca zuya' cabe gata ti neza ti ganda guilaa guidxi ca pur ndaa, ne guhuini pabia' nga xtipa napa ca xaique ni runi xhiiña' guidxi ro', ne modo guidaagu ca xaique, modo guni cabe xhiiña' cabe ne modo ganda gutaagunecabe xtipa' xti' cabe xaique xti' guidxi ro' zaguita (mexicu).

Ca xaique ni xti' ca ndaa ni gulaa guidxi ro' que la?, binni guidxi nga cui laacabe ne zacani nagachi', naguenda ne modo gacaladxi cabe guni cabeni, huaxa naquiiñe chinanda cabe casi ná ca diidxa' ni ca lu diidxa' bia'.

GUIDAPA XTIIDXA' NI. Ca dxiiña' ni runi ca xaique diidxa' bia' ndaani ca yoo ro' ra riree xia donda ne diidxa' bia' ne ca yoo ro' ni nuu ndaani ca guidxi huiini ca:

I. Ti ganda gaca tuuxa xaique ro' diidxa' bia' la?, naquiiñe gapabe cani rinaaba' gu'chi' ro' bia' rí' ca binni ni gacaladxi gaca xaiquedo' diidxa' bia' xti' yoo ro' ra riree xia diidxa' bia' ca; laaca naquiiñe guihuini de que binni ni ruzuhua lu xtiidxa' binni guidxi laabe, ne jma pe pa ndaani guidxi ro' zaguita (mexicu) biní'beni. Ca xaique ni guiu guni dxiiña' ndaani ca yoo ro' ra riree xia donda ne diidxa' bia' ca la?, ziu xtale xaique ro' diidxa' bia' guni dxiiña' ndaani ni huaxa naquiiñe chinandani casi nabaquí' diidxa' bia'.

Pa guiaadxa ca xaique ro' diidxa' bia', ni guni dxiiña' ndaani ca yoo ro' ra ria' riree xia diidxa' bia' ne donda ca la?, ma xaique xti' guidxi ro' zaguita (mexicu) ca guya' xi guni huaxa nirudo' naquiiñe guya'be xi ná ca xaique ni rini dxiiña' ndaani yoo ro' ra ria' xtiidxa' guidxi ro que. Ca xaique ro' diidxa' bia' ca la?, ziu cabe xhoopa iza lu ca dxiiña' ca, ne zanda cui ca xaique ni rini dxiiña' ndaani yoo ro' ra ria' xtiidxa' guidxi ca laacabe xti' bieque ne pa guibigueta cabe lu ca dxiiña' ca la?, zanda ca guchaa ca xaque laacabe, huaxa nirudo chinanda cabe ni ná lu Diidxa' lá guidapa xti' gu'chi' ro' bia' rí'.

II. Ra guni ca xaique diidxa' bia' ni runi dxiiña' ndaani ca yoo ro' ra riree xia diidxa' bia' ne donda la?, ca xaique ni runi dxiiña' ndaani yoo ro' ra riapa

xpidxichi guidxi ro' ca nga guya' guni cabe xhiiña' cabe jneeza. Ndaani yoo ro' ra riapa xpidxichi guidxi ro' ne ruuya' guni ca xaique diidxa' bia' xhiiña' jneeza ca la?, gadxe binni naga guiu guni dxiiña' ndaanini, tobi de laacabe nga gaca xaique ro' xtí' cabe, ne laaca laa nga gaca xaique xtí' yoo ro' ra riapa' xpidxichi gudxi ro'. Xcaadxí binni guiu ca nga: ti xaique ro' diidxa' bia', ne chupa xaique diidxa' ro' bia' ne jma de galaa de ca xaique ro' diidxa' bia' ca nga cui laacabe; tobi ca la?, xaique xtí' guidxi ro' zaguíta (mexicu) ca nga cui laa, ne xhupa ca la?, ca xaique ni runi dxiiña' ndaani yoo ro' ra ria' xtiidxa' guidxi ro' ca nga cui. Guirá' ca binni ni guiu gutagu xtiidxa' ndaani yoo ro' ri la?, napa xi guchiiña' cabe guirá' ni rinaaba' gu'chi' ro' bia' rí' ti ganada gacabe xaique ro' diidxa' bia', ne napa xi gaca cabe binni nuu xpiaan' ne que huayadxa lu xhiiña' cabe, ne ca binni cui ca xaique ro' diidxa' bia' ca la?, naquiiñe gapa cabe ti gu'chi' ni guin' de que guiza' nana cabe guzuhua cabe lu xtiidxa' binni guidxi. Zandaa cabe lu ca dxiiña' gayu iza; ne ma que zanda dí' guibii cabe xtí' bieque guiu cabe guni cabe dxiiña' ca xtí' bieque, ne tobi ga cae nga guidxaa cabe.

Ca xaique ni rini dxiiña' ndaani yoo ro' ra riapa xpidxichi guidxi ro' ne ruuya' guni ca xaique diidxa' bia' xhiiña' jneeza la?, zabaquí' cabe tu laa gaca xaique diidxa' bia' ndaani guidxi ro' zaguíta (mexicu), huaxa ra gacani ca la?, napa cabe xi chinanda cabe casi ná ca diidxa' xtío ca binni ni ruzuhua lu xtiidxa' binni guidxi. Ne laaca zabaquí' cabe pabia' ne xi guirá' yoo ro' ra ríree xia donda ne diidxa' bia' chu' ndaani guidxi ro' rí', huaxa ra gacani ca la?, naquiiñe chinanda cabe ni ná lu ca diidxa' xtí' yoo ro' ra riapa xpidxichi guidxi ro' ne ruuya' guni ca xaique diidxa' bia' xhiiña' jneeza.

III. Naquiiñe gata ca neza chinanda ca xaique ni runi dxiiña' ndaani yoo ro' ra riapa xpidxichi guidxi ro' ne ruuya' guni ca xaique diidxa' bia' xhiiña' jneeza ca, huaxa naquiiñe chinandani casi ná ca diidxa' ni ca lu ndaaga 100 xtí' gu'chi' ro' bia' rí';

IV. Diidxa' ro' bia' la?, zabaquí' ca neeza ne ca dxiiña' ra gacaladxi cabe guchaa cabe ca xaique ni runi dxiiña' ndaani ca yoo ro' ca, ne laaca naquiiñe chinanda pa nana cabe xtale lu ca dxiiña' de ra ruzuhua cabe lu xtiidxa' binni guidxi;

V. Ca diidxa' bia' ni guiré' o ni gaca ca la?, zusabanani ca xaique ni runi dxiiña' ndaani yoo ro' ra riapa xpidxichi guidxi ro' ne ruuya' guni ca xaique diidxa' bia' xhiiña' jneeza, ne laaca ca xaique xaique ro' diidxa' bia', ne ca xaique diidxa' ro' bia' ni que guni ni ná ni, ne laaca naquiiñe chinanda casi ná ca diidxa' ni ca lu ndaaga 101 xtí' gu'chi' ro' bia' rí';

VI. Ca xaique ni runi dxiiña' ndaani yoo ro' ra riapa' xpidxichi guidxi ro' ne ruuya' guni ca xaique diidxa' bia' xhiiña' jneeza la?, laaca nga gunica' ti gu'chí' ra guinica' pabia' guiaxa ca ca xaique ni runi dxiiña' ndaani yoo ro' ra riree xia diidxa' bia' ne donda ni nuu ndaani guidxi ro' rí' ne guseenda cani ra nuu xaique xtí' guidxi ro' zaguita (mexicu), ti xaique rí' cu' ni lade ca gu'chí' ra guinaaba' cabe pabia' xpidxichi guidxi guiree ti ganda guiaxa cabe, ne ti ma ca xaique ni runi dxiiña' ndaani yoo ro' ra ria' xtiidxa' guidxi ro' guini' pa zareeni o pa co'.

DE LU GAYU XTIIDXA' NI. Ziu ti yoo ro' ra guiré' xia donda ique ca binni guidxi ne ca xaique ni runi xhiiña' guidxi pa laaca gucheeneca' xhiiña' ca' ni nuusi ndaani guidxi ro' zaguita si.

Zaree cadxi diidxa' bia' ni gutaagu laacabe ti guni cabe xhiiña' cabe jneza, ne ca diidxa' bia' gusiene laacabe guni cabe ca diidxa' bia' xtí' cabe.

D. Ni gaca xaique rugaani donda ni nuu ndaani guidxi zaguita (mexicu) ca la?, ti xaique xtí' yoo ro' ra riree xia donda ca naga gacani; huaxa naquiiñe chinandani casi ná lu gu'chí' bia' xti xaique ro' xtí' guidxi ro' zaguita (mexicu) ca nga gaca; ca diidxa' rí' ne ca diidxa' bia' xtí' ca binni ca binni ca la?, zutaagu cani xtipa' xtí' cani guini' modo gaca ca dxiiña' ca.

E. Ndaani guidxi ro' zaguita (mexicu) la?, xaique ro' xtí' guidxi ro' zaguita (mexicu) nga gunini, hauxa niru do' naquiiñe chinandabe casi ná lu ndaa VII xtí' ndaaga 115 xtí' gu'chí' ro' bia' rí'. Ra guidxaa ca xaique ne ca binni ni runi xhiiña' guidxi ro' la?, zacani casi ca lu gu'chí' bia' xtí' xaique ro' xtí' guidxi ro' zaguita (mexicu).

F. Pa gueda gaca xiixa guenda naxoo la?, ca xaique ni runi dxiiña' ndaani yoo ro' ra ria' diidxa' bia' xti guidxi ca o pa que guini cabe la?, ca xaique ni riaana guni dxiiña' que zanda guchaa xaique guidxi ro' zaguita (mexicu), pa cayuninabe guidxi ro'.

Gu'chí' ra ica o ra canaaba cabe guiré' xaique xtí' guidxi ro' zaguita (mexicu) ca la?, napa xide gudii xtiidxa' galaa de ca xaique ni runi dxiiña' ndaani yoo ro' ra ria' diidxa' bia' cani ne pa guini cabe la?, ca xaique ni riana que gunini.

G. Ti ganda guidaagulisaa ca xaique ro' xtí' ca guidxi ro' zaguita (mexicu) ne ca xaique xtí' ca guidxi huiini ca la?, naquiiñe gutaagu xtiidxa' ne cabe ca xaique rí' ti ganda gaca ni ná lu ndaa VI xtí' ndaaga 115 xtí' gu'chí' ro' bia' rí'

ra rini' gapa ca guidxi huiini ca nisa, paraa zanda ucuí ca' liidxi ca'; guiapa' guidxi layu; guiapa' ne guzuhua jma yaga huiini ndaani ca guixhi' xti' cani, drenaje, chu' carru saa ndaani xquidxi ca'; ne chu' dxu' gapa xquidxi ca', ti zaca cani lu ca diidxa' bia' ca gacani.

Ra gaca ca dxiiña' ni biete ri la?, zacani juntu zuninecabeni ca xaique ni guinaaba' ni ca. Ra guidopa pabia' guidxi guinaaba' gutaagu ne cabe laaca xtipa' ti ganda gaca xhiiña' ca la?, ma zahuini mado guidaagu lisaa cabe, ne modo gaca dxiiña' ca.

Ne ra gudaagu cabe gaca dxiiña' ca la?, naquiiñe chinanda cabe ni lu ca diidxa' ni chi quiete ri':

a) Naquiiñe gata' ti neza ni gusiene ca xaique ri' modo gutaagu xtiidxa' ca, ndaani ca dxiiña' ni chi guni ca, ti raca nga guihuini pabia' nga xlayu cada tobi cabe ne zaca ganda guni cabe ca dxiiña' ni gaca ladxi cabe ndaani xquidxi cabe o ca dxiiña' ni maca biete lu niru do' ndaaga diidxa' ra ruzulu riete ca dxiiña' ri';

b) Ca xaique ni guidagulisaa ca la? zabaqui' cabe ti neza, ni iquiiñe cabe, lu ca dxiiña' ni chi guni cabe que, zaqueca ca zata' xti' neza ni gului laacabe modo guni cabe ca dxiiña' ca, casi xi iquiiñe cabe ne banda binni guiu guni cani, ne pabia' bidxichi chi iquiiñe cabe guni cabe ca dxiiña' ri'; ne

c) Guirá' ca neza ni iquiiñe ndaani ca guidxi dagu' lisaaca' ndaani xti' guidxi ro', ca xaique xti' cabe nga gunini.

H. Guirá' ni rucaaná ne ni que racaladxi gui'chi' ro' bia' ri guni ca xaique ro' xti' ca guidxi ni nuu lu xlayu zaguita (mexicu) ca la?, laaca zunidí' ca xaique ni nuu ndaanipe guidxi ro' zaguita (mexicu) ca cani.

DIIDXA' LÁ XHOOPA

Ca xhiiña' binni guidxi ne cani zanda gacane laacabe

Ndaaga 123. Tutiisi binni zanda guni intica dxiiña', ne iquiiñe binni ni; ne zaca cadxi neza ti ganda chu' jma dxiiña', ne ra gaca cani ca la?, napani xi chinandani casi ná diidxa' ca diidxa' bia' ni rini' de xhiiña' binni.

Ca xaique ni ruzuhua lu xtiidxa' binni guidxi ne rúnica dxiiña' ndaani yoo ro' ra ria' diidxa' bia' ca la?, zabeeni diidxa' bia' ni gane binni lu xhiiña', huaxa napani xi chinandani casi ná xaguete ri':

A. Ca binni runi dxiiña' raña, cani ruzia ndaani liidxi binni, cani ruzá' xiixa lu ná, o intiisi binni runi xhiiña' xtobi la?, naquiiñe chu' ti gu'chí' ra guni firmar cabe, ti guini cabe xhiiña' cabe bia' xigaaba' dxi.

I. Ca xigaaba' dxi guindaa ca binni ri' gunica' dxiiña' la?, zandaani xhono xigaaba' dxi;

II. Pa binni guidxi guni dxiiña' huaxini la?, napa xi gacani gadxe si xhigaaba' dxi;

Que lica zanda di gaca ca ndí; casi ca dxiiña' jma naxoo ne gueda gacaná binni lu ca', ca dxiiña' ni raca huaxini ndaani yuu, ne ca dxiiña' ni gaca huaxhini ne tiidí' jma de chíí xigaaba' dxi huaxini ne guni ca xcuidi huiini de chíí bi xhopa iza cani;

III. Que zanda dí' guni ca xcuidi huiini ni napa chíí bi tapa iza, da prohibida la utilización del trabajo de los menores de catorce años. Ca ni napa jma de bia' ri' ne nahuiini de chíí bi xhooa iza la?, zuni cabe xhooa xigaaba' dxi si dxiiña'.

IV. Pur cada xhooa dxi dxiiña' la?, napa xi guizi' ladxi cabe ti dxi.

V. Guirá' ca gunaa nacaxhiiñi' la?, que zanda di' guni cabe ti dxiiña' jma naná, ne gueda guni ná laacabe lu guenda nacaxhiiñi' be; ante gapa cabe xhiiñi' cabe la?, napa cabe xi guizi'ladxi cabe xhooa binabi, ne xhooa binabi dxi ma gupa cabe xhiiñi' cabe, ne laaca ziaxa cabe bia' dxi guiaana cabe ca, ne ra guiluxe dxi icaacabe ca la?, zabigueta cabe lu xhiiña' cabe que. Ne ra guibigueta cabe lu xhiiña' cabe ca la?, napa xi guizi'ladxi cabe chupa xigaaba' ndaani dxi cayuni cabe dxiiña' ca ti ugadxi cabe xhiiñi' cabe;

VI. Ca bidxichi ni guiaxa ca binni ri la?, zacani ti guenda riaxa nayaa, ne jneza.

Chupa neza nga riaxa ca binni ni runi xhiiña' guidxi tobi ca la?, cani riaxa niru do', ca ndi la?, ziaxa ca' bia' dxiiña' gunica' ne paraa nga runi cabeni; guiropa ca la?, naquiiñe guihuini xi dxiiña' nga runi cabe ne pabia' dxiiña' nga runi cabe.

Ca bidxichi ni guiaxa ca binni runi xhiiña' guidxi la?, naquiiñe ugandani ndaani yoo lidxi, ti raca nga guiré' ca ni guiaxa ra sii cabe ni iquiiñe iquiiñe cabe ndaan' lidxi cabe, ne laaca ti ganda gusenda cabe ca xiiñ' cabe che guiziid' gun'da' ne uca. Ne ca bidxichi huiini huaxie ni guiaxa ca binni guidxi ca la?, naquiiñe guihuini xi dxiiña' ni, ti guhuini pabia' nga naquiiñe guiaxa ca binni ca.

Ti guinuini pabia' guiaxa ca binni ri la?, zutaagu xtiidxa' cadxi binni ni naca xaique xt' ca binni runi xhiiña' guidxi, ne ca binni ni raca xhiiña' ne xaique xt' guidxi ro' rí, ti guihuini pabia' nga guiaxa cabe zaca guni cabe xhiiña' cabe;

VII. Bia' dxiiña' guni tuuxa la?, naquiiñe guiaxa bia' dxiiña' guni ne que sin que ucaa nacabe xtobi ti naca, gunaa o nguio o pa nayase o pa naqu'chi' o pa za de gadxe guidxi.

VIII. Cani guiaxa ca binni ri la?, que zanda dí' gutaguná tuuxa ni, cuee cabe lu cani.

IX. Ca binni ni guni dxiiña' ndaani xiixa tieda ro' la?, zaaa cabe ti geunda riaxa casi agualdu huaxa naquiiñe chinandani casi ná ca diidxa' bia' ni chiguite rí:

a) Ziu caadxi binni gutaagu xtiidxa' ndaani guidxi ro' ni chine xtiidxa' ca binni runi dxiiña', ne xcaadxi ni chine xtiidxa' ca xaique xt' ca dxiiña' ni gaca ca, ne xcaadxi biinni guichiiña' xtiidxa' xaique ro' xt' guidxi ro', ra guidxiña' cabe ca la?, naquiiñe guini' cabe pabia' nga icaa cado de ca binni ni guni xhiiña' cabe que;

b) Ca binni gutaagu xtiidxa' ndaani guidxi ro' que la?, niru do' naquiiñe guya' cabe za cabe guinaaba' diidxa' cabe xi modo nuu xpidxichi guidxi ro' ti gaca ni ca luguia ca. Laaca zaqueca naquiiñe guya' cabe xi dxiiña' cayaadxa' ndaani guidxi ro' ti ganda gacani, pabia' nga gacani ne pabia' guni gana guidxi lu cani;

c) Ne laaca ca binni ri nga guya' pabia' bidxichi guiré' pa chu' xiixa guenda ruyuubi ca dxiiña' xtí' guidxi huaxa niru do' naquiñe guihuini paraa nga chi iquiñe ni.

d) Pa chu' xiixa' tienda ro' nacubi la?, diidxa' ro' ribee zabee chuu cani chupa chonna iza ti que gudii cani xiixa binni ni cayuni dxiiña' ndaani ni;

e) Ti guihuini pabia' quixe cada tienda ro' la?, naquiñe guihuini pabia' caquixe cabe guidxi ro' ti ganda gutoo cabe xtí' cabe ti zaca cani lu ca diidxa' ro' bia' ni riní' guiaxa ti guidoo xiixa. Ca binni dxiiña' la?, zanda gudxiña' cabe ra nuu ca xaique ni runi dxiiña' ndaani yoo ro' ra riaaxa ti ganda guidoo xiixa ca la?, ne guini' cabe ni cadí' cayu ladxi cabe, huaxa naquiñe niru do' guya' cabe xi ná ca diidxa' bia' xtí' dxiiña';

f) Pa cacaa, ca binni dxiiña' ti guenda lu ca dxiiña' xtí' la?, cadí' na cabe de que zanda cu' rua cabe lu ca dxiiña' xtí' ca xaique xtí' cabe.

X. Ca ni guiaxa ca binni ri la?, naquiñe gacani bidxichi ni ridí'dí' ndaani guidxi rí', que zanda di quixe cabe laaca' ne ti xiixa casi ne dispensa, o ne xiixa gu'chí' ni galadxi tiidí' casi bidxichi.

XI. Pa lu ca xigaaba' dxi, dxiiña' quiiba' ni jma de bia' ma nexa gaca la?, ziaxa cabe bia' xtí' 100 bia' de lu ca ni maca riixa cabe. Pa galadxi ca xaique xtí' ca dxiiña' ca guni binni extra xtí' ca la?, que zanda dí' tiidí'ni jma de chonna xigaaba' dxi nin chonna dxi seguidu. Ca xcuidi ni napa chí' bi xhopa iza la?, que zanda dí' guni cabe ca dxiiña' rí'.

XII. Ca xaique ni rudii binni dxiiña' ndaani ñaa, ndaani tienda ro' o ndaani ca layu riree guiba guchi o xiixa ru la?, naquiñe gudii cabe ca binni ni chi guni xhiña' cabe que ra gasí' o ra guizí'ladxi' ti zaca cani lu ca diidxa' bia' ca, huaxa ra icaa cabe guenda rizi'ladxi ca la?, napa xi gacani nayaa ne sicaru. Ra gaca ca dxiiña' ni canaaba ndaaga diidxa' ni biete ri la?, ca xaique xtí' ca dxiiña' ni chi gaca ca la?, naquiñe gutaagu xtiidxa' ne cabe ca binni rutoo yoo ne gaca ne cabe laaca, ti zaca gbinanda sii ca binni ni runi xhiña' cabe ca xiixa yoo baratu ne sicarú ra chindeza neca' lisaa xtica'.

Pa gueda guiree xixa diidxa' bia' ni gacane chu' ti yoo ra guni ca xaique xtí' guidxi ro' ri dxiiña' ne ca binni ni raca dxiiña' xtí' ca la?, zaa gacani zaca, ti gapa ca binni rí' ti yoo huiini ra guizí' ladxi neca' ca lisaa xtica'. Ne diidxa'

bia' ni guireeque la?, laa nga cuaqui' ca neeza ti ganda sii ca binni runi dxiiña' ca xiixa yoo huiini ra chu' neca lisaa xti' ca'.

Ca dxiiña' ne ca xtipa' ni cani' ndaaga diidxa' niru do' ni ca luguia ca la?, napa cani xi guza' cani yoo ra riziidi' binni gun'da' ne uca, yoo ra guianda binni ne intiisiru yoo ra che ca binni guidxi chinaaba ca' xiixa iquiñeca' lu guenda nabaani xti' ca'.

Ne pa ze dxi tiidí' jma de chupa gayua binni ndaani ca yoo ra raza ca dxiiña' ca la?, naquiiñe guiaana ti ndaa layu, huaxa que chi tiidí' jma de gayu gayua mil de xiagaaba' bia' layu, ti ganda gata ti luguiiaa huiini, ne gata' ti yoo ra iquiiñe binni pa xi guni o ra che ca xcuidi huiini ca chichite ca'. Ti yoo ra raza dxiiña' la?, que zanda dí' gutoo cabe nisa dxu'ni', ti gue cani cayuni dxiiña' raque ne laaca que zanda di cu' cabe ti xquite raque ti dxiiña' nga ziguini cabe cadí zichite dí' cabe;

XIII. Ca xaique xti' ca tienda ro' ca la?, naquiiñe gusenda cabe ca binni chi guni xhiiña' cabe que?, chee chi guiziidi' de ca dxiiña' ni chi guni que?, neca guintiisi dxiiña' raza ndaani xtienda cabe laca naquiiñe guni cabeni; ne ma ca diidxa' bia' xti' cabe gusiene laacabe xi neeza iquiiñe ca xaique rí' ra guni ni ná ca diidxa' ni biete rí',

XIV. Ca xaique xti' ca dxiiña' ni chi guni ca binni guidxi la?, laacabe nga guya' cabe ca binni ri pa laaca gueda gacaca' xiixa lu xhiiña' ca', ne pa gueda gapa cabe xiixa guenda huara xti' dxiiña' cayuni cabe que?; ne ngue runi ca xaique ri la?, naquiiñe quixe cabe ca binni ri pa laaca gueda gatica' lu xhiiña' ca' o pa guca nasi cabe, ti diidxa' ro' bia' ma gulaqui' gacani zaca. Ndí' zacani pa xaique xti' ca dxiiña' ni cayaca que?, biquiiñe xti' binni guyubi binni guidxi guni ca dxiiña' xti';

XV. Ca xaique xti' ca dxiiña' ni chi gaca ca la?, naquiiñe guya' chahui cabe xi guirá' nuu ndaani yoo ra raza xhiiña' cabe pa cayaadxa ni xiixa, pa nayaa nuuni pa nuu tu cayapa'ni ne guya' cabe xi zanda gacane cabe ti que chi gaca xiixa guenda naná' luguia ca binni runi dxiiña' ndaani ni que?, ne lu gueda nabaani xti' cada tobi de laacabe, ne jma ru si pa nuu gunaa ni nacaxhiiñí' runi dxiiña' ndaani cani. Ne diidxa' ro' bia' guya' gaca ca dxiiña' ri jneza ne pa co' la?, laa gusaaba' ná ca xaique ca;

XVI. Casi ca binni guidxi runi xhiiña' xtobi zanda guidaagu lisaa ca' ti que gacaná lu xquenda ca' ne ca xaique xti' ca dxiiña' ca laaca zanda guidaagu lisaa ca';

XVII. Ca diidxa' ro' bia' ca la?, ma nana cani xi nga ca guenda ridagulisaa ni runi ca binni guidxi runi dxiiña' ne cani runi ca xaique xti' ca dxiiña' ca ti gusaana ná ca' o ucueza dxi ca' xhiiña' ca';

XVIII. Ca guenda ridaagulisaa ni runi ca binni guidxi runi dxiiña' ca, ti guibezadxi ca dxiiña' ni runi ca la?, cadí naca di ni ti donda, pa laacabe canaaba cabe quiiba' lu ca bidxichi chi guiaxa cabe, ti ma que rugaadadí' bidxichi bia' riaxa cabe que?. Ca binni guidxi runi dxiiña' ca la?, napa cabe xi guseenda guidxi cabe lu chií guibidxa ante guzulu cabe ucuezadxi cabe xhiiña' cabe ra nuu ca xaique ni rapa xhiiña' ca binni guidxi que?. Ca guenda ridaagulisaa ni runi ca binni guidxi runi dxiiña' ca la?, zacani ti donda pa laacabe cucaa lucabe quiiba' lu ni riaxa cabe, ne gueeda xtale guenda naxoo ra nuu ca xaique xti' cabe que?, jma pa laacabe runi cabe xhiiña' xaique ro' xti' guidxi ro' zaguita (mexicu);

XIX. Ca guenda ruzihuadxi dxiiña' la?, zaca cani ti donda pa ca binni ni cayuni dxiiña' ndaani ca tienda ro' ca gunica' xtale xiixa ni raca ndaani ni que?, huaxa naquiñe guya' cabe xi ná ca xaique ni runi dxiiña' ndaani yoo ra riapa' xquenda ca binni runi dxiiña' ca;

XX. Ca guenda biaaní' ne ca diidxa' ni guni o cani gacaladxi ca xaique xti' ca dxiiña' ca, ne ca binni guidxi runi dxiiña' ca la?, napa cabe xi chinanda cabe casi ná lu ca diidxa' xti' ca xaique ni rapa xquenda ca binni runi dxiiña', ne ra gaca ca dxiiña' ri la?, napa xi chu' cadxi binni ni chine xtiidxa' ca binni runi dxiiña' ca, ne laca ziu xtobi chine xtiidxa' ca xaique xti' ca dxiiña' ca, ne xtobi ni chine xtiidxa' xaique ro' xti' guidxi ro' rí';

XXI. Pa xaique xti' ca dxiiña' ni cayaca que?, quená guiene ni ná ca diidxa' ni biree xia ndaani yoo ra riapa' xquenda ca binni guidxi runi dxiiña' que la?, ma raque guiluxe ca guenda lisaa xti' ca dxiiña' ni bitagu xaique xti ca dxiiña' que binni runi dxiiña' que?, ne napabe xi quixebe miatí' que bia' chonna beu, ne laaca zaguiexbe cani biniti lu xtuba' donda ni guca que?. Ca diidxa' ni biete luguia ri la?, que zacadini lu ndaaga diidxa' ni chi quiete rí'. Pa binni runi dxiiña' que?, guini' ma guiluxe guenda lisaa xti' ca dxiiña' cayuni que la?, zaluxeni;

XXII. Pa tuuxa xaique xti' xiixa dxiiña' guchugu tuuxa binni lu xhiiña', ti bidaagulisaa xcadxi binni runi dxiiña' o pa guyuu lu xiixa guenda ridaagulisaa ne binni ti guibezadxi xiixa dxiiña' ne que guini' xiñee cuhuugu' laabe la?, napabe xi quixebe binni cayuni dxiiña' que?, chonna beu o gudxiguetabe laa lu xhiiña', huaxa ma binni que nga guya' xi guni.

Diidxa' ro' bia' guini' paraa nga que zaguixe xaique xtí' ti dxiiña' pa laa bichuugú lu guenda lisaa xtí' dxiiña' ni chi gaca que?. Pa binni runi dxiiña' que?, guiree de lu dxiiña' cayuni, ti gudindene xaique xtí' dxiiña' que laa, o xheela, ca xiiñí', ca bichi' o bixhooze la?, laca napabe xi guixebe chonna beu xa binni bí'ní' xhiiña'be que. Cadi ná dí' xaique xtí' ti dxiiña' que deque, que guixe dí' be binni ni ze bisaana xhiiña' que ti gudindene ca lisaa xtibe que xa binni cayuni xhiiña' que o pa laape'be guní' gudxi ca laaca gunini cani.

XXIII. Ca xiixa ni zanda icaa ca binni runi dxiiña' o cani ma gudí'dí' lu ti iza o ra guixa ti tienda ro' la?, napa cabe xi guixa cabe bia' iza bí'ní' cabe dxiiña' ndaanini que;

XXIV. Ca bidxichi quiñe' ca binni runi dxiiña' ra nuu ca xaique xtí' ti dxiiña' ne que guixa ni la?, ca lisaa xtí' cabe la?, que zanda di quixe ni, ne que lica zandadí' guinaaba beni ca lisaa rí' guixa xpidxichibe lu ti beu;

XXV. Pa gacaladxi tuuxa binni chu' guni dxiiña' ndaani xiiixa yoo la?, que zaguixe di ti chu' ndaanini, neca gacani ndaani xiixa yoo lahui o pa guyuubi xiixa yoo ruyuubi dxiiña' gudíini laabe.

Pa guenda gaca ca bieque ri lu ti guenda ruyubi dxiiña' la?, naquiiñe guhuini pa nuu xtale dxiiña' ne sin guya' cabe pa nazi' xpidxichi tuuxa o pa binni gadxe laa, ne naquiiñe guya' cabe pa ni cuyuubi dxiiña' que laasi nga cuyaana ca lisaa xtí' ndaani lidxi;

XXVI. Guirá' guenda lisaa xtí' ti dxiiña' ni guni ti binni xhiiñí' zaguita (mexicu) ne ti gringu la?, napa xi guya' ti xaique xtí' ti yoo lahui ni, laaca huaxa naquiiñe gudíi xtiidxa' ti xaique ro' ni rine xtiidxa' guidxi ro' xtí' guidxi xtí' gringu ra che xhiiñí' zaguita (mexicu) que chi guni xhiiña' gringu que?, ti zaca zanda gabibe gringu que de que casi guiluxe dxiiña' chi gaca xtí' que la?, napa xi quixe zaca guibigueta xquidxibe;

XXVII. Que zasaca xiixa diidxa' ni cadí' nuu jneza ne que zucaa dini binni guni ti dxiiña' ni cadí' ca lu gu'chi' lisaa ra ma biaana diidxa' xtí' ti dxiiña', ne xaguete rí' cá, ca diidxa' ni que zanda gaca' lu ti dxiiña':

a) Cani ucaa ti binni guni dxiiña' dede huadxi ne sica runi ti mani'.

b) Cani quiixe ti binni biatí' ná, ne cadí' biaque nexa guixa miatí' que?, ti ca xaique ni runi dxiiña' ndaani yoo ro' ra riapa' xquenda ca binni guidxi runi dxiiña' que ma gulaquí' pabia' guixabe.

- c) Cani gacaladxi cuaqui jma de ti binabi, ti quixe binni guni xhiiña'.
- d) Cani gacaladxi quixe binni ndaani, ti yoo ra ridoo bisia yase', o cani cuidxi binni ra ridoo nisa dxu'ni', o ra ridoo guenda ro' ne jma pa cadi ca raque runica' dxiiña'.
- e) Cani ucaa binni che chisii ti xiixa ra ti tienda ra gacaladxi o ra nape.
- f) Cani ucuezadxi xpidxichi ti binni runi dxiiña', ne que quixe ga laabe ti bicheebe lu xiixa.
- g) Cani ucaa ti binni runi dxiiña' gusaana ca guenda ni gacane laa lu xhiiña' casi pa gacaná lu xhiiña', o ca guenda huara ni guenda inaze laa, lu xhiiña', o cani que guni o pa gacaladxi guixale de lu xhiiña'.
- h) Ne guirá' ca diidxa' ni ucaa binni que gusaana xhiiña' ne gusaaná ca guenda ni gapa' laa neca diidxa' bia' cudii xtipa' xti' laabe.

XXVIII. Diidxa' ro' bia' nga quixhe' cani zanda gapa ti lisaa ndaani liidxi, ne cani gapa cabe ca la?, xti' cabeni ne guirutí' zanda guiaana neni o gutaquná cani, ne zanda gusaana ne cabeni ca xiiñí' cabe;

XXIX. Ca binni guidxi runi dxiiña' la?, napa cabe xi ganna cabe xi guirá' guenda diidxa' nga cá lu ca diidxa' bia' xti' ca yoo ra rianda binni ca, ne lu cani ca la?, napa xi icá ca guenda riapa' xti' ca binni birugui xtipa' xti', ca binni goola, guenda nabaani xti' binni pa guenda gaca ca' xiixa ne guiaanaca' que cheeca' chi guni ca' xhiiña' cabe, ne pa guenda gacaca' xiixa lu xhiiña' cabe, ne laca zanda guseenda cabe ca xhiiñí' cabe che ca chi guiapa' ca' ndaani xiixa yoo ra riapa' xcuidi, ne xiixa ru diidxa' ni guirè' ne gacane ca xhiiña' ca binni rañaá, o ca binni ni que riaxa xtale ti zaca ganda guiapa' guirá' xixe lisaa;

XXX. Ne laaca zaqueca zadxeela ca neeza gacane ca binni dagulisaa ne gacane binni guidxi, ti ganda gapa ca ti liidxi huiinica' ne quixe cani chahuiduga, ne

XXXI. Ra gaca ca dxiiña' xti' ca diidxa' bia' ca ndaani xti' guidxi ro' xti' zaguita (mexicu) la?, ca xaique ro' xtini ca nga guya' gaca ca dxiiña' xtini, huaxa ca dxiiña' ni chi guiete rari di la?, ca xaique ro' xti' guidxi ro' zaguita (mexicu) nga guya' gaca cani:

- a) Ca yoo ra ria' cani riquiiñe binni guidxi ne rudiica binni dxiiña'.
 1. Ra ria' lari;
 2. Ra ria' biaaní
 3. Ca yoo ra ridopa bandaa ne foto xti' binni;
 4. Ra ria' doo rigaa;
 5. Ra raca dxiiña;
 6. Ndaani yuu ra riree guiiba' risaca;
 7. Ca yoo ra ria' guiiba' ne ganda iquiiñe' guirá' xiixe guiiba' ni guiree ndaani' guidxi layu rí;
 8. Ra raca nisa gas;
 9. Ca yoo dxiiña' ra ria' nisa gas ne gasolina;
 10. Ra raca cementu ;
 11. Ra ria' guiu;
 12. Ra raca carru, ne ra ridoo ca xquiiba' ni ne ra raca chaahui biaaní xtni;
 13. Ra ria' xiixa nisa, ne ca ra raca pastia o xiixa ni gusianda binni;
 14. Ra raca gu'chí' ne xiixa guidi;
 15. Ra ria' guirá' xiixe za;
 16. Ra raca guenda ro ni riapa' ne riu ndaani xiixa lata, o ndaani xiixa caja
 17. Ca ra raca xiixa nisa guenda re' ne riapa' ndaani xiixa bote;
 18. Ra riza tren;
 19. Ra raca tabla triplay o ca ra riquiiñe cabe yaga ni gaca tabla;

20. Ra ria' speju, o ra ridooni o ra raca xiixa botella ni rilaa; ne

21. Gueeza, ca yoo ra ria' gueza guidoo;

22. Ca yoo ni ganda gutiñe bidxichi.

b) Yoo ro' ra raca dxiiña' o ca tienda ro':

1. Ca tienda ro' ni nuu lu ná xaique ro' xti' guidxi ro' zaguita (mexicu);

2. Ca tienda ro' ni nuu lu ti guendalisaa xti' guidxi ro' ti gutoo xti' o cani bidii guidxi laaca ti gu'chi' ti ganda gutooca' xtica' ne xcaadxi yoo ni gacaladxi chu' lu ca dxiiña' xti' guidxi ro' ri'; ne

3. Cani caguu binni dxiiña' neca nuuca' ndaani ca nisa do' xti' guidxi ro' zaguita (mexicu).

Ra gaca xiixa dxiiña' ne guniná guenda xti' chupa chonna guidxi la?, laca ca xaique xti' guidxi ro' zaguita (mexicu) ca nga guya' gaca cani jneza; ca gu'chi' ra riego lisaa binni ti gunica' dxiiña' ni maca biete de que napa xi gacani ndaani ca guidx ro'; cani napa xide guni ca xaique xti' xiixa dxiiña' ti chu' jma guenda riziidi, ti zaca nabaqui' diidxa' ro' bia' gacani; ne laca napa ca xaique xti' ca dxiiña' ca xi gusenndaca' ca binni ni chi guni dxiiña' xtica' ca cheeca' chi guziidi' ca jma de ca dxiiña' ni runica', ne laca naquiiñe gaca nayaa ndaani ca yoo dxiiña' xti' cabe, ti ca xaique xti' guidxi ro' ca, napaca' xi guseendaca xaique xti' ca guidxi huiini ca chi guya' ca' pa nayaa nuuni, ti zaca ná diidxa' ro' bia' gacani.

B. Lu ca dxiiña' ni guni ca xaaique ni runi dxiiña' ndaani yoo ra ria' diidxa' bia', ne xaique xti' guidxi ro' zaguita (mexicu) ne binni ni runi xhiiña' cabe la?, napa xi:

I. Guindaani xi gacani xhono xigaaba dxi ridxi' ne pa huaxini ni la?, zacani gadxe xigaba'. Ne pa guindaani jma de bia' ma nexa ca la?, zaguiiba bia' xhupa xhonna de bia' ni maca riixa cabe. Nin ti dxiiña' que zanda di' tiidi' jma de chonna xigaaba' nin jma de chonna guibidxa.

II. Pur cada xhopa gubidxa guni binni dxiiña' la?, napa xi guiziladxi ti dxi;

III. Guirá' binni runi dxiiña' la?, napa cabe xi icaacabe ti vacacion huaxa que chi tiidi' jma de gande gubidxa;

IV. Bia' bidxichi guiaxa binni runi dxiiña' la?, napani xi chinandani bia' bidxichi napa guidxi ro' zaguaita (mexicu), ne ra guya' cabe pabia' napa la?, que chi ndete cabe lu ni, huaxa laca napani xi chinandani casi ná lu ndaaga 127 xti' gu'chi' ro' bia' rí ne ni ná lu ca diidxa' xti' diidxa' ro' bia'.

Nin que ziudxi tiidí' ca guenda riaxa ca jma de lu cani riaxa huaxie, ne napa xi gacani ndaani guidubi guidxi ro' rí ne ndaani ca guidxi xti' guidxi ro' zaguaita (mexicu).

V. Ca binni guni xtale dxiiña' la?, bia' queca napa xi guiaxa ne ca gucaca' gunaa o nguú;

VI. Diidxa' ro' bia' nga guini' padxi zanda gutaguná tuuxa xpidxichi binni, o guiaxha ti ndaa lu ni.

VII. Ca binni ni guyubi dxiiña' la?, napaca' xi guzuhuínica' pa napa ca xtale guenda biaaní' ne nagueenda zaziidica' ni gabi cabe laaca'. Zabaquí' guidxi ro' ti ra guziidí' binni guni dxiiña';

VIII. Ca binni ni nuu jma ma xadxi cayuni dxiiña' paaxara' la?, zanda quiiba' jma luguia ne pa nanabe xtale de ca dxiiña' ni runibe ca la?, laca zaguiba'be jma. Huaxa ra ra gaca ni ná ca diidxa' rí la?, napa xi guihuini tu jma caquiñeni, ti pa jma ru si tobi de ca binni cayuni dxiiña' que?, laasi runi dxiiña' ndaani lisaa xti';

IX. Pa gacaladxi cabe cue' cabe o guchugu cabe tuuxa binni de lu xhiiña' la?, napa cabe xi gusuhuini cabe xiñeeni, huaxa zacani casi ná ca diidxa' xti' diidxa' ro' bia'.

Pa gueda guchugu cabe tuuxa binni de lu dxhiiña' ne que guíni' cabe xiñee bíni' cabe ni la?, zanda guinaababe gudxigueta cabe laabe lu dxiiña' que o quiixe cabe laabe bia' dxi o iza bíni'be dxiiña' que , huaxa ra gaca ca bieque ri la?, zacani casi nabaquí' ca diidxa' bia' ni rapa dxiiña'. Pa gueda guchuugu cabe xiixa dxiiña' ra runi tuuxa binni la?, ca binni ni runi dxiiña' ca napa cabe deruchu guinaaba' cabe icaacabe xti' dxiiña' casi ni napa cabe que o guiaxa cabe bia' dxi o iza bíni' cabe dxiiña'.

X. Guirá binni guidxi runi dxiiña' gacaladxi guidagulisaaca ucaalu ca' ti que gaca' xiixa lu xhiiña' ca la?, zanda.

Ne laaca zanda guidagulisaaca cabe ti ganda guzuhuadxi cabe ca dxiiña' ni

cayuni cabe que?, huaxa niru do' naquiñe guya' cabe xi ná lu ca ndaaga xti' diidxa' ni rapa xhiiña' binni guidxi, jma pa gueda guni ca xaique runi xhiiña' guidxi cani;

XI. Ca guenda ridagulisaa ni runi ca xaique rapa guidxi pa gueda gaca xiixa ne napa cabe xi quixe cabe cani ca xaguete ri':

a) Napa cabe xi quiixe cabe ca binni ni gueda gaca xiixa lu xhiiña'; ne ca guenda huara ni icá laacabe lu xhiiña' cabe; ne pa gueda gati tuuxa, pa guirugu lu ca guenda nazaca' xti' cabe, pa naca xhiiñi' tuuxa gunaa ni runi dxiiña' ndaanini ne pa nagoola binni;

b) Pa gueda gaca tuuxa xiixa lu xhiiña' o pa gaca huara la?, ziaana ga dxiiña' xti' cabe que bia' dxi guini' ca diidxa' bia' xti' ca dxiiña'.

c) Guirá' ca gunna nacaxiiñi' ni runi dxiiña' la?, que zanda di guni cabe xiixa dxiiña' ni guniná laacabe o gueda gacaná ca baduhuiini ni nuu ndaani cabe que; ante xhana cabe la?, ziana cabe ti beu, ne ra ma guxhana cabe ca la?, ziana cabe xhupa beu ne ziaxa cabe bia' dxi guiaana cabe que ne zabigueta cabe lu xhiiña' cabe ne laaca zaca cabe ca guenda ni maca napa cabe o ni ucuaacabe pur xhiiña' cabe; ne ra guibigueta cabe lu xhiiña' cabe ca la?, napa xi guizi'ladxi' cabe chupa xigaaba' ndaani dxi cayuni cabe dxiiña' ca ti ugadxi cabe xhiiñi' cabe; ne laaca napa xi guya' ti dotor laacabe ne icaacabe xiixa pastia gabi cabe, ne laaca zanda guseenda cabe ca xhiiñi' cabe chi guiaapa' ndaani ca yoo ra riguiapa' xcuidi huiini.

d) Ca lisaa xti' ca binni runi xhiiña' guidxi la?, laaca napa xi guya' ti dotor laaca pa gueda gaca huara cabe ne icaacabe ni gabi cabe, huaxa niru do' naquiñe guya' cabe xi ná ca diidxa' ro' bia' ni rapa ca xhiiña' binni guidxi.

e) Zata' ti dxi ne paraa che cabe chi zacabe ti guizi' ladxi cabe chupa chonna gubidxa, ne laaca ziu ti tienda ra chisii cabe ni iquiñe necabe lisaa xti' cabe huaxa naquiñe huxie guisaca cani guido ndaanini ca.

f) Zanda sii ca binni runi dxiiña' ca xiixa yoo huiini o cuezaca' ndaani xiixa yoo ni que guisaca laaca xtale ne huaxa naquiñe gacani casi ná ca diidxa' ni maca biete luguia ri' pa gacaladxi ca guni cani. Ne jmarusi, xaique ro' xti' guidxi ro' zaguita (mexicu) ca zabaqui' ti ndaa bidxichi ti gata ti yoo ro' ni ni guya' cui jma yoo huiini ra ganda sii o cueza ca binni ri', huaxa que zasacani laacabe xtale, o laacabe guya' cabe xi guni cabeni pa guni cahui cabeni, o ucui cabeni modo gacaladxi cabe guni cabe.

Ca bidxichi gata' lu ná ca binni ni runi dxiiña' ndaani yoo ro' ni ruya' cui jma yoo huiini ca la?, naquiñe ganna ca binni dagulisaa ti chu' ti guenda sicaru ndaani guidxi rí' ti zaca nabaquí diidxa' ro' bia' xtí' cabe gacani, ti laaca laani nga cuaquí' ni ca neeza xtí' ca dxiiña' rí'.

XII. Ca guenda naxoo ni gapa tuuxa, o caní gapa xtale binni la?, napani xi chí gatani lu ná ca xaique ni ruya' gaca dxiiña' jneza ne rapa ca guenda xtica' binni runi dxiiña' ti zaca caní lu ca diidxa' bia' xtini ca. Ca guenda nagaana o ca guenda naxoo ni guenda ne ca xaique ro' ni ruuya' chu' guidxi ro' jneza ne sin ti guenda naxoo casi ca xaique diidxa' ro' bia' ca la?, napani xi chigatani ra nuu ca xaique ni runi dxiiña' ndaani yoo ro' ra riapa' xpidxichi guidxi ro' ne ruuya' guni ca xaique diidxa' bia' xhiña' jneza ti ganda guchugu lu ca guenda naagana cazaca' cabe que?; ne ca guenda naagana o guenda naxoo ni guizacane ca xaique ni runi dxiiña' ndaani yoo ro' ra ríree xia donda ne ca binni ni runi xhiña' ca la?, laca nga cue xia ca guenda naxoo ni cayaca que.

XIII. Ca dxu' soldadu, ca dxu' ni riza ne rapa ca nisa do' xtí' guidxi ro' rí', ca binni ni runi xhiña' ca xaique ni rine xtiidxa' guidxi ro' xtí' guidxi, ca xaique rugaani donda ne ca xaique ro' xtí' guirá' xixe dxu' la?, laca diidxa' bia' xtí' cabe nga guiliidxi laacabe pa gucheene cabe laa.

Guirá' ca xaique casi ca xaique rugani donda, caní ruluí' ti xiixa ni guca', ne ca dxu' ni runi dxiiña' ndaani ca guidxi ro' ne ca guidxi huiini ca la?, zaree cabe de lu xhiña' cabe pa laacabe que guni cabe ni ná ca diidxa' ca diidxa' bia' xtí' cabe ne laaca diidxa' bia' rí' guini' pa guidxaa cabe o guireecabe. Pa ca xaique rí' guini' ca' de que guiree, guidxaa, tuuxa sin que gabi cabe laa xiñee cayacani la?, guidxi ro' zaguíta zaguixe laacabe bia' dxi ne iza b'ni' cabe dxiiña' ne me zanda di guibigueta cabe lu dxiiña' cayuni cabe que, neca gacaladxi cabe guyubi cabe xiixa neeza ucaalu cabe ti ganda guibigueta cabe xhiña' cabe.

Ti ganda guibaani xaique ni rugaani donda, ca xaique ni rului xiixa ni guca jneza ne ca lisaa xtí' ca la?, ca xaique ro' xtí' ca guidxi ro' ne ca guidxi huiini, napa cabe xi cuaquí' cabe xiixa neza ni gacane guiapa' ca lisaa xtí' ca binni rí'.

Zudii guidxi ro' zaguíta (mexicu) ca binni ni runi dxiiña' dxu' soldadu, ne ca binni rapa guidxi ro' caní ca lu lana f) xtí' ndaaga XI ni ca lu ndaaga diidxa' rí', ne casi ná ca diidxa' xtí' ca binni rapa guidxi ca nga gacani.

XIII Bis. Ca xaique runi xhiiña' guidxi ro' zaguita (mexicu) ne laca zeedaca' lu ca dxiiña' ra riu ca xaique xti' ca yoo ra riapa' bidxichi ndaani guidxi ro' ri la?, zutagune cabe xtiidxa' cabe ca binni ni guni xhiiña' cabe casi ná lu ndaaga diidxa' rí.

XIV. Diidxa' ro' bia' nga cuaquí' ti binni guiaana lu ti dxiiña' ni gapacabe laa xtale *confianza* ne que zucaalu laacabe. Ca binni ni guiaana lu ca dxiiña' ca la?, laca ziaxaca' casi riaxa xcadxi que, ne laca zacaaca' ca guenda ni rapa ca binni runi dxiiña' ndaani guidxi rí.

DIIDXA' LÁ GADXE

Ni zanda guirugulú

Ndaaga 124. Guirá' ca xtipa' ni icaa ca xaique ni runixhiiña' guidxi ro' rí la?, pa cadí ca ni lugu'chí' ro' bia' ri la?, que zanda dí' guni cabe caní ne ca xaique xtí' ca guidxi ca la?, napa ca xi ucueza dxi caní.

Ndaaga 125. Nin ti binni que zanda di cui cabe laa, guni chupa dxiiña' xtí' guidxi ro' zaguita (mexicu), nin cui cabe laa guni xtí' dxiiña' xtí' guidxi neca cayuni xhiiña' xquidxi; huaxa ni cui cabe gunidxiña' ca la?, naquiiñe cui tobi de cadxiña' caguni.

Ndaaga 126. Que zanda di quiixe binni xiixa pa cadí caní lu ca gu'chí' xtí' cadíidxa' bia' ni ruya' guixa xpidxchi guidxi.

Ndaaga 127. Ca xaique ni runi xhiiña' ca guidxi ro' ne ca guidxi huiini xtí' zaguita (mexicu) ca, ne ca binni ni runi xhiiña' cabe neca nacani ndaani xiixa guidxi huiini o ndaani xiixa guidxi ro' xtí' guidxi ro' ri la?, ziaxaca cabe ti ndaa bidxichi bia' dxiiña' cayuni cabe.

Caní chí' guíaxa cabe ca la? cada iza nga guihuini pabí' ni ne bia' dxiiña' guni cabe nga guíaxa cabe ne casí ná ca díidxa' ni ca xaguete ri nga naquiiñe chinanda caní:

I. Ni rica binni zaca guni dxiiña' nga ti xiixa nacani bidxichi o ti guenda roo, ne laaca ca bidxichi ni ricaa ca binni casí aguinaldu, ra quiiba' lu xpidxichi cabe o intisiru' ni icaacabe ti cayuni cabe xhiiña' cabe, caní que zanda icaa cabe o guíaxa cabe nga ca bidxichi ni chí' guré' ne cabe pa che cabe chí' guré' cabe chí' guni cabe xiixa xtí' xhiiña' cabe.

II. Nin ti xaique ni runi xhiiña' guidxi que zanda di guíaxa jma que xaique ro' xtí' guidxi ro' zaguita (mexicu), ne que ziaxa di de lu ca dxiiña' ni biete lu ndaa ni ca luguía ca.

III. Nin ti xaique ni runi xhiiña' guidxi que zanda di guíaxa jma que xaique xtí'; paaxa guíaxa be jma que xaique xtibe la?, naquiiñe gapabe xiixa gu'chí' ni guini' de nannabe xtale de dxiiña' ni cayunibe que o pa napabe xtale dxiiña' ni runibe, ne ra igaaba ca bidxichi ni guíaxabe ca la?, naquiiñe gacani huaxie de ni riixa xaique ro' xtí' guidxi ro' zaguita (mexicu).

IV. Que ziaxa di ca xaique ni ma bí'ní' dxiiña' ma xadxi, ne que zacadicabe xiixa bidxichi huiini pa laacabe que nucaa cabe laacabe lu xiixa gu'chí' bia' ra cudii xtiidxa' cabe pabí' dxi chí' guni cabe dxiiña', ti lu díidxa' bia' ma caní zaca, o pa cadí caní lu ca díidxa' bia' ni rapa binni dxiiña'. Ca díidxa'

ri la?, que ziudi cani ndaani ca dxiiña' ra riaxa binni ti ma b'ni' dxiiña' ma xadxi. Ni que ridaagu lu ca dxiiña' ri nga cani runi ca xaique ni runi xhiña' guidxi ne napa xti pa pur xhiña'.

V. Bia' guiaxa ca xaique ca la?, napa xi ica ni lu ti ndaa gu'chi' ti ganna binni pabia' naga riaxa cabe, ne naquiiñe guihuini pabia' nga cacaacabe ne pa cadí cayaxa cabe ne cacacabe xiixa la?, laaca naquiiñe guihuini xi nga cacaacabe.

VI. Yoo ro' ra riree xia diidxa' bia', ne ca yoo ro' ra ria' diidxa' bia' xti' ca guidxi huiini, ne yoo ro' ra ria' xtiidxa' guidxi ro' zaguita (mexicu) la?, ra rugaandasi xtipa' xti' cabe la?, zabee cabe diidxa' bia' ti ganda gaca ni ná ca diidxa' ni cayete lu ndaaga rí' ne ca xtiidxa' gu'chi' ro' bia' rí', ne laaca gusaaba nani ca xaique ni que guni ca dxiiña' ni cayeté lu ca ndaaga rí'.

Ndaaga 128. Guirá' binni ante icaaca xiixa guenda ne chigunica xhiña' guidxi la?, naquiiñe guini'cabe ne guna cabe xtiidxa' gu'chi' ro' bia' rí' neca diidxa' bia' ni guiré' luuni.

Ndaaga 129. Panuu dxi guidxi la?, nin ti dxu soldadu que zanda di guni xti' dxiiña', nepa que gabi ca xaique xti' laaguni o chindaquica xiixa yoo ra gunica dxiiña'. Ra zanda guixhale ti yoo ra guiu ca dxu ri nga ndaani' ca yoo ro' xti' xaique ro' xti' guidxi ro' rí' o ra gata ni nga fuera de ca guidxi ca.

Ndaaga 130. Dede dxi bixhale ca yu'du' ca' lu ca xhiña' ne lu ca xtiidxa' bia' guidxi ro' zaguita (mexicu) ca la?, lu ndaaga rí' ca cani. Guirá' xixe yu'du' ne tutiica binni rinanda xiixa yu'du' la?, napa cabe xi chinanda cabe ca ni ca lu ca diidxa' bia' xti' guidxi rí'.

Ca xaique ni runi dxiiña' ndaani yoo ro' ra ria' diidxa' bia' xti' guidxi ro' ri nga guya' ca' cha xiixa diidxa' bia' ni uca ridxi ca binni ni rinanda tuuxa yu'du'. Corresponde exclusivamente al Congreso de la Unión legislar en materia de culto público y de iglesias y agrupaciones religiosas. Diidxa' bia' ni guiré' ne ulidxi ca binni ni chinanda tuuxa yu'du' ca la?, napani xi chinandani casi ná ca diidxa' ni ca xaguete rí':

a) Ca yu'du' ne ca binni ni rinanda ni ca la?, ca diidxa' bia' xti' guidxi ro' zaguita (mexicu) la?, zapa laacabe huaxa niru do' naquiiñe ucaa cabeanni lu xiixa gu'chi' de que naca cabe binni yu'du'. Ne ma ca diidxa' ro' bia' ca gusiene laacabe xi guni cabe ti ganda gapa cabe xqu'chi' ni.

b) Nin ti xaique ni runi xhiíña' guidxi que zanda di chu' lu ca dxiiña' ni runi ca binni yu'du' ca;

c) Tutica binni guidxi xhiíñi' zaguita (mexicu) la?, zanda gunica' o gutaagu ca' binni guidxi ti chinandaca' intiisi yu'du' gacaladxi ca'. Casi ca binni guidxi xhiíñi' zaguita (mexicu) ne ca binni gringu la?, napa cabe xi chinanda cabe cani ca lu xtiidxa' ca diidxa' ro' bia' xti' guidxi ro' ri' ti ganda guindisa cabe xiixa yu'du';

d) Tutica xaique xti' ti yu'du' que zanda chu' guni xhiíña' guidxi ti zaca nabaqui' diidxa' ro' bia' gacani. Pa xhiíñi' guidxi laabe la?, zanda chebe chi guzebe lu gu'chi' ti ganda cui binni nin gaca xaique xquidxibe; huaxa que zanda di cui cabe laabe gacabe xaique xquidxibe. Ca binni ni gusaana xiudu' casi nabaqui' diidxa' ro' bia la?, zanda cui cabe laa gaca xaique xti' xiixa guidxi xti' zaguita (mexicu).

e) Nin ti xaique ni riza nanda ti yu'du' que zanda di saa ucaa ridxi binni guidxi che chi guze lu xqu'chi' tuuxa binni ni caguite ti gaca xaique guidxi, ne laaca que zanda di chu' lu política. Ne ra cabiidxi cabe binni uca diaga xtiidxa' cabe que zanda di guini' cabe xiixa o ucaa nacabe ca diidxa' ro' bia' xti' guidxi ro' ri' o ucaa nacabe lari ndxo' xti' guidxi ro' ri'.

Que lica zanda di' uca ca binni ni riza lu política ca xiixa diidxa' ni zeeda lu xqu'chi' ca binni ni riza lade binni yu'du'. Ne laaca que zanda di cuidxi cabe binni guidxi ndaani xiudu' cabe ne güi necabe laaca diidxa' ti che ca' chi guzee ca lu ca gu'chi' ti cuica xaique xquidxi ca.

Ra gudii xtiidxa' cabe de que zuni cabe ni ná ca diidxa' bia' ca la?, napa cabe xi guni cabe ni ná, ne pa que guni cabe ni ná ni la?, ma laani guya' ni xi guni ne ca binni ca.

Ca xaique xti' ca yu'du' ca, bixhozebiida cabe, xhiaga cabe, bichi' cabe, ne nexeela cabe, ne zacaqueca ca binni dxaga saa necabe ndaani xiixa yu'du' la?, que zanda di guiana necabe ca yu'du' ca jma pa cadí xhiíñi' xiaga ca binni ni biete ca laacabe.

Pa ca binni ni chu' ndaani ca yu'du' ca ma bichaganá ca', o caru' la?, ca xaique ni runi xhiíña' guidxi ca nga guya' ca bieque ri' ti diidxa' ro' bia' ma gulaqui' ni zaca, ne laacabe gudii cabe xtipa' ca binni ri' la?, ne ti guni cabe ni chiguni cabe jneza.

Ca xaique ni runi xhiña' guidxi' ro' zaguita (mexicu) ne ca xaique ni runi xhiña' ca guidxi huiini ca la?, napa xi guya' cabe gaca ca dxiiña' rí ndaani xquidxi cabe ti zaca nabaquí' diidxa' ro' bia' caní.

Ndaaga 131. Guidxi ro' zaguita (mexicu) si nga zanda uca xiixa xtí' cue caní chí guidoo ndaani luguiaa ro' xtí' ca gringu ca o caní chí tíidi ndaani guidxi ro' rí, ne laaca cue xiixa diidxa' bia' ni uca ridxi ca binni ni cadí cayuni ni na ca xtiidxa' be, ne laaca zanda ucuezadxibe xiixa ni canaguidoo neca de ra tíisi zeeda caní; neca cue ca xaique ro' xtí' guidxi ro' rí' cue xiixa diidxa' bia' ni guzete ni ca lu ca ndaa VI ne VII xtí' ndaaga 117 xtí' gu'chí' ro' bia' rí.

Ca xaique ni ruzuhua lu xtiidxa' binni guidxi ne runi dxiiña' ndaani yoo ro' ria' diidxa' bia' ca la?, zudii xtiidxa' cabe xaique ro' xtí' guidxi ro' zaguita (mexicu) rí, ti ganda uquixe o guindete lu caní ríaxa ti ganda guiu xtí' guidxi ro' xtí' gringu gutoo xtí' ndaani luguia ro' xtini ne zacqueca caní chí guidoo xtini ndaani xquidxi ca gringu ti ganda cha xcaxdi nacubi; ne laaca zaqueca pa guiuba ga si caquiiñe cabe guchugu cabe lu ca cuana ni chí guidoo ndaani ca luguiaa ro' xtini ne caní chí guidoo xtini ndaani xtí' luguia ro' xtí' xtí' guidxi ro', ti zaca guirooba xpidxichi guidxi o pa gaca ladxi cabe guni cabe xiixa ni ganda gacane guidxi ro' guirooba'. Ne ra guseenda xaique ro' xtí' guidxi ro' zaguita (mexicu) gu'chí' ra ica pabia' bidxichi caquiiñe la?, napa xi guni cada iza, ne ra nuu ca xaique ni runi dxiiña' ndaani yoo ro' ra ria' diidxa' bia' ca nga cheni ti ma guini' ique neca pa zaree bidxichi canaababe que.

Ndaaga 132. Ti ganda iquiiñe cabe ca yoo ra guiapa caní riquiiñe xaique ro' xtí' guidxi ro' rí' o ra guipa ca xtí' guidxi la?, lu ná ca xaique ni ruzuhua lu xtiidxa' binni guidxi nga guiana caní ti zaca magulaquí' diidxa' ro' bia'; jma pa nuuca, caní ndaani' ca guidxi ro' xtí' zaguita (mexicu) la?, naquiiñe ica cabe xtiidxa' ca xaique xtí' guidxi ro' ca ti ganda iquiiñe cabe ni.

Ndaaga 133. Guirá' diidxa' bia' ni guiré' lu gu'chí' ro' bia' rí' ne ca ni cue yoo ro' ra ria' diidxa' ca, ne guirá' diidxa' bia' ni guidaguneni o caní gutagu xtiidxa' xaique ro' xtí' guidxi ro' zaguita (mexicu) ca la?, zaca caní ti diidxa' ro' bia' xtí' guidxi ro', huaxa ra gaca caní ca la?, naquiiñe gudii xtiidxa' ca xaique ruzuhua lu xtiidxa' binni guidxi ni rabi cabe senador caní. Guirá' ca xaique diidxa' bia' xtí' guidxi rí la?, naquiiñe chinanda cabe ni na lu gu'chí' ro' bia' rí, ne caní ca lu ca diidxa' ro' bia' xtí' guidxi rí, ti guni cabe xhiña' cabe jneza, neca gadxe ni guini' gu'chí' ro' bia' ne diidxa' bia' xtí' ca guidxi ro' xtí' guidxi ro' zaguita (mexicu).

Ndaaga 134. Ca bidxichi ni guiana luná guidxi ro' zaguita (mexicu), ca guidxi ro', ca guidxi huiini ne ca yoo ro' ni runi xhiina' ni la?, ziapa chahui cani, ti guya' binni paraa chi iquiiñeni.

Guirá' ca dxiiña' guluxe ne iquiiñe cabe xpidxichi guidxi la?, napa cani xi guidxiña cani ra nuu ca xaique ni cuaqui ca guidxi ro' zaguita (mexicu) ne ca guidxi ro' xti' zaguita (mexicu), ti ganda guihuini pa dxandi biquiiñe ca bidxichi gunaaba cabe que, lu dxiiña' ni cayuni cabe que, ti zaca ganda gaca ni ná lu ndaaga diidxa' ni ca luguia ca. Sin gacaná o guiré' chu ca ndaaga diidxa' ni ca lu ndaa VI xti' ndaaga 74 ne 79 xti' gu'chi' ro' bia' rí

Ca ra runi gana guidxi, uquixe, o intisi guni la?, zacani casi ná ca gu'chi' ni ribidxi binni, ti gacani jneza ne nayaa, ne ca diidxa' guidopa ra guidxiña' ca binni ni gulidxi gu'chi' ca la?, napa cani xi ica cani lu ti gu'chi' ne ra ma biluxe ucuca cani la?, napa xi guiapani ndaani xti' gu'chi' ti guibiani neza lu binni guidxi, ti zaca ganna ca' pabia' nga ruquixe guidxi ro' zaguita (mexicu) ca xti', ne pa sicaru ru' nuu ni chi uquixe que.

Ra gaca ca dxiiña' ni biete lu ndaaga diidxa' ni ca luguia ca la?, cadí jneza nuu ca ni la?, ca diidxa' bia' xti' guidxi ri cuaqui ca neza ne ca dxiiña' ni naquiiñe ti ganda gu'ni' cabe para biquiiñe cabe ca bidxichi ni bidii guidxi laacabe que, ne zaca zahuini de que nachahui cabe ne ñuu ti guenda gubaana lade cabe n era gaca cani zaca la?, zahuini de que guidxi ro' cayuni xhiina' jneza.

Ra iquiiñe ca xaique xti' ca guidxi ro' ne ca guidxi huiini xti' guidxi ro' zaguita (mexicu) ne ca xaique ni runi xhiina' guidxi la?, napa cabe xi chinanda cabe ni ná lu ndaaga rí' ne lu ca diidxa' bia' ni rapa xpidxichi guidxi. Ra cu' bia' cabe ca dxiiña' ni raca ndaani ca guidxi xti' zaguita (mexicu) la?, zacani ndaani ca yoo ni biete lu guiropa ndaaga diidxa' xti' ndaaga rí'.

Guirá' xixe binni o xaique ni runi xhiina' a guidxi la?, napa cabe xi guya' cabe gaca guirá' xixe dxiiña' rí' ti diidxa' lá guidapa xti' gu'chi' ro' bia' rí' cani' gacani zaca.

Guirá' ca xaique xti' ca guidxi ro' ne guidxi huiini xti' zaguita (mexicu) la?, napcabe xi guni cabe xhiina' cabe jneza ne que chi gudii cabe bidxichi cadxi binni ne xcadxi co', ne laaca que chi gaca ne di cabe ti partidu ne xtobi co'.

Guirá' diidxa' guzaabi o ca gu'chi' ni uquiidxi ca xaique ni ruzuhua lu xtiidxa' binni guidxi o cani tutiisi xaique ni runi xhiiña' guidxi la?, napa cani xi gaca cani ti dxiiña' ni gacane binni guidxi o ni gusiidi laacabe pa xi gueda gaca cabe xiixa. Ne ra gaca ca dxiiña' ri la?, que lica zanda di uca ti foto xti' ti xaique ni runi xhiiña' guidxi ni cayuni cani ca, lá cabe, ridxi xti' cabe, o xiixa ni gului tu laacabe.

Guirá' xixe ca diidxa' bia' ca ne de ra ruganda xtipa' xti' cani la?, napa cani xi uca cani riidxi gaca cani ná lu guiropa ndaaga diidxa' ni biete luguia ca, ne laaca zusaba nani ca binni ni que guná ni na ni.

DIIDXA' LÁ XHONO

Guirá' ca diidxa' ni ma bixa ne ni ma
guca chaahui lu gu'chi' ro' bia' ri'

Nadaaga 135. Guĩ'chĩ' ro' bia' ri la?, zanda guixa xiixa lu ni la?, ne gaca chahui xiixa ndaaga ni ca lu ni. Pa gaca ladxi cabe guxha cabe o guni chahui cabe ca diidxa' ni ca lu ca ndaaga xti' ca guĩ'chĩ' ro' bia' ri la?, naquiiñe gutagu xtiidxa' ca xaique ni runi dxiiña' ndaaní' yoo ro' ra ria diidxa' bia' ca la?, ne naquiiñe gudii xtiidxa' jma de galaa cabe, ne ca diidxa' o ndaaga ni guni chaahui cabe o guxha cabe ca la?, naquiiñe gudii xtiidxa' ca xaique ro' xti' ca guidxi xti' zaguita (mexicu) ca cani. Ca xaique ro' ni runi dxiiña' ndaaní' yoo ro' ra ria' diidxa' bia' ne ruzuhua ca lu xtiidxa' binni guidxi o ca xaique ni riaana guni dxiiña' que la?, zugaaba cabe pabia' xaique nga bidii xtiidxa' ti guixa o gaca chahui xiixa ndaaga xti' guĩ'chĩ' ro' bia' rí.

DIIDXA' LÁ GA'

Guirá' ni guniná ca diidxa' ni ca lu gu'chĩ' ro' bia' rĩ'

Ndaaga 136. Que zanda di guniti guĩchi' ro' bia' ri' xtipa' xti' neca chu' xiixa' guenda naxoo ndaani' gudxi ro' ri' gacaladxi guxha ca xtiidxa' ni. Ne pa guenda gaca xiixa ne guenda ti tuuxa xaique guidxi ne que guni ni ná guĩchi' ro' bia' ri, ne gusaaba ná guidxi ro' biati' gacaladxi, ne gudxiña' dxi guidxi gudxigueta xquenda la?, ma guidxi gusaaba ná xaique que ni bichaa ca diidxa' xtini que, laaca zusaaba nacabe ca binni ni gaca xaique ni guri que.